


Jusiñamui uai:
Jusiñamui jito rafue
illa rabenico



New Testament in Huitoto, Murui (PE:hui:Huitoto, Murui)

Jusiñamui uai: Jusiñamui jito rafue illa rabenico
New Testament in Huitoto, Murui (PE:huu:Huitoto, Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 4 Mar 2019 from source files dated 1 Mar 2019
145a1f66-dca1-5de3-9c00-4e533605e488

Contents

MATEO	1
MARCOS	54
LUCAS	86
JUAN	138
HECHOS	175
ROMANOS	218
1 CORINTIOS	237
2 CORINTIOS	260
GÁLATAS	272
EFESIOS	279
FILIPENSES	286
COLOSENSES	291
1 TESALONICENSES	296
2 TESALONCENSES	300
1 TIMOTEO	302
2 TIMOTEO	307
TITO	311
FILEMÓN	313
HEBREOS	314
SANTIAGO	331
1 PEDRO	336
2 PEDRO	342
1 JUAN	345
2 JUAN	350
3 JUAN	351
JUDAS	352
APOCALIPSIS	355

MATEO JESUCRISTO ENIRUEMO ILLA RAFUE CUIAFUE

Jesucristo ie usumatiai
(Lc 3.23-38)

¹ Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. ² Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. ³ Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. ⁴ Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. ⁵ Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isaí micori. ⁶ Isaí micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñona ollena, David micori Urías micorina jobaimemo orede. Jobaimemo naimie fiodailla mei, naiñaiñona ote. ⁷ Salomón micori jitodi Roboam micori. Roboam micori jitodi Abías micori. Abías micori jitodi Asa micori. ⁸ Asa micori jitodi Josafat micori. Josafat micori jitodi Joram micori. Joram micori jitodi Uzías micori. ⁹ Uzías micori jitodi Jotam. Jotam micori jitodi Acáz. Acáz micori jitodi Ezequías micori. ¹⁰ Ezequías micori jitodi Manasés. Manasés micori jitodi Amón. Amón micori jitodi Josías. ¹¹ Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldadaui cai cominina uitimaci. ¹² Naie meinomo Jeconías micori Salatiel micorina comuitate. Salatiel micori jitodi Zorobabel micori. ¹³ Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. ¹⁴ Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. ¹⁵ Eliud micori jitodi Eleazar micori. Eleazar micori jitodi Matán. Matán micori jitodi Jacob micori. ¹⁶ Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

¹⁷ Abraham micori illa facaisemona David micori jeicia facaisemo Jesús ie catorce nanoramaci mameci jai ite. David micori facaisemona Babiloniamoo ite nairai anamo cai jaiagai illa facaisemo catorce nanoramaci mameci jiai ite. Babiloniamoo ite nairai anamo cai jaiagai illa facaisemona Jesús jeicia facaisemo catorce nanoramaci mameci jiai ite.

Jesús jeicia rafue
(Lc 2.1-7)

¹⁸ Jesucristo comuilla rafuena lloiticue. Jesús eidi María. Naiñaiñona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñona uruesitate. ¹⁹ José micori maremie. María jai uruesillana naimie micori fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comecina facajanona, naiñaiñona dotaacade. ²⁰ Naimie micori comecina iemo facaia, naimie micori nicairillanona, naimie micorimo Jusiñamui jaienici bairiano raite:

—José, David micori jito, Maríana jaciruiñeno ono, o aina illena. Jusiñamui Joreño naiñaiñona jai uruesitate. ²¹ Himana jocoite. Ie comini naimaci jeacinomona naimie jilloitajaibilla jira, Jesúsna o jitalle naimie mamecidi —raite. ²² Bie rafue suide, Jusiñamuidi ie lloraima micori jai llotataga uaina suillena. ²³ Jaiie llotatate:

himana uiñoñediñaiño como comuite uruedi.

himana jocoite.

Emanuel ie mameci jitalle.

Bie mameci oni dobañuamona raite: “Jusiñamui cai diga ite”.

²⁴ José micori casidemo, Jusiñamui jaienici lloga uaina finode. Maríana ote, ie aina illena; ²⁵ iadedi nai jitona naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jitade naimie mamecina Jesúna.

2

Monamo ite ramo comeciaina facauidino rafue

¹ Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeciaina facauidino naie facaiseconi Jerusalémo jitoma billafo dinena bitimaci. Jerusalémo itinomo jicanotimaci:

² —¿Ninomo como jeiciga omoi judúuai illaimadi? Jitoma bisoillafomo como bairede ucuduna ciodicai. Naiemona naimie jeicana jai uiñoticaí. Naimiemo iobillacinona fecallena biticaí.

³ Herodes micoridi naicinona cacajanona, ie comeci jarire ite. Jiaimie naimie meifomo illana jitaiñede. Jerusalémo itinodi jiai jarire itimaci. ⁴ Ie facaise Herodes micori judúuai illacomina uaiduanona, naimacimo Cristo raillamie jeicana jicanote. ⁵ Uai otimaci:

—Judea railla eniruemo. Belémo. Iena Jusiñamui facaina micoridi jai euega:

⁶ Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illacomini baifemo faite

euega. ⁷ Iena cacaja mei, Herodes micoridi monamo ite ramo comeciaina facauidino bainino uaidote. Naie ucudu bairia facaise raise uiñollena jicanote. ⁸ Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillesa. Naimiemo iobillacinona jiai feaacadicue —llote.

—Jii —fairiotimaci. ⁹⁻¹⁰ Iena naimie micori llua mei, jaidimaci. Ucuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. ¹¹ Fo jaillano uruena, ie ei María diga, ciodicimaci. Naimiemo iobillacinona fecallena, caiñici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiai fecadimaci. ¹² Naimaci inia anamo naimaci nicairillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

Egiptomo Jesús jailla rafue

¹³ Naimaci jailla mei, José micori inia anamo nicairite. Nicairillanona, Jusiñamui jaienici naimiemo bairiano raite:

—Egiptomo nai o urue diga, ie ei diga, mai jai. Omo cue llua dinori nainomo i. O abido billirui lloiticue. Herodedi nai uruena jenoite, naimiena meinellena —raite.

¹⁴ José micori raire casillano, nai urue diga, Jesús ei diga, Egiptomo naiona jaide. ¹⁵ Herodes micori fiódaille dinori nainomo ite. Ie muidona Jusiñamui ie facaina lloraima micori llotataga uai jai suide. Jaie lloga: “Egiptomona cue Jitona jai uaidoticue”.

Mena años itisaiai dierisedena faia rafue

¹⁶ Egiptomo Jesús jaillana Herodes micori fidiñede. Monamo ite ramo comeciaina facauidino naimaci eniruemo abido jaillana naimie micori jiai fidiñede. Naimie micori dine naimaci abido biñena jira, naimie micorina naimaci jifua jira, naimie micori eo icirite. Ie jira mena años itisaiai dierisedena faetate. Nana Belémo ite itisaiai diese faetate. Belén ecimo itino uruiaina jiai faetate. Naie ucudu mena años jaie nano bairena jira, mena años itisaiai dierisedena faetate. ¹⁷ Raquel micori jaie eia isoi, Belén itino birui eedimaci. Jeremías micori iena jaie euega:

¹⁸ Ramá railla nairai dinena Raquel micori eo eiana cacadicue.

Cai usuño Raquel micori eede.

Naiñaiño micori uruiái micoriai facaina eede.

Jiaie cominimona firaduacinona jitaiñede, naiñaiño uruiái micoriai jai fiódalla jira.

¹⁹ Digarui illanona, Herodes micori fiodailla mei, Egiptomo José micori dane nicairillanona, Jusiñamui jaienici naimiemo bairede. ²⁰ Llote:

—O comini eniruemo na o urue diga, ie ei diga, abido mai jai. Nai o uruena meineiacadimie jai fiodaite.

²¹ Ie jira ie eniruemo naie urue diga, ie ei diga, abido jaide. ²² Herodes micori jitodi ie moo ifomo jai illana José micori fidiano, jaciruite. Herodes micori jito mamecidi Arquelao. Nainomo José jaiacaiñede. José micori dane nicairillanona, Jusiñamuidi Galilea railla eniruemo naimie jaillena naimiemo llote. ²³ Nazaret railla nairai dine jaide, nainomo illena. Iemona Jusiñamui facaina lloraini micoriai jaie cuegafuiai jai suide. Cristona jaie cuetimaci: “Naimiedi Nazaret imie”.

3

Jofue iñenanomo Juan Bautista micori illa rafue

(Mr 1.1-8; Lc 3.1-9, 15-17; Jn 1.19-28)

¹ Diga años illanona, Juan Bautista raillamie micoridi jofue iñenanomo illanona, cominina dafafia, Jusiñamui rafuena naimacina llofueuide. ² Comini naimie micori dine billanona, naimacimo llote:

—Omoi jeacinona fainonocaida, omoi comeciai iuailai meido. Jusiñamui dibeimo omoi i. Naimie anamo omoi illana naimie jitailla jira, omoimo iena lloiticue —llote.

³ Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite. ⁴ Juan micoridi camello itiraii ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. ⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fueмона jai jaisoidimaci.

⁶ Jusiñamuimo naimaci jeacinona naimaci llua meino, naimacidi Juan micori bautizaga.

⁷ Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isoidomoi. ¿Niese Jusiñamui riicaillifueмона jilloitomoi? Cue dine omoi billena, ¿bu omoimo llua? ⁸ Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticaí. Ie mei omoi bautizallomoi. ⁹ Omoi comeciaina facañeno: “¿Bue ñellena o llua isoi finoiticaí?

Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifueмона jilloiticaí”. Ero, omoimo lloiticue: Cue llua isoi omoi finoñenia, naimie riicaillifueмона jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede.

¹⁰ Ero, llisiñede riara tiedomoi. Tiia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoína jai duere finoacade. Ie riicaillafue anamo jai itomoi. Omoi comeciai iuai omoi meidoñenia, omoína duere finoite. ¹¹ Jusiñamui dibeimo omoi comeciai iuai omoi meidoia, jinui diga omoína bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoína duere finoite.

¹² Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailai meidotinona ie moo illanomo naimiedi ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

Jesús bautizaja rafue
(Mr 1.9-11; Lc 3.21-22)

¹³ Juan micori Jordán dine nia ia, Galileamona Jesús bite. Naimiena bautizallena, Juan micori dine bite. ¹⁴ Juan dinena naimiemo llote:

—Bautizallena cuemo bitio; ia dama ite. Cuen a bautizaia, cuemona mare.

¹⁵ Jesús uai ote:

—Cuen mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. ¹⁶ Jesús bautizaja mei, jinuimona bite. Mona bojodena ciode. Jusiñamui Joreño, ucugi isoi, naimie emodomo ana billana ciode.

¹⁷ Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

4

Jesúna Taife ramo faia rafue
(Mr 1.12-13; Lc 4.1-13)

¹ Naie facaise nainomo naimiena ramo Taife faillena, jofue iñenanomo Jusiñamui Joreño Jesúna uite. ² Cuarenta digarui Jesús guiñede. Naie facaise fuilla mei, guiñeno illamona, aimetaite. ³ Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomenicon a jaita”. ⁴ Jesús uai ote:

—Dama ite. O lluaña finoñeiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

⁵ Ie mei Jerusalémo Jusiñamui jofo muidomo Taife Jesúna uite. ⁶ Raite:

—Jusiñamui Jitodiodena, eniruemo mai ana uai. David micori ona jaie cuega: Ona eenollena, Jusiñamuidi ie jaenisaimo lloite.

Eniruemo o uaiñellena, o abi bofedaiñellena, ona feiñoitimaci cuega. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

⁷ Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facañeno”. Naimie cuena raise eenuana jai uiñoticue. Jamai ebena naimiena facañeiticue. O lluaña finoñeiticue.

⁸ Ie mei a ite anedumo Taife naimiena uite, naie anedumona nana nairaiaina cioillena. Naie nairaiái eo ebire eruaide. ⁹ Naimiemo llote:

—Nana bie nairaiái cue anamo birui illamona, cuena o sedaia, nana bie nairaiái omo iiticue. O caiñici ifodo ana rainada, cuemo iobillacino o fecallena.

¹⁰ Jesús uai ote:

—Dama ite. Ona sedañeiticue. Ie cominimo Moisés micori jaie cuega: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai.

¹¹ —Ie facaise naimiemona Taife jaide. Naimie jailla mei, Jusiñamui jaenisaí Jesús dine bitimaci. Naimiena ecallena bitimaci.

Galileamo Jesús illa rafue
(Mr 1.14-15; Lc 4.14-15)

¹² Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide. ¹³ Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jiai ite.

¹⁴ Nainomo Jesús jailla jira, Isaías micori jaie cuegafuiai jai suide. ¹⁵ Naimie micori naie cominina jaie cuega:

Bie eniruemo diga nairai ite.

Zabulón ite. Neftalí ite.

Monailai fuemo nairai ite. Jordán ruicafebeimo nairai ite.

Galileamo nairai jiai ite. Nainomo judúuaiñedino jai itimaci.

¹⁶ Jeacino anamo naimaci illamona, naga naie eniruemo ite comini jitiredinomo itimaci isoidimaci

Jusiñamuina uiñoñoeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñoite. Naie rafuena uitimie bairenite

cuega. Jusiñamuina naimaci uiñoñaena jira, naimacina iese cuega. Jesús nainomo birui llofuia jira, mare rafuena jai cacadimaci. ¹⁷ Galileamo rilla mei, Jesús llocana jaide.

Llofujete:

—Jusiñamui díbeimo illena, omoi jeacinona fainonocaida, omoi comeciái iuaina meido. Ie cominina omoi jaillena birui jitaide.

Ie llofueoicaiganona jaillena, Jesúsdi nagaamagamiena fetua rafue

(Mr 1.16-20; Lc 5.1-11)

¹⁸ Jiairuido Galilea railla jorai fuemo Jesús macaritemo, menamiena ciode. Naga ie ama iaimaiaí. Damie Simón. Jiaici naimie mamecidi Pedro. Ie ama Andrés diga ite. Lloijina fairaíma iaimaiaí. Iese jaca naie iaimaiaídi maijuuidiaímaiaí. ¹⁹ Iaimaiaímo llote:

—Cue diga omico jaiocaillena, cue diga mai bi. Cue llofueganona omico jaillena jitaídícue. Lliciaína birui ocabitomico; iadedi cominina oitomico, cue díbeimo naimaci illena.

²⁰ Iena cacajanona, ieconi iaimaiaí lloijina fainonocaida, naimie diga jaidiaímaiaí. Ie llofueganona jaillena, jaidiaímaiaí. ²¹ Lliai bai Jesús jaidemo, jiaie menamiena ciode. Naga ie ama iaimaiaí. Damie Jacobo. Jiaimie Juan Iaimaiaí moodi Zebedeo. Naimie diga botemo itiaímaiaí. Lloijina sigaidimaci. Jesús iaimaiaína uaidote, naimie llofueganona jaillena. ²² Ieconi iaimaiaí moona fainonocaida, botemona ari billanona, Jesús diga jaidiaímaiaí.

Jesús ailluena cominina llofuia rafue

(Lc 6.17-19)

²³ Nana Galileamo Jesús jaide. Judúuai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui díbeimo naimaci comeciái iuaina meiduana llofujete. Ie cominina naimaci illena llofujete. Naga isoide duicono duidinona jillotate.

²⁴ Iemona nana Siria railla eniruemo naimie mameci soride. Naie comini naga isoide duicono duidinona naimie dine atidimaci. Abi isiredinona atidimaci. Jananiaí anamo illa cominina atidimaci. Naillidinona atidimaci. Niraidanidinona atidimaci. Nana naimacina jillotate. ²⁵ Ailluena comini naimiena racadimaci. Galileamona, Decápolimona, Jerusalémona, Judeamona, Jordán ruica díbeimona comini bitimaci.

5

Anedumo naimie ia, Jesús lloga rafue

(Lc 6.20-23)

¹⁻² Ailluena cominina Jesúsna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raíta, Jesús naimacimo llote:

—Omoína Jusiñamui ie cominina sedaacana rafuena ja llofueitícue. Naimie anamo naimaci illena llofueitícue. ³ Ero, Jusiñamui naimiena jitaídínona sedaite. Comeciaina facadimaci: “Naimie jitaillacinona dani finonidicaí; ia naimie caina canuanona, iena finoiticaí”. Naimie cominina naie isoidino illamona, naimie naimacina canoite. Iemona caimare iitimaci. ⁴ Jusiñamui sunaitinona sedaite. Ailluena comini jeacino finocana jaidimaci. Iena uiñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuiñoitaite. Iemona caimare iitimaci. ⁵ Jusiñamui abina iedoñedinona sedaite. Naimie cominina naie isoidino illamona, Jusiñamui nana eniruemo naimacimo iite. Eniruemo cominina íco cue sedaia, iese iite. Iemona caimare iitimaci. ⁶ Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci. ⁷ Jusiñamui cominina duenaitinona sedaite. Naimacina naimie duenaillamona, Jusiñamui naimacina íco duere finoñeite.

Iemona caimare iitimaci. ⁸ Jusiñamui jeanide comeceiredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci. ⁹ Jusiñamui naimie diga uri itinona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mamecirenitimaci. Iemona caimare iitimaci. ¹⁰ Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaiatimaci. Iemona caimare iitimaci. ¹¹ Cuemo omoi duia, duere sefuitomoi. Jiaie comini omoina jeare ñaitimaci. Omoina duere finoitimaci. Omoi joreñona tainona lloitimaci. Duere sefuitomoi; iadedi Jusiñamui omoina caimare itataite. ¹² Omoi isoi omoi jaiagaimona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefua, iocire omoi jai.

Jesús comini illa rafue
(Mr 9.50; Lc 14.34-35)

¹³ Jesús llote:

—Jusiñamui ie cominina sedaacalle rafue nia llofueiticue. Llicisi rifaia, jai maraiñede. Iena rifaiñellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini maraiñede rafuena eo finoñedimaci. Sal ie caimano jai iñenia, ¿niese dane nibaiamona caimarenite? Jai maraiñede. Jitaiñena jira, iena oni faiga. Ie isoide. Jusiñamui jitailla isoi omoi iñenia, naimie omoina duere finoite.

¹⁴ 'Cuemo omoi duilla jira, jiaie cominina Jusiñamuina omoi uiñotajamona, lligaiñora isoidomoi. Anedumo ite nairai jaca bairedede. Ie illanona jaca uiñoticaí. Jusiñamui jitailla isoi omoi illamona, jiaie comini naimiena uiñoitimaci. ¹⁵ Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligaiñollena. ¹⁶ Ie isoide. Cue rafuena jamaiñeno; iadedi omoi marena illamona, cominina Jusiñamuina uiñota. Omoi marena illamona, comini omoi mare finoca rafuena uiñoitimaci. Iemona: "Jusiñamui maremiena" raitimaci.

Jesúdi Moisés micorina llofua rafue

¹⁷ Jesús llote:

—Jusiñamui ie cominina sedaacalle rafue nia llofueiticue. Iena cue llofua jira, omoimona damierie comecina facade: "Bimie Moisés micori lloga rafuedo jaiñede". Ero: "Moisés micori llogacinuai maraiñede" raiñedicue. "Jusiñamui facaina lloraini micoriai jaie llogacinuai maraiñede" jiai raiñedicue; iadedi omoina naie llogacinaina raise uiñotaacaducue. ¹⁸ Biemo omoi comeciaina faca. Mona, enirue diga, nia ia, nana naie llogacinuai jaca suite. ¹⁹ Omoi einamací raitimaci: "Dajerie llogacino jiaie llogacino baifemo faite". Cue raiticue: Naga llogacino omoi iñoñenia, naga omoi llofueñenia, nana Jusiñamui jitaillacinona finoñedomoi. ²⁰ Ero, Jusiñamui jitailla rafuedo judfuaí illaicomini baifemo omoi jaiñenia, Jusiñamui sedajanomo jaca iñeitomoi. Naimaci naie jaie llogacinuai uiñotimaci; iadedi naimaci comeciái Jusiñamui díbeimo iñedimaci.

Jusúdi iciriñena llofua rafue
(Lc 12.57-59)

²¹ Jesús llote:

—Omoi llofuerainimona bie jai cacadomoi. Moisés micori omoi jaiagaimo llote: "Comena meineñeno. Comena bu meineia, jeacino jai finode. Naimie fiodaillena juez llua". ²² Naie llogacinodo jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefuillena, juez dine naimie uiga. Jiaimiena bu jeare ñaia, jeacino jai finode. Naimie duere sefuillena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaite.

²³⁻²⁴ 'Jerusalémo Jusiñamui jofomo omoi jeacino facaina naimiemo ra fecallena omoi jaja, omoi comini diga uri nano i. Jiaimie omoi diga icirillana omoi uibiñoia, omoi ra

fainonocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

²⁵ 'Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaita. ²⁶ Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitañeno. Jeacino finoñellena, jiaimie diga iciriñeno.

Jesúdi iima ie aiñede riño diga illa llua rafue

²⁷ Jesús llote:

—Omoi llofuerainimona bie jai cacadomoi. Moisés micori jaie llote: “Omoi aiñede riñoniai diga iñeno. Omoi iniñede iñiaai diga iñeno”. “Iena bu finoia, jeacino jai finode” raitomoi. ²⁸ Jiaie rafue birui lloiticue. Ie aiñede riñomo eruailamona naiñaiño bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode. ²⁹⁻³⁰ Biena ñaiticue. Nie isoide rafue omoina jeacino finotaia, iemo eruaiñeno. Iena llinoñeno. Iemo comecina facañeno. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi iima ie aina dotaja llua rafue

(Mt 19.9; Mr 10.11-12; Lc 16.18)

³¹ Jesús llote:

—Omoi llofuerainimona bie jai cacadomoi. Moisés micori jaie llote: “Ie aina bu dotaacania, naiñaiño dotajacanabena fecaja”. Iedo jai jaicabidomoi. Iena bu finoia, omoimona mare. ³² Jiaie rafue birui lloiticue. Jiaimie diga naiñaiño iñenia, ie aina bu dotajia, maraiñede. Jiairuido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñona ie aina illena bu ua mei, naimiedi jeacinona jai finode. Jeacino finoñellena, aina dotañeno.

Jesúdi Jusiñamui mameci jamai ebena llinoñenana llua rafue

³³⁻³⁵ Jesús llote:

—Omoi llofuerainimona bie jai cacadomoi. Moisés micori omoi jaiagaimo llote: “Taino lloñeno; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi llinoñenia, omoi lloga uai omoi finoñenia, omoimona mare. “Jusiñamui caina duere finoñeite” raitomoi. Iemona monamo ite ra mamecina jamai ebena llinotomoi. Eniruemo ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogí mamecina jamai ebena jiai llinotomoi. Jusiñamui mamecina jamai ebena llinoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jiai llinotomoi, nainomo ie illano illa jira. Eniruemo ite ra mameci omoi llinoia, iena Jusiñamui finua jira, iena naimie sedaja jira, naimie mamecina jiai llinotomoi. Jerusalén railla nairai mamecina omoi llinoia, Jerusalén naimie nairaina jira, naimie mamecina jiai llinotomoi. ³⁶ Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogí mameci jiai llinoñeno. Dama Jusiñamui iena usere itataja jira, dama naimie iena jitire itataja jira, ifotirai mamecina omoi llinoia, Jusiñamui mamecina jiai llinotomoi. ³⁷ Ie jira Jusiñamui mameci jamai ebena llinoñeno. Jiaie ra mameci jamai ebena llinoñeno; iadedi nie isoide rafuena omoi finoia, omoi lloga uaina taino lloñeno fino. Uanaicinona jaca llono. Uanaicinona omoi lloñenia, Taifemona omoi uaina otomoi.

Jesúdi iba oñenana llofuia rafue
(Lc 6.29-30)

³⁸ Jesús llote:

—Omoí llofuerañimona bie jai cacadomoi. Moisés micorí jaie llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua”. Iedo birui jai jaicabidomoi; ³⁹ iadedi birui omoimo lloticue: Ibana oñeno. Maraiñede rafue finodimemona omoi abina riidoñeno. Omoi cacaina naimie dutaia, naimie diga iciriñeno. Enefebeimo omoi uieco dobaiño, enefebei omoína naimie dutallesa. Naimie omoína duere finoia, ibana oñeno. ⁴⁰ Omoi iniroi bairollena omoína bu llogidoia, juez nia omoimo lloñenia, naimie jitaila iniroi baiñemo naimiemo feca. ⁴¹ Daje kilómetro naimaci raruaia omoína uillana illaicomini ocua, iena uiño. Nibai omoi comeci jitaiñede; ia naimacina canollena, iena mena kilómetros uiño. Naimaci ocuilla baiñemo uiño. ⁴² Omoimo ite rana bu jicaia, iena caidiñeno. Omoi rana bu jamai jicuaño uia, abido atillena, iena caidiñeno feca.

Jesúdi omoína gaiñenano isiruillena llua rafue
(Lc 6.27-28, 32-36)

⁴³ Jesús llote:

—Omoi llofuerañimona bie jai cacadomoi. Llotimaci: “Omoi cominina isirui; iadedi omoi nairaiñedinona enoi”. Iedo jai jaicabidomoi. ⁴⁴ Omoimo birui lloticue: Omoi nairaiñedinona isirui. Omoi gaiñenanona isirui. Omoína duere finodino facaina Jusiñamuimo jii. Naimaci comeciai iuai meiduana naimiemo jicano. ⁴⁵ Jusiñamui cominina omoi illamona, naimaci facaina jii. Ero, Jusiñamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jiai lligaiñotade. Maraiñedino dine noci deitate. Mareuidino dine jiai noci deitate. ⁴⁶ Naimie comini omoi illamona, nana comini daje isoi isirui. Omoína isiruitinona omoi isirua, mare; iadedi omoína gaiñenanona omoi isiruiñenia, Jusiñamui omoína: “Mare” raiñeite. Maraiñede finoraini naimacina isiruitinona isiruitimaci. Nana cominina omoi isiruiñenia, maraiñede finoraini baiñemo faiñedomoi. Naimaci isoi itomoi. ⁴⁷ Dani omoi cominina omoi uaidoia, mare; ia omoína gaiñenanona omoi uaidoñenia, naimaci baiñemo faiñedomoi. Jusiñamuina inoñedino baiñemo faiñedomoi. Naimaci isoi itomoi. ⁴⁸ Iena omoi uiñuamona, omoi Moo Jusiñamui finua isoi, mare rafuena finocana omoi jai.

6

Jesúdi mare rafue finuana llua rafue

¹ Jesús llote:

—Omoína nia llofueiticue. Jiaie comini iena cioillena, mare rafuena omoi finoiadedi, omoína: “Mareuidinodimaci” naimaci raillena, Jusiñamuimona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue. ² Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusiñamuimona ico feiñoñeitimaci. ³ Dueredinomo rana omoi fecaia, jiaie cominimo iena lloñeno. ⁴ Iena bainino feca. Bainino iena omoi fecaia, Jusiñamui iena uiñote. Naimiemona ibana feiñoitomoi. Omoína: “Mare” raite.

Jesús Jusiñamuimo jii rafue
(Lc 11.2-4)

⁵ Jesús llote:

—Jusiñamuimo omoi jiiia, maredinona abi caitadino isoi omoi iñeno. Ofiracomo naimacina comini cioillena, marefodo jiidimaci. Jiacabilla facaiseconi naisomo naimaci ia, naimacina comini cioillena, marefodo jiai jiidimaci. Naimacina: “Jusiñamuina eo

sedadimaci” comini raillana jitaidimaci. Cominimona iobillacinona birui jai feiñotimaci. ⁶ Omoi jiiacania, omoi jofomo fo jai. Nainomo Jusiñamuimo anado omoi jii. Iena Jusiñamui uiñuamona, omoi jicaca rafue naimiemona feiñoitomoi.

⁷ Jusiñamuimo omoi jiiia, naimiena iinoñedino isoi jamaicinona ñaiñeno. Naimaci comecina facadimaci: “Daje jiiiracinona diga icaiño cai jiiia jira, ja muidomo cai Moo caína raise cacaité”. ⁸ Naimaci isoi iñeno. Nia omoi jicañenia, naimie omoi jitaille rafuena uiñote. ⁹ Naimiemo omoi jiiacania, iese jii:

Ore Moo, monamo itio.

Comini ori iobidesa.

¹⁰ O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

¹¹ Nagarui guille caimo itata.

¹² Caína jeare jiaíno finoa, iena caimona feilla isoi, cai jeacinona omona feilla jira, cai jeacinona oni dota.

¹³ Caimo ramo bu faia, caína cano, iena cai iinoi raillano. Jeacinona finuamona caína jillota.

Iese omoi jii. ¹⁴ Omoína jiaie comini jeare finoa, iena omoi feitaia, omoi monamo ite Moo omoi jeacinona iena feitajanona, jiaí oni dotaite; ¹⁵ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesús guiñenaruina llua rafue

¹⁶ Jesús llote:

—Omoína nia llofueiticue. Raitomoi: “Jusiñamuina eo raise cai sedajanona, birui cai guiñeiticai. Iemona naimie caína eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uiñollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci. ¹⁷ Ero, naimaci isoi omoi iñeno; iadedi omoi guiñenarui ia, omoi abiaí raise fino. ¹⁸ Iemei cominidi omoi guiñenarui illana uiñoñeitimaci. Naimacimona iobillacinona feiñoñeitomoi. Dama Jusiñamui iena uiñoite. Bainino omoi finoca rafue naimie uiñua jira, naimiemona iba feiñoitomoi.

Jesúdi Jusiñamuimo comecina facaja rafue

(Lc 12.33-34)

¹⁹ Jesús llote:

—Omoi jofomo ailluena rana eenocana uiñeno. Giireco iena guicabite. Dajerie ra nemuide. Omoi jofomona jiaie comini iena fiicadimaci. Ailluena ra eenuamo omoi comeciaina facañeno; ²⁰ iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Giirecuaimona, nemuillamona, fiirirainimona, iena nainomo faifiñeitomoi. ²¹ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoa, naimiemo comeciaina facadomoi.

Jesús cai comecina llua rafue

(Lc 11.34-36)

²²⁻²³ Jesús llote:

—Cai uisi diga rana ciodicai. Cai uisi maraiñenia, rana raise cioiñedicai. Ie isoide. Cai comeci maraiñenia, maraiñedicinona finocana jaidicai. Jusiñamuina uiñoñedicai. Ie rafuena jiaí uiñoñedicai. Naimiena nabaiñedicai.

Jesús raruiaína llua rafue

(Lc 16.13)

²⁴ Jesús llote:

—Mena patrones diga daruido buna jaca maijinide. Mena diga bu maijiacania, damiena jiaimie baifemo gaiite. Ie gaiamie ocuica rana finoite. Jiaimie ocuica rana raise

finoñeite. Ie isoide. Raruai ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi Jusiñamui cai sedajana llua rafue
(Lc 12.22-31)

²⁵ Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite. ²⁶ Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoína canoite. ²⁷ Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoína a sairitarede. ²⁸ ¿Bue ñellena iniroimo jarire comecina facadomoi? Safiamo omoi comecina faca. ¿Niese sicodimaci? Maijiñedimaci. Iniroina tiforiñedimaci; ²⁹ iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. ³⁰ Jusiñamui safiana ebiretacabide. Dallu facaise illanona, safiadi duide. Safia baifemo omoi ualla jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ñno. ³¹ Omoi comeci jarire finoñeno. “¿Buena guiticaí? ¿Buena jítaiticaí?” raiñeno. Iemo comeciaina eo facañeno. ³² Jusinamuina ñnoñedino iemo comecina facacabidimaci. Nana omoi jitaillacinona omoi Moodi uiñua jira, naimaci isoi iñeno. ³³ Jusiñamui anamo raise omoi i. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite. ³⁴ Jusiñamui omoi birui jitailla ra omoimo iite. Iena uiñuamona, jiairuido suille rafuemo jarire comecina facañeno. Ico omoi jitailla ra omoimo jiai iite.

7

Jesúdi jiaie cominina mameriñenana llua rafue
(Lc 6.37-38, 41-42)

¹ Jesús llote:

—Omoína nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoína duere finoite. ² Jiaie cominina omoi mamerilla diese Jusiñamui omoína duere finoite. ³ Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoimo ailluena ite maraiñedicinomo nano omoi comecina faca. ⁴ Omoimo maraiñedicino illamona, ¿niese omoi ecimo itimiema mameritomoi? ⁵ Omoimo ite maraiñedicinomo omoi comecina facacaiñena jira, maredinona abi caitadinodomoi. Omoi comeciaina nano raise fino. Iemei omoi ecimo itimiema canorenitomoi. Naimie comecina raise canorenitomoi.

⁶ 'Ero, eo mare rana omoi jiconiaimo fecañeno. Eo raifide rana omoi chanchuaimo fecañeno. Naimacimo omoi fecaiadedi, iena feiñoñeitimaci. Omoína gaiñenamona, jiconiai omoína ainitimaci. Chanchuai iena jamaillamona, iena saitaitimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoi llocabia, omoína duere finoitimaci. Omoi rafuena jamaitimaci.

Jesúdi cai jitailla ra jicaja llua rafue
(Lc 6.31; 11.9-13)

⁷⁻⁸ Jesús llote:

—Daje ra omoi faifia, iena jenodomoi. Raise jenoia, iena baitomoi. Damiena omoi jenoia, naimie illanomo jaidomoi. Nainomo naimiena baillamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie

cacajamona, omoimo iite. ⁹ Ero, omoimona naimiemo llomeniconna ie moomo ie jito jicaia, noficina fecañede. ¹⁰ Lliciaina jicaia, jaiona fecañede. ¹¹ Jeacinona finocabidomoi; iadedi mare ra omoi uruiaimo fecacabillana uiñotomoi. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecaite.

¹² Jusiñamui jitaillacinona omoi finuamona, jiaie cominina marena fino. Jiaie comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. Moisés micori ie isoidicinona jaie llofuate. Jusiñamui facaina lloraini micoriai ie isoidicinona jaie jiai llofuetimaci.

Jesúdi Jusiñamui dine rille llua rafue

(Lc 13.24)

¹³⁻¹⁴ Jesús llote:

—Jusiñamui dine omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca iitimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jiai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

Jesúdi abi caitadinomona abi rairuillana llua rafue

(Lc 6.43-44)

¹⁵ Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoina jifueiacadimaci. Naimaci llofuiacinodo omoi jaia, Jusiñamui rafuedo raise jaiñeitomoi. ¹⁶ Naimaci lloga rafuemonna naimaci Jusiñamui llorainiñenana uiñoitomoi. Ero, eecuaimona uvas railla riera oñega. Eecuaimona higos railla riera jiai oñega. ¹⁷ Mare riaramonna mare llisilla comuide. Maraiñede riaramonna maraiñede llisilla comuide. ¹⁸ Mare riaramonna maraiñede llisilla comuiñede. Maraiñede riaramonna mare llisilla comuiñede. ¹⁹ Mare llisilla comuitañena jira, naga maraiñede riera jaitaca, iena jobaillena. ²⁰ Ie isoide. Naimaci finoca rafuemonna nie isoide lloraini naimacina uiñoitomoi. Jusiñamui llorainidena uiñoitomoi. Jusiñamui lloraiñedinodena uiñoitomoi. Naimaci maraiñena jira, Jusinamui naimacina duere finoite.

Jesúdi ie Moo ie comini sedajanomo ille llua rafue

(Lc 13.25-27)

²¹ Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitailla rafue finodimiedi nainomo iite. ²² Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamonna, o rafuena llocabiticaí. O uaido jananiaina oni oredicaí. O uai diga siño rafuena finodicaí” lloitimaci. ²³ Uai oiticue: “Omoina uiñoñedicue. Cue cominiñedomoi. Jeacino omoi comecimo nia illa jira, cuemonna oni omoi jai. Cue Moo ie comini sedajanomo jaca iñeitomoi”.

Jesúdi naimiema inuana ñaia rafue

(Lc 6.47-49; Mr 1.22)

²⁴ Jesús llote:

—Cue lluana cacadomoi; iadedi omoimona nana inoñedomoi. Cue lluana innotimiedi abi uiñotimie. Jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. ²⁵ Noci deidemo, eo jinuidemo, jofomo ille toia, aifi bitemo, jofo raise finua jira, jofo goiñede. Iena faifiñede. Ie isoide. Cue lluana innotimie faifiñeite. ²⁶ Cue lluana innoñedimiedi abi uiñoñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana rañede. ²⁷ Noci deidemo, eo jinuidemo, jofomo ille toia, aifi bitemo,

jofu goillamona, jai eo judaisite. Iena faifide. Ie isoide. Cue llwana iinoñedimie faifite —llote.

²⁸⁻²⁹ Moisés micori rafue uiñoraini isoi naimie llofueñena jira, illaimamo ite uai itimie isoi naimie llofuia jira, nainomo ite cominidi naimie lluari rajicaidimaci.

8

Jesúdi efonaitimiena jillotaja rafue

(*Mr 1.40-45; Lc 5.12-16*)

¹ Naimie llofuia mei, anedumona Jesús ie llofueoicaigano diga ana bite. Ailluena comini naimiena racadimaci. ² Efonaitimie naimie dine billanona, naimiena raise uaiduamona, caiñici ifodo ana rainadate. Raite:

—Maestro, o jitaiededi, cuena jillotaredio.

³ Jesús ie onolli naimiemo oni ñuitajanona, naimiena jetade. Raite:

—Ona jillotaiacadie. Mai o jillo. —Ieconí naimie jillode. ⁴ Jesús naimiemo llote:

—O jilluana bumo lloñeno; iadedi Jerusalémo, Jusiñamui jofomo, Jusiñamui diga ñairaíma dine mai jai. O jilluana comini raise uiñollena, naimiemo o abina acatajai. Moisés micori jaié lloga rana Jusiñamuimo feca. —Iemei Jesús oni jaié.

Jesúdi capitán mullaímana jillotaja rafue

(*Lc 7.1-10*)

⁵ Capernaum railla nairaímo Jesús ria, capitán raillamie naimie dine bite. Naie capitán Roma railla nairaí imie. Judúñedimie. Billanona, duere llote:

⁶ —Maestro, cuena cano. Cue jofomo cue mullaíma ite. Ie abina niraídanide. Naimie abi eo isirede. Naimiena jillota.

⁷ Jesús uai ote:

—Naimie dine jaiticue, naimiena cue jilloitallena.

⁸ Naie capitán dane llote:

—Jaiñeno. Jamai bue isoidicue. Iemo, ¿niese cue jofomo biitio? O uaido bene lluanona cue mullaíma jilloite. ⁹ Jiaie illaicomini anamo iticue. Naimaci lloga uaina iñoticue. Cue anamo jiaie soldaduái illanona, cue uaina iñotimaci. Cue anamo cue mullaíma illa jira, naimiedi cue uaina iñote. O anamo naie duico illa jira, o uaina o lloia, cue mullaíma jilloite.

¹⁰ Iena cacajanona, Jesús rajicaide. Naimie diga jaidinomo llote:

—Bie isoi cue uaina iñotimiena jaca baiñedicue. Cai judúuai cominimona biesedimiena jaca iñede. ¹¹ Ero, Jusiñamui ie cominina sedajanomo naimaci illena, diga judúuaiñedino cue llua uaina iñotimaci. Naga nairaíaimona iñotimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judúuaiñedino iitimaci. Nainomo caimare nabaitimaci. ¹² Ailluena judúuaiñedino iñotimaci. Jusiñamui ie cominina sedajanomo duillanodi omoi judúuai. Naimiena omoi iñoñena jira, omoi ona oni dotaite. Dotaja mei, eo duere sefuillamona eitomoi.

¹³ Capitámo Jesús llote:

—Mai jai. Cue uai siñonana o iñnua jira, o jitailla rafue omo jai suide. —Ieconí naimie mullaíma jillode.

Jesús Pedro jifaiñoa jillotaja rafue

(*Mr 1.29-31; Lc 4.38-39*)

¹⁴ Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride. ¹⁵ Naiñaiño dine jaillanona, naiñaiñoa jetade. Jetajamona ieconí naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(*Mr 1.32-34; Lc 4.40-41*)

¹⁶ Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. ¹⁷ Naimacina Jesús jillotajamona, Isaías micori jaie ciegafuiaie iese jai suide. Naimie micori jaie cuega: “Caina jilloitajanona, cai duicono oni oretaite”.

Jesús ie llofuegamiena damie jaillana ie rafue
(Lc 9.57-62)

¹⁸ Ailluena comini naimie ecimo illana Jesús ciuanona, ie llofueoicaiganomo ruica dine jaillena lloste. ¹⁹ Ieconí Moisés micori rafue llofueraima naimie dine billanona, lloste:

—Maestro, o jaillinomo o diga jaiacadie. O llofuegamiena jaiacadie.

²⁰ Jesús uai ote:

—Janorede ocainaiadi joforedimaci. Silliñiai jillainiairedimaci; iadedi jofonidie. Monamona billanona, imana jaidie; iadedi buenidie. Jofonidie. Cue diga o jaiacania, bue isoidena cuemona oñeitio. Iemo o comequina raise faca.

²¹ Ie facaise jiaie llofuegamie Jesúmo lloste:

—O diga jaitie; ia cue moo nia fioidañena jira, o diga nia jaiñeitie.

²² Jesús naimie uai ote:

—Cue diga idai mai bi. Cueno inoñedinodi o moona canoredimaci. Naimie fioidaia, naimiena naimaci raille. Cue rafue jiaie rafue baifemo faite. Cue diga mai bi.

Jesúdi joraina llicaitaja rafue
(Mr 4.35-41; Lc 8.22-25)

²³ Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci. ²⁴ Botemo jailla mei, Jesús inide. Bai jorai motomo jaidimacimo, eo riire aifi billamona, joradi eo bagode. Baguamona botemo jinui a uaide. Bote oruiacana jira, ²⁵ jaciruillamona, Jesúsna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

²⁶ Jesús uai ote:

—¿Bue ñellena jacinaitomoi? Cueno raise inoñedomoi. Jacinaiño.

Iemei Jesús naidacaillano, aifina lletade. Joraina jiai llicaitade. Ieconí llicaitade. Bagoñede. ²⁷ Naimie llofueoicaigano iemona rajicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

Jesúdi Gadara railla eniruemo illa rafue
(Mr 5.1-20; Lc 8.26-39)

²⁸ Ruica dine naimaci ridemo, Gadara railla eniruemo sijidimaci. Ieconí menamie Jesús dine bitiaimaiai. Jananiai anamo ite iaimaiai. Comini raioillanomo nofie moto ifuaimona bitiaimaiai. Nai iaimaiai eo riirena jira, jaca bu nainomo jainide. ²⁹ Jesúsna iaimaiai ciua facaise jananiai iaimaiaina cuirioitate:

—Jusiñamui Jitodio. ¿Niese cocona nibaicadio? Coco duere sefuille facaise nia inede; iadedi birui cocona duere finuaibidio —cuirioidiaimaiai.

³⁰ Naie bai iaire ailluena chanchuai guillano itimaci. ³¹ Jananiai Jesúmo duere llotimaci:

—Oni caina o oretajanona, chanchuai abimo caina oreta.

³² Jesús uai ote:

—Mai jai.

Ieconí nai iaimaiaimona jananiai oni jaillanona, chanchuai abimo jaide. Iemona iconiaido chanchuai joraimo aisicana jaillanona, corobaiside.

³³ Iena ciuanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaiai rafuena llotimaci. ³⁴ Ie jira ailluena comini Jesús dine bitimaci. Naimiena ciuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

9

Jesús tísítáitímiena jillotaja rafue

(Mr 2.1-12; Lc 5.17-26)

¹ Botemo ie llofueoicaigano díga Jesús jaillano, ruica díne abído jaide. Capernaumo ie illanomo ride. ² Nainomo rilla mei, naimie díne comíni ie bíiramo bíide tísítáitímiena atide. Naimiena atidínodi Jesús naimiena jillotajana ínote. Iena Jesús uíñuanona, tísítáitímiemo llote:

—Moo, o comecína ocuíño. O jeacino cue feitaja jira, iena jai oni dotadícue. Ie facai íbana jai oñeíticue.

³ Jesús díne ofidínomona dajerie Moisés micorí llogacínona llofueraini ítimaci. Jesús lluana naimaci cacajano, Moisés micorí llogacínona llofueraini comecína facadímaci: “Dama Jusiñamui jeacínona dotarede. Bimie Jusiñamuiñede; ia Jusiñamui ífomo iacade. Jusiñamuina jai jeare ñaite”. ⁴ Naimaci comeciána facajacínona Jesús uíñuamona, Jesús díne jicanote:

—¿Bue ñellena omoi comecína jeare facadomoi? ⁵ Bimiemo: “O jeacínona jai oni dotadícue” cue lloia, cue uai síñonana uíñoñeitomoi; ia bimiemo: “Mai naidacaillanona macari” cue lloia, cue uai síñonana uíñoítomoi. ⁶ Monamona jaie cue billanona, íimana jaidícue. Ie jira jeacino oni dotaja uai cuemo ite. Iena omoi uíñollena, tísítáitímiemo lloíticue: “Mai naidacai. O bíira ferianona, o jofomo mai jai”.

⁷ Iese naimie raillamona, tísítáitímie jillode. Naidacaida, ie jofomo jaide. ⁸ Comíni iena cíuanona, jacínaitímaci. Bimiemo ie uaina Jusiñamui fecajana naimaci uíñuamona, Jusiñamuimo íobillacínona fecadímaci.

Jesúdi Mateona fetua rafue

(Mr 2.13-17; Lc 5.27-32)

⁹ Jesús baí macaritemo, cuena ucubena oranomo cue raillana cíode. Mateodícue. Gobierno ucube oraímadícue. Jesús cuemo llote:

—Cue llofuegamíena o jaillena, cue díga bi.

Naidacaida, naimie díga jaidícue.

¹⁰ Nailli cue jofomo Jesús ie llofueoicaigano díga guite. Díga gobierno ucube oraíni jíai guisaíbitímaci. Díga Moisés micorí llogacínodo jaiñedíno jíai guisaíbitímaci. ¹¹ Nainomo fariseuai comíni jamai bitímaci. Moisés micorí llogacínodo eo jaidímaci. Jesúsna cíuanona, naimie llofueoicaiganomo jícanotímaci:

—¿Bue ñellena omoi maestro ucube oraíni díga guite? Maraiñede comíni díga naimie guite.

Moisés micorí llogacínodo ucube oraíni raise jaiñenamona, naie ísoidíno díga, fariseuai comíni nabairíñena jira, íese jícanoítímaci.

¹² Iena cacajano, Jesús llote:

—Ecairedínodi médicóna jítaíñedímaci; ia duídínodi médicóna jítaídímaci. Ie ísoide. Mareuídíno cuena jítaíñedímaci; ia maraiñedíno cuena jítaídímaci. ¹³ Jusiñamui facaina lloraíma micorí jaie cueba rafuemo omoi comeciána faca: “Jusiñamui llote: ‘Rana cuemo omoi fecajana jítaídícue; ia comínina omoi dueruillana jíai jítaídícue’ llote”. Comínina cue dueruilla jira, Jusiñamui díbeimo naimaci íllena, mareuídínona ítatajaíbíñedícue; íadedí Jusiñamui díbeimo naimaci íllena, maraiñedínona ítatajaíbitícue. Omoímona maraiñedíno díga nabairíticue; ia naimacína uaíbitícue.

Jesús díne Juan Bautista llofueoicaigano billa rafue

(Mr 2.18-22; Lc 5.33-39)

¹⁴ Naie facaise Juan Bautista llofueoicaiganodí Jesús díne bite. Naimíemo llote:

—Cai einamací llua ísoi, Jusiñamuina cai raise íobíallena, guíñenaruíllai ílla facaísec-óni guíñedícaí. Cai jeacino facaina sunaicabíticai. Fariseuai comíni jíai guíñedímaci; íadedí o llofueoicaigano guítímaci. Cai einamací llogacínodo jaidícaí. ¿Bue ñellena o llofueoicaigano íedo jaiñedímaci?

¹⁵ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitimaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ¹⁶ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi, jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ¹⁷ Jacagomona finoca bolsa como finoca vino joneñega. Jonegadena, mairiñena jira, sirillamona, igoi raire cuararite. Vino faifite. Igoi jiai faifite. Como finoca vino comogomo jonelle. Iemei iena faifiñeite. Ie isoide. Omoi einamacu rafue ifomo jiaie rafue birui ite. Iena omoimo llocabiticue. Iedo jaidicai —llote.

Jesúdi mena duide riñona jillotaja rafue

(Mr 5.21-43; Lc 8.40-56)

¹⁸ Juan Bautista llofueoicaigano diga Jesús llotemo, jiaimie naimie dine bite. Naimiedi judíuai ofiraco sedaraima. Jesúna duere jicanollena, caiñici ifodo rainadacaida llote:

—Cue jisa como fodaite. O onolli naiñaiño o jonellesa, naiñaiño jilloillesa, cue jofomo cue diga mai bi.

¹⁹ Iena cacajano, Jesús naimie diga jaide. Ie llofueoicaigano jiai jaidimaci. ²⁰ Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade. ²¹ “Naimie iniroi cue jetajamona jilloiticue” comecina facajamona, naiñaiño naimie iniroina jetade. ²² Ieconu Jesús dobaidacaida, abido erodatemo, naiñaiñoña ciode. Raite:

—Ñoo, o comecina ocuiño. Cueno o inua jira, jai jillodio.

Ieconu naiñaiño jillode.

²³ Ofiraco sedaraima jofomo Jesús rillano, naie jofo nama jisa jai fiodailla jira, comini merire fillana cacade. Ailluena failliñailana cacade. ²⁴ Jesús dinena raite:

—Jofomona nana omoi jino jaillana jitaicue. Cuenona biñaiño fiodañedesu. Jamai inide.

Iena cacajano, naiñaiño jai fodaite uiñuamona, Jesúri jaisitimaci. ²⁵ Comini jino oretaja mei, naiñaiño onollina naimie llinuano, fiodaillamona naiñaiño jillode. Jillua mei, naiñaiñodi naidacaide. ²⁶ Naie rafue nana naie enirue itinomo llocana jaide.

Jesúdi uisnide iaimaiana jillotaja rafue

²⁷ Ofiraco sedaraima jofomona Jesús bai jaidemo, uisnide iaimaia naimie jinafona jaidiaimaia. Jesúna ado uaidotiaimaia:

—Cai illaima David micori jitodio. Jusiñamuimona o billa jira, cocona duenai.

²⁸ Uai oñeno Jesús Capernaumo jaide. Naimie fo jailla mei, naimie dine bitiaimaia. Iaimaiaimo Jesús jicanote:

—¿Omicono cue jillotajana inotomico?

Fairiotiaimaia:

—Jii.

²⁹ Iaimaia uisina Jesús jetajano raite:

—Cueno omico inua diese jilloitomico.

³⁰ Ieconu iaimaia uisidi ciode. Jesús naie rafuena llua eo janotade.

—Bumo lloñeno —llote; ³¹ iadedi iena llocana jaidiaimaia. Iemona Jesús mameci nana naie eniruemo itinomo soride.

Jesús ñaiñedimiena jillotaja rafue

³² Capernaumona Jesús bai jaidemo, naimie dine Janaba anamo illamiena jiaie comini atidimaci. Janaba anamo naimie illa jira, naimie ñainide. ³³ Jesús Janabana oni orede. Oretaja mei, naie iima ñaite. Nainomo ite comini rajicaillanona raitimaci:

—Cai comini dine bie isoide iima jilluana jaca cioñedicai.

³⁴ Ie jira fariseuai comini dinena raitimaci:

—Taife dibeimo Janaba illamona, Jesúsdi Taife uaido Janabana oni orede —raitimaci.

Jesúdi cominina duenaila rafue

³⁵ Diga nairaiaimo ie llofueoicaigano diga Jesús llocana jaide. Nainomo judúuai ofiracuaimo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciai iuaina meiduana llofueite. Ailluena duidinona jillotate. Naga isoide duicomona jillotate. ³⁶ Naimacina duenaite. Naimaci comeciai iticino oni duiñoitimie iñena jira, naimacina duenaite. Ailluena cominina ciode. Toica llaudaiai isoi ebe isoi jaidimaci. Naimaci comeciai ocuiñonidimaci. Jusiñamui naimacina sedaacana uiñoñedimaci. ³⁷ Naimacina duenailamona, ie llofueoicaiganomo llote:

—Illimo ailluena trigo ia, iena ollena, ailluena maijrainina jitailla. Ie isoide. Ailluena comini ite naimacimo Jusiñamui rafuena cai llollena; iadedi naie rafuena lloraini eo iñedimaci. ³⁸ Ie rafue naimaci llollena, ailluena cominina raire naimie oretallena Jusiñamuimo jicano.

10

Jesúdi ie doce llofueoicaiganona fetua rafue

(Mr 3.13-19; Lc 6.12-16)

¹ Ie doce llofueoicaiganona Jesús uaiduanona, naimacimo ie uai iñonocaide, jananiai anamona cominina jilloitallena. Duiconona oni oretallena, iena jiai iñonocaide. ² Ie llofueoicaiganodi iese mameciredimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaimaiai Zebedeo jito iaimaiai. ³ Felipe. Bartolomé. Tomás. Cuenajiai uaidote. Mateodicue. Gobierno ucubena oraimadicue. Jiaie Jacobo. Naimiedi Alfeo jito. Tadeo. ⁴ Jiaie Simón. Naimiedi cananista comini facaisemo duide. Judas Iscariote micori. Naimiedi Jesúsna gaitatate.

Jesúdi ie llofueoicaiganona oretaja rafue

(Mr 6.7-13; Lc 9.1-6)

⁵ Jesús ie llofueoicaiganona oni oretajanona, raite:

—Judúuaiñedino dine jaiñeno. Samaritano railla comini dine jaiñeno; ⁶ ia cai judúuai comini dine jai. Naimacimona ailluena comini Jusiñamui rafuena nia iñoñedimaci. Faificana nia jaidimaci. ⁷ Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai iuaina meido”. ⁸ Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno. ⁹ Ucubena uiñeno. Guille ifo meidollena, rana uiñeno. ¹⁰ Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi riidollena, jiguidana uiñeno. Jiaie cominina omoi canua isoi, omoina naimaci canua. Naimacimona omoi jitailla rana omoi ono. Ie jira ailluena rana uiñeno. ¹¹ Nie nairaimo omoi ria, omoi rafuena jitaidimiena jeno, naimie jofomo omoi illena. Naie jofomo omoi i, naie nairaimo omoi ille dinori. ¹² Naie jofomo omoi rillanona, naie cominina marena uaido. ¹³ Omoina naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitañenia: “Jusiñamui omoina canoite” naimacimo lloñeno. ¹⁴ Omoina bu feiñoiacañenia, omoi uaina bu cacarefiacañenia, naie nairaimona omoi jaillanona, omoi eilliaimo ite jearacuaina jaidino. Marañede rafuena naimaci finuana naimaci uiñollena, omoi eilliaina jaidino. ¹⁵ Omoimo uanaicinona lloticue. Omoina naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoina comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

Jesús duere sefuilli fuena llua rafue

¹⁶ Jesús ie llofueoicaiganomo nia llote:

—Naimacina janallari fañellena, naimaci duere sefuiñellena, toica llaudaiai raise sedajana jitaídímaci. Ie isoide. Eo maraiñede comini motomo omoína oretaiticue. Omoína duere finoacanitímaci. Raise sedajana jitaídomoi. Jaio fioidañellena, aiside. Naimiena bu meineñellena, ie abina eenollena, jaio aiside. Ie isoi omoi abi uiñocana omoi jai. Ucugídi buena jeare finoñede. Ie isoi omoi illa. Jecino finuamona eneno omoi i. ¹⁷ Abina rairui. Dajerie omoína llogídoitímaci. Omoína gaitaja mei, naimaci ofiracomo omoína faitímaci. ¹⁸ Cue rafue omoi llua muidona, omoína gaitajanona, illaicomini dine omoína uitímaci. Omoína llogídoitínomo cue rafuena lloítomoi. Naie illaicominimo iena jiai lloítomoi. ¹⁹ Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uiñoitomoi. ²⁰ Dani omoi comeciái icinodo ñaiñeitomoi; ia Jusiñamui Joreño uaido ñaitomoi. ²¹ Cuena ñnotomoi; ia ailluena cuena ñnoñeitímaci. Cuena omoi ñnua jira, omoína enoitímaci. Iemona dajerie ie amana meinetallena, naimiena llogidoite. Dajerie moodi ie uruena meinetallena, naimiena llogidoite. Dajerie uruiaídi naimaci moona, naimaci eina meinetallena, naimacina llogídoitímaci. ²² Cue muidona ailluena comini omoína enoitímaci; iadedi cue uaina fainonocaiñedimie cue Moo diga monamo ja muidomo jaca iite. Naimiena jillotaiticue. ²³ Cue rafue naimaci jitaíñenamona, omoína nie nairai duere finoia, dinomona cue rafuena llollena, jiaie nairaimo raire jai. Cue rafuena omoi llollena, diga judíuai illanuaimo nia jaitomoi. Nana naie comini nia ñnoñenia, Jusiñamui dinena dane abido biitícue. ²⁴ Ero, ie llofueraíma duere sefuiá, ie llofuegamie daje isoi duere sefuite. Ie eci illamie duere sefuiá, ie mullaíma daje isoi duere sefuite. ²⁵ Ie isoide. Cue cominina omoi jaillamona, cue duere sefuiá, jiai duere sefuitomoi. Taife mameci jiaici llínuanona, “Beelzebúdio” jiaíno cuena raitímaci. Iese cuena naimaci jeare ñaia jira, cue cominina omoi illa jira, omoína jiai jeare ñaitímaci.

Jesúdi jaciruiñeno llofuia rafue

(Lc 12.2-9)

²⁶ Jesús nia llote:

—Cuena ñnoñedino omoína jeare ñaitímaci; ia nana cue rafuena llocana omoi jailla jira, naimacina jaciruiñeno. ²⁷ Omoímo rafuena anado jai llotícue. Iena nana cominimo marefodo llono. Ado llono. ²⁸ Omoi abina meineredímaci; ia omoi joreña meinenidímaci. Omoína naimaci meineia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. ²⁹ Omoína duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitaíñenia, naimacimona daje fioidañede. ³⁰ Ero, niga ifotirai omoímo illana Jusiñamui uiñote. ³¹ Naimiedi omoína sedajana jiai uiñote. Silliñiai baífemo Jusiñamui isiruigaomoi. Omoi duere finoacadinona jaciruiñeno. Jusiñamui jitaíñenia, omoímo jaca buena suiñeite.

Jesús naimiena janoñenana llofuia rafue

(Lc 12.8-9)

³² Ie llofueoicaiganomo Jesús nia llote:

—Cue rafuena omoi llamona, jiaíno omoína duere finoitímaci. Cuena birui omoi janoñenia, nana comini Jusiñamui uicomo ico ia, nainomo omoína janoñeiticue. “Cue cominidomoi” omoína raitícue. ³³ Cuena birui omoi janoia, nana comini Jusiñamui uicomo ico ia, nainomo omoína janoitícue. “Cue cominiñedomoi” omoína raitícue.

Jesús muidona nana comini uri ñnena rafue

(Lc 12.51-53; 14.26-27)

³⁴ Ie llofueoicaiganomo Jesús nia llote:

—Nana cominina uri itatallena enruemo biñedicue. Cuena ñnoñedinodi cuena ñnotinona enoitímaci. Enoillamona cuena ñnotinona duere finoitímaci. ³⁵ Cue lloga rafuena damierie ñnua muidona, ie moo illa díbeimo ie jito ñeite. Ie ei illa díbeimo

naiñaiño jisa iñeite. Ie jifaiño illa ðibeimo naiñaiño mio iñeite. Iese cominina uri itatañedicue. ³⁶ Omoi comini coninina enoitomoi. Iemona duere sefuitomoi. ³⁷ Ero, ie moona cue baifemo bu isirua, ie eina cue baifemo bu isirua, cue jitailla ra naimie finoacaiñena jira, cuemo raise duiñede. Ie uruai cue baifemo bu isirua, cuemo raise duiñede. ³⁸ Cue facaina bu fiolacaiñenia, cuemo raise duiñede. Naimiedi cue comini naimiena lloiacaiñedicue. ³⁹ Cue facaina fiolacaiñedimie ja muidomo faifite. Cue ðiga jaca iñeite; iadedi cue facaina fiolaitimie monamo cue ðiga jaca iite.

Jesús Jusiñamuimona ibana feiñua llua rafue

(Mr 9.41)

⁴⁰ Jesús llote:

—Cue rafuena omoi llocana jaia, ðiga jofuemo riitomoi. Cue cominina omoi illamona, omoina feiñotino cuena jiai feiñotimaci. Omoina bu feiñoia, cuane jiai feiñote. Cuena feiñotimiedi cuena oretatimiena jiai feiñote. ⁴¹ Naimie cue comini illamona, damerie Jusiñamui facaina lloraimana feiñotimaci. Jusiñamui facaina lloraimana bu feiñoia, Jusiñamuimona ibana feiñoite, naie lloraima Jusiñamuimona feiñua isoi. Cue jitaillacinona finodinona bu feiñoia, naimaci Jusiñamuimona feiñua isoi, Jusiñamuimona ibana feiñoite. ⁴² Cue ðibeimo itinona bu janore canoia, Jusiñamuimona ibana feiñoite. Naimacimo nibai jamai jinuina fecade; iadedi naimacina canuamona, Jusiñamuimona ibana feiñoite —llote. Iemei Jesús ie llofueoicaiganona, ie rafuena lllollena, orede.

11

Jesús ðine Juan Bautista micori ie llofueoicaiganona oretaja rafue

(Lc 7.18-35)

¹ Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

² Ie facaiseconi cárcelmo Juan Bautista micori Jesús finoca rafuena fidiano, iena raise uiñollena, Jesús ðine ie llofueoicaiganona orede. ³ Jesús mo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uiñoiacadica. Imieñedi odena, jiaimie billemo nia ocuridica.

⁴ Jesús uai ote:

—Cue llua cacadomoi. Cue finoca rafuena ciodomoi. Juan ðine abido omoi jaillanona, iena naimiemo llono. ⁵ “Uisnidino jai ciotimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fiollaillamona damerie jai jillodimaci. Dueredino mare rafuena jai cacadimaci” naimiemo llono. ⁶ Jiai llono: “Nibai nana cue rafuena raise cacaiñedio; ia cuena jaca nia inocana o jaia, caimare iitio”.

⁷ Juan llofueoicaigano abido jailla mei, naimie ecimo ailluena ite cominimo Jesús ði Juan rafuena llote:

—Jofue iñenanomo naimie navui ia, naimie ðine jaidomoi. ¿Ñie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoiñede. Nie isoide rafue naimiemo ia, cue rafuena llocana jaide. ⁸ ¿Bue ñellena naimie ðine jaidomoi? Mare iniroina jitadimiena cioiñedomoi. Mare iniroina jitadinona omoi cioacaniadedi, illacomini ðine jaidomoi. ⁹ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira.

¹⁰ Malaquías micori naimiena jaie cueda:

Jusiñamui raite: “Ero, o uicodo cue rafuena lllollena, damiena oretaiticue, comini comeciaina marecinona duiñollena”

cueda. Malaquías Juan Bautistana cuete. ¹¹ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioiñede. Iemona naimie baifemo faitomoi. ¹² Juan

llofua tainiamona ailluena comini cue rafuena inuamona, Jusiñamui dibeimo birui duere iacadimaci. ¹³ Nana Jusiñamui facaina lloraini micoriaidi cue billena jaie llotimaci. Moisés micori iena jiai jaie llote. Juan facaise naie llogacino jai suide. ¹⁴ Jusiñamui facaina lloraïma jaie llote: “Bie rafue suille facaise Elías isoidimie biite”. Naimie rafuena inotomoidena, Juandi naimiena uiñotomoi. ¹⁵ Omoi jeforena jira, raise fueollena, cue lluomo cacarei.

¹⁶ Jesús nia llofuate:

—Ero, omoina ñaiticue. Jifanote uruai isoidomoi. Uruiai jifanoiacania, naimaci nabaiñiaina uaiduanona, raitimaci: ¹⁷ “Omoi diga jifanoiacadica; iadedi cai diga jifanoiacañedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci. ¹⁸ Ie isoidomoi. Juan jirorainide. Caimare guñede; ia naimie diga nabairiñedomoi. Naimiena gainedomoi. Ie jira omoïmona dajerie naimiena raitimaci: “Janaba anamo naimie illamona, naimie uairico isoi ite” raitimaci. ¹⁹ Monamona billanona, imana jaidicue. Omoi isoi guiticue. Caimataidicue; ia cue diga nabairiñedomoi. Cuenajai gainedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimedio”. Iese raitomoi; iadedi Jusiñamuina inotinodi cue finoca rafuena marenana uiñotimaci.

Dajerie nairai Jesúsna inoñena rafue

(Lc 10.13-15)

²⁰ Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uiñotimaci; iadedi naimaci comeciai iuai meidoñedimaci. Ie jira naimacina ñaite. ²¹ Llote:

—Omoïmona damerie Corazín railla illanomona bitomoi. Omoïmona damerie Betsaida railla illanomona bitomoi. Cue rafuena omoi inoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuaina meiduana uiñotallena, ebinide iniroina jitajonona, naimaci ifogiamo jusefona jonetimaci. ²² Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. ²³ Omoïmona damerie Capernaum railla illanomona bitomoi. Birui abina iedoiacadomoi; iadedi jairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui niadedi nia ite. Omoi comeciai iuai omoi meidoñena, monamo cue Moo diga jaca inoitomoi; iadedi naimie omoina duere finollemona sunaitomoi. ²⁴ Jusiñamui uicomo nana comini ico ia, cue rafuena omoi inoñena jira, Sodoma railla nairai baifemo duere sefuitomoi —llote.

Jesús ie Moo diga ñaia rafue

(Lc 10.21-22)

²⁵⁻²⁶ Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uiñotina bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo feaacadicue. Mai.

²⁷ Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoina naimiena uiñotadicue. Ie muidona naimiena uiñotomoi. ²⁸ Omoi jecinomona omoi jillobillena, duere jaidomoi. Omoi comeciai marena uri illena, cue dibeimo mai omoi i. ²⁹ Cue llucino anamo omoi i. Cue riinina jira, cuemona omoi fueo. Iemei omoi comeciai marena uri iite. ³⁰ Omoina cue canua jira, cue llucino anamo omoi iacanano ia, sefuinide. Omoina cue canolle jira, cue llucino finuana sefuinide.

12

Sábadoruimo Jesús llofueoicaigano maijia rafue

(Mr 2.23-28; Lc 6.1-5)

¹ Ie rafue llumona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joide naido jaide. Ie llofueoicaigano aimetailla jira, trigona tijiano, golluano, guicana jaidimaci. ² Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Iese cai abimo jeacinona jai finodimaci.

³ Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ⁴ Jusiñamuimo fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede. ⁵ Moisés micori llogacinomo jiai raise comeciaina facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini maijiuidimaci. Jusiñamuina naimaci sedallena, ocainana fatimaci. Iraina bonodimaci. Iese maijiuidimaci; iadedi Jusiñamuimona jeacino finoñedimaci. Moisés micori jaie cuezafuina raise cacañedomoi. Iena raise facañedomoi. ⁶ Omoimo nia lloiticue. Jusiñamui jofomo finoca rafue baifemo faiticue. ⁷ Jusiñamui facaina lloraíma iena jaie cueda: “Cuemo rana omoi fecajana jitaidicue; ia omoi jitaillamona, jiaie cominina omoi duenailacínodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodimaci” lloñedomoi. Cuemona cue llofueoicaigano jeacino finoñedimaci. ⁸ Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

Jesúdi onollina idisarodimiena jillotaja rafue

(Mr 3.1-6; Lc 6.6-11)

⁹ Bai jaillanona, nairai dine rillanona, naimaci ofiracomo Jesús fo jaide. ¹⁰ Nainomo onollina idisarodimie illanona, fariseuai dinena Jesúsomo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai maijide. Uai uanona: “Mare” Jesús raiadedi, naimacimona naimie jai maijiacana jira, naimiena llogidoiacadimaci. ¹¹ Jesús uai ote:

—Sábadoruimo omoimona damie ie toica llauda ifomo uaidena, nairuido ari iena ote. Naimiemo buena lloñedomoi. ¹² Ero, cominidi llauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

¹³ Onollina idisarodimiemo llote:

—O onolli mai oni ñuita.

Iena ñuitajamona jillode. ¹⁴ Iena ciuanona, fariseuai jino jaidimaci. Naimiena meinellena, coniniri siadotimaci.

Isaías micori jaie Jesúna ñaia rafue

¹⁵ Naimiena naimaci meineiacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

¹⁶ —Cueno llocana jaiñeno —naimacimo llote. Naimie mameci are sorillana jitaiñede. Fariseuai diga ie uai uaitaiacaiñede. ¹⁷ Iemona Isaías micori jaie cuezafuiai jai suide. Jusiñamui Isaías micorina jaie cuetataga:

¹⁸ Ero, cue fetoca mullaíma ite.

Naimiedi cue isiruigamie. Naimieri iobidicue.

Cue Joreño naimiemo cue fecajanona, judíuainédinomo naimacina cue jilloitaacanana lloite.

¹⁹ Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

²⁰ Comeciai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue llumona, naimiena inotinona canoite.

Nana comini naimie anamo ille dinori iese naimie canoite.

²¹ Naimaci jillobillena, ie rafue cacajanona, ailluena judíuainédino naimiena inoitimaci.

Fariseuai Jesúna jeare ñaia rafue

(*Mr 3.19-30; Lc 11.14-23; 12.10*)

²² Jesús dine damieredi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñañede. Jesús Janabana oni oretajanona, naimiena jillotate. Naimie uaina botade. Ñaite. Cíode. ²³ Naiena ciodino rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jitomo ocuridicai.

²⁴ Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

²⁵ Naimiena naimaci enoillana Jesús uñuanona, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaina omoi llua isoi cue oretaia, Janaba ie díbeimo itino díga jai nabairiñede. Iemona naimie comini danomo iñeitimaci. ²⁷ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uñollena. Iemei cue finoca rafuena uaitañeitomoi. ²⁸⁻²⁹ Ero, mairidimie ie jofomo ite rana ñibai fiicadomoi. Iena fillena, naimiena nano raise omoi maiga. Raise maia mei, ie rana firedomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafefitaticue. Iemona Jusiñamui rafuena cue llua jai uñotomoi. ³⁰ Cue díbeimo iñedimie cuena enoide. Cue díbeimo cominina itañedimiedi naie cominina cuena inotañede. ³¹ Ie jira omoimo lloiticue: Jusiñamuidi nana comini jeacinona dotarede. Naimiedi comini marañedicinona dotarede; iadedi naimiedi ie Joreña jeare ñaiacinona dotañeite. ³² “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreña omoi jeare ñaia, Jusiñamui iena birui feitañeite. Iena ico jaca feitañeite.

Jesúdi rira llisilla llua rafue

(*Lc 6.43-45*)

³³ Jesús llote:

—Llisillamona nie isoide rira illana uñoticaí. Amena ie llisilla llillamona, amena marena uñoga. Llillamona, amena marañenana jiai uñoga. ³⁴ Ie isoide. Omoi ñaiamona omoína uñoticaí. Cuena omoi marañeno ñaia jira, omoi comeciai iticinona uñoticaí. Omoi marañena jira, jao nairaidomoi isoidomoi. ³⁵ Mareuidimie mare ie começimona ñaite; iadedi marañedimie marañede ie começimona ñaite. ³⁶ Jamai ebena birui omoi ñaia, Jusiñamui uicomo nana comini ico illa facaiseconi Jusiñamui iba oite. ³⁷ Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui díbeimo omoi começiai iuai meido.

Dajerie Jesús siño rafuena fñuana jitailla rafue

(*Mr 8.12; Lc 11.29-32*)

³⁸ Naie facaiseconi dajerie Moisés micori llogacinona llofueraini dajerie fariseuai díga Jesúmo llotimaci:

—Maestro, o lloga uaina cai ñinollena, siño rafuena o finuana cioacadicaí.

³⁹ Jesús uai ote:

—Maraiñedicinona finocabidomoi. Jusiñamui ñibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeiticue. Ero, Jonás micori ñaie ite rafuena uiñotomoi. Naiemo omoi comeciaina omoi faca. ⁴⁰ Darui amani aillue lliciaí jeraimo naimie illamona jillode. Ie isoite. Cue fiodailla mei, darui amani raiafomo iiticue. Iemei naiemona jilloitícue. ⁴¹ Lliciaí jeraimona naimie jillua mei, Nínive railla nairaí ñine Jonás micori ñaie. Nainomo Jusiñamui rafuena llote. Naie comini iena cacajano, naimaci comeciá icinuaina meidotimaci. Cue rafuena omoi cacajamona, omoi comeciá icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi” omoína raiñeiticue. Jonás micori baifemo birui uaidícue; iadedi cuena ñinoñedomoi. ⁴² Ero, Saba railla nairaí ie illaño micoridi Salomón micori ñine ñaie aarena ñaie. Naimie micori uiñuacina nainaiño micori cacareillena, aarena ñaie. Salomón micori baifemo birui uaidícue; iadedi cuena ñinoñedomoi. Omoi comeciá icinuaina birui omoi meidoñena jira, Jusiñamui uicomo nana comini ille facaiseconi nainaiño micori omoína ico ñaite: “Naimiedi siño rafue finuana ciodomoi. ¿Bue ñellena naimiena ñinoñedomoi?” omoína ico ñaite.

Janaba anamo illamie rafue

(Lc 11.24-26)

⁴³ Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni ñaie, ñaie illanona baillena, jofue ñinenanomo ñaie; iade baiñede. ⁴⁴ Baiñena jira, naimie comecina facade: “Navui cue anamo illamie ñine abido jaitícue”. Abido naimie bia, ñaie ñima comeci namanidena naimie baite. ⁴⁵ Iemei oni jaillanona, ñaie siete jananiaina naimie ñiga atide, naimaci anamo ñaie ñima illena. Naie siete jananiái naimie baifemo maraiñedimaci. Iemona ñaie ñima eo fodo ñaie. Ie isoide birui ite maraiñede comini. Cue rafue naimaci ñinoñenia, eo fodo jaitimaci.

Jesús ie comini

(Mr 3.31-35; Lc 8.19-21)

⁴⁶ Jofomo comini ñiga Jesús nia ñaie, naimie ei, ie amatiaí ñiga, bite. Naimie ñiga ñaicanano, jino naidaide. ⁴⁷ Damie Jesúmo llote:

—O ei, o amatiaí ñiga, jino ite. O ñiga ñaicaide.

⁴⁸ Naimiemo Jesús ñinena jicánote:

—¿Bu cue ei? ¿Bu cue amatiaí?

⁴⁹ Ie llofueoicaigano ñine ie onolli ñuitajanona, raite:

—Jadí, cue ei, cue amatiaí. ⁵⁰ Cue Moo monamo ite. Naimie jitaillacina finodimiedi cue amana, cue miriñona, cue eina. Imaci ua cue cominina.

13

Trigo judaidimie rafue

(Mr 4.1-9; Lc 8.4-8)

¹ Nai jofomona nairui Jesús jaillanona, jorai fue ñine ñaie. ² Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci. ³ Ailluena rafue naimacimo llote:

—Jusiñamui omoína sedaacana omoi fueollena, bie rafuena lloiticue. Damie trigona judaiaide. ⁴ Naimie judaiaimona, naisomo janore iduaí juide. Naimie bai jailla mei, silliniái iena guisaibitimaci. Ie jira sicoñede. ⁵ Nofiemo ñaie iduaí juide. Nainomo enirue raise ñede. Sicode; iadedi enirue raise ñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo ñaie iduaí juide. Eecuai sicuamona, riará eecuai ibaica. Ie jira llisiñede. ⁸ Mare eniruemó ñaie iduaí juide. Sicode. Llisillamona danademo cien ñiga llisillana ote. Jiaimona sesenta ñiga llisillana ote. Jiaimona treinta ñiga llisillana ote. ⁹ Omoi jeforena jira, raise fueollena, cue lluomo cacarei. Iena ñino.

Jesús ie como lloga rafuena llofuia rafue

(Mr 4.10-12; Lc 8.9-10)

¹⁰ Ie llofueoicaigano Jesúmo jicanuaibiside:

—¿Bue ñellena bie isoide rafuedo cominina llofuetio?

¹¹ Uai ote:

—Jusiñamuidi omoína ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñotañede. ¹² Jusiñamuina ñnotimie Jusiñamui rafuena ñnocana jaite. Jusiñamui naimiena uiñotaite; iadedi Jusiñamuina ñnoñedimie Jusiñamui rafuena uiñoñecana jaite. ¹³ Ie jira bie isoidicinodo naimacimo lloticue. Cue siño finoca rafuena cioðimaci; iadedi iena naimaci ñnoñena jira, uiñoñeno jaitimaci. Cue llofuiana jamai cacadimaci; iadedi naimaci ñnoñena jira, raise cacaiñedimaci. Uiñoñedimaci. ¹⁴ Isaías micori naimacina jaie cuega rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

¹⁵ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaacaiñedomoi.

Jai uisínidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue ðibeimo iacaiñedomoi, omoína cue jilloitai raillanona”.

Isaías micori Jusiñamuina ñnoñedinona iese jaie cuete; ¹⁶ iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi ñnua jira, ni ua omoi marena ille jillaci. ¹⁷ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesúdi trigo judaidimiena llua rafue

(Mr 4.13-20; Lc 8.11-15)

¹⁸ Jesús llote:

—Ero, omoína trigo iduaina judaidimie rafuena llofueiticue. ¹⁹ Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacaiñedimaci. Ie jira Taifedi naimaci comeciaino cacaja uaina ñnotañede. ²⁰ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaiña, iena caimare feiñotimaci. ²¹ Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci. ²² Jiaie iduai eecuai illanomo juide. Naie iduai sicua mei, iena eecuai ñbailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci. ²³ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitaille rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Raiticiai trigo motomo illa rafue

²⁴ Jesús jiaie rafuena llote:

—Jusiñamui ie cominina sedaacana rafuena lloiticue. Naimie ðibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide. ²⁵ Naimie inia mei, ie enoidimie trigona eruaide raiticiaina bainino judaiaide. Iemei oni jaide. ²⁶ Trigo sicuamona lliside. Naie facaise naie raiticiai como raise bairede. ²⁷ Judaidimie maijiraini iena ciuanona, naimiemo llote: “Mare iduai navui ritio. ¿Ñiesedeta raiticiai eo sicode?” ²⁸ Uai ote: “Cueno enoidimie iese finoca”. Naie maijiraini naimiemo jicanotimaci: “¿Birui nai raiticiai cai raitiana

jitaidio?” ²⁹ Uai ote: “Dama ite. Raiticiai omoi raitia, trigona jiai jaitaitomoi. Dama iesede. ³⁰ Danomo sicoite. Ua facaiseconi cue maijirainimo lloiticue: “Raiticiai nano jaita. Danomo ofita, jobaillesa. Trigo uanona, cue jofomo atianona, eeno”.

Jesúdi mostaza ido llua rafue

(Mr 4.30-34; Lc 13.18-19)

³¹ Jesús jiaie rafue llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riará sicode. ³² Mostaza ido eo janorede; iadedi sicua mei, eo aillue riará jaillamona, nainomo silliñiai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

Jesús siritate rana llofuia rafue

(Mr 4.33-34; Lc 13.20-21)

³³ Jesús jiaie rafuena llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

³⁴ Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede. ³⁵ Jusiñamui facaina lloraima micorí iena jiaie cueba: Jusiñamui llote: “Jiaie isoide rafuedo cominimo lloiticue. Comini nia uiñoñega rafuena lloiticue. Enirue finua facaisezona jaca bu iena uiñoñede. Birui naimaci uiñoñena, iena lloiticue”.

Jesús trigo motomo riga raiticiaina llofuia rafue

³⁶ Comini jino faionocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uiñoñena, trigo motomo riga raiticiai rafuena caimo llono.

³⁷ Uai ote:

—Mare iduai judaidimiedi cue. Jusiñamui rafuena lloticue. ³⁸ Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini. ³⁹ Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaienisai. Trigodi cuena ñinotino. ⁴⁰ Jobaillena raiticiai ofitaja isoi, ico abido cue bia, daje isoi iite. ⁴¹ Cue jaienisaina oretaiticue, nana jeacinona finoraini diese ofitallena, cue illanomona iraimo dotallena. ⁴² Nainomo eo duere sefuillamona, eetitimaci. Subicaitimaci. ⁴³ Iemei jitoma lligaiñua isoi, Jusiñamui sedajanomo naimiema ñinotinodi marena bairenitimaci. Omoi jeforena jira, raise fueollena, cue llua cacarei. Bie isoi omoi duere sefuñellena, cue llua ñino.

Jesúdi eniruemo isiruiga reica rana llofuia rafue

⁴⁴ Jesús llote:

—Jusiñamui díbeimo comini jailla rafuena lloiticue. Jiaie uaido iena omoimo lloiticue. Eniruemo isiruiga raifide ra bu baia, ie nama jai ñena jira, naie eniruena uainino íbaacade, naie ra ollena. Ucube ollena, naie rari íobilla jira, nana naimiemo ite raruiaina fecaite. Iemei eniruena íbaite. Ie isoide. Jusiñamui illanomo omoi illena, jiaie rafue uanona jaíñeno. Dani Jusiñamui rafuena uanona jai. Dani iemo omoi comeciaina faca.

Perlas railla rafue

⁴⁵ Jesús llote:

—Jusiñamui díbeimo comini jailla rafuena lloiticue. Iena omoi raise uiñoñena, perlas railla rana íbaraimana lloiticue. Eo mare perlas íballena jenocabide. ⁴⁶ Eo raifide perla naimie baia, naie perlana íballena, nana ie raruiaina fecaite. Ie isoide. Jusiñamui ie cominina sedaacaja rafuena omoi cacaja jira, iena ocana jai.

Jesús llojjina ñaia rafue

⁴⁷ Jesús llote:

—Jusiñamui ðibeimo comini jailla rafuena lloiticue. Iena omoi raise uiñollena, lloijina lloiticue. Joraimo lloijina comini faianona, naga isoide lliciaina otimaci. ⁴⁸ Ari sonua mei, mare lliciai diese fetodimaci. Maraiñede lliciai diese oni faitimaci. ⁴⁹ Ie isoide. Ico abido cue bia, iese iite. Jusiñamuina ñnotinomona naimiena ñnoñedino diese oni fetollena, Jusiñamui jaienisai biitimaci. ⁵⁰ Iemei iraimo Jusiñamuina ñnoñedinona dotaitimaci. Nainomo eo duere sefuillamona eetimaci. Subicaitimaci.

Jesús llofueoicaiganodi mare rafuena jai uiñua rafue

⁵¹ Ie llofueoicaiganomo Jesús jicanote:

—¿Nana cue lluaana cacadomoi?

Uai otimaci:

—Jii, nana cacadicai.

⁵² Naimacimo llote:

—Ie jofomo comini bia, naimacina raise nafuellena, naimacina caimare itatallena, jofa nama ie mare raruaiaimona naimaci jitailla ra naimacimo fecade. Comini comeciaina lloticue. Jusiñamui facaina lloraini micoriai llogacinona uiñotomoi. Cuemona Jusiñamui ie cominina sedaja rafuena fueocana jiai jai jaidomoi. Comini comeciaina caimare itatallena, birui llofueredomoi.

Nazaretmo Jesús illa rafue

(Mr 6.1-6; Lc 4.16-30)

⁵³ Naie rafuena Jesús llua mei, nainomona Nazaretmo jaide. ⁵⁴ Ie eniruemo rillanona, Nazaretmo ite ofiracomo llofue. Naiemona cominidi rajicaillamona raitimaci:

—¿Niese naimiedi eo abina uiñote? ¿Niese siño rafuena naimiedi finode? Naimiedi jamai bue isoidimie. ⁵⁵ Naimie amederaima jito. Naimie eidi María. Naimie amatiaidi Jacobo, José, Simón, Judas. ⁵⁶ Naimie miriñotiaidi cai motomo jiai ite. Naimaci diga nagarui nabairitica. Naimieori cai nabairicabilla. Ie jira, ¿ninena ie siño uaina ote?

⁵⁷ “Cai comena naimie ite” raillanona, naimie uaina jamaidimaci. Jesús naimacimo llote:

—Naga illanomo cominidi Jusiñamui facaina lloraïma uaina feiñotimaci; iadedi naimie nairaïmo naimie ia, ie risoilla jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina ñnoñedomoi.

⁵⁸ Naimie uaina naimaci ñnoñena jira, Jesús ailluena siño rafue finoñede.

14

Juan Bautista micori fiodailla rafue

(Mr 6.14-29; Lc 9.7-9)

¹ Naie facaiseconi Herodes railla gobernador Jesús mamecina cacade. ² Naimie ecimo maijiuidinomo llote:

—Fiodaillamona Juan Bautista micori jai jillode. Jesús raillamiedi naimie. Ie jira naimiedi siño rafuena finocabide.

³⁻⁴ Iese raite, Herodes Juan micorina navui meinetaja jira. Juan Bautista micorina nia meinetañenia, Herodedi ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

Herodes Juan micori lluaana gaiñenano, naimiena duere finode. Herodes Juan micorina gaitatajanona, cárcelmo jonetade. ⁵ Naimie micorina meinetaacade; iadedi Herodes dinena cominina jaciruite. Juan micoridi Jusiñamui facaina lloraïmana naimaci raillanona, naimie micorina jaciruite. ⁶ Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. ⁷ Ie jira naiñaiñomomo llote:

—Ñie isoide rana o jitaiaidedi, omo iiticue. Illaïma uai cuemo illa jira, iena ua finoiticue.

⁸ Naiñaiño ei naiñaiñomomo lluanona, naiñaiño uai ote:

—Juan Bautista ifogí bandejamo jonecaida, cuemo ine.

⁹ Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana llote. ¹⁰ Ie lloga uaina finollena, cárcelmo soldadona orede. Nainomo Juan micori ifogina jaitade. ¹¹ Bandejamo naimie micori ifogi jonecaida, soldado atiano, Herodías jisamo fecade. Ieconí ie eimo fecade. ¹² Iena fidiana, Juan micori llofueoicaigano naimie micori abina uaibitimaci. Iena naimaci raia mei, Jesúmo lluidimaci.

Jesús cinco mil iñiaina ecaja rafue

(Mr 6.30-44; Lc 9.10-17; Jn 6.1-14)

¹³ Juan micori meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci. ¹⁴ Eniruemo Jesús sijia, ailluena cominina dafafide. Naimacina ciuanona, naimacina duenaillanona, duidinona jillotate. ¹⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuicade. Cominina mai abido oreta. Ianori ite nairaimo naimaci guille ollena, naimacina oreta.

¹⁶ Uai ote:

—Naimacina oretañeiticue. Naimacina omoi eca.

¹⁷ Uai onaisite:

—Dani caimo ite cinco llomenico, mena lliciai diga.

¹⁸ Uai ote:

—Iena cuemo ati. ¹⁹ Raitie illanomo comini ana raillesa llono —raite.

Naie cinco llomeniconna naie mena lliciai diga uanona, monamo eruaillanona, Jusiñamui iobillacinona fecade. Iemei taillude. Ie llofueoicaiganomo fecade, cominina ecallena. ²⁰ Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci. ²¹ Cinco mil iñiaia diese guitimaci. Naimaci aitiai jiai guitimaci. Naimaci uruia jiai guitimaci.

Jesús jinui emododo macarilla rafue

(Mr 6.45-52; Jn 6.16-21)

²² Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote. ²³ Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. ²⁴ Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. ²⁵ Nia monañedemo, jinui emododo naimaci dine Jesús bite. ²⁶ Naimiena naimaci ciuanona, jacinaillamona, raitimaci:

—¿Bu joreño caimo billana ciodicai? —Jacinaillamona cuiriidimaci. ²⁷ Naie dacaiño Jesús naimacimo llote:

—Omoi joreñonicaiño. Cuesa. Jaciruiño.

²⁸ Pedro uai ote:

—Uanai cai Namadio. O dine cue billesa cuemo llono.

²⁹ Jesús uai ote:

—Cue dine bi. —Ie jira botemona jinui emodo Jesús dine Pedro macarite; ³⁰ iadedi aifi billana naimie ciuanona, jacinaite. Jinuimo anabaiacade. Ado cuirioide:

—Nama, cuena cano.

³¹ Jesús ie onolli oni ñuitajanona, naimiena llinuanona, raite:

—Eo janore cue uaina iñotio. ¿Bue ñellena eo iñoñedio? Cuena iñotiodena, jinui emododo cue dine niadedi ridio.

³² Botemo a iaimaia jaiillamona, ie facaise aifi llicaiide. ³³ Ie jira botemo itino Jesúmo iobillacinona fecadimaci.

—Odi ua Jusiñamui Jitodio —raitimaci.

Jesúdi duidinona Genesaret eniruemo jillotaja rafue

(Mr 6.53-56)

³⁴ Ruica dine jaillanona, Genesaret raila eniruemo ridimaci. ³⁵ Jesúna nainomo itino uinuamona, naimie dine duidinona atillena, nana nairaimo jiaie cominina oredimaci.

³⁶ Naimie dine billanona, dani ie iniroi fuedamo jutadallena naimiemo jicanotimaci. “Naimie iniroimo cai jutadallemona jilloiticaí” raillamo comeciaina facadimaci. Nana jutadate diese jillodimaci.

15

Jesúdi comini comeciaina ñaia rafue
(Mr 7.1-23)

¹ Jerusalémona fariseuai comini Jesús dine bitimaci. Moisés micori llogacinona llofueraíni jiaí bitimaci. ² Naimiemo jicanotimaci:

—¿Bue ñellena o llofueoicaigano cai einamaci rafuedo jaiñedimaci? Naimaci guiacania, naimaci onolli cai einamaci llua isoi raise jocoñedimaci. Ie jira cai abimo jeacino finodomoí.

³ Jesús uai ote:

—¿Bue ñellena nana Jusiñamui llogacinodo jaiñedomoí? Omoí einamaci llogacinodo jaidomoí; iadedi nana Jusiñamui llogacinodo raise jaiñedomoí. ⁴ Jusiñamui jaie llote: “O moo uai inuanona, naimiena cano. O ei uai inuanona, naiñaiñona cano. Ie moori jeare ñaitimie, ie eiri jeare ñaitimie meinelle”. ⁵ Iese Jusiñamui llote; iadedi omoí einamaci llotimaci: “Jusiñamuimo cai ucubena cai fecajamona, cai moona, cai eina jai canonidicaí”. ⁶ Iese omoí finocabilla jira, omoí einamaci llogacinodo omoí jaillamona, Jusiñamui uaina jamaidomoí. ⁷ Mareuidinona abi caitauidinodomoí. Isaías micori omoina jaie raise llote. Naimiedi Jusiñamui llua cuete:

⁸ Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticaí” llotimaci. “Ona sedadicaí” llotimaci.

Jamai ñaitimaci. Naimaci comeciái cue dibeimo raise iñede.

⁹ Cue uai itena, jamai comini llucacinona naimaci llofuecabilla jira, tainona cuena sedadimaci.

¹⁰ Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoí uiñollena, cue llua mo cacarei. ¹¹ Omoí einamaci isoi omoí guiñenia, naimaci isoi omoí onollina omoí jocoñenia, omoí comeciaina jearetañedomoí. Omoí guigamona, omoí onollina jocuamona, Jusiñamuina nabaiñedomoí. Omoímo jeacino illa jira, Jusiñamuina nabaiñedomoí. Omoí comeciái jearena jira, jeacinona finocabidomoí.

¹² Ie llofueoicaigano naimiemo lluaíbitimaci:

—O llua muidona, fairseuai cominina icidio.

¹³ Naimie dinena uai ote:

—Dama ite. Nana cue Moomona oñega rafuedi jai ieconi duite. Naimaci rafue cue Moomona oñenia, ja muidomo ieconi duite. ¹⁴ Naimacina faínonocai. Uanaicinona naimaci uiñoñena jira, uisínidino isoidimaci. Jiaimiena uisínidimie ifoia, dafomo uaidiaimaiaí. Ie isoide. Uanaicinona fariseuai uiñoñena jira, uanaicinona llofuenidimaci. Uanaicinodo jaiñedimaci. Ja muidomo faífitimaci.

¹⁵ Pedro naimiemo llote:

—Aillinano o llua caimo raise llono.

¹⁶ Uai ote:

—¿Ñiese cue llua jiaí nia cacaiñedomoí? ¹⁷ Ñie isoide ra guitomoina, omoí jebemo jaide. Ie mei omoí abiaimona jino bite; ¹⁸ iadedi omoí comeciáimo iticinomona jearedena ñaitomoí. Omoí comeciái jearena jira, jearede rafuena finocabidomoí. ¹⁹ Omoí comeciái jearena jira, jeare comeciaina facacabidomoí. Comena meinecabitomoí. Omoí aiñede riño diga icabitomoí. Omoí iniñede iima diga icabitomoí. Fiiricabitomoí. Tainona llogiricabitomoí. Jiaie comini joreñona jeare ñaicabitomoí. ²⁰ Bie isoidicinuai omoí comeciáimo illa jira, jearede rafuena finocabidomoí; iadedi omoí einamaci llua isoi, omoí onolli jocoñenamona jeacino comuiñede.

16

Fariseuai comini Jesúmo siño rafuena finuana jicauano billa rafue
(Mr 8.11-13; Lc 12.54-56)

¹ Dajerie fariseuai comini Jesús dine bitimaci. Naimiena facacillena, dajerie saduceuai comini jiai bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uiñoitimaci. Naimiena duere finoacadimaci. Llotimaci:
—Iena cai cioillena, Jusiñamuina siño rafuena finota.

² Jesús uai ote:

—Jitoma sojicaidemo, mona jiairenia, raitomoi: “Íco are maremonanite”. ³ Jiai raitomoi: “Jitiramo mona jiairenia, ja noci deite”. Monamo omoi eruaiillamona, marena monaillana uiñotomoi; iadedi birui cue finoca rafuena raise uiñoiacaiñedomoi. Omoi motomo birui suide rafuena raise cacaiñedomoi. Abina uiñotinona abi caitadomoi. ⁴ Jeacinona finocabidomoi. Jusiñamui dibeimo raise iacaiñedomoi. Siño rafuena finoñeiticue. Jonás micorimo jaie suide rafuena uiñotomoi. Jusiñamui naimiemo siño rafuena finode. Naiemo comeciaina omoi faca. Fiodaillamona naimie jillode. Ie isoi cue jiai jilloiticue. —Ie llua mei, naimacimona Jesús ie llofueoicaigano dıga oni jaide.

Jesús siritate rana llofua rafue
(Mr 8.14-21)

⁵ Ruica dine naimaci rillanona, ie llofueoicaigano llomeniconona feillana uibiñotimaci.

⁶ Iena naimie uiñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite. ⁷ Jesús iese llua jira, iena naimaci raise cacaiñena jira, dani coniniri siadotimaci:

—Llomeniconona cai atiñena jira, caimo iese llote.

⁸ Naimaci siaduana Jesús uiñua jira, naimie llua naimaci nia raise cacaiñena jira, naimacimo llote:

—Cue uaina nia raise iñoñedomoi. Omoına canoredicue. ¿Bue ñellena dani omoi llomenico iñenana siadotomoi? ⁹ ¿Niese iñoñedomoi? ¿Niese cue navui siño finoca rafuemo comeciaina facañedomoi? Navui cinco mil iñiaı cinco dıganicodemo guitimaci. Monillamona, guigamona fiebillamona, doce cirıgaıaimo iraidomoi. ¹⁰ Jıaicaiño cuatro mil iñiaı siete dıganicodemonona guitimaci. Monillamona guigamona fiebillamona, siete cirıgaıaimo iraidomoi. ¹¹ Omoına cue ecallena, ¿niese cuena birui iñoñedomoi? Llomeniconona ailli ñaiñedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaite.

¹² Ie facaise naimie llua jai cacadimaci. Llomenico siritate rana naimie ñaiñede; iadedi fariseui llofuiacinomona naimaci abina rairuillena ñaite. Saduceuai llofuiacinomona naimaci abina rairuillena ñaite.

Pedro Jesúna llua rafue
(Mr 8.27-30; Lc 9.18-21)

¹³ Cesarea Filipo railla enıruemo Jesús jaidemo, ie llofueoicaiganomo jıcanote:

—¿Niese jıaıe comini cuena raitimaci?

¹⁴ Uai otimaci:

—Damierie raitimaci: “Odi Juan Bautista micorıdıo”. Damierie raitimaci: “Odi Elıas”. Jıaıno raitimaci: “Jeremıas micorıdıo”. Jıaıno raitimaci: “Jusiñamui facaina lloraıma micorıdıo”.

¹⁵ Jesús dane jıcanote:

—¿Niese omoi cuena raitomoi?

¹⁶ Pedro uai ote:

—Odi cai Jilloıtarımadıo. Cristıdıo. Jusiñamui facaina lloraıni micorıaı o billena jaie llotimaci. Cai cajede Jusiñamui Jıtodıo.

¹⁷ Jesús dinena uai ote:

—Simón Pedro, Jonás jıtodıo. Marena llotıo. Comini ona iena uiñotañede; iadedi cue Moo Jusiñamui ona iena uiñotade. ¹⁸ Pedro, o comecına uiñoticue. Cuena como o

lloga uaina meidoñeítio. Bie rafuena jiaie cominimo o llumona, jiai ñnoítimaci. Cuen a ñnuamona, cue cominina jaitimaci. Cue ðibeimo ñnedino iena itatanidimaci. ¹⁹ Ailluena cominimo Jusiñamui ie cominina jailla rafuena nano lloraímana jaitio. O llucínodo jaitino cue cominina jaitimaci. O llucínodo jaiñeítino cue cominina jaiñeítimaci

²⁰ Iena llua mei, ie llofueoicaiganona rairuide:

—Cue Crisonana bumo nia lloñoeno.

Jesús ie fiodaillena llofuia rafue

(Mr 8.31-9.1; Lc 9.22-27)

²¹ Naie facaisemona ie llofueoicaiganomo Jerusalémo naimie jaillena marefodo llote:

—Nainomo cai judúuai illaicomini cuena eo duere finoítimaci. Cuen a meineítimaci; iadedi darui amani illanona, fiodaillamona jilloíticue.

²² Pedro ðinena lletade:

—Nama, ¡Jusiñamui iena jitañede! Bie isoide rafue omo suiñeite.

²³ Jesús jinafo ðine naimiemo erodate. Raite:

—Cuemona oni jai. Iese ñaiñoeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

²⁴ Ie llofueoicaiganomo llote:

—Cue cominina bu jaiacania, ie jitaile rafuedo jaiñena. Cue ðibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue ðibeimo naimie iite. ²⁵ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaiacaiñenia, ja muidomo faifite.

²⁶ Cue cominina bu jaiñenia, nibai eo duere sefuíñeite. Nibai ailluena ra naimiemo iite; ia, ¿ñiese cue Moo ðine riite? Nainomo naimie riñoeno faifite. ²⁷ Cue jaienisai ðiga cue Moo ðinena monamona ico biíticue. Cue Moo uai cuemo illanona, ebirena biíticue. Nagamie imaci finoca rafue ðiese cue iba ollena biíticue. Cue cominiñedinona duere finoíticue.

²⁸ Uanaicinona omoimo lloíticue. Omoimona dajerie nia fiodaiñeítomoimo, illaímana cue bairellena cioitomoí.

17

Jesús abi meidocailla rafue

(Mr 9.2-13; Lc 9.28-36)

¹ Seis ðigarui illanona, anedumo comini ñnenanomo Jesús jaide. Naimie ðiga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uíñede. ² Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie ñiroi naie ðacaiño eo userecaide. ³ Naie facaise naimacimo Moisés micori joreño, Elías ðiga bairede. Elíadi Jusiñamui facaina jaie lloraíma. Jesús ðiga ñaitiaímaiaí. ⁴ Jesúmo Pedro llote:

—Nama, bene cai illana mare. O jitaia, daje amani bisaini finoíticue. Daje oue; jiaie Moisés micori ie; jiaie Elías ie.

⁵ Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie llumo cacareillanona, iena ñno—llote. ⁶ Jesús llofueoicaigana iena cacajanona, eo jaciruillanona, naimaci uieco ðinena ana bitadatimaci. ⁷ Jesús naimaci ðine billano, naimacina jetajanona, raite:

—Mai jaciruiñoeno naidacai.

⁸ Naimaci erorillamona, dama Jesúna ciódimaci. ⁹ Anedumona bitimacimo, naimacimo Jesús llote:

—Omoi ailli ciua rafuena bumo lloñoeno, cue fiodaillamona cue jillua ðinori.

¹⁰ Naimiemo llotimaci:

—Moisés micori llogacínona llofueraini birui raicabitimaci: “Elías raillamie ðane biite. Ie mei cai jilloitaraima biite” raitimaci. Jusiñamuimona o billana ñnoticaí. Odi cai jilloitaraimana ñnoticaí. Odi cai jilloitaraimadiomo, ¿bue ñelli iese raitimaci?

¹¹ Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise llolena. Jusiñamui ðibeimo naimaci illena, comini imaci comeciai meiduana llote. ¹² Ero, naimie jai bite; iadedi bie comini naimiena raise uiñoñedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, iimana cue jaillena; iadedi duere sefuiticue.

¹³ Ie muidona Jesús llofueoicaigano naimiedi Juan Bautista micorina ñaiana jai uiñotimaci.

Jesúdi Janaba anamo itimiena jillotaja rafue

(Mr 9.14-29; Lc 9.37-43)

¹⁴ Ie jiaie llofueoicaigano ðine Jesús abido ria, nainomo ailluena comini itimacimo ride. Jesús ðine damie billanona, naimiena raise uaiduanona, caiñici ifodo rainadacaida raite:

¹⁵ —Maestro, cue jitona duenai. Janaba anamo naimie ite. Iemona naillicabide. Duere sefuide. Uai-uacabide. Jiaicaiñodedi iraimo uaillanona, uside. Jinuimo jiai uaillanona, niadedi corobaite. ¹⁶ Naimiena jilloitallena o llofueoicaigano ðine naimiena atidicue; iadedi naimiena jillotanidimaci.

¹⁷ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaiacaiñedomoi. Omoi ðiga are iticue. Raise omoi ñnollena, ¿nie ðinori omoi ðiga iiticue?

Naie duidimie moomo llote:

—O jito cue ðine mai ati.

¹⁸ Naimiena atiamona, Jesús naimiemo Janaba illana uiñote. Janabana Jesús lletaja jira, naie uruemonona Janaba oni jaide. Ieconí naie urue jillode.

¹⁹ Ie mei ie llofueoicaigano Jesúmo anado jicanotimaci:

—¿Bue ñellena Janabana oni oretanidicai?

²⁰ Uai ote:

—Raise nia omoi ñnoñena jira, uanaicinona omoimo lloiticue. Janaba oni oretallena, cue uai navui omoimo iticue. Birui raise cuena omoi ñnoñena, bie Janaba oni oretanidomoi. Jusiñamuina eo janore ñnotomoidena, ðiga rana finodomoi. “Oni bai jai” bie anedumo llotomoidena, omoína naimie canuamona, bie anedu oni lliai bai jaite. Jusiñamuina omoi ñnoia, naga rana finoredomoi. ²¹ Jusiñamuimo omoi comeciaina facallena omoi guiñenamona, Jusiñamui ðiga omoi ñaiamona, bie isoide Janabana oni oretaredomoi.

Jesús ie fiodaillena dane llofuia rafue

(Mr 9.30-32; Lc 9.43-45)

²² Galileamo ie llofueoicaigano ðiga danomo itemo, Jesús naimacimo llote:

—Monamona billanona, iimana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. ²³ Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

Jesúmo Jusiñamui jofo facaina damie ibataja rafue

²⁴ Capernaumo naimaci rilla mei, Jusiñamui jofo ucube oraini Pedro ðine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

²⁵ Pedro ðinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús ðinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitoniamona ocabiñedimaci; ia naimacimo duide cominimona otimaci.

²⁶ Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitonaiaina ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofo facaina naimie cuena ibatañede; ²⁷ iadedi Jusiñamui jofo ucube orainina coco iciñellesa, ucubena jenuai. Joraimo aimajaitiosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

18

*Jesús ie llofueoicaigano moto imi*ena ille rafue

(Mr 9.33-37; Lc 9.46-48)

¹ Naie facaiseconi naimie dine ie llofueoicaigano jicanuai bitimaci:

—Jusiñamui ie cominina sedajanomo ico cai ia, ¿bu cai moto imi ena ille?

² Iena cacajanona, Jesús daje urue uaiduanona, naimaci motomo jonete. ³ Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fainonocaiñenia, bie urue isoi omoi moto imieñedimiena illanona, Jusiñamui sedajanomo iñeitomoi. Cue cominina omoi ia, bie urue isoi iitomoi. ⁴ Bie urue isoi abi iedoñedimiedi Jusiñamui ie cominina sedajanomo imie moto naimi ena ille. ⁵ Bie isoidimie cuemo duillamona, naimi ena feiñotimiedi cuena jai feiñote; ⁶ iadedi cuena iñotimiena jeacinona finotaiacadimie iena finoñellena, jeacinona finotaiacadimie cimaimo aillue nofici maianona joraimo corobaillena, naimi ena dotacadena, cuemona mare.

Jesúdi jeacinona finoñenana llofuia rafue

(Mr 9.42-48; Lc 17.1-2)

⁷ Jesús llote:

—Ramo faitino duere sefuillesa. Diga ramo omoi faicana uitinomo riitomoi; iadedi Jusiñamui omoi ramo faitimiena duere finoite. ⁸⁻⁹ Biena ñaiticue. Nie isoide rafue omoina jeacino finotaia, iena linoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

Jesúdi naimi ena iñotinomona damie faifillana jitaiñena rafue

(Lc 15.3-7)

¹⁰ Jesús llote:

—Urue isoi omoi illena como lloiticue. Iena dane lloiticue. Cue Moo naimacina uiñua jira, bie urue isoidinona jamaiñocaiñeno. Monamo cue Moo ecimo naimaci jaienisai jaca ite, naimacina canollena. ¹¹ Jusiñamuimona cue billanona, naimi ena iñoñedinona naimaci jeacinomona jilloitallena biticue. ¹² Ero, omoimo iena jiaie rafuedo lloiticue. Damiemo cien diga toica llauda ite. Naiemona daje feiraite. Iena faifiñellena, jiaie llaudaiaina fainonocaida, iena jenuaite. ¹³ Iena baillanona, ieri iobite. Baillari oni jaiñedinori baifemo iobite. ¹⁴ Ie isoide. Jusiñamui naimi ena iñotinomona damie faifillana jitaiñede. Ie jira naimacina jeacinona finotañeno.

Jesús omoi ecimo itimie omoina jeare finuana llofuia rafue

(Lc 17.3)

¹⁵ Jesús nia llote:

—O ecimo itimie ona jeare finoia, naimie dine iena lluai. Daimaiai iena omico llono. O uai naimie fairioia, naimie o dibeimo jai iite. ¹⁶ O uai naimie fairioñenia, jiai menami ena uiño, o llamo iaiaiai cacareillesa. ¹⁷ O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina iñoñedimiena omoi nabaiñena isoi, Moisés llogacinodo raise jaiñedino omoi nabaiñena isoi, naimi ena

nabaiñeno. Omoi ofiracomo naimiēna feiñoñeno. ¹⁸ Iese omoi finoia, omoi comeciai daje isoi lloillamona, Jusiñamuimona mare.

¹⁹ 'Omoimo nia lloiticue. Daje isoi comecina cue Moo Jusiñamuimo jicallena menamaiai facajamona, cue Moomo iaimaii jianona, cue Moo iaimaii jitaille rafuena finote. ²⁰ Menamie cue dibeimo illamona, damie amani cue dibeimo illamona, naimaci motomo iticue.

²¹ Pedro naimiemo jicanuaibite:

—Nama, cue ecimo itimie cuena jeare finoia, ¿niga icaiño ibana cue oñeno iena feitaiticue? Nibai siete digacaiño.

²² Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaiño feita. Iena omoi raise uiñollena, bie rafuena lloiticue.

²³⁻²⁴ 'Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentas iballena. Damie eo debede. Diez mil ucubena debede. ²⁵ Naimie ucube iñena jira, naie illaimadi ie cuenta iballena, naimie ai, ie uruaii diga, nana ie raruaii diga, fecallena llote. ²⁶ Iena cacajano, ie illaima uicomo caiñici ifodo raita duere jicade: “Nama, dama ite. Fecuisse omo ibaiticue”. ²⁷ Naimie duenailamona, naie illaima llote: “Ibatañeiticue. Cuemo jai debeñedio. Mai jai”. ²⁸ Ie mei naimie jaide. Bai jaillanona, jiaie maijiraima diga dafaifide. Jai debeñedimieo janore debede. Cien ucubena debede. Jai debeñedimie dinena ie cimaiona llinuana llote: “O debia cuemo mai iba”. ²⁹ Ie jira debedimie caiñici ifodo ana rainadacaida, duere jicade: “Ucube cuemo iñede; iadedi cuena duenai. Fecuisse omo ibaiticue”. ³⁰ Uai ote: “Ja raire jitaidicue”. Naimiēna duenaiñena jira, cárcelmo naimiēna jonetade, ie cuenta iballe dinori. ³¹ Naimie nabaiñiai iena fidianona, sunaitimaci. Ie jira naimaci illaima dine nana naie rafuena lluidimaci. ³² Naie illaimadi nano debedimieo abido uaiduano, naimiemo llote: “Maraiñedio. Navui o cuentana ibatañedicue, cuemo o duere jicanua jira. ³³ ¿Bue ñe o nabaina duenaiñedio, ona cue duenaila isoi?” ³⁴ Icirillamona, naie illaima naimiēna cárcelmo jonetade, nainomo duere sefuillena, nana ie cuenta iballe dinori. ³⁵ Ie isoide. Cue Moo Jusiñamui omoina duere finote, omoi comeciai jitaillamona omoi ecimo itimie ie maraiñede finoca rafuena omoi feitañenia —llote.

19

Jesús iima ie aina dotaja rafuena llofuia rafue

(Mr 10.1-12; Lc 16.18)

¹ Ie llofueoicaigano diga Galileamona jaillanona, Jordán railla ille ruica dibeimo Judeamo Jesús jaide. ² Ailluena comini naimiēna racadimaci Nainomo duidinona jillotate. ³ Naimiēna facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiēna duere finoacadimaci. Jicanotimaci:

—¿Iima ie aina dotajana rairuidio? ¿Nie isoide rafue muidona damie ie aina dotarede?

⁴ Jesús dinena uai ote:

—Moisés micori jiaie cuete: “Enirue finua facaiseconi Jesiñamuidi come iaimaiaina finode. Imana finode. Riñona jiai finode”. ⁵ Ie jira Jusiñamuidi jiaie llote: “Ie ai diga illena, iima ie moona fainonocaita. Ie eina jiai fainonocaita. Ie ai diga illamona, menade comedi daamiēna jai jaide” llote. ⁶ Menade come jai damiēna jai ite. Jusiñamui iese iaimaiaina itataja jira, iima ie aina dotañellesa. Riño ie inina dotañellesa.

⁷ Dane jicanotimaci:

—¿Bue ñe Moisés micori cuete: “Iima ie aina dotaacania, dotalle rabena nano cueite. Ie mei naiñaiñona dotaite”?

⁸ Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuiñede; iadedi nano dofoconi iese iñede. ⁹ Jiaie riño diga naimie illena, ie aina bu dotaia, jiaie iima diga naiñaiño iñenia, naimiedi jeacinona jai finode. Ie aina dotajana rairuidicue.

¹⁰ Naimiemo ie llofueoicaigano dinena llotimaci:

—Iese ia, cai jitaillamona aina jamai cai dotanina jira, damamei ainidicai.

¹¹ Naimacimo Jesús llote:

—Nana comini omoi como llucinodo jainidimaci. Dani Jusiñamuina jitaídino iedo jairedimaci. ¹² Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

Jesúdi naimie dine uruiai billana jitailla rafue

(*Mr 10.13-16; Lc 18.15-17*)

¹³ Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo lollena jitaídimaci. Ie llofueoicaigano iena rairuidimaci; ¹⁴ iadedi Jesús raite:

—Uruiai cue dine billesa. Naimacina rairuiñeno. Cuen a bie isoide ñnotinodi Jusiñamui ie cominina sedajanomo jainaaidimaci.

¹⁵ Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

Ucuberedimie Jesús diga ñaia rafue

(*Mr 10.17-31; Lc 18.18-30*)

¹⁶ Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena finoiticue?

¹⁷ Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina ñnocana jai.

¹⁸ Uai ote:

—¿Nie llogacinuaina ñnoiticue?

Jesús dinena uai ote:

—Comena meineñeno. O aiñede riño diga iñeno. Fiiñeno. Jiaimiena o llogidoia, tainona lloñeno. ¹⁹ O moo uaina ñno. O ei uaina ñno. O abina o isiruilla isoi, nana cominina isirui.

²⁰ Naie conirue uai ote:

—Nana iena jai ñnoticue. ¿Nie isoide rafuena nia finoiticue?

²¹ Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuen a o ñnuamona, monamo ico jaca iitio. Cue llofuegamiena o illena, mai cue diga bi.

²² Iena naimie cacajano, sunaite. Naimiemo eo ailluena ra illa jira, iena fecaacaiñede.

²³ Jesús ie llofueoicaiganomo llote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuiruite. ²⁴ Iena nia lloiticue. Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁵ Iena ie llofueoicaigano cacajano, Jusiñamui cominina ucuberedino raise jainina jira, “¿Niese dueredinodicaidi Jusiñamui cominina jaiticai?” raillamo comeciaina facadimaci. Raijicaillanona, raitimaci:

—Nana comini rana jitailla jira, buca jillobiti.

²⁶ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁷ Pedro uai ote:

—Ero, o llua isoi nana cai rana faionocaida, o diga jaicabidicai. ¿Niese Jusiñamuimona ibana feiñoiticai?

²⁸ Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jiai iite, nainomona omoi judíuai doce nairaiaina omoi sedallena. ²⁹ Cuen a naimie isiruillamona, ie jofona bu faionocaia, ie amatiaina

bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite. ³⁰ Jamai bue isoidomoi. Omoimona jiaino jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

20

Jesús Jusiñamui ie cominina sedaacana llua rafue

¹ Jesús llote:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uiñollena, bie rafuedo iena lloiticue. Jitiramo daje patrón ie illimo maijillena, maijiuidinona jenuaide. ² Dajeriena baillanona, “Omoimo daberie ibaiticue” llote. “Jee” raitimaci. Ieconi ie illimo maijillena, naimacina orede. ³ Jitoma nia oni daidemo, mercadomo naimie jiaisona ciode. Jamai itimaci. ⁴ Ie jira naimacimo llote: “Cue illimo maijjai. Raise ibaiticue” llote. ⁵ Ie mei jaidimaci. Jitoma naidai ia, jiaisona ciuanona, naimacimo maijillena llote. Jitoma oni caidemo, jiaisona ciuanona, naimacimo maijillena jiai llote. ⁶ Jitoma jasicí muido itemo, jiaisona ciuanona, jicanote: “¿Bue ñellena namonana jamai itomoi?” ⁷ Uai otimaci: “Jaca caimo maijille rana budi lloñede”. Ie jira naimacimo llote: “Mai. Cue illimo maijjai” llote. ⁸ Jitoma edacaidemo, naie patrón ie mullaímamo llote: “Maijirainina uaido. Jinafona maijiaidinona raire nano iba. Ie mei jitiramo maijiaidinona jinafo iba” llote. ⁹ Ie jira jinafona maijiaidinona nano ibade. Dabe ibade. ¹⁰ “Naimaci baifemo feiñoiticaí” raillamo jitiramo maijiaidino comeciaina facadimaci; iadedi iese feiñoñedimaci. Nana daberie feiñotimaci. ¹¹ Ie jira naie patrón joreñona jeare ñaitimaci: ¹² “Jinafona maijiaidino dallu maijidimaci. Ecasilla facaise maijñedimaci; iadedi namonana maijdicai. Dani cai ibaja isoi ibadio” ñaitimaci. ¹³ Naimacimona damiemo naie patrón llote: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. ¹⁴ O ucubena jai o feiñua jira, mai jai. Cue jitailla jira, da o ibaja isoi dallu maijidinona ibadicue. ¹⁵ Cue ucubena jira, cue jitailla isoi cue ibaia, ¿niese cuena jeare ñaitomoi? Jiaisona cue duenailanona, ¿bue ñellena uradoidomoi? Mai jai” llote. Jusiñamui ie cominina sedaacana omoi raise uiñollena, bie rafue jai lloticue. ¹⁶ Jamai bue isoidomoi. Omoimona jiaino jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

Jesúdi ie fiodaillena dane llua rafue

(Mr 10.32-34; Lc 18.31-34)

¹⁷ Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite. ¹⁸ Raite:

—Ero, Jerusalémo jai jaidicai. Monamona billanona, iimana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. ¹⁹ Judíuaiñedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

Jesús dine Jacobo Juan iaímaiai ei billa rafue

(Mr 10.35-45)

²⁰ Naie facaise Jesús dine Jacobo, Juan iaímaiai ei diga, bitiaímaiai. Iaímaiai moodi Zebedeo. Jesús dine iaímaiai ei rillanona, naimiena raise uaidollena, caiñici ifodo ana rainadacaida llote:

—Omo daje rafue jicanoiadicue.

²¹ Naiñaiño Jai Jesús dinena jicanote:

—¿Bue ñiaibitio?

Naiñaiño uai ote:

—Illaïmana o jailla mei, cue jito iaïmaiai o ecimo illana o llwana jitaïdicue. Damie o nabeimo. Jiaïmie o jarifebeimo. —Jiaino baifemo iaïmaiai illena, naiñaïño iese llote.

²² Naimacimo eruaiïllanona, Jesús ðinena uai ote:

—O jitaïllacinona raise uiñoñedio. Cue duere sefuiticue.

Naiñaïño jito iaïmaiaïmo jïcanote:

—¿Ie isoi duere sefuiacadomico?

Uai otïiaïmaiai:

—Jii.

²³ Jesús ðinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

²⁴ Iena jiaie llofueoicaigano cacajano, naie iaïamaiaïri iciritimaci. ²⁵ Jesús nana naimacina uaiduanona, raite:

—Nana illaïcominidi naimaci anamo itinona ocuicabidimaci; ²⁶ iadedi omoi ðine iese iñena. Omoïmona bu imïena iacania, omoi mullaïmana naimie jaisoïllasa. ²⁷ Omoïmona bu imïena iacania, omoïna naimie canocana jaisoïllasa. ²⁸ Cuemona fueo. Biñedicue cominina cue ocuïllena; iadedi cominina canuaïbidicue. Cue jitaïlla jira, nana comini facaina fiðaisaïbiticue. Naimaci jeacinomona naimaci jillobillena, fiðaisaïbiticue. Aïlluena comini cuena iïnuamona jilloitimaci. Coninina omoi canua —llote.

Jesús mena uisïnidiïmaiaïna jillotaja rafue

(Mr 10.46-52; Lc 18.35-43)

²⁹ Jericó raïlla nairaïmona jaidimacimo, aïlluena comini naimaci jinafona racadimaci.

³⁰ Ie facaiseconi mena uisïnidiïmaiaï nai fuemo raïðiaïmaiaï. Jesús naïedo jaïllano cacajano, naimïena ado uaidotïiaïmaiaï:

—David micori Jitona o illamona, Jusiñamuïmona o billa jira, cocona duenai. Cocona cano.

³¹ Iaïmaiaï lliicaïllena, Jesús ðiga jaidino iaïmaiaïna lletade; iadedi eo cuirioidiaïmaiaï:

—Maestro, David micori Jitona o illamona, cocona duenai.

³² Iaïmaiaïna Jesús cacajano, ieconï naïdadajanona, iaïmaiaïna uaidote. Jïcanote:

—¿Nïese omiconona cue nïbaïana jitaïdomico?

³³ Uai otïiaïmaiaï:

—Maestro, coco uisina o cioitajana jitaïdicoco.

³⁴ Iaïmaiaïna duenaïllanona, iaïmaiaï uisina jetade. Ieconï iaïmaiaï uisidi ciode. Iaïmaiaï jai ciuanona, ie llofueganona iaïmaiaï jaïllena, Jesús ðiga jaidiaïmaiaï.

21

Jesús illaïma isoi Jerusalémo jaïlla rafue

(Mr 11.1-11; Lc 19.28-40; Jn 12.12-19)

¹ Oni jaïllanona, Jerusalémo iaïreicaïðimacimo, Betfagé raïlla nairaïmo Jesús ie llofueoicaigano ðiga ridimaci. Olivos raïlla anedumo ite. Ie llofueoicaiganomona Jesús menamïena orede. ² Raite:

—Bie nairaï illa uïcomo maï omico jai. Nainomo cuinaca burrana baitomico. Ie ecimo ie uruena baitomico. Naie iaïmaiaïna suiñuano bene ati. ³ Omïcomo “¿Bue ñïllena bie suiñodomico?” bu jïcanoïa, llono: “Coco Nama naie iaïmaiaïna jitaïde. Naïlli naimie iaïmaiaïna raïre abïdo oretaita” —raite.

⁴ Jusiñamui facaina lloraïma micori jaïe llua isoi, bie rafue suïde. ⁵ Naimie micori jaïe cuete:

Jerusalén itinomo llono:

“Ero, omoi illaïma omoïna sedallena biite.

Abi iedoñeno biite.

Burra urue emododo naimie biite”

cuete. ⁶ Iaïmaiaï jaïllanona, Jesús llua isoi finodiaïmaiaï. ⁷ Burra ie urue ðiga atïðiaïmaiaï.

Burra urue emodomo naimie llofueoicaigano naimaci iïroïna jobianona, ie emodomo Jesús raïnadate. ⁸ Naimïena iobitallena, illaïma isoi naimie jaïllena, aïlluena comini

imaci iniroi diga, naiso motomo jobedimaci. Jiaino raforono uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiirisite:

—¡Cai Jilloitaraima billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caina jilloitajasa!

¹⁰ Jerusalémo naimie ridemo, nana nainomo itino naie rafuena uiñoiacadimaci.

—¿Buta bite? —jicanotimaci. ¹¹ Jesús diga bitino dinena uai otimaci:

—Jesús bite. Naimiedi Jusiñamui facaina lloraima. Galileamo ite Nazaret imie.

Jesúdi Jusiñamui jofomona damieriena dotaja rafue

(*Mr 11.15-19; Lc 19.45-48; Jn 2.13-22*)

¹² Jerusalémo Jesús rilla mei, Jusiñamui jofomo naimie jaide. Naie jofu eo aillue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecauidimaci. Iena Jesús ciuanona, naimaci mesaiaina oni caicode. Ucugina fecauidino rairacuai jiai oni caicode. ¹³ Naimacimo llote:

—Ie facaina lloraima Jusiñamui llogacino jaie cuega: “Cue jofu ite, nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

¹⁴ Ie facaise uisnidino Jusiñamui jofomo naimie dine bitimaci. Ñuja-ñujacaida macaritino jiai bitimaci. Naimaci billanona, Jesús naimacina jillotate. ¹⁵ Nainomo Jesús diga mare rafuena finode. Diga cominina jillotate. Iena ciuanona, nainomo ite uruai ado cuiirisite:

—David micori Jitori iobidicai. Jusiñamui lloraini micoriai jaie llua isoi, cai Jilloitaraima jai ite.

Iena ciuanona, iena cacajanona, judúuai illaicomini iciritimaci. ¹⁶ Naimiemo jicanotimaci:

—¿Bie uruai cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomoi? Naimie cuete:

Naimiemo Jusiñamuidi uruiaina mare iobillacinona fecataite.

¹⁷ Naimacina fainonocaida, Betaniamo Jesús jaide, nainomo inillena.

Jesús higuera railla riarana faidua rafue

(*Mr 11.12-14, 20-26*)

¹⁸ Ie areruido Jerusalémo abido ie llofueoicaigano diga Jesús bia, aimetaite. ¹⁹ Nai fuemo higuera railla riarana ciuanona, iena jibuide. Naiemo naie llisilladi inede. Dama ie ibena ciode. Ie jira naie amenana llote:

—Biemona jaca llisíñeite. —Iese railla dacaiño naie riaradi duide. ²⁰ Ie llofueoicaigano iena ciuanona, rajjicaillamona raitimaci:

—¿Niese naie riarai raire duide?

²¹ Jesús dinena uai ote:

—Uanaicinona omoimo lloiticue. Cue Moona raise omoi inoia, bie isoide rafuena finoitomoi. Raise omoi inoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaille rana finoite. ²² Naimie iena finuana omoi inuamona, nie isoide rafue cue Moomo omoi jicajia, iena naimie finoite.

Jesúdi ie siño uaina llua rafue

(*Mr 11.27-33; Lc 20.1-8*)

²³ Jerusalémo rillanona, Jusiñamui jofomo Jesús fo jailla mei, nainomo ite cominina llofue. Judúuai illaicomini naimie dine billanona, jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁴ Jesús dinena uai ote:

—Omoimo daje rafuena nano jicanoitucue. Raise omoi fairioia, omoimo cue uaido cue finoca rafuena lloiticue. ²⁵ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluaña ññoñedomoi?” ²⁶ “Comini” cai fairioia, bene itino caina nibai meineitimaci, Juan micoridi Jusiñamui facaina lloraima naimaci railla jira.

²⁷ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

Jesúdi mena jito iaimaiaí illa llua rafue

²⁸ Judúuai illaicominimo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo birui maijiaí”. ²⁹ Uai ote: “Jaiacaiñedicue” llote. Dallu illanona, ie comecina dane facajano, maijiaide. ³⁰ Jiaie jitomo daje isoi llote. Naimie uai ote: “Jii, maijiaitucue” llote. Iese llote; iadedi maijiañede. ³¹ ¿Nie jitoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoína ñaitucue. Omoimona marañedimaci; iadedi Jusiñamui cominina naimaci jaillamona, gobierno ucube oraini Jusiñamui illanomo iitimaci. Callirediñaiñuaidi nainomo jiaí iitimaci; iadedi nainomo jaca iñeitomoi. ³² Marena omoi comeciaina itatallena, Juan micori navui bite; iadedi naimie micorina ññoñedomoi. Ucube oraini naimie micori rafuena ñnotimaci. Callirediñaiñuái naimie micori rafuena ñnotimaci. Iena uiñotomoi; iadedi omoi comeciái iuaillaina meidoñedomoi. ññoñedomoi.

Jesúdi marañede maijiraini rafuena llua rafue

(Mr 12.1-12; Lc 20.9-19)

³³ Judúuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona jiaínomo fecade. Ie mei jiaie eniruemo jaide. ³⁴ Uvas jai einaila facaise riaraiaina sedaraini dine naie patrón janore mullaiaína orede, naimie facaise iedinona naimie feñollena; ³⁵ iadedi naie sedarainidi ie mullaiaína duere finosite. Daje mullaimana fatimaci. Jiaimiena meinetimaci. Jiaimiena noficina fairinotimaci. ³⁶ Ie mei patrón jiaie mullaiaína orede. Naimacina jiaí duere finodimaci. ³⁷ Ja muidomo ie jitona orede. “Cue jitona jaciruitimaci. Naimie uaina ñnoitimaci” comecina facade. ³⁸ Riaraiaina sedaraini naimiena ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” raitimaci. ³⁹ Naimiena jino dotajanona, naimiena meinetimaci. ⁴⁰ Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono —llote.

⁴¹ Judúuai illaicomini uai otimaci:

—Naie marañedinona dueruiñeno meineite. Ie mei jiaie cominimo naie illi fecajte, iena sedallena, naiemona riarana feñollena.

⁴² Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoína jaie cuete. Ie ciegafuena raise facañedomoi. Naimie micori cueda:

Jofu finoraini jitaíñena noficidi nana naie jofomo ite nofici baifemo jai uaide.

Jusiñamui iena finotate.

Iena cai uiñuamona, “Eo mare” raiticaí

cuega. Jusiñamui cominina damierie jaillana naimie micori cuete. Jusiñamui oretagamierna damierie jitañenamona, naimie cominina jaiñeitimaci; iadedi Jusiñamui oretagamierna ailluena ñnuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitañena jira, naimie cominina jaiñeitomoi. ⁴³ Jusiñamuidi ie cominina sedajanomo omoina itatañeite; iadedi jiaie cominina nainomo itataite, naimie jitailla rafuena naimaci finua jira.

⁴⁴ Jesús llote:

—Naie noficina dane ñaiticue. Noficimo bu eicaitaia, bofedaite; ia naie nofici bumo ana uai, naimierna saitaite. Ie isoide. Cue llwana omoi jamaia, duere sefuitomoi. Iena omoi ñnoñena, ja muidomo faifitomoi.

⁴⁵ Jesús llwana naie judiuai illaicomini cacajanona, naimiedi naimacina ñaiana jai uiñotimaci. ⁴⁶ Icirillamona, naimierna gaitacadimaci; iadedi cominina jaciruitimaci, cominidi naimie Jusiñamui facaina lloraimana raillanona.

22

Jesúdi illaima ie jito aina ua llua rafue

¹ Jusiñamui jofomo Jesús nia illanona, nainomo itinona llofue:

² —Jusiñamui ñibeimo comini jailla rafuena omoimo lloiticue. Iena omoi uiñollena, bie rafuedo iena lloiticue. Illaimadi ie jito ai ua rafue finode. ³ Naimie ie mullaini orede, rafuemo llogano uaidollena; iadedi nai llogano biacaiñedimaci. ⁴ Dane jiaie mullaini oretajano llote: “Nai lloganomo llono: ‘Rafue guille jai finocasa. firetaiai, farediretaiai diga, jai faga. Jai nana fuite. Rafuemo mai bi’ ”. ⁵ Naimaci cacarefiacaiñede. Damie ie illimo jaide. Jiaimie ie chinganamo jaide. ⁶ Jiaino mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. ⁷ Ie jira naie illaima eo icirite. Naimie soldaduai oretate, naimie mullaini meinetinona meinellena. Naimie naimaci illano jobaitate. ⁸ Ie meinoconi ie fiebide mullainimo llote: “Rafue guille jai nana finoca; ia llogano maraiñedimaci. ⁹ Naiso bojicaillanomo jai. Nana o ciolle diese llono: ‘Rafuemo bi’ llono”. ¹⁰ Ie jira ie mullaini jai naisona jaide. Maraiñedino baillanona diese ofitatimaci. Jiai maredino diese ofitatimaci. Rafue finua jofo naie llogano diga oruide. Illaima nainomo fecaca iniroina jitadimaci. ¹¹ Illaima fo bia, mesamo itino jibuillena, ñnomo daje iima rafue ie mare iniroina jitañenana ciode. ¹² Naimiemo jicanote: “Nabai, ¿niese bene rafue ie mare iniroina jitañeno bitio?” jicanote. Naimie uainicaide. ¹³ Ie jira naie illaima ie mullaiaimo llote: “Naimie cuena ñnoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiai sunaite” llote. ¹⁴ Ero, naie rafuemono omoi fueo. Illaima ailluena uaidote; ia nana biñedimaci. Ie isoide. Jusiñamui ailluena cominina uaidote; iadedi naimacimona janore fetode.

Jesúmo gobiernomo ucubena fecajana jicanua rafue

(Mr 12.13-17; Lc 20.20-26)

¹⁵ Naimacimo Jesús llua mei, fariseuai comini abido jaillanona, coniniri siadotimaci. Naimie raise uai oñedena, naimierna duere finollena, Jesúsna facaciacadimaci. ¹⁶ Ie jira naimie ñne naimaci cominimona dajerie oredimaci. Herodianuai railla cominina jiai jaidimaci. Jesús ñne rillanona, raitimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. ¹⁷ Omo rafuena jicanoiacadica. Dani Jusiñamuina sedadica; iadedi romanos railla nairai anamo birui cai illa jira, ¿naimaci illaima Césaromo ucubena cai fecajana rairuidio? Caimo llono —llo timaci.

¹⁸ Naimaci comeciaina maraiñedicinona facajana Jesús uiñuamona, uai ote:

—¿Bue ñnellena cuena facacitomoi? Maredinona abi caitadomoi. ¹⁹ Ucube cuemo acata —llote. Ie jira acatatimaci.

²⁰ Jesús dinena jìcanote:

—¿Bu ie joreño nainomo ite? ¿Bumo jainaiade bie cuega radi?

²¹ Uai otimaci:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

²² Naimie lluaana cacajano, rajicaidimaci. Naimie jeare uai oñena jira, naimie dinomona oni jaidimaci.

Jesús ðine saduceuai railla comini billa rafue

(Mr 12.18-27; Lc 20.27-40)

²³ Naie facaise saduceuai railla comini naimie ðine bitimaci. Fiodaillamona jaca buna jilloñellena ðnotimaci. Jesúmo llotimaci:

²⁴ —Maestro, Moisés micorì jaie cuega: “Ìma fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega. ²⁵ Ero, cai motomo siete amatiaì ite. Nano doforamie ie aina ote. Naimie nia uruiainide fiodailla. Ie emodo imie ie ama feciñona ote. Uruiainide jiaì fiodailla. ²⁶ Naie siete ðigamiedemona iese sefuide. ²⁷ Ja muidomo naie riño jiaì fiodaite. ²⁸ Fiodaillamona, ico naimaci jilloiadedi, ¿bu naie riño ienite? Naiñaiño siete ðigamièna ðniredede —llotimaci.

²⁹ Jesús uai ote:

—Moisés micorì cuegafuiaina raise omoì uiñoñena jira, Jusiñamui uaina raise omoì uiñoñena jira, bie isoide rafuena raise uiñoñedomoì. ³⁰ Fiodaillamona jillua mei, Jusiñamui ðiga ite comini ainitimaci. ðninitimaci. Monamo Jusiñamui jaenisaì aindimaci. ðnindimaci. Ie isoi itimaci. ³¹ Fiodaitino jilluana omoìmo lloiticue. Jusiñamui omoì jaiagaimo jaie llogacinona ðnoñedomoì. Naimie llote: ³² “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. Jai fiodaitimaci; ia naimaci joreñuai nia itimaci. Jusiñamuidi ðani cajedino imaci Jusiñamuina jira, naimaci joreñuai naimie ðine itimaci. Ico naimaci abiaina jiaì jillotaite —llote. ³³ Nainomo ite comini iena cacajano, naimie llofuiari rajicaidimaci; ia saduceuai ðinena uainicaidimaci.

Jesús nanoca llogacinona llofua rafue

(Mr 12.28-34)

³⁴ Saduceuai comini uainicaillana fariseuaidi jai fidiano, Jesús ðine ofidimaci. ³⁵ Naimacimona ðamiedi Moisés micorì jaie llogacinona eo uiñote. Jesúna facacillena, naimiemo jìcanote:

³⁶ —Maestro, Moisés micorì jaie llogacinuaimona, ¿nie llogacino ua nanoca llogacinona?

³⁷ Jesús ðinena uai ote:

—Moisés micorì jaie cuega: “Omoì jitailla jira, nana omoì comecimona cai Nama Jusiñamuina isirui. Naimiemo omoì comecina eo faca”. ³⁸ Bie ua nanoca llogacino. ³⁹ Ie emodomo ite llogacino janore daje isoide: “Ñani omoì abi omoì isiruilla isoi, omoì ecimo itinona jiaì isirui”. ⁴⁰ Bie mena llogacinomona nana jiaie llogacinuai comuide. Nana Moisés micorì llogacinuai naiemona comuide. Nana Jusiñamui facaina lloraìni micoriaì llogacinuai naiemona comuide —llote.

Jesús ðinena fariseuai cominimo jìcanua rafue

(Mr 12.35-37; Lc 20.41-44)

⁴¹ Naimie ðine nia fariseuai comini ia, Jesús naimacimo llote:

⁴² —Jusiñamui lloraìni micoriaì jaie raitimaci: “Jusiñamuidi Cristo raillamièna ore-taite, ie cominina sedallena”. ¿Niese naimièna raitomoi? ¿Bu jito naimiedi?

Uai otimaci:

—David micorì jito. David micorì isoi Cristo ie cominina sedaite.

⁴³ Jesús ðinena jìcanote:

—Naimiedi David micorì isoidena, ¿bue ñellena David micorì “Cristodi cue Nama” llote? Jusiñamui Joreñodi David micorì ñaitatajanona, David micorì llote:

⁴⁴ Jusiñamuidi cue Namamo llote:

“Illaimana o illamona, cue nabei dine ana rai.

Ona iñoñedino o anamo itataiticue”.

⁴⁵ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama.

⁴⁶ Uaina onidimaci. Naie facaisemona Jesús ie uaina dane uaitañedimaci.

23

Jesúdi judíuai illaicomínina ñaia rafue

(Mr 12.38-40; Lc 11.37-54; 20.45-47)

¹ Jusiñamui jofomo Jesús nia illanona, naimie dine ailluena comini bitimaci. Ie llofueoicagano nainomo jiai illanona, nana naimacimo llote:

² —Moisés micori llogacinuaina llofuerainidi naie rafuedo jai jaicabidimaci. Fariseuai comini iedo jiai jaicabidimaci. ³ Naimaci llofuiacinodo omoi jai. Naimaci llofuiana omoi cacarefi; iadedi naimaci illa isoi omoi iño, naimaci llofuiacinodo naimaci jaiñena jira.

⁴ Omoi einamaci llogacinuaido raise omoi jaillena, diga rafuena omoi finuana jitaídímaci; iadedi iedo omoi jaillena, omoína jaca canoñedimaci. “Jusiñamuina eo raise sedadicaí”

comecina facadímaci. Iemo naimaci comecina facajamona, ⁵ iena omoi cioillena, nana naimaci finua rafuena marefodo finodímaci. Jiaie cominimo ite Jusiñamuimo jirabe baífemo faitibena uiacacabidímaci. Iniroi fuedadi aillofena jonegana gaidímaci.

⁶ Rafue ia, naimaci jamai bue isoíñedínomo comecina facajanona, rafue nama ecimo raiacadímaci. Ofiracomo uicomo raiacadímaci, comini naimaciri acarillena. ⁷ Níne naimaci jaia, nana comini naimacina uaiduana gaidímaci. Maestrodicinona uaiduana jiai gaidímaci. ⁸ Jusiñamuina eo raise naimaci sedajana omoi uiñuana jitaídímaci. Naimaci isoi iño. Omoi damacina jira, omoímona damie omoi baífemo faíamo comecina fa-

cañeno. Naimiena maestrona raiño. Omoi baífemo cue illanona, omoi maestrodicue. ⁹ Omoi Moo Jusiñamui monamo illanona, dama naimiena seda. Jiaimiena sedaño. Jusiñamui isoi jiaimiena “Moo” raiño. ¹⁰ Omoi damacina jira, omoímona damiena “Cai illaima” raiño. Omoi illaimana jai iticue. ¹¹ Omoímona bu imiena jaiacania, omoi mullaimana naimie nano jaillamona, omoína naimie canua. ¹² Jusiñamuidi “Jiaíno afemo iticue” raillano comecina facadímiena jamai bue isoidímiena itataite; ia Jusiñamuidi “Jiaíno afemo iñedicue” raillano comecina facadímiena jamai bue isoíñedímiena itataite.

¹³ Naie facaise Moisés micori llogacinona llofuerainidi fariseuai comini diga illanona, Jesús naimacimo llote:

—Jusiñamui omoína duere finoite. Mareuidinona abi caitadinodomoí. Jusiñamui díbeimo comini illana jitaíñedomoí. Naimie díbeimo omoi illana jiai jitaíñedomoí. Ie muidona Jusiñamuimona duere sefuitomoí. ¹⁴ “Jusiñamuina eo sedadímaci” omoímo comini comeциаína facajana jitaídomoí. Ie jira are jídomoí; iadedi iese iñedomoí. Maraiñede rafuena finocabidomoí. Jífuianona feciñuai rana bairocabidomoí. Ie jira Jusiñamui omoína eo duere finoite. ¹⁵ Damiena omoi díbeimo itatallena, omoi isoi Jusiñamui rafuedo naimie jaillena, diga rafuena finodomoí. Omoi díbeimo illa mei, omoi baífemo omoi einamaci llogacinodo naimie jaillana jitaídomoí. Omoi diga ico naimie ua faífite. Comínina uanaíñedicinodo jaitatomoí. Iese omoi illa jira, duere sefuitomoí.

¹⁶ Omoi llofuiacino diga comínina canoñedomoí. Mareuidinona abi caitadinodomoí. Raicabitomoí: “Cai lloga uai cai finollena jiai comini uiñollena, Jusiñamui jofomo ite oro mamecina llinoticaí; iadedi Jusiñamui jofo mamecina cai llinoía, cai lloga uaina cai finoñenia, caimona mare. Jusiñamuimona duere sefuiñeiticaí” raicabitomoí. ¹⁷ Abi uiñoñedomoí. Omoi llofuiacino diga comínina canoñedomoí. Jusiñamui jofomo naie oro jainaiailla jira, naie orodi mare; iadedi naie oro naie jofo baífemo uaiñede. Abina omoi uiñoñena jira, Jusiñamui omoína duere finoite. ¹⁸ Jiai raitomoí: “Jusiñamuimo faga toica ocaina jobaisoillano mamecina cai llinoía, cai lloga uaina cai finoñenia, caimona mare; iadedi Jusiñamuimo fecaca toica ocaina mamecina cai llinoía, cai lloga uaina jaca finoiticaí”. ¹⁹ Abi uiñoñedomoí. Omoi llofuiacino diga comínina canoñedomoí.

Naie jobaisoillanomo naie ocaina illa jira, naie ocaina mare; iadedi naie ocaina naie jobaisoillano baifemo uaiñede. ²⁰ Ero, Jusiñamui mo ocaina jobaisoillano mamecina omoi linoia, nainomo ite ocaina mamecina jiai llinotomoi. ²¹ Jusiñamui jofo mamecina omoi linoia, Jusiñamui nainomo illa jira, naimie mamecina jiai llinotomoi. ²² Monamo ite ra mamecina omoi linoia, Jusiñamui illano nainomo illa jira, nainomona cominina naimie sedaja jira, naimie mamecina jiai llinotomoi. Omoi llua rafuena omoi finoñenia, Jusiñamui omoina duere finoite.

²³ 'Mareuidinona abi caitadinona omoi illamona, omoimo nia lloiticue. Nana omoi illimo ite ramona, nana omoimo ite ucubemona Jusiñamui mo janore jisa fecacabidomoi. Nana comini omoi isoi illena jitaidomoi. Mare; iadedi nanoca rafuena jaca finoñedomoi. Jiaie cominimo omoi comecina facañedomoi. Jiaie cominina duenaiñedomoi. Omoi lloga uaina finoñedomoi. Nana naie isoide rafuena omoi jiai finua. Iena omoi finoñenia, Jusiñamui omoina duere finoite. ²⁴ Abina uiñoñedomoi. Jallecima jiroracomo ia, iena oni faiga; ia aillue ra nainomo ia, iena cioiñeno namo gutadomoi. Ie isoide. Omoi llofuiacino diga cominina canoñedomoi. Jusiñamui ie eo jitailla rafuedo comini jaillana llofueñedomoi. Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

²⁵ 'Omoimo nia lloiticue. Omoi einamací llogacinodo eo jaidomoi; iadedi omoi comeciaina raise finoñedomoi. Eo fiidomoi. Jifuianona comini rana bairodomoi. Jeacinona finocana jaidomoi. ²⁶ Abina uiñoñedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise finoñedomoi. Nano omoi comecina raise fino. Mare rafue finocana jai. Omoi einamací rafuemo comecina facañeno; ia Jusiñamui rafuemo comecina faca. Iese omoi jaiñenia, Jusiñamui omoina duere finoite.

²⁷ 'Omoimo nia lloiticue. Marena finoca raiafo isoidomoi. Jinofe marena eruaide; iadedi nainomo mare ra iñede. Comini illaici jamai ite. Jai maraiñede. ²⁸ Ie isoidomoi. Marena eruaidomoi; iadedi maredinona abi eo caitadomoi. Omoi comeciaino eruaide. Omoi comecina raise omoi finoñenia, Jusiñamui omoina duere finoite.

²⁹ 'Omoimo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi, ³⁰ raillano: "Cai jaiagai Jusiñamui facaina lloraini micoriaina meinetimaci. Naie facaiseconi iticaidena, naimaci isoi finoñedicaí. Cai jaiagai isoi birui iñedicaí" raitomoi; ³¹ iadedi omoi llamona Jusiñamui facaina lloraini micoriai meinetino uruaí omoina uiñoticaí. ³² Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. ³³ Omoi maraiñena jira, jaio nairai isoidomoi. Ja muidomo iraimona jillobiñeitomoi. Nainomo duere sefuitomoi. ³⁴ Cue rafuena lollena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jiai oretaiticue. Dajeriena meinetomoi. Naimacina coraitomoi. Omoi ofiracomo dajeriena faitomoi. Diga nairaimo naimacina duere finoitomoi. ³⁵ Abel micori jaie ite. Naimie maremie. Ie ama naimiena meinete. Naimie facaisemona omoi jaiagai ailluena mare cominina meinetimaci. Ie mei omoi jaiagai Zacaría meinetimaci. Naimiedi Berequías jito. Jusiñamui jofomo Jusiñamui mo toica ocaina jobaisoillano ecimo naimiena meinetimaci. ³⁶ Uanaicino omoimo lloiticue. Naimacina omoi jaiagai meinia muidona, omoimona Jusiñamui birui ibana oite. Naimaci isoi maraiñede rafuena finocana jaidomoi. Jusiñamui omoina duere finoite.

Jesús Jerusalémo itinomo llua rafue
(Lc 13.34-35)

³⁷ Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona nofcina fairinuano, naimacina meinetomoi. Omoina cue sedallena, atava ie uruaí sedaja isoi, diga icaiño cue anamo omoina uaidoiadicue; iadedi omoi dinena cuena jitañedomoi. ³⁸ Iemona Jusiñamuidi omoi

illanona jai fainonocaide. ³⁹ Cue Moo ðine jaiticue. Cue jailla mei, cuena cioiñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

24

Jesúdi Jerusalémo ite Jusiñamui jofu judaiana llua rafue

(*Mr 13.3-23; Lc 17.22-24; 21.5-24*)

¹ Jusiñamui jofomona ie llofueoicaigano ðiga Jesús jino jaidemo, Jesúna nai jofona eruaitatimaci. ² Jesús ðinena llote:

—Bie jofona ciodomoi. Uanaicinona omoimo lloiticue. Nana bie jofomo ite noficiái ico judaisite —llote. ³ Ie mei Olivos railla anedu ðine rillanona, Jesús naie muidomo raïdemo, ie llofueoicaigano naimiemo iena anado llotimaci:

—Jusiñamui jofu judaiana omo jicanoiacadicaí. ¿Niruido iena suite? Caimo llono. O abido billirui iaírei ia, ¿nie isoide rafue suite, o abido billiruina cai uiñollena?

⁴ Uai ote:

—Omoína bie rafuena bu jifueñellena, omoi abina rairui. ⁵ Ailluena comini cue mamecido billanona: “Cristodicue” raitimaci. ðiga cominina jifueitimaci. Iemona omoi abina rairui. ⁶ Jobaimiai illena fidiitomoi; iadedi jaciruiñeno. Iese suite; iadedi abido nia biñeiticue. ⁷ Daje nairai jiaie nairai ðiga jobairitimaci. Daje gobierno jiaie gobierno ðiga jobairite. ðiga illanuaimo comini aime gutitimaci. ðiga illanuaimo ñuisañuái suite. ⁸ Iese suia, omoi duere sefuillifue omoimo suite.

⁹ Cuen a ñinoñedino omoína gaitatajanona, omoína meineitimaci. Cue cominina omoi illamona, nana nairaíai omoína enoitimaci. ¹⁰ Naie facaise cue ðibeimo itinomona ailluena abido danomo jaitimaci. Iemona duere omoi sefuillena, omoína janoñeitimaci; iadedi omoína enoillamona, omoína llogidoitimaci. ¹¹ Naie facaise ðiga comini raitimaci: “Jusiñamui facaina llorainidicaí”; iadedi Jusiñamui facaina llorainiñedimaci. Uanaicinona lloñeitimaci. ðiga comini naimaci ðibeimo itataitimaci. ¹² Jeacino eo comuicana jailla jira, ailluena comini conini isiruiñeitimaci; ¹³ iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁴ ðiga cominidi Jusiñamui ðibeimo comini ille rafuena nana nairaímo lloitimaci, nana nairaíai iena cacaillena. Ie mei abido biiticue.

¹⁵ Cue lluomo cacarei. Daniel micori Jusiñamui facaina lloraiíma. Naimie micoridi jiaimie jearede rafue finollena jaie llote. Naie rafue suia, Jusiñamui jofomo Jusiñamuina sedañeitomoi. Nainomo naie jearede rafue finuana omoi ciuanona, ¹⁶ naiemona omoi jillobillena, duere omoi sefuiñellena, Judeamo omoi illamona, aneduái ðine omoi aisi. ¹⁷ Jofu emodomo omoi ia, ana billanona, aneduái ðine raire rillena, jofomo jaiñeno. Nainomo ite rana omoi ðiga uiñeno. ¹⁸ Aneduái ðine raire rillena, illimo omoi ia, abido jofomo biñeno, omoi iniroi omoi ðiga uillena. ¹⁹ Naie rafuemona jillobillena, naie facaise urueside riño duere sefuite. Uruena nia jirode riñodi jiaí duere sefuite. ²⁰ Eo duere sefuiñellena, Jusiñamuimo omoi jicano, rollime facaiseconi bie rafue suiñellena. Moisés micori sábadomo are jaillana jaie rairuide. Sábadoruimo bie rafue suiñellena, Jusiñamuimo jicano. ²¹ Naie facaise comini eo duere sefuitimaci. Enirue finua facaisemona iese comini nia duere sefuiñedimaci. Ico iese eo duere sefuiñeitimaci. ²² Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

²³ Ie facaise omoimo bu raia: “Jai, Jusiñamui facaina lloraiíma benomo birui bairede. Naimiedi Cristo”, iena ñinoñeno. Jiaimie raia: “Oni batine Cristo birui bairede”, iena ñinoñeno. ²⁴ Cristona abi caitadino biitimaci. Jusiñamui facaina llorainina abi caitadino jiaí biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²⁵ Ero, bie rafue nia suiñenia, iena omoimo jai lloticue. ²⁶ Omoimo naimaci raia: “Ero, batine jofue iñenanomo Cristodi ite”, nainomo jaiñeno. Naimaci raia: “Ero, bene bie jofomo Cristo ite”, iena ñinoñeno. ²⁷ Mona borillamona mona jillacidi usere ciode. Nana cominimo bairede. Ie isoide. Cue abido bia, nana comini iena

uiñoitimaci. ²⁸ Urujaisai rifaide ramo ofillana uiñua isoi, nana cuena ñnotino cue billena uiñoitimaci.

Jesús abido ie bille rafue

(Mr 13.24-37; Lc 17.26-30, 34-36; 21.25-33)

²⁹ Jesús llote:

—Naie duere sefuilla facaise meinoconi jitoma lligaiñoñeite. Fivui jiai lligaiñoñeite. Monamona ucuai llujite. Nana naie radi jaidisite. ³⁰ Ie mei monamo baireiticue. Ieconi nana nairaijai jarire iitimaci. Jacinaitimaci. Uillie motodo cue billena cioitimaci. Ebire biiticue. Naimacina cue sedallena, illaimana biiticue. ³¹ Cue jaienisaina cue ecimona oretaiticue. Ado trompeta ficiretajano, cue fetocano diese naganomona ofitaitimaci.

³² Higuera railla riaromona omoi fueo. Bie eniruemo naie riaru firuillamona, fiemona raire illana uiñotomoi. ³³ Ie isoide. Bie rafue ico suia, cue billirui iaieiri illena uiñoitomoi. ³⁴ Uanaicinona omoimo lloiticue. Nana bie rafue suille facaiseconi bie nairai nia iite. ³⁵ Mona enirue diga fuite; iadedi cue lloga uai jaca suite. ³⁶ Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. ³⁷ Abido cue billirui iaieiri ia, Noé micori facaiseconi itino isoi comini iitimaci. Naimaci duere sefuillemo Noé micori facaise itinodi comeciaina facañedimaci. ³⁸ Naie facaiseconi nia eo noci deiñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. ³⁹ Nia noci deiñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. ⁴⁰ Naie facaiseconi menamie illimo danomo iitiiaimaia. Damie Jusiñamui dine jaite. Jiaimie fiebillanona, Jusiñamuimona duere sefuite. ⁴¹ Mena riño danomo doberitiaiñuai. Dañaiño Jusiñamui dine jaite. Jiañaiño fiebillanona, Jusiñamuimona duere sefuite. ⁴² Cue billirui omoi uiñoñena jira, iemo ocuiri. ⁴³ Bie rafuemo omoi comeciaina omoi faca. Jofo namadi fiiriraima nie naiona billena uiñotena, ie rana faifiñellena, ie jofona raise sedade. ⁴⁴ Ie isoi cue billemo ocuiri. Monamona ico abido biiticue. Omoi ocuiriñena facaisemo riiticue. Ie jira cue billemo nagarui ocuiri.

Jesúdi patrón ie mullaimana ie jofona sedataja llua rafue

(Lc 12.41-48)

⁴⁵ Jesús llote:

—Cue billena omoi raise cacaillena, jiaie rafuedo iena lloiticue. Patrón daje mullaimana ie jofona sedatate. Naie mullaima ñnogamie. Abina uiñotimie. Nainomo itinona raise ecacabide. Naie mullaimana ie jofona sedataja mei, naie patrón oni jaide. ⁴⁶ Patrón ico abido bia, ie jofona ie mullaima raise sedaia, mullaimari naimie iobillamona, ie mullaima marena iite. ⁴⁷ Iobillamona, patrón ie mullaimana nana ie raruiaina sedatataite; ⁴⁸ iadedi ie mullaima marañenia, ie comecina facaite: “Cue patrón are biñeite. Naimie lloga uaina finoñeiticue”. ⁴⁹ Ie comecina iese facaja jira, naimie anamo ite mullaiana faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁵⁰ Ie ocuiriñena facaise ie patrón abido billanona, naimiena duere finoite. ⁵¹ Ie isoide. Cue abido bia, cuena ñnotinori iobiticue; ia cuena ñnotinona abi caitadino dine cuena ñnoñedinona dotaiticue. Nainomo duere sefuillano eetimaci.

25

Jesúdi diez jitaiñuaina llua rafue

¹ Jesús llote:

—Abido cue bia, Jusiñamui ie cominina sedaite. Cue billemo ocuiritinona sedaite. Naie facaise ite cominidi diez jitaiñuaimo ite rafue isoidimaci. Naiñaiñuai lamparíniai llinuanona, iima ie aina ua meinomo finoca rafuemo jaiacadimaci. ²⁻⁴ Lamparíniai unel-lena, farena naiñaiñuai uilla jira, cinco diga abina uiñotimaci. Farena naiñaiñuai uiñena

cuenta canollena, cuenta jibuisaibidomoi”. ³⁷ Cua jitaillacinona finodino dinena cuemo jicanoitimaci: “Nama, ¿niruido aimetaitiomo, ona eadicaí? ¿Niruido jiroacadomoi, jinui omo fecadicaí? ³⁸ ¿Niruido ona ciodicaí, caí jofomo ona feñollena? ¿Niruido iniroina omo fecadicaí? ³⁹ ¿Niruido duidiomo, ona jibuisaidicaí? ¿Niruido cárcelmo itiomo, ona jibuisaidicaí?” ⁴⁰ Uai oiticue: “Uanaicinona omoimo lloiticue. Cuenta innotinomona jamai bue isoidimiena canodomoi, cuenta jiai canodomoi” lloiticue.

⁴¹ 'Iemei cua jarifebeimo itinomo lloiticue: “Cuemona oni mai jai. Cua cominiñedomoi. Jai faifidomoi. Duere omoi sefullena, iraimo mai jai. Naie irai jaca duiñede. Jusiñamuidi naiena Taife iena jai finode. Jusiñamuidi Taife comini iena jiai jai finode. ⁴² Cua jitaillacinona omoi finoñenamona, navui aimetaiticue, cuenta ecañedomoi. Jiroacaducue, jinui cuemo fecañedomoi. ⁴³ Omoi nairai dine cua macaria, omoi jofomo cuenta feñoñedomoi. Iniroiniducue, iniroi cuemo fecañedomoi. Duiducue, cuenta canollena, cuenta jibuisaibiñedomoi. Cárcelmo iticue, cua canollena, cuenta jibuisaibiñedomoi”. ⁴⁴ Cuemo jicanoitimaci: “¿Niruido aimetaitiomo, ona ecañedicaí? ¿Niruido jiroacadomoi, jinui omo fecañedicaí? ¿Niruido ona ciodicaí, caí jofomo ona feñollena? ¿Niruido iniroinidomoi, omo fecañedicaí? ¿Niruido duidiomo, ona jibuisaiñedicaí? ¿Niruido cárcelmo itiomo, ona jibuisaiñedicaí?” ⁴⁵ Uai oiticue: “Uanaicinona omoimo lloiticue. Diga comini cuenta innotimaci. Naimacimona jamai bue isoidimiena omoi canoñena jira, cuenta canoñedomoi” lloiticue. ⁴⁶ Naimaci jaca isi cacaitimaci; iadedi cua jitaillacinona finodino cua Moo sedajanomo jaca iitimaci.

26

Judíuaí illaicomini Jesúna gaitallena siadua rafue

(Mr 14.1-2; Lc 22.1-2; Jn 11.45-53)

¹ Ie llofueoicaiganona llofuaí mei, naimacimo Jesús llote:

² —Pascua railla rafue illena, menarui fiebide. Iena uiñotomoi. Monamona jaie cua billamona, imana jaidicue. Cua fiodaillena cua Moo cuenta oretate. Illaicomini cuenta coraillena, birui cuenta gaitaitimaci —llote. ³ Naie facaiseconi Jusiñamui diga nanoca ñairainidi, jiaie illaicomini diga, nanoca ñairaima jofomo ofidimaci Nanoca ñairaimadi Caifás. ⁴ Jesúna jifuiano gaitallena coniniri siadotimaci. Naimiena meinellena jiai siadotimaci. ⁵ Raitimaci:

—Pascua railla facaise naimiena nia gaitañeiticai. Naie facaise naimiena caí gaitataia, iena gaitañenamona, comini caí diga fuititimaci. Nia sedaiticai.

Jesúmo riño caimare soride ra totaja rafue

(Mr 14.3-9; Jn 12.1-8)

⁶ Betania railla nairaimo Jesús jaillanona, Simón jofomo jaide. Simódi jaie efonaitimie. ⁷ Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. ⁸ Jesús llofueoicaigano iena ciuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. ⁹ Iena fecacadena, eo ailluena raifide. Naie ucube dueredinomo fecadena, caimona mare.

¹⁰ Naimaci ñañana Jesús uñua jira, naimacimo llote:

—¿Bue ñellena naiñaiñoña jeare ñaitomoi? Mare rafuena cuemo finode. ¹¹ Omoi diga dueredino jaca itimaci; iadedi omoi diga jaca iñeiticue. ¹² Cua abimo bie caimare soride ra naiñaiño totajamona, cua fiodaillirui facaina naiñaiño iese finode. ¹³ Omoimo uanaicinona lloiticue. Ninomo cua mare finoca rafuena bu lloia, naiñaiñoña ubiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue

(Mr 14.10-11; Lc 22.3-6)

¹⁴ Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide. ¹⁵ Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci. ¹⁶ Naie facaiseconimona Jesúna gaitatalliruimo naimie ocuride.

Jesúdi ie fiodaille rafuena llua rafue

(*Mr 14.12-25; Lc 22.7-23; Jn 13.21-30; 1 Co 11.23-26*)

¹⁷ Pascua railla rafue ia, siritaga rana guiñedimaci. Dani llomeniconona guitimaci. Egiptomona cai jaiagai jillobillana começillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaideo?

¹⁸ Uai ote:

—Jerusalémo omoi jaillanona, omoimo cue llogamiena omoi ciuanona, naimiemo llono: “Cai llofueraima fiodaille facaise iaiei ite. O jofomo ie llofueoicaigano diga pascua rafuena finoacade” llono.

¹⁹ Ie muidona ie llofueoicaiganodi ie llua finodimaci. Pascua railla rafue guille finodimaci. ²⁰ Nairui jitoma ana itemo, Jesús ie doce llofueoicaigano diga nainomo guisaide. ²¹ Naimaci mesamo guitimacimo, Jesús llote:

—Omoimona damie cuena gaitataite —llote. ²² Iena cacajanona, eo sunaitimaci. Damierie naimiemo jicanoside:

—¿Cuena ñaitio?

²³ Uai ote:

—Omoimona damie bie platomo cue diga llomenico diga mutade. ²⁴ Jusiñamui facaina lloraíma cuela isoi, monamona jai billamona fiodaiticue; iadedi cuena gaitataitimie eo duere sefuite. Naimie jeiciñegadena, cuemona mare.

²⁵ Jesúna gaitataitimiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

²⁶ Naimaci nia guitimacimo, llomeniconona Jesús llinuanona, Jusiñamuimo iobillacinona fecaja mei, llomeniconona tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi começina facajano, iena guiño.

²⁷ Ie mei naimie jiroraçona jiai llinote. Jusiñamuimo iobillacinona llua mei, naie jiroracomu jai totaca vino naimacimo fecajano, raite:

—Biemona nana omoi jiro. ²⁸ Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi começi. ²⁹ Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue. —Iena jirodimaci.

Jesúdi Pedro naimiena januana llua rafue

(*Mr 14.26-31; Lc 22.31-34; Jn 13.36-38*)

³⁰ Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. ³¹ Jesús naimacimo llote:

—Cuemo suille rafue muidona, ja naio cuena fainonocaitomoi. Jusiñamui facaina lloraíma micori iena jaie cuela: “Toica llaudaiai sedaraimana meinetaiticue. Naimie toiníai uaficaida jaitimaci” cuela. Naimie micori caina cuete. ³² Ero, fiodaillamona cue jillua mei, omoi uicodo Galileamo jaiticue, nainomo omoi diga dafaiçillena.

³³ Pedro uai ote:

—O finolle rafue muidona nana jiaíno ona fainonocaia, ona jaca fainonocaiñeiticue.

³⁴ Jesús dinena raite:

—Uanai omo lloiticue. Ja naio iitava nia ñaiñenia, dacaiño amani cuena janoitio.

³⁵ Pedro uai ote:

—O diga cue fioldaiadedi, ona janoñeiticue.
Nana ie llofueoicaigano daje uaido jiai raitimaci.

Jesúdi Getsemanímo Jusiñamuimo jia rafue
(*Mr 14.32-42; Lc 22.39-46*)

³⁶ Oni jaillanona, Getsemaní railla illanomo jaidimaci. Ie llofueoicaiganomo Jesús llote:
—Beno ana rai. Omoimona oni bai janore jaiticue. Cue Moo diga ñaillena, jaiticue.

³⁷ Pedrona uite. Zebedeo ie jito iaimaiana jiai uite. Naimie sunaicaide. Ie comeci uri iñede. ³⁸ Naimacimo llote:

—Cue comeci sunaicaide. Niadi fioldaiticue. Benomo fiebi; ia nia iniñeno cue facaina omoi jii.

³⁹ Naimie janore bai jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jiide. ⁴⁰ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia iñedemo. ⁴¹ Iniñeno. Taife ramo omoína fai raillano, iena omoi inoñellena, Jusiñamuimo jii. Omoi comeci mare rafuena finoacade; iadedi omoi comeci dani ocuiñoñede. Ie muidona Jusiñamuimo jii, omoína naimie ocuiñotallena —llote. ⁴² Ie mei dane jillena jaide. Raite:

—Ore Moo, o jitaia, cue duere sefuillamona cuena jillota. Cue fioldailana o jitaia, o jitailla rafuena finoiticue.

⁴³ Ie llofueoicaigano dine dane billanona, naimaci uisi llirioilla jira, naimaci inisitemo ride. ⁴⁴ Abido jaillanona dane jiide. Ailli daje isoidiuidado jiide. ⁴⁵ Ie mei ie llofueoicaiganomo dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fioldaiticue. Cuena ja gaitajanona, Jusiñamui jitailla jira, naimiena inoñedino anamo ja iiticue. ⁴⁶ A naidacai. Maiña. Cue gaitataitimie jai bite.

Jesúna gaitalle rafue
(*Mr 14.43-50; Lc 22.47-53; Jn 18.2-11*)

⁴⁷ Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci. ⁴⁸ Jesús dine naimaci nia riñenia, Judas micori naimie diga bitinomo jai llote:

—Jesúna omoi uiñollena, naimiena llibanoticue. Ie mei naimiena gaita —llote. ⁴⁹ Jesús dine naimaci rillanona, Judas micori Jesús dine raie jaide. Naimiena uaidote:

—Maestro, jai biticue. —Ieconi naimiena llibanote. ⁵⁰ Jesús dinena raite:

—¿Bue ñiaibitio?

Ie mei Judas micori diga bitinodi Jesúna gaitadimaci. ⁵¹ Iena ciuanona, Jesús diga itinomona damie ie lloebi llinuanona, Jusiñamui diga nanoca ñairaíma ie mullaíma jefona jaíbonote. ⁵² Jesús naimiemo llote:

—O fuiriacania, o jiai fioldaitio. O lloebi dane eeno. Cue riiduanona, fuiriñeno. ⁵³ Cuena riidollena, cue Moomo cue jicaia, eo ailluena jaienisai cue dine naimie oretaite; ⁵⁴ iadedi iese cuena riidoia, Jusiñamui facaina lloraini micoriai ciegafuiai suiñeite. Cue fioldaille rafuena cuetimaci —llote. ⁵⁵ Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Fuiriraimadicueta cuena omoi gaitajaibilla. Jusiñamui jofomo nagarui llofuecabiticue; iadedi cuena gaitañedomoi. ⁵⁶ Nana bie rafue suide, Jusiñamui facaina lloraini micoriai ciegafuiai suillena —llote. Ie facaise nana naimie llofueoicaigano naimiena faínonocaillano, aisidimaci.

Jesúdi judíuai illaicomini dine illa rafue
(*Mr 14.53-65; Lc 22.54-55, 63-71; Jn 18.12-14, 19-24*)

⁵⁷ Jesúsna gaitadinodi Caifás jofomo Jesúsna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamaci jiai ofidimaci. ⁵⁸ Jesús jinafona Pedro aarena jaide. Caifás jofo nairaibirimo jaide. Naie rafue fuiduana naimie uiñollena, nainomo ite jofomo majjiraini diga raide.

⁵⁹ Naimiena meinellena, nana naie illaicomini Jesúsno nicino illana uiñoiacadimaci. ⁶⁰ Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúsna ñaitimaci; iadedi taino llotimaci. Ie mei menamie bitiaimaiaia. ⁶¹ Raitiaimaiaia:

—Bimie llote: “Jusiñamui jofona judaiedicue. Judaia mei, darui amani illanona, iena dane finoredicue” —llochiaimaiaia.

⁶² Jusiñamui diga nanoca ñairaima Jesúsno jicanote:

—¿Niese iaimaiaia uai oitio? ¿Nie isoide rafue ona llogidotiaimaiaia?

⁶³ Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, uanaicinona cai lloñenia, caina duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

⁶⁴ Jesús dinena uai ote:

—Jii, naimiedicue. Iena raise llotio. Monamona jaie cue billamona, iimana jaidicue; iadedi ico jiairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jiai cioitimaci.

⁶⁵ Iena cacajanona, naimiemonona Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitaiñedicaia. Ie ñaiaimona dama naimie abina llogidote. ⁶⁶ ¿Niese naimiena raitomoi?

Jiai illaicomini dinena uai otimaci:

—Naimie fioidillesa.

⁶⁷ Ie mei naimie uiecona tuallaitimaci. Naimiena ducoidimaci. Jiai bucoidimaci.

⁶⁸ Raitimaci:

—O Cristodiodena, ¿bu o bucoia? caimo llono.

Jesús uai oñede.

Pedro Jesúsna janua rafue

(*Mr 14.66-72; Lc 22.56-62; Jn 18.15-18, 25-27*)

⁶⁹ Naie facaise Pedro naie jofo nairaibirimo ite. Naie jofo nama mullaño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite. ⁷⁰ Nana nainomo itinomo Pedro llote:

—O lluaña uiñoñedicue.

⁷¹ Nase fuemo Pedro jaidemo, naimiena jiaie mullaño ciuanona, nainomo itinomo llote:

—Bimiedi Nazaret ie Jesús comini imie.

⁷² Pedro uai ote:

—Uanaicinona cue lluaña Jusiñamuidi uiñote. O llogamierna uiñoñedicue.

⁷³ Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoi ñaitio.

⁷⁴ Uai ote:

—Uanaia cue lloñenia, Jusiñamui cuena duere finoite. Uanaicinona cue lluaña naimie uiñote. Ero, Jesúsna uiñoñedicue. —Ieconia itava ñaite. ⁷⁵ Iena cacajano, Pedro Jesús lluaña uibiñote. Jaive Jesús Pedromo llote: “Itava nia ñaiñenia, dacaiño amani cuena janoitio” llote. Iena uibiñuanona, Pedro jino jaillano, sure eede.

Pilato dine Jesús illa rafue

(*Mr 15.1; Lc 23.1-2; Jn 18.28-32*)

¹ Monaidemo, nana Jusiñamui dîga nanoca ñairainîdi, nana einamacî dîga, Jesúna siadotîmacî. Naimîena meinellena siadotîmacî. ² Siadua mei, Jesúna maianona, Poncio Pilatomo uitîmacî. Romanuai railla nairai anamo naimacî illa jira, Pilatodî naimacî gobernador.

Judas micorî fiodailla rafue

³ Judas micorî Jesúna jai gaitatate. Naie illaicominî Jesúna meiniana llua naimîe micorîdî uîñuamona, ie começi iuaina meidote. Illaicominîmo ie treinta dîga ucubena abîdo atide. ⁴ Raite:

—Jesús maraiñede rafuena jaca finoñede. Naimîe fiodaiñeite. Naimîena cue gaitatajamona, maraiñedicinona jai finodîcue.

Uai otîmacî:

—¿Bue ñe caimo lluaîbitio? O rafue caimo duiñede.

⁵ Ie mei Judas micorî Jusiñamui jofo jeraimo naie ucubena fo jamai faite. Jino jailanona, oni jaide. Dama naimîe abîna meinellena, cimaio llirinote raona. ⁶⁻⁷ Jusiñamui dîga nanoca ñairainî naie ucubena iraiâ mei, iena siadotîmacî. Coninîri raitîmacî:

—Naie isoide ucube nainomo joniana Moisés micorî jaie rairuilla jira, Jusiñamui jofomo ite ucube ocabiranomo jonenidîcai. Naie ucube dîga damîe meinellena îbadîcai.

—Ie jira naie ucube dîga enîruena îbadîmacî. Naie illanodî jiñora ouilla enîrue. Jiaie nairaimona bu bia, naimîe fiodaia, naie enîruemo naimîena raillena, iena îbadîmacî.

⁸ Naie ucube muidona damîe fiodailla jira, birui naie enîrue mamecîdî dirue ie enîrue.

⁹ Iemona Jeremías micorî jaie cuega rafue jai suide. Naimîe micorîdî Jusiñamui facaina lloraima. Naimîe micorî cuega: “Cai Israel railla cominîmona damîerie railla jira, naimîena meinellena, treinta ucubena fecaitîmacî. ¹⁰ Naie ucube dîga jiñora ocabilla enîruena îbaitîmacî, cai Nama Jusiñamui llua isoi” cuega.

Pilato dîne Jesús illa rafue

(Mr 15.2-5; Lc 23.3-5; Jn 18.33-38)

¹¹ Pilato railla gobernador uicomo Jesúna atîa mei, Pilato Jesúmo jîcanote:

—¿Judíuai cominî illaimadio?

Jesús uai ote:

—Jîi. Raise llotio.

¹² Ie mei Jusiñamui dîga nanoca ñairainîdi, einamacî dîga, naimîena llogîdote; iadedî naimîe dînena uai oñede. Ie abîna riidoñede. ¹³ Ie muidona Pilato naimîemo llotte:

—Dîga rafuena ona llogîdotîmacî. ¿Nîese uai oñedio?

¹⁴ Jesús nia uai oñede. Ie jira Pilato uainicaide.

Pilatodî Jesús fiodaillana llua rafue

(Mr 15.6-20; Lc 23.13-25; Jn 18.38-19.16)

¹⁵ Naga año pascua railla rafue facaiseconi cárcelmo itînomona Pilatodî cominî jîcacamiêna jamai jino orede. ¹⁶ Bie año cárcelmo Barrabás raillamîe ite. Naimîe mamecî eo are soride. ¹⁷ Naie rafue illa jira, ailluena cominî naimîe dîne ofillano, naimacîmo Pilato jîcanote:

—Bie año cárcelmona, ¿bumîe jino cue oretajana jitaidomoi? Barrabás raillamîe ite. Jesús raillamîe jiaî ite. Naimîedî Cristona jiaî mamecîrede.

¹⁸ Iese jîcanote; iadedî naimîedî Jusiñamui dîga nanoca ñairainî Jesúri uradoillana uîñote. Naimacî Jesúna meineiacanana jiaî uîñote. ¹⁹ Ie maîjiracomo naimîe nia illanona, naie facaise Pilato aî naimîe dîne rabe orede. Cuete: “Bimîedî maraiñede rafuena jaca finoñede. Naimîena duere finoñeno. Jaive naîo cue nicairillano, naimîe muidona cue começi jarire ite”. ²⁰ Ailluena cominî Pilato dîne ofillanona, Jusiñamui dîga nanoca ñairainîdi, einamacî dîga, cominîmo llotîmacî:

—Pilato caimo jîcanoia, Barrabás jino oretallena jîca. Jesús meinellena jîca —llotîmacî.

²¹ Cominî ofilla mei, naimacîmo Pilato dane jîcanote:

—¿Nîmîe cue jino oretajana jitaidomoi?

Uai otîmacî:

—Barrabás.

²² Pilato dinena jicanote:

—¿Niese Jesúna cue finuana jitaïdomoi? Naimiedi Cristona jiai mameciredede.

Nana uai otimaci:

—Naimiena cruzmo corai.

²³ Pilato dane jicanote:

—¿Nie isoide maraiñede rafuena finode?

Naimaci dinena ado ibi llonoidimaci:

—Naimiena corai.

²⁴ Jesúna jino oretajana jitaïnedimaci. Iena Pilato uiñuamona, comini jai uri iñenana naimie ciuanona, jinui diga ie onollina jocuanona raite:

—Bimie fiodaïllana cue muidonañede. Bie rafue cuemo jai duiñede. Naimie fiodaite omoi muidona.

²⁵ Uai otimaci:

—Dama iesede. Naimie fiodaite cai muidona. Jiai cai uruai muidona.

²⁶ Ie mei Pilatodi Barrabás naimaci jitaïlla jira, jino orede; iadedi Jesúna sechedotajana, naimiena coraïllena orede. ²⁷ Dajerie soldaduaidi Pilato jofomo Jesúna uite. Nana soldaduai nainomo ofidimaci. ²⁸ Naimie iniroi duiñuano, naimiemo jiduirede iniroina jitaïdimaci. ²⁹ Eecuaïmona niga nuiciraina naimie ifogïmo jitaïdimaci. Ie nabeïllimo radosina jonete, illaïmana naimie illa isoi. Caiñici ifodo raidimaci, illaïmana naimie illa isoi. Raitimaci:

—Jadi, judíuai illaïma. —Iese raïllanona naimiena jifanododimaci. ³⁰ Naimiena tuallaïtimaci. Naimie onollimo ite radosina naimaci llinocaida, naïedo naimie ifogïna buta-butadimaci. ³¹ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abïdo naimiemo jitaïdimaci. Ie mei naimiena coraïllena oni uitimaci.

Jesúna coraïa rafue

(Mr 15.21-32; Lc 23.26-43; Jn 19.17-27)

³² Jerusalémona naimaci jaïllanona, Cirene raïlla eniruemona bitimiemo dafaïfidimaci. Naimie mameci Simón. Naimiena Jesús uiga cruzna rocatatimaci. ³³ Gólgota raïllanomo jaidimaci. Ifocoraïna eruaiïlla jira, iese mameciredede. ³⁴ Nainomo rillanona, ie abi isirena cacaiñellena, vinomo erirede rana faïanona, naimiemo fecadimaci; iadedi iena naimie facajano, iena jiroñede. ³⁵ Naimie coraïa mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raïllanona uiñollena, jifanododimaci. ³⁶ Ie mei ana raidimaci, naimiemo eruaillena. ³⁷ Naimie ifogï afebeïmo ie llogïduafuena jonetimaci. Iese cuela: “Bimiedi Jesús. Judíuai comini illaïma”. ³⁸ Ie mei mena fiiriruïde iaimaïaina coraidimaci. Damie Jesús nabeïmo coraïca. Jiaïmie Jesús jarifebeïmo coraïca. ³⁹ Naisodo jamai jaidino Jesúna mameritimaci. Mamerillanona, ifogaïaina jaididimaci. ⁴⁰ Raitimaci:

—Navui raisoidio: “Jusiñamui jofona judaïticue. Darui amani illanona, iena dane finoiticue” raisoidio. Ie muidona dama o abina mai jilloita. Jusiñamui Jitodïdena, cruzmona ana bi.

⁴¹ Ie facaise Jusiñamui diga nanoca ñairaini naimiena mameritimaci. Moisés micori llogacino llofueraïni naimiena jiai mameritimaci. Einamacï naimiena jiai mameritimaci. Raitimaci:

⁴² —Jiaïe cominina jillotate; iadedi dama naimie abina jilloitanide. Naimiedi cai judíuai comini illaïma raïllamïdena, cruzmona naimie ana niade billasa. Ie mei naimiena ñnoïticaï. ⁴³ “Jusiñamui Jitodicue” naimie raïlla jira, naimiedi Jusiñamuina ja ñnotena, Jusiñamui jitaïa, Jusiñamui naimiena jillotaite. —Iese naimiena mameritimaci. ⁴⁴ Naimie diga coraïca iaimaïaï daje isoi naimiena mameritïaïmaïaï.

Jesús fiodaïlla rafue

(Mr 15.33-41; Lc 23.44-49; Jn 19.28-30; Heb 9)

⁴⁵ Jitoma naidai itemona, daje amani horas mona jitibicaide. ⁴⁶ Ie meinomo judíuai raïlla uaido Jesús ado jidaïoide:

—Elí, Elí, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

⁴⁷ Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci. ⁴⁸ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. ⁴⁹ Ieconi jiaíno raitimaci:

—Ina nai. Dallu seda. Elías naimiena jilloitajaíbillena sedaiticai.

⁵⁰ Ieconi Jesús dane ado cuirioita, fiodaite.

⁵¹ Naie facaise Jusiñamui jofomo ie fetaca iniroife ana anaba jillacimo metodo menafe cuararide. Ieconi ñuisaño suide. Iemona nofie oni bojode. ⁵² Diga raiafuaí econote. Jesús jillua mei, raiafomona, fiodaillamona, ailluena Jusiñamuina innotinodí jillodimaci. ⁵³ Ie mei Jerusalémo naimaci jaillanona, diga cominí naimacina ciodimaci. ⁵⁴ Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena ciuanona, eo jacinailamona, naimie raite:

—Uanai bimiedí Jusiñamui Jito.

⁵⁵ Ailluena riñoniaí naie rafuena aarena ciodimaci. Naimiena canollena, Galileamona Jesús diga navui bitimaci. ⁵⁶ Naimaci motomo María Magdalena ite. Jiaie María jiaí ite. Naiñaiñodí Jacobo ei. Naiñaiño jiaí José ei. Zebedeo uruiaí ei jiaí ite.

Jesús raiafomo jonia rafue

(Mr 15.42-47; Lc 23.50-56; Jn 19.38-42)

⁵⁷ Jitoma ana itemo, eo ucuberedimie Pilato dine jaide. Naimiedí Arimatea nairai imie. Naimie mameci José. Jesús díbeimo jaidimie. ⁵⁸ Jesús abina jicallena, Pilato dine jaide. Pilato “Jee” raillanona, Jesús abina naimie ollena llote. ⁵⁹ Ie mei Jesús abina cruzmona ana José uanona, jeanide mare userede iniroi diga naimie abina ferinote. ⁶⁰ Nofici ie raiafomo jonete. Naie raiafo dama José jaie finoca, naimie iena. Jesús abí nainomo jonia mei, José naifomo noficina ñuitade. Naifo ibaide. Ie mei oni jaide. ⁶¹ María Magdalena raiafo uico dine jiaie María diga rainadatíiaíñuái.

Soldaduai Jesús raiafo sedaja rafue

⁶² Ie areruido, pascua railla rafue illarui, dajerie judíuai illaicomini Pilato dine jaidimaci. ⁶³ Raitimaci:

—Ero, naie abí caitadimie nia fiodaíñenia, navui llote: “Cue fiodaillamona, darui amani illanona, jilloitícue”. ⁶⁴ Ie jira o uai oreta, darui amani raifi naie raiafo raise íbaillena, naimie llofueoicaigano nainomo jaillanona, naimie abí arí oi raillano. Naimie abina naimaci fíianona lloitimaci: “Naimie jai jillode”. Iese suia, cominina eo jífueitímaci.

⁶⁵ Pilato uai ote:

—Soldaduai omoído oreitícue, naie raiafo raise sedallena.

⁶⁶ Ie jira jaidimaci. Raona nitajano, raiafo raise íbaidimaci. Naiena sedallena, soldaduaina nainomo fainonocaidimaci.

28

Jesús fiodaillamona jillua rafue

(Mr 16.1-8; Lc 24.1-12; Jn 20.1-10)

¹ Sábado fuilla mei, monaiacania, María Magdalena, jiaie María diga, raiafona jíbuisaidíiaíñuái. ² Ieconi ñuisaño suide. Monamona billanona, Jusiñamui jaienicí raiafomo íbaica noficina oni ñuitade. Naie noficimo raide. ³ Eo queniredena eruaide. Naimie iniroi eo userede. ⁴ Nainomo ite soldaduai naimiena eo jacinailamona, abí docaidimaci. Iemona fiodaítino isoi dallu itímaci. ⁵ Ie facaise naie jaienicidí dinena naie riño íaíñuaimo llote:

—Jaciruíñeno. Coraica Jesúsna omuíño jenuana uíñotícue. ⁶ Naimie bene íñede. Naimie llua isoi, fiodaillamona naimie jai jillode. Naimie ifo jeraimo bíillano mai jíbuisaíbi. ⁷ Ie mei ie llofueoicaigano dine raire omuíño jai. Fiodaillamona naimie jilluana naimacimo llono. “Galileamo omoí uicomu naimie jaite” llono. Bie rafue omuíño jai

lloiticue —llote. ⁸ Ie jira raiafomona rajicaillanona, eo iobillanona, raire jaidiiañuui. Ie llofueoicaigano dine aisidiiañuui. ⁹ Ie llofueoicaigano dine iañuui nia riñenia, Jesús iañuaimo dafaifillano, raite:

—Itomuño. —Naimie dine iañuui rillanona, naimiena sedallena, naimie eillina llinotiiañuui. ¹⁰ Jesús dinena raite:

—Jaciruiño. Cue llofueoicaiganomo llono: “Galileamo jai. Nainomo omoina cioiticue” llono.

Soldaduai raiafona sedademo suide rafue

¹¹ Jaidiiañuaimo, nainomo ite soldaduai mona dajerie Jerusalémo jaide, nanoca Jusiñamui diga ñairainimo nana naimacimo suide rafue lollena. ¹² Iena cacajano, einamaci diga iena siadotimaci. Ie mei naie soldaduai ucubena fecadimaci. ¹³ Raitimaci:

—Jiaie cominimo llono: “Cai inia mei, ie llofueoicaigano ie abiina fiano uitimaci” llono.

¹⁴ Iena cai gobernador fidiia, naimie diga ñaiticai, omoina naimie duere finoñellena —raitimaci. ¹⁵ Ie jira naie ucubena feñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

Jesús ie llofueoicaiganomo iraicaiño lloga rafue

(Mr 16.14-18; Lc 24.36-49; Jn 20.19-23)

¹⁶ Ie mei Galileamo naie once llofueoicaigano jaidimaci. Jesús lloga anedumo jaidimaci. ¹⁷ Naimiena naimaci ciuanona, naimiena sedadimaci; iadedi dajerie Jesús jilluana raise nia ñnoñedimaci. ¹⁸ Jesús dinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. ¹⁹ Ie jira naga nairaimo jai, cue dibeimo naie cominina itatallena. Cue dibeimo naimaci jailla mei, cue Moo dibeimo naimacina illamona, naimaci cue dibeimo illamona, ie Joreño anamo naimaci illamona, naimacina bautiza.

²⁰ Nana omoimo cue lloga rafuena naimaci iena ñnollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.

MARCOS JESUCRISTO ENIRUEMO ILLA RAFUE CUIAFUE

Jofue iñenanomo Juan Bautista micori illa rafue

(Mt 3.1-12; Lc 3.1-9, 15-17; Jn 1.19-28)

¹⁻² Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micori Jusiñamui facaina jaie llua mona, Juan Bautista micori llofuellena llote. Iena suillamona, Jesucristo eniruemo ite rafue tainede. Iena nano lloiacadicue. Isaías micori cuete:

“Ero, o uicodo cue rafuena llollena, damiena oretaiticue” Jusiñamui raite.

³ Jofue iñenanomo damie jidai-jidaillana cacadicue.

Naimie llote: “Cai Nama biite. Naimie naiso atona raise fino” llote.

Naisona llote; iadedi naimie uaina naimaci feiñollena, naimaci comeciai marena finuana ñaite.

⁴ Isaías micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide. Cominina dafaifia, naimacimo llote:

—Omoi jeacinona fainonocaida, Jusiñamui dibeimo omoi comeciai iuailai meido. Iemona omoi jeacinona feitaite. Omoi comeciai iuailai omoi meidoia, cominina iena uiñotallena, mai omoi bautizallomoi.

⁵ Diga comini naimie micori dine jai jaisoidimaci. Jerusalémona, nana Judeamona, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micori bautizaga.

⁶ Juan micoridi camello itiraiai ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. ⁷ Cominimo llote:

—Cue baifemo faitimie bie facaise biite. Jamai bue cue isoilla jira, naimiena cue canuana uiñoñedicue. ⁸ Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreña omoimo itataite.

Jesús bautizaja rafue

(Mt 3.13-17; Lc 3.21-22)

⁹ Jordán dine Juan micori nia ia, Galileamona, Nazaretmona naimie dine Jesús bite. Nainomo Jesúdi Juan bautizaga. ¹⁰ Bautizaja mei, jinuimona billana, ieconi mona bojodena ciode. Jusiñamui Joreño, ucugi isoi, naimie emodomo ana billana ciode.

¹¹ Monamona Jusiñamui llote:

—Cue isiruiga Jitodio. Ori iobidicue.

Jesúna Taife ramo faia rafue

(Mt 4.1-11; Lc 4.1-13)

¹² Jesús bautizaja mei, Jusiñamui Joreño jofue iñenanomo naimiena uite. ¹³ Comini nainomo iñede. Difai ocainaiiai itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisai naimiena sedadimaci.

Galileamo Jesús illa rafue

(Mt 4.12-17; Lc 4.14-15)

¹⁴ Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. ¹⁵ Llote:

—Jusiñamui birui omoina sedaacade. Ie cominina omoi jaillena birui jitaide. Jusiñamui dibeimo illena, omoi jeacinona fainonocaida, omoi comeciai iuaina meido. Bie rafuena mai omoi iino.

Ie llofueoicaigano jaillena, Jesúdi nagaamagamiena fetua rafue

(Mt 4.18-22; Lc 5.1-11)

¹⁶ Jiairuido Galilea railla jorai fuemo Jesús macaritemo, menamiena ciode. Naga ie ama iaimaiiai. Damie Simón. Jiaimie Andrés. Llojina fairaima iaimaiiai. Iese jaca naie iaimaiaidi maijuidiiaimaiiai. ¹⁷ Iaimaiaimo llote:

—Cue diga omico jaiocaillena, cue diga mai bi. Cue llofueganona omico jaillena jitaídícue. Lliciaína birui ocabitomico; iadedi comínina oitomico, cue díbeimo naimaci illena.

¹⁸ Iena cacajanona, ieconi iaimaiaí llojina fainonocaida, naimie diga jaidíiaimaiaí. Ie llofueganona jaillena, jaidíiaimaiaí. ¹⁹ Lliai bai Jesús jaidemo, jiaie menamiena ciode. Naga ie ama iaimaiaí. Damie Jacobo. Jiaimie Juan. Iaimaiaí moodi Zebedeo. Botemo iaimaiaí llojina sigaidíiaimaiaí. ²⁰ Jesús iaimaiaína uaidote, ie llofueganona jaillena. Ie maijiraíni diga iaimaiaí mooná fainonocaida, botemona ari billanona, Jesús diga jaidíiaimaiaí.

Jesúdi Janaba anamo itímie jillotaja rafue

(Lc 4.31-37)

²¹ Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofueite. ²² Moisés micori llogacino llofueráni isoi llofueñede. Illaima uai isoi naimie llofuia jira, nainomo ite comíni naimie llofuiamona rajicáidímáci. ²³ Janaba anamo illamie nainomo ite. ²⁴ Jesús llofuiana cacaita, Janabadi íimána ado cuirioitate:

—Odi Nazaret ie Jesús. ¿Bue ñeacadio cai diga? Caina duere finuaíbidio. Ona uiñoticue. Odi Jusiñamui ie mare fetocamiedio.

²⁵ Jesús naimiena lletade:

—Llicai. Naimiemona oni jai.

²⁶ Janaba naimiena docaitajanona, ado cuirioillanona, naimiemona oni jaide. ²⁷ Iena ciuanona, nana nainomo itino rajicáidímáci. Coniniri siadotímáci:

—¿Niese ite? Bimie jiaie uaido llofueite. Janabamo naimie llua mei, íimamona Janaba oni jaide. Janaba Jesús uaina íinote.

²⁸ Iemona nana Galilea eniruemo Jesús mameci are soride.

Jesús Pedro jifaiñona jillotaja rafue

(Mt 8.14-15; Lc 4.38-39)

²⁹ Ofiracomona Jesús jaillanona, ie llofuegano diga, Simón jofomo jaide. Andrés nainomo jiaí jaináiaide. Jacobo, Juan diga jiaí fo jaide. ³⁰ Ie facaise Simón jifaiño duide. Abi cuaride. Nainomo itino Jesúsna naiñaiño duillana llote. ³¹ Iena cacajanona, naiñaiño díne jaillanona, Jesús naiñaiño onollina llinote. Naiñaiñona naidacaitade. Ieconi abi cuarilla fainonocáide. Guille finuanona, ie jofomo itinona ecade.

Jesúdi ailluena duidinona jillotaja rafue

(Mt 8.16-17; Lc 4.40-41)

³² Navuida, jitiíbicaídemo, Jesús díne comíni ailluena duidinona atídímáci. Janaba anamo itinona jiaí atídímáci. ³³ Nana Capernaum comíni naie jofó nasemo ofídímáci. ³⁴ Jesúdi diga duiconá ailluena duidinona jillotate. Ailluena comíni Janaba anamona jillotate. Naimiena jananiaí uiñua jira, Jesús naimaci ñaiana rairuide.

Galileamo Jesús llofuia rafue

(Lc 4.42-44)

³⁵ Ie areruido nia monaiñenia, Jesús casillanona, Capernaumona comíni íñenanomo Jesús jaide. Nainomo Jusiñamuimo jíide. ³⁶ Monaia, casidemo, jofomo Jesús íñena jira, Simón, ie nabaiñiaí diga, Jesúsna jenuaide. ³⁷ Baillanona, raite:

—Nana comíni ona jenodímáci.

³⁸ Jesús uai ote:

—Jiaie nairaiaí díne mai cai jailli. Nainomo llofueiacadícue. Ie jira Capernaumona jino bitícue.

³⁹ Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaína oni oretate.

Jesúdi efonaitimiena jillotaja rafue

(Mt 8.1-4; Lc 5.12-16)

⁴⁰ Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jitaiadedi, cuena jillotaredio.

⁴¹ Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaicadicue. Mai o jillo. ⁴² —Ieconí naimie jillode. ⁴³ Ie facaise Jesús naimiena oretaiacanano, naimiemo riire llote:

⁴⁴ —O jilluana bumó lloñeno; iadedi Jerusalémo Jusiñamui jofomo Jusiñamui diga ñairaima dine mai jai. O jilluana comini raise uiñollena, naimiemo o abina acatajai. Moisés micori jaié lloga rana Jusiñamuimo feca.

⁴⁵ Iese Jesús naimiemo llote; iadedi Jesús finoca rafue llocana eo uite. Ie muidona ailluena comini Jesúsna cioacana jira, Jesús marefodo comini illanomo jaisoiñede; ia comini iñenanomo jaisoide. Iese jaisoide; ia naganomona naimie dine biñoidimaci.

2

Jesús tisitaitimiena jillotaja rafue

(Mt 9.1-8; Lc 5.17-26)

¹ Nigarui illanona, Capernaumo Jesús dane abido ride. Comini iena fidianona, ² ie risoillacomo naimie dine ofidimaci. Ailluena billa jira, fo illino iñede. Nasemo jiai eo ofidimaci. Jesús naimacimo Jusiñamui rafuena llofuede. ³ Cominina Jesús llofuetemo, naimie dine nagaamagamie ie biiramo biide tisitaitimiena atidimaci. ⁴ Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuideo a jaidimaci. Jofo emodo econuano, Jesús ecimo naimiena ie biiramo biide diga, rao diga, ana ñuitadimaci. ⁵ Iena Jesús ciuanona, tisitaitimie jilluana naimaci iinuana Jesús uiñote. Tisitaitimiemo llote:

—Nabai, o jeacino cue feitaja jira, iena jai oni dotadicue. Ie facai ibana jai oñeiticue.

⁶ Nainomo itinomona damerie Moisés micori llogacinona llofueraini nainomo raidimaci. Comecina facadimaci: ⁷ “¿Niese bimiedi iese llote? Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”.

⁸ Naimaci comeciai facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi? ⁹ Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona, o biira ferinocaida, mai macari” cue lloia, cue uai siñonana uiñoitomoi. ¹⁰ Monamona jaié cue billanona, iimana jaidicue. Ie jira jeacino oni dotaja uai cuemo ite. Iena omoi uiñollena, tisitaitimiemo lloiticue: ¹¹ “Mai naidacai. O biira ferianona, o jofomo mai jai”.

¹² Iese naimie raillamona, tisitaitimie jillode. Naidacaida, ie biira feria mei, naimacimona jino jaide. Nana nainomo itino rajicaidimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicai.

Jesúdi Levína fetua rafue

(Mt 9.9-13; Lc 5.27-32)

¹³ Jiáiruido jorai fuemo Jesús dane jaide. Ailluena comini naimie dine ofillanona, naimacina llofuede. ¹⁴ Llofuia mei, Jesús bai macaritemo, Leví raillamiena ciode. Levídi Alfeo jito. Gobierno ucube ouillanomo naimie maijiuide. Nainomo raidena Levína ciode. Naimiemo llote:

—Cue llofuegamiena o jaillena, cue diga bi. —Naidacaida, Jesús diga jaide.

¹⁵ Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci. ¹⁶ Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúsna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci. ¹⁷ Iena cacajano, Jesús llote:

—Ecairedinodi médicono jitaiñedimaci; ia duidinodi médicono jitaídımaci. Ie isoide. Mareuidino cuena jitaiñedimaci; ia maraiñedino cuena jitaídımaci. Jusiñamui díbeimo mareuidinona uaibiñedicue; iadedi maraiñedinona uaibiticue. Omoimona maraiñedino diga nabairiticue; ia naimacina uaibiticue.

Jesúmo comini guiñenana jicanua rafue
(Mt 9.14-17; Lc 5.33-39)

¹⁸ Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiaí guiñenaruillai ite. Jesús dine comini billanona, naimiemo llote:

—Cai einamaci llua isoi, Jusiñamuina naimaci raise iobitallena, guiñenaruillai illa facaiseconi Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiaí jaidımaci; ia o llofueoicaigano jaca guitımaci. ¿Bue ñellena cai einamaci rafuedo jaiñedimaci?

¹⁹⁻²⁰ Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabaiñiai sunaiñedimaci. Iobillamona guitımaci. Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaídi iite. Ie isoide. Cue comini diga birui cue illa jira, iocire itımaci. Ico cue jaille mei, sunaitımaci. Ie muidona birui cue llofueoicaigano guicabitımaci.

²¹ Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ²² Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiaí faifite. Como finoca vino comogomo jonelle. Iemei iena faifiñeite. Ie isoide. Omoi einamaci rafue ifomo jiaie rafue birui ite. Iena omoimo llocabitıcue. Iedo jaidıcaí —llote.

Sábadoruimo Jesús llofueoicaigano maijia rafue
(Mt 12.1-8; Lc 6.1-5)

²³ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, guicana jaidımaci. ²⁴ Dajerie fariseuai iena ciuano, llotımaci:

—Rairuica rana finosite. Moisés micori rairuilla jira, sábadoruimo maijınidıcaı; iadedi trigona naimaci tijiamona, caimona jai maijidımaci. Iese cai abimo jeacınona jai finodımaci.

²⁵ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeci raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. ²⁶ Naie facaise Jusiñamui diga nanoca ñairaimadi Abiatar. Jusiñamui jofomo naimaci fo jailla mei, Jusiñamuimo fecaca llomenicono uanona, guitımaci. Jamai bue isoidino naie llomenicono guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga, David micori iena guite; ia Jusiñamui naimacina duere finoñede. ²⁷ Jusiñamui sábadona finuamona, sábadı ite, nairui illamona comini caımare illena; ia omoi llofuiamona, iese iñedımaci. Nairuimo rairuica rana finoñellena, comini iese illena llofuecabitımoı. ²⁸ Monamona cue billamona, imana jaidıcue. Ie jira sábadoruimo comini finolle rafuena rairuiredıcue. Nairuimo finoñelle rafuena jiaí rairuiredıcue. Ie jira nairuimo cue jitailla rafuena finoredıcue.

3

Jesúdi onollina idisarodimiena jillotaja rafue
(Mt 12.9-14; Lc 6.6-11)

¹ Jiaie sábadoruimo judúuai ofiracomo Jesús dane jaide. Ie facaise onollina idisarodimie nainomo ite. ² Nainomo itino Jesús eruaidimaci, sábadoruimo Jesús naimie raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Sábadoruimo bu maijia, naimacimona jeacino finode. ³ Onollina idisarodimiemo Jesús llote:

—Cue ecimo mai bai bi.

⁴ Jesús nainomo itinomo jicanote:

—¿Nie isoide rafue sábadoruimo finuadi mare? Bimie birui cue jillotaiadedi, birui mare rafuena finodicue. Cuená birui omoi meineiadedi, birui marañede rafue finodomoí. Sábadoruimo, ¿nie isoide rafue finuana rairuidomoí?

Comini dinena uai oñedimaci. ⁵ Naimie uaina naimaci ñnoñena jira, riicaillanona, Jesús naimacimo erodate. Duidimiemo llote:

—O onolli mai oni ñuita.

Iena oni ñuitajamona jillode. ⁶ Iena ciuanona, fariseuai jino jaidimaci. Naimiena meinellena, illaíma Herodes díbeimo itinona baillanona, naimaci díga coniniri siadotimaci.

Jorai fuemo Jesús di ailluena cominina llofuia rafue

⁷ Naie nairaimona jorai fuemo Jesús, ie llofueoicaigano díga, oni jaide. Galilea railla eniruemoná ailluena comini naimie díne bitimaci. Judeamona jiaíno bitimaci. ⁸ Jerusalémona, Idumeamona, Jordán ruicafebellemona, Tiro jinofemo ite eniruemoná, Sidón jinofemo ite eniruemoná ailluena bitimaci. Nana naimie siño finoca rafuena cacajanona, naimiena cioacadimaci. ⁹ Comini naimiena meetasí raillanona, ie llofueoicaiganomo daje botemo naimie jaillena eenogana llote. ¹⁰ Ailluena duidinona naimie jai jillotaja jira, nana duidino naimiemo riacadimaci. Jilloillena naimiena jetaacadimaci. Iemona naimie illa bote eenuana jitaide. ¹¹ Jananiai anamo itino Jesúsna cioia, Jesús uicomo ana bitadajanona, jananiai naimacina ñaitatajamona, raitimaci:

—Jusiñamui Jitodio. ¹² —Ia Jesús naimiena naimaci lluaná rairuide.

Jesús di ie doce llofueoicaiganona fetua rafue

(Mt 10.1-4; Lc 6.12-16)

¹³ Naie facaise anedumo Jesús jaide. Ie jitaillano díese naimie díne uaidote. Naimie díne billa mei, ¹⁴ doce dígamiena fetode. Naimie díga jaicabillena, naimacina fetode. Ie rafuena llollena, naimacina oretaiacade. ¹⁵ Janaba anamo itinomona Janabana oni oretallena, ie uai naimacimo ite. ¹⁶ Iese mameciredimaci: Simón; naimie mameci jiaicidi Jesús jítaca Pedrona. ¹⁷ Jacobo, Juan; iaímaiaí Zebedeo jito iaímaiaí. Jiaie mameci iaímaiaína Jesús jonete Boanergesna. Naie mameci oni dobaiñuamona mona guruama. Iciriruilla jira, iese mamecirediiaímaiaí. ¹⁸ Andrés, Felipe, Bartolomé, Mateo, Tomás, jiaie Jacobo; naimiedi Alfeo jito. Tadeo, jiaie Simón; naimiedi cananista comini facaisemo duide. ¹⁹ Judas Iscariote micori; naimiedi Jesúsna gaitatatimie.

Fariseuai Jesúsna jeare ñaia rafue

(Mt 12.22-32; Lc 11.14-23; 12.10)

²⁰ Ie llofueoicaiganona fetua mei, ie risoilla jofomo naimaci díga Jesús abído jaide. Ailluena comini naimie díne billa jira, naimie guillena, naimie abí juanide. ²¹ Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaíbiacadimaci. ²² Jerusalémona Moisés micori llogacinona llofueraíni naie facaise billanona, raitimaci:

—Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúsdi Janabana oni oretate —raitimaci.

²³ Naimaci raillana naimie cacajanona, naimie díne Jesús naimacina uaidote. Llote:

—Janaba díbeimo Beelzebú illamona, dama ie abína oretanide. ²⁴ Ero, daje isoi comeciaina lloíñenamo daje nairai facañenia, danomo maijinidimaci. Oni jaidimaci. ²⁵ Daje isoi comeciaina lloíñenamo daje jofomo itino facañenia, danomo jainaiainidimaci. Oni jaidimaci. ²⁶ Ie isoide. Beelzebú uaido jananiaína omoi llua isoi cue oretaiá, Janaba

ie díbeimo itino díga jai nabairiñede. Iemona naimie comini danomo iñeitimaci. Ie uai ieconi saite. ²⁷ Ero, mairidimie ie jofomo ite rana nibai fiacadomoi. Iena fiillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. ²⁸ Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; ²⁹ iadedi naimiedi ie Joreñona jeare ñaiacinona jaca dotañeite. Jusiñamui iena jaca feitañeite —llote.

³⁰ —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

Jesús ie comini

(Mt 12.46-50; Lc 8.19-21)

³¹ Jesús comini naimie dine rillanona, naimie díga ñaiacanano jino naidaidimaci. ³² Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai díga jino ite. O díga ñaiacade.

³³ Jesús dinena uai ote:

—¿Bu cue ei? ¿Bu cue amatiai?

³⁴ Naimie ecimo itinomo erodajanona, llote:

—Jadi, cue ei, cue amatiai. ³⁵ Jusiñamui jitaillacinona finodimie cue amana, cue miriñona, cue eina. Imaci ua cue cominina.

4

Jesúdi trigona judaidimiena llua rafue

(Mt 13.1-9; Lc 8.4-8)

¹ Jiáiruido jorai fuemo dane jaillanona, ailluena comini naimie dine ofillamona, Jesús naimacina llofueite. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci. ² Ailluena rafuena naimacina llofueite. Raite:

³ —Omoi fueollena, bie rafuemo raise cacarei. Damie trigona judaiaide. ⁴ Naimie judaiamona, naisomo janore iduai juide. Naimie bai jailla mei, silliñiai iena guisaibitimaci. Ie jira sicoñede. ⁵ Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, ⁶ raise jainañena jira, ecasillamona duide. Ie jira llisiñede. ⁷ Eecuai illanomo jiaie iduai juide. Eecuai sicuamona riana eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo treinta díga llisillana ote. Jiainamona sesenta díga llisillana ote. Jiainamona cien díga llisillana ote. ⁹ Omoi jeforena jira, raise fueollena, cue llamo cacarei. Iena ñino.

Jesús ie como lloga rafuena llofui rafue

(Mt 13.10-23; Lc 8.9-15)

¹⁰ Ailluena cominimona jailla mei, naimie díga jaisoidinodi, ie doce llofueoicaigano díga, Jesúmo ie llofuiana jicanotimaci. ¹¹ Uai ote:

—Jusiñamuidi omoína ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñotañede. ¹² Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci ñinoñena jira, uiñoñoeno jaitimaci. Cue llofuiana jamai cacadimaci; iadedi naimaci ñinoñena jira, raise cacaiñedimaci. Uñoñedimaci. Jusiñamui díbeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. ¹³ Cue como llofuiacinona omoi raise cacaiñenia, dane cue llofui, iena jiai raise nibai cacaiñeitomoi; ¹⁴ ia iena omoína llofueiticue. Trigona judaidimiedi Jusiñamui rafue lloraima isoide. ¹⁵ Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciamo cacaja uaina ñnotañede. ¹⁶ Jiaie iduai nofiero juide. Dajerie comini comeciai naie nofie isoidimaci. Jusiñamui uai nano naimaci cacai, iena caimare

feiñotimaci. ¹⁷ Nofiemo riga iduai jainaonidedi raise sicoñede. Naie comini janore ñnua jira, ie isoidimaci. Dallu nano ñnotimaci. Jusiñamui uai muidona duere naimaci sefua, abido danomo uaidimaci. ¹⁸ Jiaie iduai eecuai illanomo juide. Naie iduai sicua mei, iena eecuai ñbaila jira, raise lliñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; ¹⁹ iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitailla rafuena finocana jaiñedimaci. ²⁰ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

Jesúdi lamparína ñaia rafue

(Lc 8.16-18)

²¹ Jorai fuedo Jesúdi cominina nia llofujete:

—Jai uneca lamparín jiaie illanomona atia mei, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainade. ²² Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie ñnotimaci. Damierie ñnoñedimaci. ²³ Omoi jeforena jira, raise fueollena, cue lluamo cacarei. Iena ñno.

²⁴ Cue lluamo raise cacarei. Omoi cacaja diese Jusiñamui omoína uiñotaite. ²⁵ Iena omoi ñnoia, Jusiñamui omoína canoite. Omoína uiñocana jaitaite. Jiaimie iena janore cacajamona, iena ñnoñenia, Jusiñamui naimiena faifitaite.

Jesúdi Jusiñamui ie cominina sedaacana llofuaia rafue

²⁶ Jesús llote:

—Jusiñamui ñbeimo comini jailla rafuena nia lloiticue. Naimie ñbeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide. ²⁷ Judaia mei, ie illimo nagarui ie majicabilla isoi naimie jaide. Niese iduai denuana naimie raise uiñoñede; ²⁸ ia eniruemona nano sicode. Monaila mei, lliside. Iemona naicuai comuide. ²⁹ Jai einaia, iena ote. Ie isoide. Jusiñamui rafuena raise cacaiñedomoi; ia iena ñnocana jaidomoi.

Jesúdi mostaza ido llua rafue

(Mt 13.31-35; Lc 13.18-19)

³⁰ Jesús jiaie rafuena llote:

—Jusiñamui ñbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ñco jaitimaci. ³¹ Jiaie rafuedo iena omoimo lloiticue. Damie mostaza idona rillamona, naiemona eo aillue riará sicode. Mostaza ido eo janorede; ³² iadedi sicua mei, eo aillue riará jaillamona, ie onogaillai jegairiena jira, icairo anamo manaidinomo silliñiai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ñco jaitimaci.

³³ Naie isoide rafuiaido Jesúdi Jusiñamui ie cominina sedaacana rafuena cominimo llote. ³⁴ Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofujete.

Jesúdi jorai baguana lliicaitaja rafue

(Mt 8.23-27; Lc 8.22-25)

³⁵ Ailluena comini llofuaia mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

³⁶ Cominina fainonocaida, botemo naimie jai illamona, naimie llua isoi, oni jaidimaci. Jiaie botes jiai jaide.

³⁷⁻³⁸ Bai jaillanona, jillacimo Jesús inide. Ie ifogí almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinaillamona, Jesúsna casitatimaci. Raitimaci:

—Maestro, ¿niese itio inioilla? Caina cano. Jai buisaidicai. Corobaisaidicai.

³⁹ Naimie casillano, aifina lletade. Jinui baguana lliicaitade. Ieconí aifi lliicaide. Bagoñede. ⁴⁰ Ie llofueoicaiganomo jicanote:

—¿Bue ñellena jacinaitomoi? ¿Niese cuena raise iinoñedomoi?

⁴¹ Uai oñeno eo rajjicaidimaci. Coniniri ñaitimaci:

—Bimiedi ¿nie isoidimie? Aifi naimie uaina iinote. Jorai naimie uaina jiai iinote. —Bai jaillanona, ruica dine ridimaci.

5

Jesúdi Gadara railla eniruemo illa rafue

(Mt 8.28-34; Lc 8.26-39)

¹ Ruica dine naimaci ridemo, Gadara railla eniruemo sijidimaci. ² Botemona ari Jesús jaidemo, naimie dine damie bite. Naimiedi Janaba anamo itimie. ³ Comini raioillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. ⁴ Diga icaiño lleo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide. ⁵ Nagarui nofie motomo ite. Anedumo jaisoide. Cuirí-cuirisoide. Dama ie abina nofici diga jaidode. Iese naimie isoide. ⁶ Nofiemona Jesúna ciuanona, aisicana Jesús dine bite. Naimiena sedallena, ie caiñici ifodo ana rainadate. ⁷⁻⁸ Jesús llote:

—Janaba, bimiemona oni jai.

Janabadi iimana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoñeno.

⁹ Jesús Janabamo jicanote:

—¿O mameci bu?

Uai ote:

—Aillosiedicai.

¹⁰ Bie illanomona naimacina oretañellena Jesúmo duere jicanotimaci. ¹¹ Naie facaise nainomo ite anedumo ailluena chanchuai itimaci. ¹² Chanchuai abimo naimaci jaillena Jesúmo duere jicanotimaci. ¹³ Jesús dinena:

—Jee —raite. Ieconí iima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconí jillacimo joraimo chanchuai aisiano corobaisidimaci.

¹⁴ Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. ¹⁵ Jesús dine naimaci ridemo, jaive Janaba anamo illamiena Jesús ecimo raillana cioidimaci. Naimie iniroina jai jítade. Naimie jai uairicoñede. Iena ciuanona, Jesúna jaciruitimaci. ¹⁶ Naie rafuena ciodio jaive Janaba anamo illamie jilluana llotimaci. Chanchuaimo suide rafuena jiai llotimaci. ¹⁷ Naie enirue itinodi Jesúmo naimaci eniruemona oni jaillena duere jicanotimaci.

¹⁸ Botemo Jesús jaiacania, jaive Janaba anamo illamie Jesúmo jicanote, naimie diga jaillena; ¹⁹ ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenaillana naimacimo llono.

²⁰ Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajjicaidimaci.

Jesúdi mena duide riñona jillotaja rafue

(Mt 9.18-26; Lc 8.40-56)

²¹ Ruica díbeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia, ²² Jairona mameciredimiedi Jesús dine bite. Naimiedi judíuai rafue ofiraco sedarima. Jesúmo duere jicanollena, ana bitadate.

²³ Duere jicanote:

—Cue jisa jai fioidaiacade. Cue jofomo cue diga bi, o onolli naiñaiño o jonellena, naiñaiño jilloillena.

²⁴ Iena cacajano, ie llofueoicaigano diga, naimie diga Jesús jaide. Ailluena comini Jesús mo ñaijillanona jaidimaci. ²⁵ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. ²⁶ Diga manorainimona duere sefuide. Jilloñede; ia fodo jaide. Nana ie ucube jiai fuite. ²⁷ Jesús duidinona jilluana naiñaiño fidiamona, jinafo dinena billanona, naimie iniroina jetade. ²⁸ “Naimie iniroi cue jetajamona jilloiticue” comecina facajamona, naiñaiño naimie iniroina jetade. ²⁹ Ieconi diailladi fainonocade. Ie abi jilluana naiñaiño jai uiñote. ³⁰ Ie abimona ie uai oni jaillana Jesús uiñuanona, dobaicaide. Cominimo jicanote:

—¿Bu cue iniroina jetade?

³¹ Ie llofueoicaigano dinena uai otimaci:

—Ailluena comini o ecimo jaidimaci. Omo ñaijidinona: “¿Bu cue iniroi jetade?” raitio.

³² Raise uiñollena, Jesús ie ecimo itinomo erodate. ³³ Duidiñaiño ie jilluana uiñua jira, Jesús dine jaciruicana bite. Naimie uicomo ana bitadajanona, nana naiñaiño ite rafuena llote. ³⁴ Naiñaiño Jesús llote:

—Ñoo, cuena o inua jira, jai jillodio. Mai marena o jai. O duicomona jai jillobidio.

³⁵ Naiñaiño diga Jesús nia ñaitemo, Jairo jofomona jiaño bite. Jairomo llote:

—O jisa jai fioidaite. Maestrona ñaidoño.

³⁶ Iena cacajano, Jairomo Jesús llote:

—O comeci jarire iño; ia cuena nia ino.

³⁷ Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. ³⁸ Jairo jofomo rillanona, nainomo itino eecuinaillana cacade. Failliñaillana cacade. ³⁹ Jesús fo jailla mei, nainomo itinomo jicanote:

—¿Niese itomoi eecuinailla? Cuemona naiñaiño fioidañedes. Jamai inide.

⁴⁰ Iena cacajano, naiñaiño jai fioidaite uiñuamona, Jesús jaisitimaci. Naimacina Jesús jino oretaja mei, nai jitaño moo diga, naiñaiño ei diga, ie llofueoicaigano diga, naiñaiño ecimo Jesús jaide. ⁴¹ Naiñaiño onollina llinocaida, judúuai uaido raite:

—Talita, cumi. —Iena oni dobaiñuamona: “Jitaibici, mai naidacai” raite.

⁴² Ieconi jilluanona naidacaide. Jai jilluano macarite. Naiñaiño doce años jai ite. Nana nainomo itino ieri eo rajicaidimaci.

⁴³ —Bumo bie rafuena lloño —naimacimo Jesús llote. Guillena naiñaiño eajana jiai llote.

6

Nazaretmo Jesús illa rafue

(Mt 13.53-58; Lc 4.16-30)

¹ Naie illanomona Jesús oni jailla mei, ie llofueoicaigano diga Nazaretmo ride. ² Rilla mei, sábadoruimo nainomo ite ofiracomo llofue. Iena cacajanona, nainomo itino rajicaidimaci. Raitimaci:

—¿Niese eo abina uiñote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie. ³ Naimiedi amederaima. María jito. Ie amatiadi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.

⁴ Jesús naimacimo llote:

—Naga illanomo cominidi Jusiñamui facaina lloraíma uaina feiñotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina inoñedomoi.

⁵ Ie muidona nainomo siño rafuena eo finonide. Damierie duidinona jetajamona, naimacina jillotate; ⁶ ia naimaci inoñenari rajicaide. Ie mei diga nairaimo Jesús llofuecana jaide.

Jesúdi ie llofueoicaiganona oretaja rafue
(Mt 13.53-58; Lc 4.16-30)

⁷ Ie doce llofueoicaiganona Jesús uaiduanona, naimacimo ie uai iñonocaiide, jananiai anamona cominina jilloitallena. Ie rafuena lollena, jiaie illanuaimo naimacina menamierie oretaiacade. ⁸ Raite:

—Ailluena rana uiñeno. Omoi abi riidollena, jiguidana uiño. Llomenicono uiñeno. Ailluena rana omoi uiñellena, bolsana uiñeno. Ucubena uiñeno. ⁹ Zapatona jítajano jai. Abi omoi meidolle iniroina uiñeno. ¹⁰ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i. ¹¹ Omoína bu feiñoiacaiñenia, omoi uaina bu cacarefiacaiñenia, naie nairaimona omoi jaillanona, omoi eilliaimo ite jearacuaina oni jaidino. Maraiñede rafuena naimaci finuana naimaci uiñollena, omoi eilliaina jaidino.

¹² Jesús naimacimo llua mei, jaidimaci.

—Omoi jeacinona fainonocaillanona, Jusiñamui díbeimo omoi comeciai iuai meiduana omoi jai —llofuecana jaidimaci. ¹³ Janaba anamo ite cominimona Janabana oredimaci. Duidino abimo farena gia mei, naimacina jillotata.

Juan Bautista micori fiodailla rafue
(Mt 14.1-12; Lc 9.7-9)

¹⁴ Jesús mameci are sorilla jira. Herodes railla gobernador Jesús finoca rafuena fidide. Naimie raite:

—Fiodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

¹⁵ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaiie lloraíma micori jai jillode.

¹⁶ Jesúsna fidiano, Herodes comecina facade: “Juan micori ie ifogina navui jaitataticue. Fiodaillamona naimie jai jillode”.

¹⁷⁻¹⁸ Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

¹⁹ Ie muidona Herodías dinena Juan Bautista micorina jearuite. Naimiena meinetaiacade; ²⁰ ia finonide, Juan Bautista micorina Herodes jaciruilla jira. Naimiedi Juan micorina mareuidimienna uiñote. Naimie Juan micori Jusiñamui rafuedo jaillana jiai uiñote. Ie muidona naimie Juan micorina raise eenote. Diga icaiño naimie micori llua cacade. Iena gaide; ia iena raise cacaiñede. Ie muidona Herodías naimie micorina meinetanide; ²¹ ia ja muidomo naiñaiño sedallirui ride. Herodes cumpleños ie rafuena finode. Ailluena illaicomina ie rafuemo uaidote. Eo ucuberedinona jiai uaidote. ²² Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. ²³ Illaíma uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

²⁴ Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

²⁵ Herodes dine raire abido billanona, llote:

—Juan Bautista ifogi bandejamo ja joncaida, cuemo ine.

²⁶ Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacañede. ²⁷ Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. ²⁸ Bandejamo naimie ifogi joncaida, iena atiano, Herodías jisamo fecade. Iecon

ie eimo fecade. ²⁹ Iena fidianona, Juan micori llofueoicaigano naimie micori abina uaibitimaci. Iena raitimaci.

Jesús cinco mil iñiaina ecaja rafue

(Mt 14.13-21; Lc 9.10-17; Jn 6.1-14)

³⁰ Jesús llofueoicaigano abido bia, Jesúmo nana naimaci finoca rafuena llotimaci. ³¹ Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiaí abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

³² Ie muidona botedo comini iñenanomo dani jaidimaci. ³³ Ailluena comini naimaci oni jaillana cioidimaci. Naimacina uiñuamona, diga nairaiamona aisicana jaidimaci. Jesús nia riñenia, uicodo ie jaillanomo ridimaci. ³⁴ Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uiñuamona, Jesús naimacina duenaite. Ailluena rafuena naimacina llofue. ³⁵ Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. ³⁶ Comini mai abido oreta. Ianori ite nairaiamo, ianori ite jofuemo naimaci guille ollena, bie cominina abido oreta.

³⁷ Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaidio.

³⁸ Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

³⁹ Iena cacajano, cominimo raitie illanomo dajerise ana raillena Jesús llote. ⁴⁰ Naimaci cien digamierie ana raisite. Jiaino cincuenta digamierie ana raisite. ⁴¹ Naie cinco llomeniconona, naie mena lliciai diga, Jesús uanona, monamo eruaillanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade. ⁴² Nana guillanona monidimaci. ⁴³ Monillamona, fiebide guillena iraidimaci. Doce cirigaiaimo oruitatimaci. ⁴⁴ Cinco mil iñiaí diese guitimaci. Naimaci ainiaí, imaci uruiaí diga, jiaí guitimaci.

Jesús jinui emododo macarilla rafue

(Mt 14.22-27; Jn 6.16-21)

⁴⁵ Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote. ⁴⁶ Cominina facadua mei, aneduaimo dane jaide, Jusiñamui diga ñaillena. ⁴⁷ Jitibicaidemo, nainomo dama ite. Ie llofueoicaigano jorai motomo jai itimaci. ⁴⁸ Aifi naimacimo riire rilla jira, riire jaitimaci. Iena Jesús ciuanona, jinui emododo naimaci dine bite. Naimaci ecido naimie jaisaide; ⁴⁹ ia naimiena naimaci ciuanona, comecina facadimaci: “¿Bu joreño caimo billana ciodicai?” ⁵⁰ Naimiena ciuamona, nana jacinaillamona cuirioidimaci. Naie dacaiño Jesús naimacimo llote:

—Omoi joreñonicaiñeno. Cuesa. Jaciruiñeno.

⁵¹ Botemo Jesús jaide. Ie facaise aifi lliciaide. Ieri eo rajicaidimaci. ⁵² Janore guillemona ailluena cominina naimie ecajana jaive cioidimaci; ia naimie uai siñonana nia raise uiñoñedimaci. Naimiena nia raise iñoñedimaci.

Jesúdi duidinona Genesaret eniruemo jillotaja rafue

(Mr 14.34-36)

⁵³ Ruica dine jaillanona, Genesaret railla eniruemo ridimaci. Nainomo sijidimaci. ⁵⁴ Botemona ari jaidemo, nainomo itino Jesúsna uiñotimaci. ⁵⁵ Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atiuidimaci. ⁵⁶ Diga nairaiamo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie

inironi fueda jetallena naimiemo duere jıcanotımacı. Nana naimie inironina jetadıno diese jillodımacı.

7

Jesúdi comini comeciaina ñaia rafue
(Mt 15.1-20)

¹ Naie facaise fariseuai cominidi Jesús dine bitımacı. Moisés micori llogacınona llofueraini Jerusalémona jıai bitımacı. ² Jesús llofueoicaiganomona damierie naimacı isoi guiñenana ciodımacı. ³⁻⁵ Fariseuai dinena Jesúmo jıcanotımacı:

—¿Bue ñellena omoi llofueoicaigano cai einamacı rafuedo jaiñedımacı? Naimacı guıacania, naimacı onollı cai einamacı llua isoi, raise jocoñedımacı. Ie jira cai abımo jeacıno finodomoı.

Iese jıcanotımacı, naimacı einamacı rafuedo naimacı jailla jira. Maraiñede rafue naimacımo suiñellena, iese ailluena judııuai jaidımacı. Naimacı guıacania, naimacı einamacı llua isoi, onollına dıga ıcaıño jocuano, guitımacı. Mercadomona bia, naimacı einamacı llua isoi, abına lleredımacı. Naimacı einamacı llua isoi, tazones, ollas, bandejas jıai jocodımacı. Iese jaisoidımacı. Comeciına facadımacı: “Iese cai finoia, Jusiñamuımona mare. Iese cai finoñenia, Jusiñamuımona maraiñede. Naimie caina duere finoite”. Jearede rafue naimacı abımo oñellena, iese finouidımacı.

⁶ Jesús uai ote:

—Mareuidınona abı caitauidınodomoı. Isafas micori jaie omoına raise llote. Naimiedi Jusiñamui llua cuete:

Bımacı naimacı uaido marecınona cuemo llote; iadedı cue rafuedo raise jıacaiñedımacı.

“Ona isıruıtıcaı” llotımacı.

“Ona sedadıcaı” llotımacı.

Jamai ñaitımacı. Naimacı comeciı cue dıbeımo raise iñede.

⁷ Cue uai itena, jamai comini llucacınona naimacı llofuecabilla jira, tainona cuena sedadımacı

cuete. ⁸ Isafas micori llua isoi itomoı. Jusiñamui llogacınona faınonocaida, omoi einamacı rafuedo jaidomoı. ⁹ ¿Bue ñellena nana Jusiñamui llogacınodo jaiñedomoı? Omoi einamacı llogacınodo jaidomoı; iadedı nana Jusiñamui llogacınodo raise jaiñedomoı.

¹⁰ Moisés micori jaie llote: “O moo uai inuanona, naimiena cano. O ei uai inuanona, naiñaiñona cano. Ie moori jeare ñaitımie, ie eiri jeare ñaitımie meinelle”. ¹¹⁻¹² Iese Moisés micori llote; iadedı omoi einamacı llotımacı: “Jusiñamuımo cai ucubena cai fecajamona, cai moona, cai eina jai canonıdıcaı”. ¹³ Iese omoi finocabilla jira, omoi einamacı llogacınodo omoi jaillamona, Jusiñamui uaina jamaidomoı. Bie isoide rafuedo jaca jaidomoı.

¹⁴ Fariseuai dıga iese llua mei, naimie ecımo ailluena comini dane ofıllanona, naimacımo llote:

—Iena raise omoi uıñollena, cue llua mo cacarei. ¹⁵ Omoi einamacı isoi omoi guiñenia, naimacı isoi omoi onollına omoi jocoñenia, omoi comeciaina jearetañedomoı. Omoi guıllamona, omoi onollına jocuamona. Jusiñamuına nabaiñedomoı. Omoımo jeacıno illa jira, Jusiñamuına nabaiñedomoı. Omoi comeciı jearena jira, jeacınona finocabıdomoı.

¹⁶ Omoi jeforena jira, raise fueollena, cue llua mo cacarei. Iena ino.

¹⁷ Cominımona oni jaillanona, Jesús ie risoılla jofomo jaide. Nainomo ie llofueoicaigano aıllınano ie llua jıcanotımacı. ¹⁸ Uai ote:

—¿Nıese cue llua jıai nıa cacaiñedomoı? Nıe isoide ra guitomoina, omoi comeciımo jeare iñede. ¹⁹ Omoi comeciımo jaiñede; ia omoi jebemo jaide. Ie mei omoi abıaimona jino bite.

Jesús llua mo, nana guıle radı mare uıñotıcaı. ²⁰ Jesús llote:

—Omoi comeciı jearena jira, jearede rafuena finocabıdomoı. ²¹ Omoi comeciı jearena jira, jeare comeciaina facacabıdomoı. Omoi aiñede riño dıga ıcabıtoı. Omoi iniñede iıma dıga ıcabıtoı. Fııricabıtoı. Cominına meınecabıtoı. ²² Jıai

comini rana nicidocabitomoi. Jearede rafuena finocabidomoi. Iena ebiruitomoi. Jifuericabidomoi. Abina uradoicabidomoi. Jiaie comini joreñaona jeare ñaicabitomoi. Abina iedocabitomoi. Ebona jaicabidomoi. ²³ Bie isoidicinuai omoi comeciaino illa jira, jearede rafuena finocabidomoi; iadedi omoi einamací llua isoi, omoi onolli jocoñena-mona jeacino comuiñede.

Jesúdi judío iñaiñoñediñaiñoña jillotaja rafue
(Mt 15.21-28)

²⁴ Nainomona Jesús jaillanona, Tiro railla eniruemo jaide. Sidón railla eniruemo jiai jaide. Nainomo jofomo jaillanona, iena buna fidiana jitañede; ia iena janonide. ²⁵⁻²⁶ Ie facaise judío iñaiñoñediñaiño ñaño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidianona, naimie ñe bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúmo duere jicade. ²⁷ Judúuaiñedinona naimie canoñenana naiñaiño uiñollena, naiñaiñoño Jesús llote:

—Uruiai guillamona jiconiaina ecadicaide, maraiñede. Uruiai nano ecadicaí.

²⁸ Naiñaiño ñenena uai ote:

—Jii, maestro; iadedi jiconiaidi uruai guillamona fiebide guillemona guitimaci. — Iese llote; ia jiaie rafuemo comeciina facade. Uruiaina llote; iadedi judúuaiño comeciina facade. Jiconiaina llote; ia judúuaiñedinomo jiai comeciina facade. Comeciina facade: “O cominimo o rafue duide; ia cai Namana o illa jira, nibai o rafue caimo janore duide”.

²⁹ Jesús uai ote:

—Raise llotio. O jofomo mai abido jai. O jisamona Janaba oni jaide.

³⁰ Naimie llua isoi jofomo jaide. Ie jisa biiramo biidena ciode. Janaba naiñaiñoñomona oni jaillana jai uiñote.

Jesús jefona cacaiñediñaiñoña jillotaja rafue

³¹ Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiai jaide. Ja muidomo Galilea railla jorai fuemo ride. ³² Iena fidiano, naimie ñe comini jefona cacaiñediñaiñoña atide. Naimie gogoma. Naimiena jilloitallena, naimiemo ie onolli jonellena Jesúmo jicadimaci. ³³ Ailluena comini naimie ñe jai billa jira, jefona cacaiñediñaiñoña eneno oni uite. Nagafebe jefomo onocai ñuitade. Ie onocaimo tuajanona, iima iifena jetade. ³⁴ Jusiñamui ñe monamo eruaita, naimiena duenaillamona, jafaicina faite. Judúuai uaido naimiemo llote:

—¡Efata! —Oni dobañuamona: “¡Ecoricaí!” raite.

³⁵ Ieconí ie jefodi ecoricaide. Jai raise cacade. Jai raise ñaite. ³⁶ Cominimo:

—Bimie jai jilluana bumo lloñoño —Jesús diga icaiño llote; ia naimie uaina iñoñediñaiño. Iena llocana uitimaci. ³⁷ Naimieri eo rajicadimaci. Coninina naimiena raitimaci:

—Naga rafuena raise finode. Jefona cacaiñediñaiñoña jai jillotate. Gogonaitimiena jai jillotate.

8

Jesúdi cuatro mil iñaiñoña ecaja rafue
(Mt 15.32-39)

¹ Naie facaise naimie ñe ailluena comini illanona, naimaci guille jai iñena jira, Jesús ie llofueoicaigano naimie ñe uaidote. Raite:

²⁻³ —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñediñaiñoña, naisomo naimaci baii raillano. Naimacina cue duenailla jira, naimacina canoiacadiñaiñoña.

⁴ Jicanotimaci:

—¿Niese naimacina bene ecaiticaí? Jofue iñenanomo iticaí.

⁵ Jesús jicanote:

—¿Niga llomenico omoimo ite?

Uai otimaci:

—Siete.

⁶ Comini ana raillena Jesús llote. Naie llomeniconona uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. ⁷ Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote. ⁸ Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. ⁹ Nainomo cuatro mil iñiaiai guitimaci. Naimaci ainiaiai, imaci uruiaiai diga, jiai guitimaci. ¹⁰ Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

Fariseuai comini Jesúsno siño rafuena finuana jicanuano billa rafuena
(Mt 16.1-4; Lc 12.54-56)

¹¹ Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uiñotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

¹² Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

¹³ Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

Jesús siritate rana llofuaia rafue
(Mt 16.5-12)

¹⁴ Ruica dine rilla mei, Jesús llofueoicaigano llomeniconona feillana uibiñotimaci. Naimacimo daje llomenico ite. ¹⁵ Iena naimie uiñuamona, naimacimo Jesús llote:

—Fariseuai siritate ramona abina rairui. Illaima Herodes siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite.

¹⁶ Jesús iese llua jira, iena naimaci raise cacaiñena jira, dani coniniri siadotimaci:

—Llomeniconona cai atiñena jira, caimo iese llote.

¹⁷ Naimaci siaduana Jesús uiñua jira, naimie llua naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Ñiese cuena iñoñedomoi? Cuemo siño uai illana nia raise cacaiñedomoi. ¹⁸ Uisiredomoi. Jeforedomoi. ¿Ñiese cue navui siño finoca rafuemo comeaiña facañedomoi? ¹⁹ Navui cinco mil iñiaiai cinco diga llomeniconona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

²⁰ Jesús llote:

—Jiaicaiño cuatro mil iñiaiai siete diga llomeniconona guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

²¹ Jesús dinena jicanote:

—¿Ñiese cuena nia raise iñoñedomoi? Siño uai cuemo illana nia raise iñoñedomoi.

Jesús uisnidimiena jillotaja rafue

²² Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisnidimiena atide. Naimiena jilloitallena, naimiena jetallena, Jesúsno jicanote. ²³ Iena Jesús cacajanona, ie onollina llinuanona, nairai illa jinofemo uisnidimiena uite. Ie mei ie uisina tuade. Ie uisina jiai jetade. Naimiemo jicanote:

—¿Buena ciodio?

²⁴ A eruaillanona, uai ote:

—Comini macarillana ciodicue; ia amena isoi eruidimaci. Nia raise cionidicue.

²⁵ Ie uisina Jesús dane jetade. Iemona oni erocaillamona, jai jillode. Jai raise ciode.

²⁶ Jai jillua jira, ie jofomo naimiena abido orede. Jesús llote:

—Betsaidamo itino o jilluana lloñeno; ia nainomo jaiñeno o jofomo mai abido jai.

Pedro Jesúsna llua rafue

(Mt 16.13-20; Lc 9.18-21)

²⁷ Cesarea Filipino eniruemmo ite nairaiaimo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

²⁸ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁹ Jesús dane jicanote:

—¿Niese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci

³⁰ Jesús iena bummo llua rairuide.

Jesús ie fiodaillena llofuia rafue

(Mt 16.21-28; Lc 9.22-27)

³¹ Ie facaise ie llofueoicaiganona ie duere sefuillena llofue. Llote:

—Cai judúuai illaicomini cuena eo duere finoitimaci. Cuena jitañellemona, cuena meineitimaci; iadedi darui amani illanona, fiodaillamona jilloiticue.

³² Iena marefodo naimacimo llote. Iena cacajano, Pedro dinena lletade:

—Dama ite. Iese lloñoeno. Bie isoide rafuena lloñoeno.

³³ Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñoeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

³⁴ Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñoena. Cue díbeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue díbeimo naimie iite. ³⁵⁻³⁷ Duere sefuillana jaciruillamona, cue cominina bu jaiacaiñoena, ja muidomo faifite; iadedi duere sefuillana jaciruñoenamona, cue cominina bu jai, jaca faifíñeite. Cue cominina bu jaiñoena, nibai eo duere sefuíñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñoeno faifite.

³⁸ Birui ite comini Jusiñamuina jitañedimaci. Naimiena jai fainonocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñoena, íco cue bia: “Naimiedi cue comini” lloñeiticue. Jusiñamui jaienisai díga, cue Moo dinena, monamona íco biiticue. Cue Moo uai cuemo illanona, ebire biiticue.

9

¹ Omoimo uanaicinona lloticue. Omoimona dajerie nia fiodaiñoetomoimo, illaimana ebire cue bairellena cioitomoi.

Jesús abi meidocailla rafue

(Mt 17.1-13; Lc 9.28-36)

² Seis dígarui illanona, anedumo comini iñenanomo Jesús jaide. Naimie díga jaillena, Pedrona uite. Jacobo jiai uite. Juan jiai uite. Jiaie llofueoicaiganona uíñede. Nainomo rilla mei, naimaci uicomo naimie abi meidocaide. ³ Naie dacaiño naimie iniroi eo quenirecaide. Eo userecaide. Cai iniroimo jitoma lligaiñoamona ie isoi usere jaca jaiñede. ⁴ Naie facaise naimacimo Moisés micori joreño, Elías díga, bairede. Elíadi Jusiñamui facaina jaie lloraíma. Jesús díga ñaitiaímaíai. ⁵ Iaimaíai jaiacania, Pedro Jesúsno llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

⁶ Eo jaciruilla jira, naimie ñaia rafuena raise uíñoñoeno jamai ebena ñaite. ⁷ Ie facaise uillie billamona, naimacina íbaide. Uilliemona Jusiñamui llote:

—Bimie cue isiruiga Jito. Naimie lluaamo cacareillanona, iena ñino —llote.

⁸ Ieconí oni erodajanona, dama Jesúsna ciodimaci. Jíainona cioñedimaci.

⁹ Anedumona bitimacimo, naimacimo Jesús llote:

—Omoi ailli ciua rafuena bumo lloñeno, cue fiodaillamona cue jillua dinori. ¹⁰ Jesús llua isoi finodimaci. Iena bumo lloñedimaci; ia fiodaillamona naimie jilluana naimaci raise nia cacaiñena jira, iemo comecina facadimaci. ¹¹ Naimiemo llotimaci:

—Moisés micorí llogacinona llofueraini birui raicabitimaci: “Elías raillamie dane biite. Ie mei cai Jilloitaraima biite” raitimaci. Jusiñamuimona o billana ñnoticai. Odi cai Jilloitaraimana ñnoticai. Odi cai Jilloitaraimadiomo, ¿bue ñelli iese raitimaci?

¹² Uai ote:

—Raise ñnotomoi. Elías isoidimie jai bite, nana Jusiñamui jitailla rafue raise llollena. Jusiñamui díbeimo naimaci illena, comini imaci comeciai meiduana llote. Jusiñamui facaina lloraini micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca. ¹³ Elías isoidimie jai bite; iadedi Jusiñamui facaina lloraima micorí jai euega isoi, naimaci jitailla jira, naimiena jai meinetimaci.

Jesúdi Janaba anamo itimiena jillotaja rafue

(Mt 17.14-21; Lc 9.37-43)

¹⁴ Ie jiaie llofueoicaigano dine Jesús abido ria, nainomo ailluena comini itimacimo ride. Moisés micorí llogacinona llofueraini dinena ie llofueoicaigano uaina uaitaside.

¹⁵ Jesús billana comini ciuanona, jacinaisidimaci. Naimiena feñollena, naimie dine aisida jaidimaci. ¹⁶ Moisés micorí llogacinona llofuerainimo Jesús jicanote:

—¿Niese cue llofueoicaigano uaina uaitatomoí?

¹⁷ Uai oñedimaci; ia cominimona damie uai ote:

—Maestro, Janaba anamo cue jito illa jira, o dine naimiena atidicue. Cue jito Janaba anamo illamona ñainide. ¹⁸ Nagarui Janaba bille diese, naimiena eniruemo uaitate. Iemona fue di mullede. Ie isidodi murude. Ie abi jaiare jaide. O llofueoicaiganomo jicadicue, Janabana oni oretallena; ia oretanidimaci. Ie jira Moisés micorí llogacinona llofueraini bie rafuena, o llofueoicaigano diga, uaina uaitatimaci.

¹⁹ Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Omoi diga are iticue. Raise omoi ñnollena, ¿nie dinori omoi diga iiticue?

Naie duidimie moomo llote:

—O jito cue dine mai ati.

²⁰ Naie urue Jesús dine atianona, Janaba naimiena naillitate. Iemona urue eniruemo uaide. Jabi-jabide. Fue mullede. ²¹ Jesús dinena naie urue moomo jicanote:

—¿Nie dinori o jitodi bie isoi ite?

Uai ote:

—Naimie uruenamona. ²² Janabadi, diga icaiño iraimo usillena, naimiena uaitate. Corobaillena, diga icaiño jinuimo jiai uaitate. Janaba oni o oretarenia, cocona duenaillamona, cocona cano.

²³ Jesús uai ote:

—“O oretarenia” raitio. Ero, o jito jillotaredicue. Cueno o ñnoia, o jito jilloite.

²⁴ Naie urue moo ieconi llote:

—Ona ñnoticue. Raise nia cue ñnoñenia, cuena raise ñnota.

²⁵ Naie facaise ailluena comini naimie dine raire ofillana naimie ciuanona, Jesús Janabana lletade:

—Bie uruena ñaitatañedio. Naimiena cacaitañedio. Naimiemona oni jai. Naimie dine dane biñeno.

²⁶ Ado cuirioillanona, naimiena eo riire naillitajanona, Janaba oni jaide. Iemona naie urue fiodaitimie isoi eroaide. Naimiena ciuanona, nainomo itino raitimaci:

—Naimie jai fiodaite; ²⁷ —ia Jesús naimie onollina llinoicaida, naimiena a naidanete.

²⁸ Iemona oni jaillanona, damie jofomo Jesús nailli ria, naimiemo ie llofueoicaigano anado jicanotimaci:

—¿Bue ñllena Janabana oni oretanidicai?

²⁹ Jesús uai ote:

—Jusiñamuimo omoi jñamona, naimiena raise omoi ñnuamona, bie isoide Janabana oretaredomoi. Naimiena omoi raise ñnoñena jira, bie uruemona Janabana oni oretañedomoi.

Jesús ie fiodaillena dane llofuia rafue

(Mt 17.22-23; Lc 9.43-45)

³⁰⁻³¹ Ie llofueoicaigano diga Jesús oni jaillanona, Galilea railla eniruemo jaide. Ie llofueoicaiganona naimie llofueiacana jira, naimie ie jaillana jiaie comini fidiana jitañede. Naimacimo llote:

—Monamona billanona, iimana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. Naie illaicomini cuena meineitimaci; iadedi darui amani illanona, jilloiticue.

³² Ie llofueoicaigano iena raise cacaiñedimaci; ia naimiemo iena jicanuana meiruitimaci.

Jesús ie llofueoicaigano moto imiena ille rafue

(Mt 18.1-5; Lc 9.46-48)

³³ Capernaumo Jesús rilla mei, ie risoilla jofomo naimie ia, ie llofueoicaiganomo jicanote:

—Naisona cai bia, ¿nie isoide rafuena coniniri siadotomoi?

³⁴ Uai oñedimaci. Naimaci moto imiena illena, naisodo siadocana bitimaci. Meiruillanona, uai oñedimaci.

³⁵ Naimie ana rainadaja mei, ie ecimo naimacina uaidote. Raite:

—Omoi moto imiena bu iacania, jamai bue isoidimiena naimie illa. Omoi muillaimana naimie jailla isoilla.

³⁶ Iena naimaci raise uiñollena, nainomo ite cominimona daje urue bai jainanocaida, naimaci motomo naimiena jonete. Naimiena menioita, naimacimo llote:

³⁷ —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiena feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

Jesúdi ie dibeimo itinona llua rafue

(Mt 10.42; Lc 9.49-50)

³⁸ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

³⁹ Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaiñeite. ⁴⁰ Cai dibeimo itimiedi cai facaisena ite. ⁴¹ Ero, cuemo omoi duillamona, omoína bu janore canoia, Jusiñamuimona ibana feiñoite. Omoimo ñibai jamai jinuina fecaite; iadedi omoína naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

Jesúdi jeacinona finoñenana llofuia rafue

(Mt 18.6-9; Lc 17.1-2)

⁴² Jesús nia llofueite:

—Cuena como ñnotinona jeacinona finotaiacadimie iena finoñellena, naimie cimaïomo aillue nofici maianona, joraimo corobaillena naimiena dotacadena, mare. ⁴³⁻⁴⁸ Biena ñaiticue. Nie isoide rafue omoína jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iramo omoi jaiñellena, jeacino

finoñeno. Naimacimo ite aiaí fioidañena jira, naie irai jaca duiñenamona, nainomo itino jaca duere sefuitimaci.

⁴⁹ 'Ero, birui omoi duere sefuillamona, cue cominina jai jaidinona uiñoiticue. ⁵⁰ Guille caimaretallena, sal mare; iadedi ie caimano jai iñenia, iena dane caimaretañedicaí. Ie isoide. Jeacino omoi finoia, omoi comeciaí caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

10

Jesús iima ie aina dotaja rafuena llofua rafue

(Mt 19.1-12; Lc 16.18)

¹ Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica díbeimo jaide. Ailluena comini naimie dine ofillamona, naimie llofueuilla isoi, naimacina llofue. ² Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

³ Uai ote:

—¿Niese Moisés micori llote?

⁴ Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñona dotaite”.

⁵ Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuiñede; ⁶ iadedi nano dofoconi iese iñede. Enirue finua facaiseconi Jusiñamuidi come iaimaiaina finode. Imana finode. Riñona jiai finode. ⁷ Ie jira Jusiñamuidi jaie llote: “Ie ai diga illena, iima ie moona fainonocaite. Ie eina jiai fainonocaite. Ie ai diga illamona, menade comedi daamiena jai jaide” llote. ⁸ Menade come jai daamiena jai ite. ⁹ Jusiñamui iese iaimaiaina itataja jira, iima ie aina dotajana rairuidicue. Riño ie inina dotajana rairuidicue.

¹⁰ Jofomo ie llofueoicaigano diga, naimie nailli illanona, naimiemo bie rafuena jicanotimaci. ¹¹ Jesús dinena llote:

—Jiaie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. ¹² Ie inina fainonocaillanona, jiaimiena nie riño uamona, naiñaiño jeacino jai finode.

Jesúdi naimie dine uruai billana jitailla rafue

(Mt 19.13-15; Lc 18.15-17)

¹³ Naie facaise Jesús dine comini naimaci jesanide diese atidimaci. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Ie llofueoicaigano iena rairuidímaci; ¹⁴ iadedi iena cacajano, Jesús icirite. Jesús raite:

—Uruiai cue dine billesa. Naimacina rairuiñeno. Cuen a bie isoi innotinodi Jusiñamui cominidímaci. ¹⁵ Bie uruai abina iedoñedímaci. Einamacimona jamai bue isoidímaci. Naimaci isoi bu iñenia, Jusiñamui cominina jaiñeitímaci. Jusiñamui naimiena sedallena, Jusiñamui cominina naimie jaiñeite.

¹⁶ Naie uruai dasarie meni-menioicaida, naimaci ifogimo ie onollina joneta:

—Jusiñamui omoína canoite —llote.

Ucuberedimie Jesús diga ñaia rafue

(Mt 19.16-30; Lc 18.18-30)

¹⁷ Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremiedio. Jusiñamui diga ico cue jaca illena, ¿buena finoiticue?

¹⁸ Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. ¹⁹ Moisés micori llogacinuaina inocana jai. Jaie cuete: “Comena meineño. O aiñede riño diga iñeno. Fiiñeno. Jiaimiena o llogidoia, tainona lloño. O moo uaina iino. O ei uaina iino”.

²⁰ Uai ote:

—Maestro, uruena cue illa facaisemona nana bie llogacinuaina inoticue.

²¹ Jesús dinena naimiemo eruaillanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuena o inuamona, monamo ico jaca itio. Cue llofuegamiena o illena, mai cue diga bi.

²² Iena cacajano, naimiedi sunaite. Eo aillue ra naimiemo illa jira, iena naimie fecaacaiñena jira, sure jaide. ²³ Naimie jailla mei, ie llofueoicaiganomo eruaillanona, naimacimo llote:

—Ucuberedinodi Jusiñamui cominina jaillena eo sefuiruitimaci.

²⁴ Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite.

²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

²⁶ Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicai di Jusiñamui cominina jaiticai?” raillamo comeciaina facadimaci. Raijicaillanona, coniniri raitimaci:

—Nana comini rana jitailla jira, ¿buca jillobiti?

²⁷ Naimacimo eruaillanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro dinena llote:

—O llua isoi jai finodicai. Nana cai rana fainonocaida, o diga jai jaicabidicai.

²⁹ Jesús uai ote:

—Uanaicino lloiticue. Cuena naimie isiruillamona, cue rafuena naimie llumona, ie jofona bu fainonocaia, ie amatiana bu fainonocaia, ie miriñuaina bu fainonocaia, ie moonona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, ³⁰ Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiai, ie miriñuai, ie eitiai, ie uruai, ie enirue birui iite. Monamo naimie ico caimare iocire jaca iite.

³¹ Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoñedimaci; ia Jusiñamuimona ico jamai bue isoitimaci. Jiaimono ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoñeitimaci.

Jesús ie fiodaillena dane llua rafue

(Mt 20.17-19; Lc 18.31-34)

³² Jerusalémo nia jaillanona, Jesús uicodo jaide. Nainomo naimie jaciruiño jaillamona, ie llofueoicaigano rajicaidimaci. Naimaci diga jaidino jaciruoicaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:

³³ —Ero, Jerusalémo jai jaidicai. Monamona billanona, imana jaidicue; iadedi omoi illacomini cuena gaitaitimaci. Gaitaja mei, cue meinellena lloitimaci. Judúaiñedino illacomimimo cuena fecaitimaci. ³⁴ Cueri jifanoitimaci. Cuena tuallaitimaci. Cuena faitimaci. Cuena meiteitimaci; iadedi cue fiodailla mei, darui amani illanona, jilloiticue —llote.

Jesús dine Jacobo Juan iaiaiaiai billa rafue

(Mt 20.20-28)

³⁵ Naie facaise Jesús dine Jacobo, Juan diga bitiaiaiaiai. Iaiaiaiai moodi Zebedeo. Raitiaiaiaiai:

—Omo coco jicalle rafue cocoena finuana jitaidicoco.

³⁶ Jesús uai ote:

—¿Nie isoide rafuena jitaidomico?

³⁷ Uai otiaimaia:

—Illaimana o jailla mei, o ecimo coco illena o llwana jitaidicoco. Damie o nabeimo. Jiaimie o jarifebeimo. —Jiaino afemo iaimaiai illena, iese llotiaimaiai.

³⁸ Jesús dinena llote:

—Omico jicanuana raise uiñoñedomico. Cue eo duere sefuiticue. Llegi cacaiticue. ¿Je isoi duere sefuiacadomico? ¿Je isoi llegi cacaiacadomico?

³⁹ Uai otiaimaia:

—Jii. Sefuiacadicoco.

Jesús dinena raite:

—Cue isoi duere sefuitomico. Llegi cacaitomico; ⁴⁰ iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

⁴¹ Iena jiaie llofueoicaigano cacajano, naie iaimaiairi iciritimaci. ⁴² Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci; ⁴³ iadedi omoi dine iese iñena. Omoimona bu imiēna iacania, omoi mullaimana naimie jaisoillasa. ⁴⁴ Omoimona bu imiēna iacania, omoina naimie canocana jaisoillasa. ⁴⁵ Cuemona fueo. Biñedicue, cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena iinuamona, jilloitimaci. Coninina omoi canua —llote.

Jesúdi Bartimeona jillotaja rafue

(Mt 20.29-34; Lc 18.35-43)

⁴⁶ Oni jaillanona, Jericó railla nairaimo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fuemo uisinidimie raide. Naimie mameci Bartimeo. Timeo jito. Nainomo jamai raide, ucubena jamai jica-jicallena. ⁴⁷ Nazaret ie Jesús jaillana naimie cacajano, ado cuiurioide:

—David micori Jitona o illamona, Jusiñamuimona o billa jira, cuena duenai. Cuena cano.

⁴⁸ Naimie lliicaillena, Jesús diga jaidino naimiēna lletade; iadedi eo cuiurioide:

—Maestro, David micori Jitona o illamona, cuena duenai.

⁴⁹ Naimiēna cacajano, Jesús naidadajanona, llote:

—Naimiēna cue dine uaido.

Bartimeona uaiduanona, raitimaci:

—O comecina ocuiño. Mai naidacai. Jesús ona uaidote.

⁵⁰ Iena cacajano, ie emodomo itiroina duiñuanona, raire naidacaida, Jesús dine bite.

⁵¹ Naimiemo Jesús jicanote:

—¿Niese ona cue nibaiana jitaidio?

Uai ote:

—Maestro, cioacadicue.

⁵² Jesús dinena uai ote:

—Cuena o iinua jira, jai jillodio. Mai jai. —Iecon naimie jai ciode. Jesús diga jaidino diga naimie jiai jaide.

11

*Jesús illa*ima isoi Jerusalémo jailla rafue

(Mt 21.1-11; Lc 19.28-40; Jn 12.12-19)

¹ Oni jaillanona, Jerusalémo iaireicaidimacimo, Betfagé railla nairaimo ie llofueoicaigano diga Jesús ride. Betania nainomo jiai ite. Olivos railla anedumo naga nairai iaimaiai ite. Ie llofueoicaiganomona Jesús menamiēna orede. ² Raite:

—Bie nairai illa uicom mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. ³ Omicomo: “¿Bue

ñellena iena suiñodomico?” bu jicanoia, llono: “Coco Nama iena jitaide. Nailli iena raire abido oretaite lote”.

⁴ Naimie llua isoi, jaidiiaimaiai. Naisomo jofu nasemo burritona baillanona, iena suiñodiiaimaiai. ⁵ Ie facaise nainomo itino jicanote:

—¿Bue ñellena burritona suiñodomico?

⁶ Jesús llua isoi uai otiaimaiai. Ie muidona:

—Jee —raitimaci.

⁷ Burritona atidiaimaiai. Ie emodomo naimie llofueoicaigano naimaci iniroi jobianona, ie emodomo Jesús rainadate. ⁸ Naimiena iobitallena, illaima isoi naimie jaillena, diga comini, imaci iniroi diga, naiso motomo jobedimaci. Jiaino nai fuemona raforona uanona, naiso motomo jobedimaci. ⁹ Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¿Cai Jilloitaraima billa! Jusiñamui mamecido bitimie eo mare. ¹⁰ Cai illaima David micori ifomo caina sedallena, damie billemo birui ocuiridicai. Jusiñamui caina jilloitajasa.

¹¹ Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

Jesús higuera railla riarana faidua rafue

(Mt 21.18-19)

¹² Ie areruido Betaniamona Jerusalémo abido ie llofueoicaigano diga Jesús bia, aimetaite. ¹³ Arena higuera railla riarana ciuanona, iena jibuide. Como firuide; ia naie llisilladi iñede. Ie llisilla facaise nia iñede. ¹⁴ Ie jira naie riarana lote:

—Biemona jaca llisiñeite. —Ie llofueoicaigano naimie lluaana cacadimaci.

Jesúdi Jusiñamui jofomona damieriena dotaja rafue

(Mt 21.12-17; Lc 19.45-48; Jn 2.13-22)

¹⁵ Jerusalémo Jesús rilla mei, Jusiñamui jofomo naimie jaide. Naie jofu eo aillue. Diga cuartos nainomo ite. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecaidimaci. Iena Jesús ciuanona, naimaci mesaiaina oni caicode. Ucugina fecaidino rairacuai jiai oni caicode. ¹⁶ Jofu facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. ¹⁷ Naimacina llofueite:

—Ie facaina lloraime micori Jusiñamui llogacino jaie cuega: “Cue jofu ite, nainomo nana comini cuemo jillena” cuega. Ero, ailluena omoi ibataja jira, naimie jofona fiiruidino jofona omoi finoca.

¹⁸ Judíuai illaicomini naimie finoca rafuena fidianona, naimiena meinellena, coniniri siadotimaci. Ailluena comini naimie llofuiana ebiuillanona, rajicaidimaci. Ie jira judíuai illaicomini naimiena jaciruillamona, naimiena nia meinenidimaci. ¹⁹ Nairui navuida ie llofueoicaigano diga, Jerusalémona Jesús oni jaide.

Jesús faidoca riaru duilla rafue

(Mt 21.20-22)

²⁰ Ie are ie llofueoicaigano diga, Jerusalén dine Jesús jaillanona, higuera railla riaru duillana cioidimaci. Nana ie jainao diga duillana cioidimaci. ²¹ Jesús navui are lluaana Pedro ubiñuanona, naimiemo lote:

—Maestro, ero. O faidoca higuera jai duide.

²² Jesús uai ote:

—Jusiñamuina inocana jai. ²³ Uanaicinona omoimo lloiticue. Jusiñamui lluaana raise bu inoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite. ²⁴ Nie isoide rafue Jusiñamuimo omoi jicajia, naimie iena finuana omoi inuamona, iena naimie finoite.

²⁵ Jusiñamuimo o jiaicania, jiaimie diga o rafue ia iena feita. Ie isoi cai Moo Jusiñamui

omoimo ite jeacino jiai feitaite; ²⁶ iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

Jesúdi ie siño uaina llua rafue

(Mt 21.23-27; Lc 20.1-8)

²⁷ Jerusalémo naimaci rillanona, Jusiñamui jofomo Jesús fo jailla mei, judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Díese billanona, ²⁸ jicanotimaci:

—¿Nie isoide uaido o finoca rafuena finodio? ¿Bu omo iga uai diga o finoca rafuena finodio?

²⁹ Jesús dinena uai ote:

—Omoimo daje rafuena nano jicanoitícue. Raise omoi fairioia, omoimo cue uaido cue finoca rafuena lloiticue. ³⁰ Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

³¹ Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluaña ññoñedomoi?” ³² “Comini” cai fairioia, bene itino caina nibai meineitimaci, Juan micoridi Jusiñamui facaina lloaíma naimaci railla jira.

³³ Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo lloñeiticue.

12

Jesúdi marañede maijiraini rafuena llua rafue

(Mt 21.33-46; Lc 20.9-19)

¹ Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaite. Jiairuido uvas ijina eenollena, enruemo ifona raite. Naie illina raise eruaillena, tidacana finode. Iena sedallena, ibatajanona, jiaínomo fecade. Ie mei jiaie enruemo jaide. ² Uvas jai einalla facaise riaraiaina sedaraini dine naie patrón ie mullaímana orede, naie illimona dajerie riaraiaina llisilla ollena; ³ iadedi naie sedarainidi ie mullaímana fatimaci. Ie mei naimiemo riaraiaina fecañeno naimiema abido oredimaci. ⁴ Ie mei patrón jiaie mullaímana orede. Naimie ifogina bofedimaci. Naimiema jeare finodimaci. ⁵ Ie mei patrón jiaimiena orede. Naimiema meinetimaci. Ie mei ailluena mullaíaina orede. Damieriena fatimaci. Damieriena meinetimaci. ⁶ Patrómo ie isiruiga jito ite. “Cue jítóna jaciruitimaci. Naimie uaina ñnoitimaci. Naimiema oretaitícue” patrón comecina facade. ⁷ Riaraiaina sedaraini naimiema ciuanona, coniniri raitimaci: “Bimiemo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” raitimaci. ⁸ Naimaci dine naimie rilla mei, naimiema meinetimaci. Ie mei ie abina illimona jino dotadimaci. ⁹ Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Ie mei jiaínona ie illina sedataite.

¹⁰⁻¹¹ Naimacimo Jesús llote:

—Naie illi sedaraini isoidomoi. Jusiñamui facaina lloaíma micori omoína jaie cuete. Ie ciegafuena raise facañedomoi. Naimie micori cueda:
Jofu finoraini jitañena noficidi nana naie jofomo ite nofici baífemo jai uaide.

Jusiñamui iena finotate.

Iena cai uiñuamona: “Eo mare” raiticaí

cueda. Jusiñamui cominina damierie jaillana naimie micori cuete. Jusiñamui oretagamiema damierie jitañenamona, naimie cominina jaiñeitimaci; iadedi Jusiñamui oretagamiema ailluena ñnuamona, naimie cominina jaitimaci. Ero, Jusiñamui facaina lloaíma micori caina cuete. Naie jofona finoraini isoidomoi. Naie nofici isoidícue. Cue rafuena omoi jitañena jira, naimie cominina jaiñeitomoi.

¹² Judíuai illaicomini iena cacajanona, Jesús naimacina ñaiana naimaci uiñuamona, naimiena gaitacadimaci; ia cominina jaciruitimaci. Ie jira naimiemona oni jaidimaci.

Jesúmo gobiernomo ucubena fecajana jicanua rafue

(Mt 22.15-22; Lc 20.20-26)

¹³ Judíuai illaicomini jailla mei, dajerie fariseuai cominina Jesús dine oredimaci. Illaíma Herodes díbeimo itinona oredimaci. Naimie raise uai oñenia, naimiena duere finollena, Jesúsna facaciacadimaci. ¹⁴⁻¹⁵ Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoiacadicaí. Dani Jusiñamuina sedadicaí; iadedi romanuai railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono — llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoí? Ucube cuemo acata.

¹⁶ Ie jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiaide bie cuega radi?

Uai otimaci:

—César.

¹⁷ Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluaana cacajano, naimie raise uai ua jira, ieri rajjicaidimaci. Naimie iese llua jira, naimiena duere finonidimaci.

Jesús dine saduceuai railla comini billa rafue

(Mt 22.23-33; Lc 20.27-40)

¹⁸ Naie facaise saduceuai railla comini naimie dine bitimaci. Fiodaillamona jaca buna jilloñellena ñnotimaci. Jesúmo llotimaci:

¹⁹ —Maestro, cai facaina Moisés micori jaie cuega: “Íma fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

²⁰ Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiainide fiodailla. ²¹ Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide. ²² Uruiaínide nana fiodailla. Ja muidomo naie riño jiaí fiodaite. ²³ Fiodaillamona, ico naimaci jilloiadedi, ¿bu naie riño ienite? Naiñaíño siete digamiena inirede —llotimaci.

²⁴ Jesús uai ote:

—Moisés micori cuegafuiaína raise omoí uiñoñena jira, Jusiñamui uaina raise omoí uiñoñena jira, bie isoide rafuena raise uiñoñedomoí. ²⁵ Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaenisai ainidimaci. Ininidimaci. Ie isoi naie siete amatiaí iitimaci. ²⁶ Fiodaitino ico jilloillena omoimo lloiticue. Moisés micori jofue iñenanomo illa facaise, amena boode metodo Moisés micorimo Jusiñamui ñaía facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ²⁷ Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaína jiaí jillotaite. Fiodaillamona jilluana omoí raise uiñoñedomoí —llote.

Jesús nanoca llogacinona llofuia rafue

(Mt 22.34-40)

²⁸ Naie facaise Moisés micori llogacinona llofueraíma Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacínuaímona, ¿nie llogacino ua nanoca llogacinona?

²⁹ Jesús dinena uai ote:

—Moisés micori jaie cuega: “Israel comini, bie rafuemo cacarei. Cai Nama Jusiñamui jaca dajede. ³⁰ Omoí jitailla jira, nana omoí comeciaí diga, cai Nama Jusiñamuina isirui.

Naimiemo omoi comeciaina eo faca”. ³¹ Ie emodomo ite llogacino janore daje isoide: “Dani omoi abi omoi isiruilla isoi, omoi ecimo itinona jiai isirui”. Bie mena llogacino jiaie llogacinuai baifemo faite.

³² Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena iñede. ³³ Cai jitailla jira, nana cai comeciai diga naimiena cai isiruia, naimiemo cai comeciaina eo facaia, cai abina cai isiruilla isoi cai ecimo itinona cai isiruia, Jusiñamuina raise sedadicaí. Bie rafuedo naimiemo toica ocaina fecajana baifemo faite. Bie rafuedi naimiemo cai ra fecajana baifemo faite.

³⁴ Naimie raise uai ua jira, naimiemo Jesús llote:

—Iese o innocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

Jesús dinena fariseuai cominimo jicenua rafue

(Mt 22.41-46; Lc 20.41-44)

³⁵ Jusiñamui jofomo Jesús jailla mei, nainomo itinomo jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci? ³⁶ Jusiñamui Joreñodi David micorina ñaitatajanona, David micori llote:

Jusiñamuidi cue Namamo llote: “Illaimana o illamona, cue nabei dine ana rai.

Ona iñoñedino o anamo itataitucue”.

³⁷ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama. —Nainomo itino naimie llofuiana iocire cacareidimaci.

Jesúdi judíuai illaicomínina ñaia rafue

(Mt 23.1-36; Lc 11.37-54; 20.45-47)

³⁸ Jusiñamui jofomo Jesús nia llofuianona, raite:

—Moisés micori llogacinona llofueraimomona abina rairui. Illaicomínina naimaci itimacidenona, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoñedínona itimacidenona, comini naimacina uaiduana gaidimaci. ³⁹ Comini naimacimo acarillena, ofiracomo uicomo raicadimaci. Rafue ia: “Jamai bue isoñedicai” raillamo comecina facajanona, rafue nama ecimo raicadimaci. ⁴⁰ Feciñuaimona rana ocabillanona, naiñaiñuaina duere finodimaci. Naimiena eo sedadimacidenona, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

Jesúdi Jusiñamui jofomo duerede feciño ucube fecajana ciua rafue

(Lc 21.1-4)

⁴¹ Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci.

⁴² Ie facaise eo duerede feciño menaruñu jonete. ⁴³ Iena ciuanona, naimie dine ie llofueoicaiganona uaiduanona, naimacimo llote:

—Bie eo duerede feciño nana jiaie comini jonia baifemo jonete. ⁴⁴ Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaino baifemo jonete.

13

Jesúdi Jerusalémo ite Jusiñamui jofu judaiana llua rafue

(Mt 24.1-2; Lc 21.5-6)

¹ Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiai co ebirede. Bico eo ebire ciode.

² Jesús dinena uai ote:

—Bie jofu birui eo mare; ia nana bie jofomo ite noficiai ico judaisite —llote.

³ Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo llotimaci:

⁴ —Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁵ Uai ote:

—Omoína bie rafuena bu jifueñellena, omoi abina rairui. ⁶ Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui. ⁷ Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue. ⁸ Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuaí suite. Diga illanuaimo comini aime gutimaci. Iese suia, omoi duere sefuillifue omoimo suite. ⁹ Abina rairui. Dajerie omoína llogidoitimaci. Omoína gaitaja mei, naimaci ofiracomo omoína faitimaci. Cuemo omoi duilla jira, omoína gaitajanona, omoína duere finollena, illaicomini dine omoína uitimaci; ia naimacimo cue rafuena lloitomoi. ¹⁰ Diga comini cue rafuena nana nairaimo lloitimaci, nana nairai iena cacallena. Ie mei abido biiticue. ¹¹ Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uiñoitomoi. Dani omoi comeciái icinodo ñaiñeitomoi; ia Jusiñamui Joreño uaido ñaitomoi. ¹² Cuen a iinotomoi; ia ailluena cuena iinoñeitimaci. Cuen a omoi iinua jira, omoína enoitimaci. Iemona dajerie ie amana meinetallena, naimiema llogidoite. Dajerie moodi ie uruena meinetallena, naimiema llogidoite. Dajerie uruiaidi naimaci moona, naimaci eina meinetallena, naimacina llogidoitimaci. ¹³ Cue cominina omoi illamona, nana nairai omoína enoitimaci; iadedi cuena fañonocaiñedimie ja muidomo monamo jaca iite. Naimiema jillotaiticue. ¹⁴ Cue lluomo cacarei. Jusiñamui facaina lloraimadi jiaimie jearede rafue finollena jai llote. Naie rafue suia, Jusiñamui jofomo Jusiñamuina sedañeitomoi. Nainomo ite jearede rafue finuana omoi ciuanona, naiemona omoi jillobillena, duere omoi sefuñellena, Judeamo omoi illamona, aneduai dine omoi aisi. ¹⁵ Jofo emodomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uiñeno. ¹⁶ Aneduai dine raire rillena, illimo omoi ia, abido jofomo biñeno, omoi iniroi omoi diga uillena. ¹⁷ Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. ¹⁸ Eo duere sefuñellena, Jusiñamuimo omoi jicano, rollime facaiseconi bie rafue suiñellena. ¹⁹ Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuñedimaci. Ico iese eo duere sefuñeitimaci. ²⁰ Naie facaise ianori fo Jusiñamui oñeítana, buna jaca jillobiñeite. Naimie fetocano muidona, naie facaise Jusiñamui ianori fo oite.

²¹ Ie facaise omoimo bu raia: “Jadi, Jusiñamui facaina lloraima benomo birui bairede. Naimiedi Cristo”, iena iinoñeno, Jiaimie raia: “Oni batine Cristo birui bairede”, iena iinoñeno. ²² Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. ²³ Ie jira omoi abina rairui. Ero, bie rafue nia suiñenia, iena omoimo jai lloticue.

Jesús abido ie bille rafue

(Mt 24.29-35, 42-44; Lc 21.25-36)

²⁴ Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. ²⁵ Monamona ucuai ana llujite. Nana naie radi jaidisite. ²⁶ Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁷ Cue jaienisaina cue ecimona oretaiticue. Cue fetocano diese naganomona ofitaitimaci.

²⁸ Higuera railla riaramona omoi fueo. Bie eniruemo naie riaru firuillamona, fiemona raire illana uiñotomoi. ²⁹ Ie isoide. Bie rafue ico suia, cue billirui iaie illena uiñoitomoi. ³⁰ Uanaicinona omoimo lloticue. Nana bie rafue suille facaiseconi bie nairai nia iite. ³¹ Mona enirue diga fuite; iadedi cue lloga uai jaca suite. ³² Cue abido billirui jaca bu

uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. ³³ Abina rairuicana jai. Naimie omoina canollena, Jusiñamuimo jiai jicabi. Cue billirui omoi uiñoñena jira, iemo ocuri.

³⁴ Iena omoi raise uiñollena, bie rafuena lloiticue. Patrón jiaie eniruemo jaide. Nia jaiñenia, ie mullaiaina ie jofona sedatate. Nagamie ie maijille ocuide. Jofo nasena sedadimiemo naimie billemo raise ocurillena llote. ³⁵ Naie patrón abido billena naimaci uiñoñena jira, naga hora iemo ocuritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. ³⁶ Ebena naimie biite. Inidimacimo naimaci baisabi raillanona, naimaci jaca ocurilla. ³⁷ Ie isoide. Ebena biiticue. Cue abido billirui omoi uiñoñena jira, iemo jaca omoi ocuri.

14

Judúuai illaicomini Jesúna gaitallena, siadua rafue

(Mt 26.1-5; Lc 22.1, 2; Jn 11.45-53)

¹ Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana comecillena, naie rafue ite. Judúuai illaicomini Jesúna jifuiano gaitaacadimaci. Naimiena meineiacadimaci. Iena siadua mei, ² raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaiñenamona, comini cai diga fuitimaci. Nia sedaiticai.

Jesúmo riño caimare soride ra totaja rafue

(Mt 26.6-13; Jn 12.1-8)

³ Betania railla nairaimo Jesús jaillanona, Simón jofomo jaide, Simódi jaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide.

⁴ Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide. ⁵ Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

⁶ Naimaci ñaiana Jesús uinua jira, naimacimo llote:

—Dama ite. ¿Bue ñellena naiñaiñona jeare ñaitomoi? Mare rafuena cuemo finode.

⁷ Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeiticue. ⁸ Cue facaina naiñaiño finoacana diese jai finode. Nia fioidañedicue; ia cue fioidaillirui facaina naiñaiño iese finode. ⁹ Omoimo uanaicinona lloiticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño finoca rafuena lloite.

Judas micori raillamie Jesúna gaitataiacana rafue

(Mt 26.14-16; Lc 22.3-6)

¹⁰ Ie facaise Jesús llofueoicaiganomona Judas Iscariote micori raillamiedi Jesúna gaitatallena, Jusiñamui diga nanoca ñairaini dine jaide. ¹¹ Iena cacajano, iobidimaci.

—Iena o finoa, omo ucubena fecaiticai —lloitimaci. Iemona Jesúna gaitatalliruimo Judas ocuride.

Jesúdi ie fioidaille rafuena llua rafue

(Mt 26.17-29; Lc 22.7-23; Jn 13.21-30; 1 Co 11.23-26)

¹² Llomenico guille rafue illanona, judúuai comini toica llaudaiaina fajarui illanona, Jesúmo ie llofueoicaigano jicanote:

—¿Ninomo pascua railla rafue ie guille finuana jitaideo?

¹³ Naimacimona menamiena oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca.

¹⁴ Naimie jailla jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” ¹⁵ Ie mei omicomo afebebamo ite aillue cuartona acataite. Na raruiái diga ite. Nainomo cai guille fino.

¹⁶ Jesús llua isoi jaidiiaimaiai. Jerusalémo rilla mei, naimie llua isoi baitiiaimaiai. Pascua rafue guille finodiiaimaiai. ¹⁷ Nairui jitoma ana itemo, ie llofueoicaigano diga, Jesús nainomo guisai. ¹⁸ Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

¹⁹ Iena cacajanona, sunaitimaci. Damierie naimiemo jicanoside:

—¿Cuena ñaitio?

²⁰ Uai ote:

—Omoimona damie bie platomo cue diga llomenico diga mutade. ²¹ Jusiñamui facaina lloraíma micori cuega isoi, monamona jai billamona, fioidaiticue; iadedi cuena gaitataitimie eo duere sefuite. Naimie jeiciñegadena, cuemona mare.

²² Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

²³ Ie mei naimie jiroracona jiai llinote. Jusiñamuimo iobillacinona llua mei, naie jiroracomo jai totaca vino naimacimo fecade. Iemona nana jirodimaci. ²⁴ Naimie raite:

—Cue fiodaillamona, dama cue diaillamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie. ²⁵ Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue.

Jesúdi Pedro naimiena januana llua rafue

(Mt 26.30-35; Lc 22.31-34; Jn 13.36-38)

²⁶ Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. ²⁷ Naimacimo llote:

—Cuena fainonocaitomoi. Jusiñamui facaina lloraíma micori iena jaie cuega: “Toica lludaiaí sedaraimana meinetimaci. Naimie toiniaí uaficaída jaitimaci” cuega. Naimie micori caina cuete. ²⁸ Ero, fiodaillamona cue jillua mei, omoi uicodo Galileamo jaiticue, nainomo omoi diga dafaifillena.

²⁹ Pedro uai ote:

—Nana jiaíno ona fainonocaia, ona jaca fainonocaiñeiticue.

³⁰ Jesús dinena raite:

—Uanai omo lloiticue. Ja naio iitava menacaiño nia ñaiñenia, dacaiño amani cuena janoitio.

³¹ Pedro dinena riire llote:

—O diga cue fioidaiadedi, ona janoñeiticue.

Nana ie llofueoicaigano daje uaido jiai raitimaci.

Jesúdi Getsemanímo Jusiñamuimo jia rafue

(Mt 26.36-46; Lc 22.39-46)

³² Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

³³ Naimie diga Pedrona uite. Jacobona uite. Juan jiai uite. Naimie sunaicaide. Ie comeci uri iñede. ³⁴ Naimacimo llote:

—Cue comeci sunaicaide. Niadi fioidaiticue. Benomo fiebi; ia nia iniñeno cue facaina omoi jii.

³⁵ Naimie janore bai jaillanona, eniruemo bitadate. Naimie duere sefuiñellena, Jusiñamuimo jiiide:

³⁶ —Ore Moo, nana rana finoredio. Cuena llegi cacaitañeno. Cue jitailla isoi cuena finoñeno; iadedi o jitailla isoi cuena fino.

³⁷ Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo. ³⁸ Iniñeno. Taife ramo omoína fai raillano, iena omoi iñoñellena, Jusiñamuimo jii. Omoi comeci mare rafuena finoacade;

iadedi omoi comeci dani ocuiñoñede. Ie muidona Jusiñamuimo jii, omoína naimie ocuiñotallena —llote.

³⁹ Ie mei dane jiiñena jaide. Ailli naimie jiiá isoi, dane jiiide. ⁴⁰ Ie llofueoicaigano dine dane billanona, naimaci uisi llirioilla jira, naimaci inisitemo ride. Naimacina casitajano, Jesús naimaci diga ñaite; ia naimaci dinena uai uana uiñoñede. ⁴¹ Dane jiiá mei, ie llofueoicaiganomo dane billanona, naimacina casitajano, llote:

—¿Niese nia inidomoi? ¿Niese jafaici nia otomoi? Jai macaibaite. Cue fiódaille facaise jai ite. Jusiñamui jitailla jira, cuena ja gaitajanona, naimiena inoñedinó anamo ja iiticue.

⁴² A naidacai. Maña. Cue gaitataitimie jai bite.

Jesúna gaitalle rafue

(Mt 26.47-56; Lc 22.47-53; Jn 18.2-11)

⁴³ Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiaí atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci. ⁴⁴ Jesús dine naimaci nia riñenia, Judas naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita. Naimiena raise maianona, naimiena oni uiño.

⁴⁵ Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. ⁴⁶ Ie jira Jesúna gaitadimaci.

⁴⁷ Iena ciuanona, Jesús diga itinomona damie ie lloebi llinuanona, naimiedi nanoca ñairaima ie mullaíma jefona jaibonote. ⁴⁸ Naimiena gaitadinomo Jesús llote:

—Omoi lloebina atidomoi. Omoi butaralluna atidomoi. Cuena gaitallena, fiiriraímadicuenta cuemo omoi billa. ⁴⁹ Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuena jai omoi gaitajamona, Jusiñamui facaina lloraini micoriai cuegafuiai suite.

⁵⁰ Ie facaise nana naimie llofueoicaigano naimiena fainonocaillano, aisidimaci.

Jesús jinafona conirue racaja rafue

⁵¹ Ie facaise daje conirue Jesús jinafona racade. Jamai abimo iniroi ferinocaida racade. Naimiena ciuanona, comini naimiena gaitadimaci; ⁵² ia ie iniroina fainonocaillanona, taimiena aiside.

Jesúdi judúuai illaicomini dine illa rafue

(Mt 26.57-68; Lc 22.54, 55, 63-71; Jn 18.12-14, 19-24)

⁵³ Jesúna gaitaja mei, Jusiñamui diga nanoca ñairaima dine naimiena uitimaci. Nana judúuai illaicomini itimaci. Nanoca ñairaini itimaci. Einamací jiaí itimaci. Moisés micori llogacinona llofueraini jiaí itimaci. ⁵⁴ Pedro naimaci jinafona aarena racade. Jusiñamui diga nanoca ñairaima nairaibirimo jaide. Jofono sedadino diga nainomo ite iraimo agaide.

⁵⁵ Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedinomaci. ⁵⁶ Diga comini Jesúna llogidotimaci; ia tainona llotimaci. Daje isoi lloñedinomaci. ⁵⁷ Damierie billanona, tainona llogiduanona, raite:

⁵⁸ —Bimie llwana cacadicaí. Jusiñamui jofona jeare ñaite. Naimie llote: “Jusiñamui jofona comini finodimaci; ia iena cue judaíanona, darui amani illanona, jiaie finoiticue. Comini iena finoñeitimaci”. ⁵⁹ —Iese llotimaci; ia daje isoi lloñedinomaci.

⁶⁰ Naimaci motomo Jusiñamui diga nanoca ñairaima naidadajanona, Jesúmo jicanote:

—¿Niese uai oitio? ¿Nie isoide rafue ona llogidotimaci?

⁶¹ Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

⁶² Jesús uai ote:

—Jii, naimiedicue. Monamona jaie cue billamona, iimana jaidicue; ia ico jiairuido illaimana cue illena, Jusiñamui ecimo cue raillena, omoi nairai cioitimaci. Mona uilliemmo cue abido billena jiai cioitimaci.

⁶³ Iena cacajanona, icirillanona, naie nanoca ñairaima dama ie iniroina cuaranote. Raite:

—Jiaino naimiena llogidollena jai jitaiñedicai. ⁶⁴ Jusiñamuina naimie jeare ñaiana jai cacadomoi. ¿Niese naimiena raitomoi?

Jiaie illaicomini dinena:

—Naimie fiodaillesa —lloitimaci.

⁶⁵ Ie facaise damierie naimiena tuallaitimaci. Ie uiecona ibaila mei, naimiena ducoidimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoidimaci.

Pedrodí Jesúsna janua rafue

(Mt 26.69-75; Lc 22.56-62; Jn 18.15-18, 25-29)

⁶⁶ Naie facaise Pedro nairaibirimo ite. Naie nanoca ñairaima mullaiñuaimona dañaiño nainommo billanona, ⁶⁷ Pedro agaillana ciode. Raite:

—Nazaret ie Jesús cominidio.

⁶⁸ Pedro iena januano, raite:

—O lluana uiñoñedicue. Iena raise cacaiñedicue.

Ie mei nase fuedo jaide. Naie facaise iitava dacaiño ñaite. ⁶⁹ Naie mullaiño naimiena dane ciuanona, nainommo jamai itinommo llote:

—Bimiedi Jesús ie llofueoicaigano imie.

⁷⁰ Iena Pedro dane janote. Dallu illanona, nainommo jamai itino Pedrommo llote:

—Odi Galilea imiedio. Jesús diga jaicabidio.

⁷¹ Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, omoi llogamiena uiñoñedicue.

⁷² Ieconí iitava dane ñaite. Iena cacajano, Pedro Jesús lluana uibiñote. Jaive naio Jesús Pedrommo llote: “iitava menacaiño nia ñaiñenia, dacaiño amani cuena janoitio”. Iena uibiñuamona, Pedro eo eede.

15

Pilato díne Jesús illa rafue

(Mt 27.1, 2, 11-14; Lc 23.1-5; Jn 18.28-38)

¹ Jitiramo monaidemmo, judíuai illaicomini danommo siadotimaci. Jusiñamui diga nanoca ñairaini itimaci. Naimaci einamací jiai itimaci. Moisés micorí llogacinona llofueraíni jiai itimaci. Siadua mei, Jesúsna maianona, Pilatomo uitimaci. Romanuai raila nairai anamo naimaci illa jira, Pilatodí naimaci gobernador. ² Pilato naimiemmo jicanote:

—¿Judíuai comini illaimadio?

Jesús uai ote:

—Jii.

³ Ie muidona Jusiñamui diga nanoca ñairaini Jesúsna llogidotimaci:

—Naimie diga maraiñede rafuena finode —lloitimaci.

⁴ Pilato dinena naimiemmo jicanote:

—¿Niese uai oñedio? Ona eo llogidotimaci.

⁵ Jesús nia uai oñena jira, Pilato uainicaide.

Pilatodí Jesús fiodaillana llua rafue

(Mt 27.15-31; Lc 23.13-25; Jn 18.38-19.16)

⁶ Naga año pascua raila rafue facaiseconí cárcelmo itinomona Pilatodí comini jicacamienna jamai jino orede. ⁷ Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite.

⁸ Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. ⁹ Pilato jicanote:

—¿Bu jino cue oretallena jitaidomoi? Omoi judíuai railla illaimana nibai jitaidomoi.

¹⁰ Iese jicanote; iadedi naimiedi Jusiñamui diga nanoca ñairaini Jesúri uradoillana uiñote. Naimaci Jesúna meiniacanana jiai uiñote. ¹¹ Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. ¹² Iena cacajano, Pilato naimacimo jicanote:

—¿Niese bimiena cue finuana jitaidomoi? Naimiedi omoi judíuai illaíma raillamie.

¹³ Ado llotimaci:

—¡Naimiena corai!

¹⁴ Pilato dane jicanote:

—¿Nie isoide marañede rafuena finode? —Iena cacajano, ado ibi llonoidimaci:

—¡Naimiena corai!

¹⁵ Naimacina iobitallena, naimaci jitailla jira, Barrabás jino orede; iadedi Jesúna sechedotaja mei, naimiena coraillena orede.

¹⁶ Soldaduai naimiena gobernador jofo fo uillanona, nana soldaduai nainomo ofidimaci. ¹⁷ Jiduirede iniroi naimiemo jitaadimaci. Ecuaimona niga nuiciraina naimie ifogimo jitaadimaci. ¹⁸ Naimiena jifanoduanona, naimiena uaidotimaci:

—¡Jadi, judíuai illaíma!

¹⁹ Radosi diga ie ifogimo buta-butadimaci. Naimiena tuallaitimaci. Naimie illaimana itena, naimiena sedallena, caiñici ifodo raiedimaci. ²⁰ Jesúna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitaadimaci. Ie mei naimiena coraillena oni uitimaci.

Jesúna coraia rafue

(Mt 27.32-44; Lc 23.26-43; Jn 19.17-27)

²¹ Jerusalémona naimaci jaillanona, jamai bitimiemo dafaifidimaci. Naimiedi Simón. Cirene railla enirue imie. Naimie jito iaímaiaidi Alejandro iaímaiai Rufo diga. Jerusalén onifemona naimie billanona, naimiemo dafaifidimaci. Naimiena Jesús uiga cruzna rocatatimaci. ²² Gólgota raillanomo jaidimaci. Ifocoraina eruaila jira, iese mameciredo. ²³ Nainomo rillanona, ie abi isirena cacaiñellena, vinomo ererede rana faianona, Jesúmo fecadimaci; iadedi naimie iena jiroñede. ²⁴ Ie mei naimie cruzmo coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uiñollena, jifanododimaci.

²⁵ Jitoma nia fuiri daidemo, naimiena coraidimaci. ²⁶ Cruzmo ie llogiduafuena jonetimaci. Jai cueda: “Judíuai comini Illaíma”. ²⁷ Ie mei mena firiruide iaímaiaina coraidimaci. Damie Jesús nabeimo coraica. Jiaimie Jesús jarifebeimo coraica. ²⁸ Iemona Jusiñamui facaina lloraima micori jaie cuedafue suide. Cueda: “Marañedino isoi naimie jai ite”.

²⁹ Naisodo jamai jaidino Jesúna mameritimaci. Mamerillamona, ifogiaína jaididimaci. Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio. ³⁰ Ie muidona dama o abina mai jillota. Cruzmona ana bi.

³¹ Ie facaise Jusiñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. ³² Naimiedi Cristodena, naimiedi cai judíuai comini illaíma raillamiedena, dama niadedi cruzmona ana ie billa. Iena cai cioia, naimiena inoíticai. —Iese naimiena jifanododimaci. Naimie diga coraicamie iaímaiai naimiena jiai jeare ñaitiaímaiai.

Jesús fiodailla rafue

(Mt 27.45-56; Lc 23.44-49; Jn 19.28-30)

³³ Jitoma naidai itemona, daje amani horas mona jitibicaide. ³⁴ Ie meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobaiñuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

³⁵ Iena cacajano, nainomo jamai itinomona damierie raitimaci:

—Naimie jaiie Jusiñamui facaina lloraima Elfana uaidote —raitimaci. ³⁶ Naimacimona damie jarire jaillanona, fibecode ramo vinona faite. Radosimo jillillano jirollena, naimiemo a fecade. Raite:

—Dallu sedaiticai. Elías naimiema jillotajaibillena uiñoiacadicai.

³⁷ Ie facaise ado cuirioita fiodaite. ³⁸ Naie facaise Jusiñamui jofomo ie fetaca iniroife ana anaba jillacimo motodo menafe cuararide. ³⁹ Jesúsna sedallena, nainomo capitán ite. Jesúsno eruailanona, Jesús fiodaillana ciode. Raite:

—Uanai bimiedi Jusiñamui Jito.

⁴⁰ Dajerie riñoniai naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite. ⁴¹ Galileamo Jesús navui illa facaise naie riñoniai naimie diga jaisoidimaci. Naimiema canouidimaci. Jerusalémo Jesús billanona, ailluena riñoniai naimie diga jiai bitimaci. Ie fiodaillana jiai cioidimaci.

Jesús raiafomo jonia rafue

(Mt 27.57-61; Lc 23.50-56; Jn 19.38-42)

⁴² Jitoma ana itemo, sábado rille jai iairei illanona, ⁴³ Arimatea nairai imie Pilato dine jaide. Naimiedi José. Naimiedi illaicomini. Maremie. Naimie Jusiñamui ie cominina ico sedajanomo illemo ocuride. Ie comecina ocuiñocaida, Pilato dine jaide. Iena raillena, Jesús abina jicade. ⁴⁴ Iena cacajano, Pilato Jesús fiodaillana raise uiñoiacade. Ie fiodaillana nia fidiñede. Jesúsna sedade capitána uaiduanona, naimiemo Jesús fiodaillana jicanote.

⁴⁵ —Jesús jai fiodaite —capitán railla mei, Pilato Jesús abina Josémo fecallena llote.

⁴⁶ José mare userede iniroi ibaja mei, cruzmona Jesús abi ana ua mei, naie iniroi diga ie abina ferinote. Nofici motomo finoca raiafomo jonete. Naifona ibaillena, aillue nofici nainomo bai ñuitade. ⁴⁷ María Magdalena, jiaie María diga, naimie raiana ciode. María José ei.

16

Jesús fiodaillamona jillua rafue

(Mt 28.1-10; Lc 24.1-12; Jn 20.1-10)

¹ Sábadoruimo jitoma sojicaidemo, María Magdalena caimare soride rana ibade. Jacobo ei, María jiai ibade. Salomé jiai ibade. Jesús abimo jonellena, ie abina raise finollena naimaci einamací finocabilla isoi, naiñaiñuai iena ibade. ² Domingo jitiramo jitoma como bairedemo, Jesús raiafo dine naiñaiñuai jaide. ³ Jaillanona, coniuaiñoimo jicanote:

—¿Bu noficina caina oni ñuitalle raiafomona?

⁴ Raiafo dine rillanona, iemo eruailanona, nofici oni ñuitacana ciode. Naie nofici eo aillue. ⁵ Raiafomo jaillanona, naiñaiñuai coniruena eruaidimiena nabeimo raillana ciode. Naimie are userede iniroina jitade. Naimiedi Jusiñamui jaienici. Naiñaiñuai jacinaite.

⁶ Nainomo itimie dinena raite:

—Jacinañeno. Nazaret ie Jesúsna jenodomoi. Naimiema coraidimaci; ia fiodaillamona naimie jai jillode. Bene jai iñede. Naimie jonianomo mai eroda. ⁷ Naimie llofueoicaiganomo iena lluai. Ua Pedromo llono. Galileamo omoi uicomo naimie jaite. Omoimo naimie llua isoi, naimiema cioitomoi.

⁸ Naiñaiñuai jino jaillanona, raiafomona aisicana jaide. Jacinaillamona abi jaidisite. Jaciruillamona, iena bummo lloñede.

Jesús María Magdalenamo bairia rafue

(Jn 20.11-18)

⁹ Domingo jítiramo Jesús jillua mei, María Magdalenamo Jesús nano bairede. Naiñaiño Janaba anamo navui illamona, Jesús naiñaiñomona siete jananiai navui oni orede.

¹⁰ Naiñaiñomo naimie bairia mei, naimie diga jaicabidíno iena lluaide. Naimacimo iena nia lloñenia, sure eedimaci.

¹¹ —Naimie jai jillode. Naimiena jai ciodicue —naimacimo naiñaiño llua mei, iena iñoñedimaci.

Mena llofueoicaiganomo Jesús bairia rafue

(Lc 24.13-35)

¹² Ie meinocni Jesús mena llofueoicaiganomo bairede. Naimie eruaisoilla isoi, eruaiñede. Iaimaii naisomo macaria, iaimaiimo bairede. ¹³ Jerusalémo abido iaimaii rilla mei, jaiie llofueoicaiganomo iena llotiiaimaii; ia iñoñedimaci.

Jesús ie once llofueoicaiganomo bairia rafue

(Mt 28.16-20; Lc 24.36-49; Jn 20.19-23)

¹⁴ Ie once llofueoicaigano danomo guitimacimo, Jesús naimacimo bairede. Naimie jillua mei, damierie naimiena ciuanona, ie llofueoicaiganomo iena llote; ia iñoñedimaci. Naimaci iñoñena jira, Jesús naimacimo riire llote. ¹⁵ Naimacimo llote:

—Nana nairaiimo jai. Nana cominimo cue mare rafue llocana jai. ¹⁶ Cuen a iñuamona, bautizagano diese Jusiñamui mona duere sefuiñeitimaci; iadedi Jusiñamui cuena iñoñedinona duere finoite. ¹⁷ Cuen iñotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. ¹⁸ Jaiona naimaci lliñoia, naimacina niese níbañeite. Bainode ra naimaci jiroia, naimacina niese níbañeite. Duidinona naimaci jetajamona, jilloitimaci.

Jesús monamo jailla rafue

(Lc 24.50-53)

¹⁹ Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide. ²⁰ Monamo Jesús jailla mei, ie llofueoicaigano, diga nairaiimo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cueda rafue jai fuite. Marcodicue.

LUCAS JESUCRISTO ENIRUEMO ILLA RAFUE CUIAFUE

Lucas Teófilomo cartana orede

¹⁻⁴ Teófilo, cue isiruiğa nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciodimaci. Iena llocana jiai jaidimaci. Naimacimona bie rafue raise uiñoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uiñua jira, uanaicinona o raise uiñollena, bie cartana jai cueticue. Iese birui cue começi jitaide.

Jusiñamui jaienici Juan Bautista micori jeicillena llua rafue.

⁵ Jesucristo nia jeiciñenia, Zacarías illa facaise Herodena mameciredede illaimadi. Judea railla eniruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijiuide. Naimie aidi Elisabet. Naiñaiño jaie ite usumadi Aarón micori. Aarón micoridi Jusiñamui diga nano ñairaima. ⁶ Jusiñamuimona iaimaiai mare, nana naimie lloga uaina raise iaimaiai inua jira. ⁷ Naiñaiño oiniñona jira, uruenidaimaiai. Jiai jai uaicima iaimaiai.

⁸ Zacarías facai ite comini maijia facaise ia, Jusiñamui jofo dine naimie maijiaide. ⁹ Nainomo naimie maijia, caimare soride ra fo jobaillena, naimiena fetodimaci. Naimaci finouilla isoi, jobaillanona dani Jusiñamui diga ñairaini naimiena fetodimaci. Iemei naimie fo jaide. ¹⁰ Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci. ¹¹ Ieconi cai Nama Jusiñamui jaienicidi naie ra boano nabeimo Zacaríamo bairede. ¹² Naimiena ciuanona, Zacarías jacinaita. ¹³ Jaienici naimiemo llote:

—Zacarías, jacinaiño. Jusiñamui o jiacinona jai cacade. Iemona o ai uruesite. Himana jocoite. Juan o jitalle naimie mamecidi. ¹⁴ Iemona o começi caimare iite. Iobitio. Ailluena comini naimie jeiciari iobitimaci. ¹⁵ Jusiñamuimona naimie jamaí bue isoineitimiena jaite. Jifaitate rana jiroñeite. Naimie jeiciamona Jusiñamui Joreño naimiena namataite. ¹⁶ Cai Nama Jusiñamui dibeimo ailluena Israel cominina naimie itataite. ¹⁷ Jusiñamui jitaillacinona finocana jaite. Elíamo Jusiñamui Joreño jaie siño uai illa isoi, naimiemo iite. Jusiñamui rafuena naimie llumona, damierie, naimaci jaiagai isoi, Jusiñamuina inoitimaci. Ailluena Jusiñamui uaina jai inoñedimaci; ia damierie birui inoitimaci. Naimaci começiai Jusiñamui dibeimo meidoitimaci. Iemona cai Nama Jesucristo bia, naimiena inoitimaci.

¹⁸ Zacarías dinena jicanote:

—¿Niese o llua suillena uiñoiticue? Jai uaicimadicoco.

¹⁹ Jusiñamui jaienici dinena uai ote:

—Gabrieldicue. Jusiñamuimona biticue. Cuen a oretate, bie mare rafuena omo llollena.

²⁰ Ero, cue uaina o inoñena jira, uainitio, o jito jeicille dinori. Jiairuido bie rafue suite.

²¹ Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” começaina facadimaci. Naimie jino are biñena jira, rajicaidimaci. ²² Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai llua uai uiñotimaci. Naimie ñaiño ite. ²³ Jusiñamui jofomo naimie maijia facaise fuilla mei, ie jofomo abido jaide. ²⁴ Digarui illanona, ie aidi urueside. Ie jira jofomo naiñaiño cinco fivui fiebide, começina facajanona: ²⁵ “Cue uruesilla jira, iena nia buna lloiacañedicue. Cue Nama cuena jai duenaillana uiñoticue. Navui cue urue iñena jira, meiruiticue. Jai meiruiñeiticue. Comini cue joreño jai ñaiñeitimaci”.

Jusiñamui jaienici Jesús jeicillena llua rafue

²⁶⁻²⁷ Elisabet seis fivui uruesilla mei, Jusiñamuidi Galileamo ie jaienici Gabrielna orede. Nazaretmo María dine naimiena orede. María nia ininide; ia jai José jicanogañaiño. Naimie usumadi David micori.

²⁸ Rillanona, naiñaiño lote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

²⁹ Iena cacajanona, naiñaiño jacinaita. Iena naiñaiño raise cacaiñena jira, iemo comequina facade. ³⁰ Gabriel dinena lote:

—Jacinaiño. Jusiñamui ona duenaite. ³¹ Birui uruesitio. Himana jocoitio. Naimie mamequina jitaio Jesúsna. ³² Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itataite. ³³ Illaimana illamona, Israel railla nairaina jaca sedaite. Naimie ifomo jiaimie jaca iñeite.

³⁴ María uai ote:

—Hima diga nia iñedicue. ¿Niese bie nibaille?

³⁵ Gabriel lote:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiaie marenite. Naimiedi Jusiñamui Jito. ³⁶ O comini iñaiño, Elisabet, ie uacitaila facaise jiaie jai urueside. Naiñaiño jai jionaide; ia jai seis fivui naiñaiño uruesilla ite.

³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo iticue. O llucino cuemona mare.

Ie facaise Gabriel naiñaiñomona oni jaide.

Maríadi Elisabet dine jailla rafue

³⁹ Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide. ⁴⁰ Zacarías jofomo rillano:

—Itio —raillanona, Elisabetna uaidote. ⁴¹ Elisabet naiñaiño uaina cacajano, ieconi naiñaiño jeraimo ite urue iena jiaie uiñuamona, niraide. Ie facaise Jusiñamui Joreño anamo Elisabet jai ite. ⁴² Iese illamona, María uruesillana uiñote. Naiñaiño ado lote:

—Jusiñamui ona eo marena canoite. O uruena marena itataite. ⁴³ Jamai bue isoidicue; ia, odi cue Jilloitaraíma ei illanona, cue dine bitio. Iena cuemo nia lloñedio; ⁴⁴ ia, cuena o uaiduanona, iobillamona cue jeraimo ite uruedi niraide. ⁴⁵ Cai Nama omo llotataga uaina suillana o inua jira, Jusiñamui ona eo marena canoite. —Jusiñamui Joreño naiñaiño illamona, iena lote.

⁴⁶ María dinena uai ote:

Caiñai Nama eo mare. Naimiemo iobillacinona fecaacadicue.

⁴⁷ Naimiedi cue Jilloitaraímana jira, naimieri iobidicue.

⁴⁸ Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

⁴⁹ Naimiedi siño. Naimiedi mareuidimie. Cue facaina eo mare rafuena finode.

⁵⁰ Naimiena inotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena inotinona duenaite.

⁵¹ Diga siño rafuena finoite. Abi iedotino comeciái facajacinona llicaitaite.

⁵² Naimiedi illaicominina oni dotaite; ia jamai bue isoidinona jamai bue isoñedinona itataite.

⁵³ Dueredinona eo canoite; ia duenidinomo buena fecañeite.

⁵⁴ Duenaillamona, cai Israel cominina feitañeite.

⁵⁵ Cai jaiagaimo naimie jaie llua isoi, birui caina canoite.

Abraham micorimo jaie lote: “Ona duenaiticue. O cominina jaca duenaiticue”

María lote. ⁵⁶ Elisabet diga davui amani naiñaiño fiebide. Ie mei ie jofomo abido jaide.

Zacarías jito jeicia rafue

⁵⁷ Elisabet jocularui jai ridemo, himana jocode. ⁵⁸ Naiñaiño ecimo ite comini, naiñaiño comini diga, iena fidiamona, cai Nama naiñaiñoona eo duenaillana uiñotimaci. Naiñaiño diga iobidimaci. ⁵⁹ Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamequina jitaacadimaci; ⁶⁰ iadedi Elisabet lote:

—Dama ite. Jitaiñedicue. Naimie mamecidi Juan cai jitalle.

⁶¹ Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

⁶² Jefona cacaiñena jira Zacaríamo onolli diga jicanotimaci, ie jito mamecina jitallena.

⁶³ Onolli diga Zacarías fairuano, rabena jicade. Cuete: “Naimie mamecidi Juan”. Ieri rajjicaidimaci. “¿Bue ñelle iena jitade?” comeciaina facadimaci. ⁶⁴ Ieconí Zacarías jai dane ñaite. Ie jira Jusiñamuimo iobillacino fecade. ⁶⁵ Nana iaímaiaí ecimo itino rajjicaidimaci.

—Jusiñamui muidona naie rafue suide —llotimaci. Bie rafuena fidiano, nana Judea railla aneduaimo itinodi iena ñaoidimaci. ⁶⁶ Iena cacajano, comeciaina facadimaci: “Bimie jamai bue isoíñeitimiena jaite”. Cai Nama naimiena marena jaca canua jira, iese llotimaci.

Zacarías Jusiñamuimo iobillacinona fecaja rafue

⁶⁷ Ie facaise Jusiñamui Joreño Zacaríana llotatajanona, Zacarías llote:

⁶⁸ Cai Nama Jusiñamuidi mare.

Cai Israel comini dine biite, caina jilloitallena.

⁶⁹ David micori Jusiñamuina jaie sedade.

David micori cominimona siño Jilloitaraímana cai dine oretaite.

⁷⁰ Ie facaina llorainido naimie jaie llua isoi, cai Jilloitaraímana oretaite,

⁷¹ Taifemona, Janabamona cai jilloillena.

⁷²⁻⁷³ Cai usumatiaí micoriaimo: “Omoína duenaiticue” llote.

Cai usuma Abraham micorimo jaie llogacinona feitañede.

⁷⁴⁻⁷⁵ Taifemona cai jilloillena, cai Jilloitaraímana oretaite.

Nana cai ille dinori Jusiñamuina jaciruiñeno sedajana jitaide.

Naimie jitailla isoi cai illena, naimie jitaillacinona cai finollena, cai Jilloitaraímana oretaite.

⁷⁶ Cue jito, ona lloiticue. Jusiñamui ie lloraimana jaitio.

Cai Nama uicomo jaitio, comini comeciai o raise finollena.

⁷⁷ Ie cominimo jeacinomona jilluacinona lloitio.

Iena naimaci iñoia, Jusiñamui naimaci jeacinona feitaite.

⁷⁸⁻⁷⁹ Jeacino anamo jai cai illa jira, jitiredinomo iticai isoidicai.

Jusiñamuina cai nia iñoñenia, fiodaillana jaciruiticai.

Naimie caina duenaillamona, cai Jilloitaraíma billena o llofuellena, ona oretaite.

Naimiena cai iñoia, jitiredinomo iñeiticai; ia Jusiñamui diga cai comeciai uri iite.

⁸⁰ Zacarías jito sairide. Jusiñamuina iñocana jaide. Cominimo naimie nia marefodo lloñenia, jofue iñenanomo ite.

2

Jesús jeicia rafue

(Mt 1.18-25)

¹⁻² Jesús jeicia facaise César Augusto anamo ailluena nairaiaí ite. Romamona naimacina sedauide. Naie facaise Siria railla enirue gobernadori Cirenio. César Augusto, nie diese comini naga nairaímo illana naimie uiñollena, nana comini mameciaí cuellena ocuide. Jaca bu iese jaie finoñede. ³ Naimaci jaiagai illanomo mameciaí cuiana ocuide. ⁴ Ie jira José Galileamona Nazaretmona jaide. Judeamo Belémo jaide. David micori cominimo naimie jainaiailla jira, David micori illanomo jaide. ⁵ Ie ai María diga jaide. Naiñaño fenai jai eo aillue. ⁶⁻⁷ Belémo iaímaiaí rillanona, naie facaise comini jofomo inillino iñena jira, jurareta jofomo ridiaímaiaí. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisai toica llaudaiaí sedaraini dine jailla rafue

⁸ Jesús jeicia facaise naie naio Belén ecimo ite pastomo damierie toica llaudaiaia sedaraini itimaci. Naimaci toiniaina sedadimaci. ⁹ Ieconí cai Nama Jusiñamuimona daje jaienici naimacimo ebena bairede. Jusiñamui ie siño uai diga naimacina quetiñote. Jacinaitimaci. ¹⁰ Jaienici llote:

—Jacinaiño. Mare rafue lloiacadicue. Nana cominina iobitallena, iena lloiacadicue.

¹¹ David micori illanomo damie como jeiciga. Jusiñamui facaina lloraini micoriai naimie billena jaie llouidimaci. Naimiedi Cristo cai Nama. Naimie omoi Jilloitaraíma. Jeacinomona omoína jillotaite. ¹² Naimiena jibuisai. Iniroina ferinoga urue jurareta jofomo imaci ecaranomo baitomoi. Iemona cue llwana uanaicinona uiñoitomoi —llote.

¹³ Ie facaise naie jaienici dine ailluena jaienisai bitimaci. Jusiñamuimo iobillacinona fecajano rotimaci:

¹⁴ Monamo Jusiñamui illanona, naimiemo iobillacinona fecaacadicaí.

Cominina naimie duenaillamona, naimie diga uri iitimaci rotimaci. Ie mei abido jaidimaci.

¹⁵ Monamo jaienisai jailla mei, toica llaudaiaí sedaraini coniniri ñaitimaci:

—Belémo mai cai jailli, cai Nama caimo como lloga rafuena cai jibuisaillena.

¹⁶ Ieconí raire jaidimaci. María José diga baitimaci. Iaimaiaí urue jurareta ecaranomo biillana cioidimaci. ¹⁷ Naimiena ciua mei, nana naimacimo jaienici lloga rafuena llotimaci. ¹⁸ Nana naie rafuena cacadinodi ieri rajicaidimaci. ¹⁹⁻²⁰ Iaimaiaí uruena ciua mei, llaudaiaí sedaraini imaci toiniaí dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

Jerusalémo Jusiñamui jofomo Jesúna iaimaiaí uilla rafue

²¹ Ocho digarui illanona, naie urue abina dete. Ie ei jeraimo naimie nia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

²²⁻²⁴ Moisés micori jaie llua isoi Jerusalémo Jesúna uitiaimaiaí. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaíma iena faja mei, riño facaina Jusiñamuimo jobaica”. Jiaí cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaimaiaí.

²⁵ Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo inocana jaide. Naimie cominina Cristo jilloitallena, Cristo billemo ocuride. Naie facaise Jusiñamui Joreño anamo naimie ite. ²⁶ Iemona Jusiñamui Joreñodi, naimiena Cristona cioillena, navui uicodo uiñotade. O nia fioidañenia, Cristona cioitio raillanona llote. ²⁷ Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón ciode. ²⁸ Naimaci dine jaillanona, Jesúna meniñote. Jusiñamuimo iobillacinona fecajano jiiide:

²⁹ Nama, o anamo iticue.

Cuomo o lloga uai jai suilla jira, uri fioidaiticue.

³⁰ O oretaga Jilloitaraímana jai cioidicue.

³¹ Naimiena oredio, nana comini jilloillena.

³² Naimiedi judíuainedínona uanaicinona uiñotaite.

O cominina iobitaite

jiiide. ³³ Iena cacajamona, iaimaiaí jitona lloga uairi rajicaidiaimaiaí. ³⁴⁻³⁵ Simeón iaimaiaimo caimaredicinona llote:

—Jusiñamui omoína raise canoite —llote.

Maríamo llote:

—Ero, ie rafuena llollena, Jusiñamui o jitona jai fetode. Naimie illamona, comini comeciaina facajacinona uiñotaite. Naimiemo suille rafuemono o comeci sure iite. Cai cominimona ailluena naimiena jitañeitimaci. Ailluena jitaítimaci.

³⁶ Nairuido Jusiñamui jofomo Ana railla feciño ite. Jusiñamui naiñaiño lloga rafuena llouide. Naiñaiño moo Fanuel micori. Naiñaiño nairaidi Aser. Jitaiño facaisemona ie ini diga siete años illanona, naimie fiodaite. ³⁷ Naiñaiño jai eo uaiçiño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedauide.

³⁸ Simeón ñaiana cacajano, naiñaiño Jesús comini dine billano, Jusiñamuimo iobilacinona fecade. Naimie billemo naimaci ocuirilla jira, naiñaiño naimaci Jilloitaraimana nainomo itinomo llocana uite.

Nazaretmo abido naimaci jailla rafue

³⁹ Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiiaimaiai. ⁴⁰ Nainomo Jesús sairicana mairicana jaide. Eo abina uiñote. Naimieri iobillamona, Jusiñamui naimiena canouide.

Jerusalémo Jusiñamui jofomo Jesús illa rafue

⁴¹ Naga año Jerusalémo pascua railla rafue dine Jesús moo iaimaiai jaisoidiiaimaiai. Egiptomona naimaci jaiagai jillobillana começillena, naie rafue ite. ⁴² Naimiemo doce años illa facaise Jerusalémo iaimaiai jaisoilla isoi, jaidiiaimaiai. Naimie doce años illa jira, Jesúna uitiaimaiai. ⁴³⁻⁴⁴ Rafue fuilla mei, abido bitiaimaiai. Ailluena comini jiai billa jira, Jesús billana raise uiñoñediiaimaiai. “Cai comini diga naimie bite” raillanona começina facadiiaimaiai; ia Jesús Jerusalémo fiebide. Darui raifi billa mei, iaimaiai cominimo naimiena eo jenodiiaimaiai. ⁴⁵ Baiñena jira, inia mei, Jerusalémo darui jaillanona, abido jaidiiaimaiai. ⁴⁶ Ie are Jusiñamui jofomo naimiena baitiaimaiai. Moisés micori llogacinona llofueraini motomo naimie ite. Naimaci llofuiana cacade. Iena naimaci diga jiai siadote. ⁴⁷ Nana cacadino naimie uiñogacinori rajicaidimaci. Naimie raise siadogacinori jiai rajicaidimaci. ⁴⁸ Naimiena iaimaiai baia, rajicaidiiaimaiai. Ie ei naimiemo jicanote:

—¿Bue ñellena cocona duere finodio? O moocama diga ona eo duere jenodicoco.

⁴⁹ Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Niese bene cue illana uiñoñedomico?

⁵⁰ Naimie llwana raise cacaiñediiaimaiai. ⁵¹ Iemei iaimaiai diga Nazaretmo naimie abido jaide. Iaimaiai uai iinuanona, iaimaiai anamo ite. Ie ei María nana naie rafue ie começimo facauide. ⁵² Naimie sairicana abina uiñocana jaide. Jusiñamui naimieri iobide. Comini dinena naimiena jiai gaidimaci.

3

Jofue iñenanomo Juan Bautista micori illa rafue

(Mt 3.1-12; Mr 1.1-8; Jn 1.19-28)

¹⁻² Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla enirue diga, gobernadori Felipe. Abilinia railla enirue gobernadori Lisantias. Jusiñamui diga nanoca ñairaima iaimaiaidi Anás, Caifás diga. ³ Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fainonocaida, Jusiñamui dibeimo omoi começiai iuai meido. Iemona Jusiñamui omoi jeacinona feitaite. Omoi começi iuai omoi meidoia, comini iena uiñollena, mai omoi bautizallomoi.

⁴ Isaías micori ie rabemo naimiena jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite. Naimie jaillino atona fino.

⁵ Nana iconi oruita.

Naga aneduai diese eniruena judai.

Neicairuai joide naisona atona fino.

Naimo itaicuai illa diese eniruena oruita, daje facai illena.

⁶ Nana comini Jusiñamui naimacina jillotaicanana uiñoitimaci”

cuete; ia naimaci comeciaina ñaite. Cai Namana iinuana ñaite. Abina iedoñenana ñaite. Jeacino finocana jaiñenana ñaite. Cai Nama Jesús bia, Jesús uaina naimaci feiñollena, naimaci comeciai marena finuana ñaite.

⁷ Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jaiio nairai isoidomoi. ¿Ñiese jilloit-omoi? Cue dine omoi billena, ¿bu omoimo lloga? ⁸ Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciai iuailai meiduana uiñoiticaí. Ie mei bautizallomoi. Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicaillifuemona jilloiticaí”. Ero, omoimo lloiticue: Cue llua isoi omoi finoñenia, naimie riicaillifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. ⁹ Ero, llisiñede riará tiedomoi. Tíia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoína jai duere finoacade. Ie riicaillafue anamo jai itomoi. Omoi comeciai iuai omoi meidoñenia, omoína duere finoite.

¹⁰ Iena cacajanona, comini dinena naimiemo jicanotimaci:

—Cai bautizaja mei, ¿ñiese iiticaí? ¿Ñie isoide mare rafuena finoiticaí?

¹¹ Juan uai ote:

—Ailluena iniroiredimiedi iniroinidimiemo iniroina feca. Guilleredimiedi guillenidimiemo guillena feca.

¹² Naimacina bautizallena, gobierno ucubena oraini jiaí bitimaci. Jicanotimaci:

—Llofueraíma, cai bautizaja mei, ¿ñiese iiticaí? ¿Ñie isoide mare rafuena finoiticaí?

¹³ Uai ote:

—Gobierno facaina omoi íbataia, cominimona gobierno llua baífemo oñeno.

¹⁴ Naimie dine billanona, soldaduai jicanotimaci:

—Cai bautizaja mei, ¿ñiese iiticaí? ¿Ñie isoide mare rafuena finoiticaí?

Uai ote:

—Cominimona rana bairoñeno. Riicinodo rana oñeno. Tainona llogiduamona, cominimona rana oñeno. Omoi ucube illa diese feiño. Ie baífemo ucubena nicidoñeno.

¹⁵ Juan llofuiamona naie facaise cominidi Cristo billemo ocurilla jira, “Juandi níbai Cristo” raillanona, Juanmo comeciaina facauidimaci. ¹⁶ Iena fidiano, Juan llote:

—Cristoñedicue. Jusiñamui díbeimo omoi illamona, jinui díga omoína bautizadicue. Cai baífemo faitimie bie facaise biite. Naimie cue ífomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoimo itataite. Omoi comeciai iuai omoi meidoñenia, omoína duere finoite.

¹⁷ Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciai iuailai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duiñede —llote.

¹⁸ Bie isoidicinodo cominimo ie mare rafuena llofueuide. ¹⁹ Naie facaiseconi Herodedi gobernador. Ie ama aí ote, ie aina illena. Naiñaiñodi Herodías. Díga jiaie mariñede rafuena finode. Ie muidona Juan naimiena lletade. ²⁰ Maraiñede rafuena Herodes finocana jaillamona, Juan cárcelmo jonetade.

Juandi Jesúsna bautizaja rafue

(Mt 3.13-17; Mr 1.9-11)

²¹ Ailluena cominina Juan bautizaja facaise, Jesúsna jiaí bautizade. Bautizaja mei, Jesúsdi ie Moo díga ñaianona, mona bojode. ²² Ieconí Jusiñamui Joreño ucugina eruailano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

Jesucristo ie usumatiai
(Mt 1.1-17)

²³ Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Elí micori jito. ²⁴ Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. ²⁵ José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. ²⁶ Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. ²⁷ Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito. ²⁸ Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. ²⁹ Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. ³⁰ Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. ³¹ Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito. ³² David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. ³³ Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito. ³⁴ Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. ³⁵ Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. ³⁶ Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. ³⁷ Lamec micori Musalén micori jito. Musalén micori Enoc micori jito. Enoc micori Jared micori jito. Jared micori Mahalaleel micori jito. Mahalaleel micori Cainán micori jito. ³⁸ Cainán micori Enós micori jito. Enós micori Set micori jito. Set micori Adán micori jito. Adándi Jusiñamui comuitagamie.

4

Taife ramo Jesús faia rafue
(Mt 4.1-11; Mr 1.12-13)

¹ Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiema orede. ² Nainomo cuarenta digarui Taifedi naimiema ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. ³ Jesús aimetaillana Taife uiñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomeniconna jaita”.

⁴ Jesús uai ote:

—Iena lloñeiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite”.

⁵ Ie mei a ite anedumo Taife Jesúna uillano, dallu illanona, naimiemo nana nairaiaina acatate. ⁶⁻⁷ Llote:

—Nana bie nairaiiai cue anamo ite. Iena cue iacagamiemo itataredicue. Cueno o sedajamona, iobillacina cuemo o fecaia, nana bie nairaiiai omo fecaiticue. Bie nairaiiai illaimana jaitio.

⁸ Jesús uai ote:

—Dama ite. Ona sedañeiticue. Moisés micori jaie cuega: “Cai Nama Jusiñamuina seda. Dama naimiemo iobillacinona feca”.

⁹ Ie mei Jerusalémo Jusiñamui jofo muidomo Taife Jesúna uite. Raite:

—Jusiñamui Jitodiódena, eniruemo mai ana uai. ¹⁰⁻¹¹ David micori ona jaie cuega: Ona eenollena Jusiñamuidi ie jaienismo lloite.

Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluaña finoñeiticue.

¹³ Taife naimiena ramo faia mei, naimiemona ie jitaille dinori oni jaide.

Galileamo Jesús ie rafue lolle jillaci

(Mt 4.12-17; Mr 1.14-15)

¹⁴ Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. ¹⁵ Ailluena judíuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

Nazaretmo Jesús illa rafue

(Mt 13.53-58; Mr 6.1-6)

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiai ado facallena, naimie a naidadate. ¹⁷ Naie lloraco nama mullaímadi Isaías micori jaie cuegafuiai jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸⁻¹⁹ Jusiñamui Joreño cuemo ite.

Dueredinomo mare rafuena lollena, cuena fetode.

Taife anamo ailluena comini illa jira, Jusiñamui naimacina jillotaiacana uiñoñedimaci.

Jusiñamui rafuena ailluena comini uiñoñena jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenaillana birui uiñuana jitaide.

Naimacimo mare rafue lollena, cuena jai oretate.

²⁰ Naie rafue facaja fuillamona, cuegafuiai abido fecade. Naimacina llofuellena, dane ana raide. Nana nainomo ite comini naimiemo eo eruaidimaci. ²¹ Iemei naimie naimacina llofueite. Raite:

—Omoi como cacaja cuegafuiai omoi motomo jai suide. Cuena ñaite.

²² Naimie lluaña comini cacajano, coninina raitimaci:

—Naimie fue mare. Naimie marena llofueite. —Iemona rajjicaillamona, coniniri raitimaci—, Naimiedi jamai José jito. ¿Ñiese naie rafue birui suide?

²³ Iena uiñuamona, Jesús dinena llote:

—Cue lluaña iñoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiai finoia, naimiena iñoiticai. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi. ²⁴ Uanaicinona omoimo lloiticue. Naimie comini nairaimo Jusiñamui facaina lloraíma ia, ie comini naimie uaina feiñoiacasiñede. Iena jamasíte. Ie isoide. Cue nairaimo cue illa jira, cue uaina iñoñedomoi. ²⁵ Jaie ie isoide. Elías facaiseconi daje amani años abimo atomonado noci deiñede. Aime guitimaci. Naie facaiseconi bie eniruemo cai comini dine ailluena feciñuái itimaci; iadedi omoi jaiagai Jusiñamui uaina iñoñedimaci. ²⁶ Jusiñamuidi Elíana cai comini dine oreñede; iadedi jiaie eniruemo ite feciño dine naimiena orede. Sarepta railla nairaimo orede. Sidón railla eniruemo naie nairai ite. Cai cominiñede feciñomo orede. ²⁷ Jiaie rafuena lloiticue. Eliseo micoridi Jusiñamui facaina jaie llote. Eliseo micori facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina iñoñena jira, Eliseo micori duidinona

jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina inoiacaiñedomoi —llote.

²⁸ Jesús lluana cacajano, naie ofiracomo itino eo iciritimaci. ²⁹ Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci. ³⁰ Naimiena meineiacadimaci; iadedi naimaci motomo naimie jaillanona, naimacimona naimie jillobillano oni jaide.

Jesúdi Janaba anamo itimie jillotaja rafue

(Mr 1.21-28)

³¹ Jesús Capernaumo jaide, Galilea railla eniruemo ite. Nainomo naimie ia, sábadoruimo judíuai ofiracomo jaide. Nainomo llofuede. ³² Illaíma uai isoi naimie llofuaia jira, nainomo ite comini naimie llofuiamona rajicadimaci. ³³ Janaba anamo illamie nainomo ite. Jesús llofuiana cacaita, Janabadi iimana ado cuirioitate:

³⁴ —Odi Nazaret ie Jesús. ¿Bue ñeiacadio cai díga? Caina duere finuaibidio. Ona uñoticue. Odi Jusiñamui ie Mare Fetocamiedio.

³⁵ Jesús naimiena lletade:

—Llúcai. Naimiemona oni jai. —Iena cacajanona, naimaci motomo Janaba iimana ana dotade; ia naimiedi bofedaiñede. Ie mei Janaba naimiemona oni jaide. ³⁶ Iena ciuanona, nana nainomo itino rajicadimaci. Coniniri siadotimaci:

—¿Nie isoide Jesús uai? Janabamo naimie llua mei, iimamona Janabadi oni jaide.

³⁷ Jesús finoca rafue muidona, naimie mamecidi nana naie eniruemo soride.

Jesúdi Simón Pedro jifaiñona jillotaja rafue

(Mt 8.14-15; Mr 1.29-31)

³⁸ Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaiñona jilloitallena, nainomo itino Jesúmo jicanote. ³⁹ Naiñaiño dine Jesús jaillanona, ie uai lluamona, naie duicodi oni jaide. Ieconí naiñaiño jillode. Abi cuariñede. Naidacaillanona, guille finuanona, ie jofomo itinona ecade.

Jesúdi ailluena duidinona jillotaja rafue

(Mt 8.16-17; Mr 1.32-34)

⁴⁰ Nairuido jítoma ana itemo, comini ailluena duidinona Jesús dine atidimaci. Díga duicuai illanona atidimaci. Naimacina jetajamona, naimacina jillotate. ⁴¹ Jananiaína jiaí oni oretajano, jananiai dinena raite:

—Odi Jusiñamui Jitodio. —Naimiena naimaci uñua jira, Jesús naimaci ñaiana rairuide. Naimiedi Jusiñamui Jitona uñotimaci.

Judeamo Jesús llofuaia rafue

(Mr 1.35-39)

⁴² Ie areruido jítiramo jofue iñenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci. ⁴³ Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena lloiena, Jusiñamui cuena orede. Oni jaiticue. Omoi díga fiebiñeiticue.

⁴⁴ Ie mei Judeamo ite ofiracuaimo Jesús llocana jaide.

5

Jesús muidona, naimaci ailluena lliciaína ua rafue

(Mt 4.18-22; Mr 1.16-20)

¹ Jiairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci. ² Ie facaise jorai fuemo Jesús mena sijide botena cide. Naimaci lloijina naimaci jocua jira, naie botemo lloiji fairaini iñede. ³ Comini ie llofuiacinona raise cacaillena, Jesús daje botemo

jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raita, botemona cominina llofue. ⁴ Llofuia mei, Simómo llote:

—Aforedinomo jai. Nainomo omoi lloijina faino.

⁵ Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicaí. ¿Ñiese ja oiticai? Iadedi o llua jira, lloijina faiticue.

⁶ Iena naimaci faia mei, ailluena lliciaina jiatatimaci. Ie jira naimaci lloiji cuaranoiacade. ⁷ Iena ciuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade. ⁸ Iena ciuano, Simón Pedro Jesúmo iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jeacinona finouidimiedicue.

⁹ Ailluena lliciaina naimaci ua jira, naimaci rajicaillamona, iena naimie llote.

¹⁰ Naimie nabaiñiaimona Zebedeo jito iaímaiai ite. Juan diga Jacobo iaímaiai. Simómo Jesús llote:

—Cuen a jaciruiño. Lliciaina birui ocabitomoi; iadedi cue ñibeimo naimaci illena, biruimona cominina oitomoi.

¹¹ Eniruemo sijiano, naimaci raruiaí fainonocaida, Jesús diga jaidimaci.

Jesúdi efonaitimiena jillotaja rafue

(Mt 8.1-4; Mr 1.40-45)

¹² Jiairuido Jesúdi jiaie nairaimo ia, efonaitimie naimie ñine bite. Naimie eo fodo jaide. Jesúna naimie ciuano, naimiena raise uaiduamona, ana bitadate. Llote:

—Maestro, o jitaíadedi, cuena jillotaredio.

¹³ Jesús ie onolli oni ñuitajanona, naimiena jetade. Raite:

—Ona jillotaiacadicue. Mai o jillo. —Ieconí jillode.

¹⁴ Jesús naimiemo llote:

—Omo suide rafue jaca bumo lloño; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micori jaie lloga rana feca Iemona comini o jilluana uiñoitimaci.

¹⁵ Iese Jesús naimiemo llote; iadedi Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comini naimie ñine bitimaci. ¹⁶ Bitimaci; iadedi Jusiñamui diga ñaillena, jofue iñenanomo Jesús jaide.

Jesúdi tisitaitimiena jillotaja rafue

(Mt 9.1-8; Mr 2.1-12)

¹⁷ Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie ñine bite duidinona jillotate. ¹⁸ Ie facaise ie biiramo biide tisitaitimiena Jesús ñine damerie atidimaci; ¹⁹ iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie biiramo biide diga, comini motomo Jesús ecimo ana ñuitadimaci. ²⁰ Iena Jesús ciuanona, tisitaitimie jilluana naimaci iñuana Jesús uiñote. Tisitaitimiemo llote:

—Jai, o jeacinona cue feitaja jira, iena oni jai dotadicue. Ie facai ibana jai oñeiticue.

²¹ Nainomo itinomona Moisés micori llogacinona llofueraini itimaci. Fariseuai jiaí itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”. ²² Naimaci comeciái facajacinona Jesús uiñuanona, naimacimo jicanote:

—¿Bue ñellena omoi comeciaina iese facadomoi? ²³ Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo: “Mai naidacaillanona macari” cue lloia, cue uai siñonana uiñoitomoi. ²⁴ Monamona jaie cue billanona, imana

jaidicue. Ie jira jeacino oni dotaja uai cuemo ite. Iena omoi uinollena, tisitaitimie mo lloiticue: “Mai naidacai. O biira ferianona, o jofomo mai jai”.

²⁵ Iese naimie raillamona, tisitaitimie jillode. Iecon naimaci motomo naimie naidaide. Ie biira feriano, Jusiñamuimo iobillacino fecajano, ie jofomo jaide. ²⁶ Nana naiena ciolino eo rajicaidimaci. Iemona Jusiñamuimo iobillacinona fecadimaci. Eo rajicaillamona, raitimaci:

—Bie isoide siño comena jaca cioinédicai.

Jesúdi Levína fetua rafue

(Mt 9.9-13; Mr 2.13-17)

²⁷ Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimie mo lloite:

—Cue llofuegamiena o jaillena, cue diga bi.

²⁸ Naidacaida, Jesús diga jaillanona, ie maijiana faimonocai. ²⁹ Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci. ³⁰ Nainomo fariseuai cominidi, Moisés micori llogacino llofueraini diga, jamai bitimaci. Jesúna ciuanona, ie llofueoicaiganomo jicanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacino ucube oraini raise jaiñenamona, naie isolino diga fariseuai comini nabairiñena jira, iese jicanotimaci. ³¹ Jesús iena cacajano, lloite:

—Ecairedino médicono jitaiñedimaci; iadedi duidinodi médicono jitaiddimaci.

³² Jusiñamui díbeimo mareuidinona uaibinédicue; iadedi maraiñedinona uaibiticue.

Jesúmo comini guiñenana jicanua rafue

(Mt 9.14-17; Mr 2.18-22)

³³ Naie facaise fariseuai dinena Jesúmo lloite:

—Cai einamaci llua isoi, Jusiñamuina cai raise iobitallena, guiñenaruillai illa fa-caiseconi guinédicai. Jusiñamuimo jicabidicai. Cai jeacino facaina sunaicabiticai. Cai einamaci rafuedo Juan Bautista llofueoicaigano jaidimaci. Cai llofuegano iedo jiai jaidimaci; iadedi o llofueoicaigano jaca guitimaci. ¿Bue ñellena cai einamaci rafuedo jaiñedimaci?

³⁴ Jesús uai ote:

—Jiaie rafuedo iena lloiticue. Coniruedi ie aina uarui ia iobilla jira, ie nabaiñiai sunaiñedimaci. Iobillamona guitimaci. ³⁵ Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci. ³⁶ Jiaie rafuedo iena lloiticue: Nia joneña comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. ³⁷ Jacagomona finoca bolsa como finoca vino joneña. Jonegadana, mairiñena jira, sirillamona igoi raire cuararite. Vino faifite. Igoi jiai faifite. ³⁸ Como finoca vino comogomo jonelle. Iemei iena faifiñeite. ³⁹ Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamaci rafue ifomo jiaie rafue birui ite. Iena omoimo llocabiticue. Iedo jaidicai; ia omoi einamaci rafuemo omoi fibilla jira, jiaie rafuedo birui jaiacaiñedomoi —llote.

6

Sábadoruimo Jesús llofueoicaigano maijia rafue

(Mt 12.1-8; Mr 2.23-28)

¹ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, golluano, guicana jaidimaci. ² Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijnidicai; iadedi trigona naimaci tijiama, caimona jai maijidimaci. Caimona jeacinona jai finodimaci.

³ Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga Jusiñamui jofomo fo jaide. ⁴ Jusiñamuimo fecaca llomeniconona uanona, guitimaci. Jamai fue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede. ⁵ Monamona cue billamona, iimana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiai rairuiredicue. Ie jira nairuimo cue jitailla rafuena finoredicue.

Jesúdi onollina idisarodimiena jillotaja rafue

(Mt 12.9-14; Mr 3.1-6)

⁶ Jiaie sábadoruimo judíuai ofiracomo Jesús jaillanona, llofuate. Ie facaise nainomo nabellimo idisarodimie ite. ⁷ Moisés micori llogacinona llofueraini, fariseuai diga, Jesús eruidimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode. ⁸ Naimaci comeciaina facajacinona Jesús uiñuamona, onollina idisarodimiemo llote:

—Cue ecimo naidada. —Iemei Jesús ecimo naidadate.

⁹ Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cueno birui omoi meineiadedi, birui marañede rafue finodomoi. Sábadoruimo ¿nie isoide rafue finuana rairuidomoi?

¹⁰ Naimacimo eruaillanona, duidimiemo llote:

—O onolli mai oni ñuita. —Iena ñuitajanona jillode. ¹¹ Nainomo itino iena ciuanona, eo iciritimaci.

—¿Niese Jesúsna nibaiiticaí? —naiemona coniniri siadotimaci.

Jesúdi ie doce llofueoicaiganona fetua rafue

(Mt 10.1-4; Mr 3.13-19)

¹² Nairui aneduaimo Jesús jaide, Jusiñamui diga ñaillena. Namona naio jide. ¹³ Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode. ¹⁴ Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé, ¹⁵ Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide. ¹⁶ Judas; naimiedi Jacobo jito. Judas Iscariote micori; naimiedi Jesúsna gaitatatimie.

Jesúdi ailluena cominina llofuaia rafue

(Mt 4.23-25)

¹⁷ Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómoma bitimaci. Tiro monaillai fuemo ite. Sidón monaillai fuemo jiai ite. Naimie llamo cacareillena bitimaci. Naimaci duicomona jiai jilloiacadimaci. ¹⁸ Jananiai anamo itinomona Jesús jananiaina oni orede. ¹⁹ Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

Jesús lloga rafue

(Mt 5.1-12)

²⁰ Ie llofueganomo eruaillanona, Jesús llote:

—Naimie anamo omoi jai illamona, Jusiñamui omoína sedaacana rafuena omoína llofueiticue. Naimiena jitaidomoína, omoína sedaite. Comeciaina facadomoi: “Jusiñamui jitailacinona dani finonidicai; ia Jusiñamui caina canuamona, iena finoiticai”. Naimie comini omoi illamona, naimie omoína canoite. Iemona caimare iitomoi. ²¹ Naimie jitailacino omoi finuamona, Jusiñamui omoína sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoína sedaite. Ailluena comini jeacino finocana jaidimaci. Iena uiñuamona, sunaitomoi. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoi. ²² Cuemo omoi duia, duere sefuitomoi. Jiaie comini omoína enoitimaci. Omoína oni dotaitimaci. Omoína jeare ñaitimaci. Cuemo omoi duilla jira, omoína jamaitimaci; ia Jusiñamui omoína caimare itataite. ²³ Omoi isoi omoi jaiagaimona Jusiñamui facaina lloraini micoriai jiaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefuaia, iocire omoi jai. ²⁴ Iese iitomoi; ia Jusiñamuina jitaiñedino ico duere sefuitimaci. Comeciaina facadimaci: “Jusiñamuina jitaiñedicai. Marena birui iticai. Nana cai comechai jitailacino birui caimo ite”. Iese birui itimaci; ia Jusiñamui naimacina ico duere finoite. ²⁵ Jusiñamuimona buena birui jitaiñedino ico duere sefuitimaci. “Nana cai comechai jitailla rafue caimo birui illa jira, Jusiñamuimona buena jitaiñedicai” raitimaci. Iese birui itimaci, ia Jusiñamui naimacina ico duere finuamona, buenitimaci. “Cai comeciaina iocire itatallena, Jusiñamuina jitaiñedicai” damierie birui raitimaci. Naimaci jeacino facaina sunaiñedimaci. Birui ite rafuena ebiruitimaci. Iese birui itimaci; ia Jusiñamui naimacina ico duere finuamona, sunaitimaci. Eeitimaci. ²⁶ Naimaciri iobillamona, omoi jaiagaidi Jusiñamui facaina llorainina abi caitadinona marena ñaitimaci. Damierie birui daje isoidimaci. Jusiñamuina iobitaiacaiñedimaci; ia cominina iobitaiacadimaci. Iemona comini naimacina marena ñaitimaci; ia Jusiñamui naimacina ico duere finoite.

Jesúdi iba oñenana llua rafue

(Mt 5.38-48; 7.12)

²⁷ Jesús llote:

—Cue lluana cacajamona, iena ñino. Finuamona omoína enoidinona isirui. Naimacina cano. ²⁸ Omoi jeare ñaitinona marena ñaino. Omoína jeare finodino facaina Jusiñamuimo omoi jii. ²⁹ Omoi cacaina bu dutaiade, iba oñeno; iadedi enefebeimo dobaida, enefebeimo jiai dutallena. Omoi iniroina bu bairoiaciona, omoimo naimie nia jicañenia, naimie jitailla iniroi baifemo naimiemo feca. ³⁰ Omoimo ite rana bu jicaia, iena caidiñeno feca. Omoimona rana bu bairoia, iena abido jicañeno. ³¹ Jusiñamui jitailacinona omoi finuamona, jiaie cominina marena fino. Jiaie comini omoína finuana omoi jitailla isoi, naimacina fino. Naimaci omoína marena finuana omoi jitaia, naimacina marena fino. Naimaci omoína maraiñeno finuana omoi jitaia, naimacina ie isoi maraiñeno fino. O finoacaga ra isoi jiaie cominimo fino. ³² Naimie cominina omoi illamona, nana comini daje isoi isirui. Omoína isiruitinona omoi isiruaia, mare; iadedi omoína gaiñenanona omoi isiruiñenia, Jusiñamui omoína: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baifemo faiñedomoi. Naimaci isoi itomoi. ³³ Naimie cominina omoi illamona, nana comini daje isoi cano. Omoína canodinona omoi canoia, mare; iadedi omoína canoñedinona omoi canoñenia, Jusiñamui omoína: “Mare” raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baifemo faiñedomoi. Naimaci isoi itomoi. ³⁴ Naimie cominina omoi illamona, nana cominimo daje isoi rana feca. Omoimo ra fecadinomo rana omoi fecajia, mare; iadedi omoimo rana fecañedinomo rana omoi fecañenia, Jusiñamui omoína: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoi fecañenia, maraiñede rafuena finoraini baifemo faiñedomoi. Naimaci isoi itomoi. ³⁵⁻³⁶ Omoína gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuirineno; ia Jusiñamui omoi raise ibaite. Jusiñamui maraiñedinona

canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona, maraiñedinodi naimie cominina omoi illana uiñoitimaci. Jusiñamuidi cominina duenailla isoi, cominina omoi jiai duenai.

Jesúdi jiaie cominina mameriñenana llua rafue

(Mt 7.1-5)

³⁷ Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoina duere finoite. Omoimo maraiñede rafuena bu finoa, iena feita. Iena omoi feitañenia, Jusiñamui omoimo ite maraiñede rafuena feitañeite. ³⁸ Jiaie rafuedo iena lloiticue. Rana omoi fecaia, iena raise omoi gaieia, ico ibana omoi oia, raise gaiecana feiñoitomoí. Ie isoide. Jiaínomo maraiñede rafuena finoñeno; ia naimacina duenaillamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoí.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoi illamona, bie rafuena cacarei. Uanaicínodo omoi jaiñenia, uisinidimie isoi iitomoí. Uisinidimie jiaie uisinidimiena ifonide. Ifo iade, nagamaiai dafomo uaidiiaimaiai. ⁴⁰ Fueotimie ie llofueraima baifemo uaiñede; iadedi naimie raise fueoia, ie llofueraima isoi jaite. Raise fueollena, cue uaimo cacarei. ⁴¹ Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoimo ailluena ite maraiñedicinomo nano omoi comecina faca. ⁴² Omoimo maraiñedicino illamona, ¿niese omoi ecimo itimiema mameritomoí? Omoimo ite maraiñedicinomo omoi comecina facacaiñena jira, maredinona abi caitadinodomoí. Omoi comeciaina nano raise fino. Iemei omoi ecimo itimiema canorenitomoí. Naimie comecina raise canorenitomoí.

Jesúdi riarra llisilla llilla llua rafue

(Mt 7.17-20; 12.34-35)

⁴³ Jesús nia llofueite:

—Mare riarra maraiñede riarra isoi llisiñede. Maraiñede riarra mare riarra isoi jiai llisiñede. ⁴⁴ Llisillamona nie isoide riarra illana uiñoticaí. Amena ie llisilla llillamona amena marena uiñoiga. Llillamona, amena maraiñenana jiai uiñoiga. Ecuaimona uvas railla riarana oñedicaí. Monaigimona higos railla riarana jiai oñedicaí. ⁴⁵ Ie isoide. Naimaci comeciaino iticinomona comini ñaitimaci. Mare comeci iticinomona maremiedi mare rafuena finocabide. Maraiñede comeci iticinomona maraiñedimie maraiñede rafuena finocabide.

Jesúdi naimiema inuana ñaia rafue

(Mt 7.24-27)

⁴⁶ Jesús nia llofueite:

—Omoimona damierie cuena: “Cai Nama” raitomoí; iadedi cue llogacinona finoñedomoí. ⁴⁷ Diga comini cue dine bitimaci. Cue uaina cacadimaci. ⁴⁸ Cue uaina innotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. Noci deidemo, eo jinuidemo, jofomo ille toia, jofu raise finua jira, jofu goiñede. Iena faifiñede. Ie isoide. Cue llua innotimie faifiñeite. ⁴⁹ Cue uaina innoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raiñede. Noci deidemo, eo jinuidemo, jofomo ille toia, jofu goillamona, jai eo judaisite. Iena faifide. Ie isoide. Cue llua innoñedimie faifite —llote.

7

Jesúdi capitán mullaimana jillotaja rafue

(Mt 8.5-13)

¹ Ie llua fuillamona, Jesús Capernaumo jaide. ² Nainomo romanos railla nairaimo duide illaia ite. Cien soldaduaina sedauide. Naimiedi capitán. Judúñedimie. Ie mullaima

eo duide. Niade fioidiacade. Capitán naimiena eo gaide. ³ Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaimana jillotajaibillena jitaide. ⁴ Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caimona maremiena jira, naimiena o canuana jitaidicai. ⁵ Cai nairaina isiruite. Ie ucube diga cai ofiracona finotate.

⁶ Iena cacajamona, Jesús naimaci diga jaide. Capitán jofomo iairei Jesús ria, capitádi Jesús dine ie nabaiñiaina orede, Jesúmo lollena:

—Maestro, biñeno. Jamai bue cue isoilla jira, cue jofomo biñeno. ⁷ Jamai bue cue isoilla jira, o dine jiai jaiñedicue. O illanomona o uaido cue mullaima jilloita. ⁸ Jiaie illaicomini anamo iticue. Naimaci lloga uaina iñotitue. Cue anamo jiaie soldaduai illanona, cue uaina iñotimaci. Cue anamo cue mullaima illa jira, naimiedi cue uaina iñote. O anamo naie duico illa jira, o uaina bene o lloia, cue mullaima jilloite.

⁹ Iena cacajano, Jesús rajicaide. Oni dobaidajano, naimie diga jaidinomo llote:

—Bie isoidimie cue uaina iñotimiena jaca baiñedicue. Cai judíuai cominimona bie isoidimiena jaca iñede. Mai abido jai.

¹⁰ Capitámona bitino abido capitán jofomo rillano, mullaima jai jilluana cioidimaci.

Jesúdi feciño jitona jillotaja rafue

¹¹ Jiairuido Naín railla nairaimo Jesús jaide. Ie llofueoicaigano jiai jaidimaci. Ailluena comini jiai jaidimaci. ¹² Naie nairai ie nasemo naimie iaireicaia, jai fioidaitimiena comini jino atiana ciode. Naie fioidaitimiedi conirue. Ie eidi feciño. Dajede ie jitodi jai fioidaite. Ailluena Naín itino naie feciño diga jaidimaci. ¹³ Jesús naiñaiñona ciuanona, naiñaiñona duenaite. Naiñaiñona raite:

—Mai eeñeno.

¹⁴ Fioidaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fioidaitimie Jesús llote:

—Mai a rainada.

¹⁵ Iena Jesús lua mei, naie fioidaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite. ¹⁶ Naieri nana jacinaitimaci. Jusiñamuimo iobillacinona fecadimaci. Raitimaci:

—Jusiñamui facaina lloraime cai motomo ite. Naimie uai eo siño. Naimiena Jusiñamui oretaja jira, Jusiñamui caina birui canoacana jira, iobidicai.

¹⁷ Nana Judeamo itino Jesús finoca rafuena fididimaci. Judea enirue fuemo ite nairaiadi jiai fididimaci.

Jesús dine Juan Bautista micori ie llofueoicaiganona oretaja rafue

(Mt 11.2-19)

¹⁸ Juan Bautista micori llofueoicaiganodi nana Jesús finoca rafuena fidiano, iena naimiemo llote. Ie llofueoicaiganomona Juan micoridi menamiena uaidote. ¹⁹ Llote:

—Jofue iñenanomo navui cue ia, jiaimie billena llofuecabitue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuriticaí?” naimiemo jicano.

²⁰ Jesús dine iaimaiai rillano, Jesúmo llotiaimaiai:

—Juan Bautista cocona orede. Jofue iñenanomo navui naimie ia: “Jusiñamui-mona damie biite” naimie llofuecabite. Juan llofuegamiena o illana uiñoiacadicaí. Imieñediodena, jiaimie billemo nia ocuriticaí. Cocomo llono.

²¹ Jesús dine iaimaiai billa facaiseconi, Jesús diga isoide duicuai illanona jillotate. Jananiai anamo itinomona jananiaina oni jiai orede. Uisididimona uisina dane ciotate.

²² Ie jira Jesús iaimaiaimo llote:

—Cue lluana cacadomico. Cue finoca rafuena ciodomico. Juan dine abido omico jaillanona, iena naimiemo llono. “Uisididino jai cioidimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fioidaillamona damierie jai jillodimaci. Dueredino mare rafuena jai cacadimaci”. Iese

naimiemo llono. ²³ Jiai llono: “Ñibai nana cue rafuena raise cacaiñedio; ia cuena jaca nia ñnocana o jaia, caimare iitio”.

²⁴ Iaimaiai abido jailla mei, naimie ecimo ailluena ite cominimo Jesúdi Juan rafuena llote:

—Jofue ñnenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoñede. Nie isoide rafue naimiemo ia, cue rafuena llocana jaide. ²⁵ ¿Bue ñellena naimie dine jaidomoi? Mare ñiroina jitadimiena cioñedomoi. Mare ñiroina jitadinona omoi cioacaniadedi, illacomini dine jaidomoi. Naimacimo ailluena ra ite. ²⁶ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira. ²⁷ Malaquías micori naimiema jaie cuela: “Jusiñamui raite: ‘Ero, o uicodo cue rafuena llorena, damiema oretaiticue, comini comeciama marenona duiñollena’ ” cuela. Malaquías Juan Bautistana cuete. ²⁸ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofue; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi.

²⁹ Naimacina navui Juan bautizaja jira, nainomo ite comini iema cacajano, Jusiñamuimo iobillacinona fecadimaci. Gobierno ucube orainidi jiai fecadimaci; ³⁰ iadedi fariseuai iobillacinona fecañedimaci. Moisés llogacinuaina llofueraini jiai fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede. ³¹ Jesús llote:

—Cuena ñnoñedinona lloiticue: Ero, omoima ñaiticue. ³² Jifanote uruiai isoidomoi. Uruiai jifanoiacania, naimaci nabaiñiama uaiduanona, raitimaci: “Omoi diga jifanoiacadica; iadedi cai diga jifanoiacaiñedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedica;” raitimaci. ³³ Ie isoidomoi. Juan jirorainide. Caimare guñede; ia naimie diga nabairiñedomoi. Naimiema gaiñedomoi. Ie jira omoimona dajerie naimiema raitimaci: “Janaba anamo naimie illamona, naimie uairico isoi ite” raitimaci. ³⁴ Monamona billanona, iimana jaidicue. Omoi isoi guiticue. Caimataidicue; ia cue diga nabairiñedomoi. Cuena jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimidio”. ³⁵ Iese raitomoi; iadedi Jusiñamuina ñnotinodi cue finoca rafuena marenana uñnotimaci.

Jesús Simón jofomo illa rafue

³⁶ Jiairuido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite. ³⁷ Jesús guitemo, daje riño fo jaide. Naiñaiñodi maraiñede rafuena finoraiño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga. ³⁸ Judíuai aciaita jaca guisoidimaci. Jinafo dine eilli jonesiuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascomona soride rana totade. Naimiema naiñaiño isiruillamona, iese naiñaiño finode. ³⁹ Iema ciuanona, Simón dama comecina facade: “Bimie Jusiñamui facaina lloraimadena, nie isoide naimiema jetade riñona niade uñnote. Naimiedi naiñaiño maraiñede rafuena finoraiñona uñnote. Iema naimie uñuamona, naiñaiñona jino raire orede. Naimiedi Jusiñamui facaina lloraimañede”. ⁴⁰ Jesús naimie comecina facajacinona uñuano, naimiemo llote:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damiemo quinientos diga ucubena fecade. Jiaimiemo cincuenta diga ucubena fecade. ⁴² Ie iade, naiena abido meidonidiaimaia. Ie jira ucubena fecadimiedi raite: “Dama omico meidoñega. Naiena jai feitaticue”. Ero, Simón, ¿nimeca ucubena fecadimiena eo isiruite?

⁴³ Simón dinena uai ote:

—Cue comeci raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

⁴⁴ Iemei Jesúdi riño dine dobaidajanona, Simómo llote:

—Biñaiñona ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote. ⁴⁵ Naiñaiño cue ecimo fo billanona, cue eillina diga icaiño llibanote. ⁴⁶ Naiñaiño cue eillimo soride rana totade. ⁴⁷ Naiñaiñomo eo jeacino ite; ia cuena naiñaiño eo isiruillamona, nana ie jeacinona jai oni dotajana uiñotica. “Jeacono cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiñomo llote:

—O jeacino jai oni dotaca. Iena jai feitaticue.

⁴⁹ Jiaíno nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riñomo llote:

—Cuena o inua jira, o jeacinomona jai jillodio. Mai uri o jaillano o i.

8

Dajerie riñoniai Jesúna canua rafue

¹ Ie facaise diga nairaímo Jesúdi mare rafuena llocana jaide. Naimie anamo comini illana Jusiñamui jitailla jira, Jesúdi Jusiñamui dibeiemo naimaci comeciai iuaina meiduana llofuate. Ie doce llofueoicaigano naimie diga jaidimaci. ² Dajerie riñoniai jiai jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate. ³ Juana ite. Naiñaiño inidi Chuza. Herodes railla illaíma ecimo naimie maijuide. Susana ite. Jiaie riñoniai jiai itimaci. Naiñaiñuai ramona Jesúna canouidimaci.

Jesúdi trigona judaidimiena llua rafue

(Mt 13.1-9; Mr 4.1-9)

⁴ Diga nairaiaimona ailluena comini Jesús dine billanona, naimacimo llote:

—Jusiñamui omoína sedaacana omoi fueollena, bie rafuena lloiticue. ⁵ Damiedi trigona judaiaide. Naimie judaiaimona naisomo janore iduai juide. Comini nainomo jaillano, iena saitadimaci. Bai jailla mei, silliníai iena jiai guisaibite. Ie jira sicoñede. ⁶ Nofiemo jiaie iduai juide. Sicode; iadedi jinui raise iñena jira, duide. ⁷ Eecuai illanomo jiaie iduai juide. Eecuai sicuamona, riara eecuai ibaica. Ie jira llisiñede. ⁸ Mare eniruemo jiaie iduai juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluomo cacarei. Iena ino.

Jesús ie como lloga rafuena llofuia rafue

(Mt 13.10-23; Mr 4.10-20)

⁹ Jesúmo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

¹⁰ Uai ote:

—Jusiñamuidi omoína ie sedaacana rafuena jai uiñotade. Jiaie iena uiñoñedomoi. Jiaie cominina iena nia uiñotañede. Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci iñoñena jira, uiñoñeno jaidimaci. Cue llofuiana jamai cacadimaci; iadedi naimaci iñoñena jira, raise cacañedimaci. Uiñoñedimaci.

¹¹ Omoína cue como lloga rafuena llofueiticue. Naie iduaidi Jusiñamui uai. ¹² Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina iñoi raillano, naimaci naiemona jilloi raillanona, Taife naimaci comeciaino cacaja uaina iñotañede. ¹³ Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feiñotimaci. Nofiemmo riga iduai jainaonidedi raise sicoñede. Naie comini janore iñua jira, ie isoidimaci. Dallu nano iñotimaci. Jusiñamui uai muidona duere naimaci sefua, abido danomo uaidimaci. ¹⁴ Jiaie iduai eecuai illanomo juide. Naie iduai sicua mei, iena eecuai ibaila jira, raise lliñede. Dajerie comini comeciai naie illano isoidimaci. Jusiñamui uaina cacadimaci. iñotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci. ¹⁵ Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciainona iñocana jaidimaci. Eo llide isoidimaci. Jusiñamui jitailla rafuena sefuiruiñeno iñocana jaidimaci.

Jesús ie rafue llocana jailla llua rafue

(Mr 4.21-25)

¹⁶ Jesús nia llote:

—Lamparín bu unia meinoconi, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainaca. ¹⁷ Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie iñotimaci. Damierie iñoñedimaci. ¹⁸ Cue lluomo raise cacarei. Iena omoi iñuamona, Jusiñamui omoína canoite. Omoína uiñocana jaitaite. “Jusiñamui rafuena uiñoticue” raitimiedi iñoñenia, Jusiñamui naimiena faifitaite.

Jesús dibeimo itinona ñaia rafue

(Mt 12.46-50; Mr 3.31-35)

¹⁹ Cominina Jesús nia llofua, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci. ²⁰ Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

²¹ Jesús uai ote:

—Jusiñamui uaina cacajamona, iena iñotino ieca cue eidi, cue amatiaidi.

Jesúdi jorai baguana lliicaitaja rafue

(Mt 8.23-27; Mr 4.35-41)

²² Jiairuido botemo Jesús jailla mei, ie llofueoicaiganomo llote:

—Ruica dibeimo mai cai jailli. —Ie mei jaidimaci. ²³ Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci. ²⁴ Jesúna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina lliicaitade. Ieconi aifi lliicaide. Bagoñede.

²⁵ Naimacimo jicanote:

—¿Bue ñellena cuena iñoñedomoi? —Naimiena jacinailamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina iñote. Jorai naimie uaina jiai iñote.

Jesúdi Gadara railla eniruemo illa rafue

(Mt 8.28-34; Mr 5.1-20)

²⁶ Ruica ðibellemo ridemo, Gadara railla eniruemo sijidimaci. Galilea facaisemo ite. ²⁷⁻²⁹ Botemona ari Jesús jaidemo, damie Jesús ðine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo nofie moto ifuaimo i-isoide. Ebena cominina naimie faei raillanona, lloeo ðiga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie ciuanona, cuiroide. Jesús ecimo uaide. Janaba naimiena ado llotatate: —Jesús, nanoca Jusiñamui Jitodio. ¿Niese cuena nibaiacadio? Cuena duere finoñeno.

Iese raite, Janaba naie iimamona oni jai oretajana Jesús llua jira. ³⁰ Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. ³¹ Jesúmo duere jicanoside, iraimo naimacina nia oretañellena. ³² Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús ðinena:

—Jee —raite. ³³ Iecon iimamona jaidemo, chanchuai abimo jaidimaci. Iena suidemo, iconi jillacimo joraimo chanchuai aisidimaci. Ðinomo corobaiside.

³⁴ Iena ciuanona, chanchuai sedaraini naimaci nairai ðine aisicana jaidimaci. Naie rafuena llocana jaidimaci. ³⁵ Ie jira ðiga comini jaide, naie rafuena raise fidillena. Jesús ðine naimaci ridemo, jaive Janaba anamo illamiena Jesús ecimo raillana ciodimaci. Naimie iniroina jai jitade. Naimie jai uairicoñede. Iena ciuanona, Jesúna jaciruitimaci. ³⁶ Naie rafuena ciodinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica ðibeimo abido jaillena. ³⁸ Iecon i jaive Janaba anamo illamie Jesús jicanote, naimie ðiga jaillena; iadedi Jesús raite:

—Dama ite. ³⁹ Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

Jesúdi mena duide riñona jillotaja rafue

(Mt 9.18-26; Mr 5.21-43)

⁴⁰ Ruica ðibeimo Jesús abido ria, naimie abido billemo naimaci ocuirilla jira, ailluena comini naimiena feiñotimaci. ⁴¹ Jairona mameciredimiedi Jesús ðine bite. Naimiedi judíuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote. ⁴² Ðañaiñode ie jisa. Doce años naiñaiñodi ite. Niadedi fiðaiacade. Ie jira Jesúmo jicanuaibite. Iena cacajano, naimie ðiga Jesús jaide. Ie llofueoicaigano jiai jaidimaci. Jesús jaillano, ðiga comini naimiemo ñaijisaide.

⁴³ Bai jaillanona, ðuidiñaiño Jesús jinafona jaide. Naiñaiño jeraimona doce años jaca ðiaide. Naiñaiño jaca buna jillotanide. ⁴⁴ Jinafo ðinena billanona, Jesús iniroi fueda jetade. Iemona ðiailladi fainonocaide. Jillode.

⁴⁵ Jesús ðinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicai.

Ie nabaiñiai ðiga Pedro ðinena raite:

—Maestro, ailluena comini o ecimo jaidimaci. Omo ñaijidimaci.

⁴⁶ Jesús uai ote:

—Damie cuena jetade. Cue abimona cue uai jaillamona, naimie jai jillode.

⁴⁷ Jaive ðuidiñaiñodi Jesús naiñaiño uinuana uiñote. Ie jira Jesús ðine jaciruicana bite. Naimie uicomo ana bitadajanona, nana comini uicomo naimiena jetaja rafuena llote. Naiñaiño iecon i jilluana llote. ⁴⁸ Jesús ðinena naiñaiño raite:

—Ñoo, cuena o iñua jira, jai jillodio. Mai jaillanona, uri o i.

⁴⁹ Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoñeno.

⁵⁰ Iena Jesús cacajano raite:

—O comeci jarire iñeno; ia cuena nia iino. Naiñaiño jilloite.

⁵¹ Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. ⁵² Nana nainomo itino eecuinaidimaci. Failliñaidimaci. Jesús dinena raite:

—Omoi eeñeno. Cuemona naiñaiñodi fiodaiñedesa. Jamai inide.

⁵³ Jai fiodaite: “¿Bue ñelli inide raitio?” raillanona jaisitimaci. ⁵⁴ Jesús fo jailla mei, naiñaiño onollina llinocaida, raite:

—Jitaibici, mai naidacai.

⁵⁵ Ieconí naiñaiño joreño abido bite. Naidacaide. Jesús llote:

—Guillena naiñaiño eca. ⁵⁶ —Naiñaiño moo, ie ei diga, rajicaidiaimaiai. Jesús iaimaiaimo llote:

—Bie rafuena bumó lloñeno.

9

Jesúdi ie llofueoicaiganona oretaja rafue

(Mt 10.5-15; Mr 6.7-13)

¹ Ie doce llofueoicaiganona naimie dine Jesús uaiduanona, naimacimo ie uaina iñonocai, jananiaina anamona cominina jilloitallena. Duicuaína oni oretallena, iena jiaí iñonocai. ² Naimacimo llote:

—Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie díbeimo omoi comeciai iuaina meido”. Duidinona jillota. ³ Omoi jaia, buena uiñeno. Omoi abina riidollena, jiguidana uiñeno. Ailluena rana omoi uiñellena, bolsana uiñeno. Llomenicono uiñeno. Ucubena uiñeno. Guille ifo meidollena, rana uiñeno. Meidolle iniroina uiñeno. ⁴ Nie nairaímo omoi jaia, daacomo omoi ri. Naie nairaímo omoi ille dinori, daacomo omoi i. ⁵ Omoína comini feiñoñenia, naimaci nairaímona omoi jaia, omoi eilliaímo ite jearacuaina oni jaidino. Nicino naimacimo illana naimaci uiñollena, omoi eilliaína oni jaidino.

⁶ Jesús naimacimo llua mei, jaidimaci. Jusiñamui rafuena lluanona, diga nairaímo jaidimaci. Diga comini imaci duicomona jillotatimaci.

Juan Bautista micori fiodailla rafue

(Mt 14.1-12; Mr 6.14-29)

⁷ Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede. ⁸ Jiaie comini raisoidimaci:

—Elías jai bairede.

Jiaíno raisoidimaci:

—Fiodaillamona Jusiñamui facaina jaie lloraíma micori jai jillode.

⁹ Jesúna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúna cioacade.

Jesús cinco mil iñiaína ecaja rafue

(Mt 14.13-21; Mr 6.30-44; Jn 6.1-14)

¹⁰ Jesús llofueoicaigano abido bia, Jesúmo naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide; ¹¹ iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúdi Jusiñamui díbeimo naimaci comeciai iuaina meiduaana llofuate. Duidinona jiaí jillotate.

¹² Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaiaimo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Dani caimo ite cinco llomeno mena lliciai diga. Nana naimaci guillena, ¿guille cai iballena nibai jitaideo?

¹⁴ Cinco mil iñiaia nainomo illa jira, ailluena guille jitaillana uiñotimaci. Naimaci ainiaia, imaci uruiaia diga, jiaia itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

¹⁵ Iena finodimaci. ¹⁶ Naie cinco llomenicono, naie mena lliciai diga Jesús uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. ¹⁷ Nana guillanona monidimaci. Monillanona, fiebide guillena iraidimaci. Doce cirigaiaimo oruitatimaci.

Pedro Jesúsna llua rafue

(Mt 16.13-19; Mr 8.27-29)

¹⁸ Jiairuido Jesús ie Momo jiaa facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

¹⁹ Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

²⁰ Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriaia o billena jaie llotimaci. Jusiñamui ona orede.

Jesús ie fiodaillena llofuia rafue

(Mt 16.20-28; Mr 8.30-9.1)

²¹ Jesús naimaci como llogacino bumo llua rairuide. ²² Llote:

—Cai judúuai illaicomini cuena eo duere finoitimaci. Cuena jitañellemona, cuena meineitimaci; iadedi darui amani illanona, fiodaillanona jilloiticue.

²³ Nana ie llofueoicaiganomo llote:

—Cue cominina bu jaiacania, ie jitaile rafuedo jaiñena. Cue díbeimo naimie jaillanona, duere sefuicana jaite. Nibai naiemona fiodaite. Bu iese jaiacania, cue díbeimo naimie iite. ²⁴ Duere sefuillana jaciruillanona cue cominina bu jaiacaiñenia, ja muidomo faifite; iadedi duere sefuillana jaciruiñenamonona cue cominina bu jaija, jaca faifiñeite.

²⁵ Cue cominina bu jaiñenia, nibai eo duere sefuñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite. ²⁶ Cuena bu meiruia, cue uaina bu meiruia, dane cue bia, naimiena meiruiticue. Cuena meiruillanona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisai siño uai isoi illanona, cue Moo dinena monamonona ico biiticue. Cue Moo uai cuemo illanona, ebire biiticue. ²⁷ Uanaicinona omoimo lloticue. Omoimona dajerie nia fiodaiñeitomoimo, illaimana cue bairellena cioitomoio.

Jesús abi meidocaila rafue

(Mt 17.1-8; Mr 9.2-8)

²⁸ Ocho digarui illanona, Jusiñamuimo jillena, anedumo Jesús jaide. Naimie diga jaillena, Pedrona uite. Juan jiaia uite. Jacobona jiaia uite. Jiaie llofueoicaiganona uiñede.

²⁹ Naimie jiamona naimie abi meidocaide. Naimie iniroi naie dacaño eo userecaide.

³⁰ Ieconni menamie bairiano, Jesús diga ñaitiaimaiaia. Moisés micori joreño ite. Elías jiaia ite. ³¹ Ebire bairediaimaiaia. Jesús Jerusalémo fiodaille rafuena ñaitimaci. ³² Ie facaiseconi

Pedro ie nabaiñiai diga jai inidimaci; ia casillamona, Jesús ebirenana cioidimaci. Jesús ecimo itiaimaiaia jiai cioidimaci. ³³ Iaimaiaia jaiacania, Pedro Jesúmo llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie. —Iese raite; ia ie ñaia rafuena raise uiñoñoeno jamai ebena ñaite.

³⁴ Iena naimie nia lluanona, uillie billamona, naimacina ibaide. Uillie ibaibillaconi jacinaitimaci. ³⁵ Uilliemona Jusiñamui naimacimo llote:

—Bimiedi cue jito. Naimiena fetodicue, cue jitaille rafue finollena. Naimie llua omoi cacareillanona, iena iino —llote.

³⁶ Jusiñamui llua mei, dama Jesúsna dane cioidimaci. Jesús diga itino naimaci ciua rafuena naie facaiseconi jaca bumo lloñedimaci.

Jesúdi Janaba anamo itimiena jillotaja rafue

(Mt 17.14-21; Mr 9.14-29)

³⁷ Ie areruido anedumona ana bitimacimo, ailluena comini naimacimo dafaifide. ³⁸ Cominimona damie ado llote:

—Maestro, cue dajede cue jito duillana jibuisaibi. ³⁹ Janaba naimie anamo illamona, cue jito cuiritate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede. ⁴⁰ Janabana oni oretallena, o llofueoicaiganomo jicanoticue; ia oretanidimaci.

⁴¹ Iena cacajanona, Jesús ie llofueoicaiganomo llote:

—Cue uai siñonana nia iinoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi iinollena, ¿nie dinori omoi diga iticue? —Naie duidimie moomo llote—, O jito cue dine mai ati.

⁴² Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconia naie urue jillode. Iemei Jesús ie moomo naimiena fecade. ⁴³ Comini iena ciuanona, Jusiñamui siño uai naimiemo illari rajicaidimaci.

Jesús ie fiodaillena dane llofuia rafue

(Mt 17.22-23; Mr 9.30-32)

Naimaci nia rajicaia, Jesús ie llofueoicaiganomo llote:

⁴⁴ —Cue llua feitañoeno. Monamona billanona, imana jaidicue; ia Jusiñamui jitailla jira, jairuido illaicomini cuena meineitimaci.

⁴⁵ Jesús llua raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiai meiruitimaci.

Jesús ie llofueoicaigano moto imiena ille rafue

(Mt 18.1-5; Mr 9.33-37)

⁴⁶ Ie facaise Jesús llofueoicaigano conini uaitajanona raitimaci:

—¿Bu cai moto imiena ille?

⁴⁷ Jesús naimaci comeciaia facajacinona uiñuamona, nainomo ite cominimona daje urue bai jainanocaida, naimaci motomo naimiena jonete. ⁴⁸ Raite:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imiena ille.

Jesúdi ie dibeimo itinona llua rafue

(Mr 9.38-40)

⁴⁹ Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena cioidicai. Cai diga naimie jaicabiñena jira, iena finuana rairuidicai.

⁵⁰ Jesús dinena uai ote:

—Naimiena rairuiñoeno. Cai dibeimo itimiedi cai facaisena ite. Ie jira naimie isoidinona rairuiñoeno.

Jesús dinena Jacobo, Juan iaimaiaia lletaja rafue

⁵¹ Monamo abido Jesús jaillirui iairei ia, Jerusalémo jaiacanamo naimie comecina facade. ⁵² Ie jira dajeriena uicodo oretate. Ie inillinona jenollena, Samaria railla nairaimo jaidimaci; ⁵³ iadedi Jerusalémo naimaci jailla jira, judúuaiñedinona samaritanodi gaiñena jira, Jesús llofueoicaiganona feñoiacaiñedimaci. ⁵⁴ Iena fidiana, Jacobo, Juan diga, Jesúsimo jicanotiiaimaia:

—Nama, ¿bie comini jobaillena, monamona irai billena Jusiñamuimo coco jicanuana jitaideo?

⁵⁵ Iaimaiaimo eruailanona, Jesús dinena iaiaimaiaimo riire lletade:

—Dama ite. Iena jitañedicue.

⁵⁶ Ie mei inillena jiaie illanomo jaidimaci.

*Jesús ie llofuegami*ena damie jaillena ie rafue

(Mt 8.19-22)

⁵⁷ Naisona ie llofuecaigano diga, Jesús oni jaillanona, Jesúsimo damie llote:

—O jaillinomo o diga jaiacadicue. O llofuegami jaiacadicue.

⁵⁸ Jesús uai ote:

—Janorede ocainaiadi joforedimaci. Silliñiai jillainiairedimaci; iadedi jofonidicue. Monamona billanona, imana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comecina raise faca.

⁵⁹ Jiaimie Jesús llote:

—Cue llofuegami o jaillena, cue diga mai bi.

Naimie uai ote:

—O diga jaiticue; ia cue moo nia fioidañena jira, o diga nia jaiñeiticue.

⁶⁰ Jesús naimie dane llote:

—Dama ite. Cue diga mai bi. Cuena inoñedinodi o moona canoredimaci. Naimie fioidaia, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie dibeimo naimaci comeciai uaina meiduana llocana cue diga mai o bi.

⁶¹ Jiaimie Jesúsimo llote:

—O llofuegami jaiacadicue: iadedi cue jofomo nano jaiacadicue, cue cominina facadollena.

⁶² Jesús uai ote:

—Cue llogami jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

10

*Ie rafuena lollena, Jesús setenta digami*ena oretaja rafue

¹ Ie llofueganona llofua mei, naimacimona Jesús setenta digamiena fetode. Naga naimie jaiacana nairaimo menamieriena oretate. ² Naimacimo llote:

—Diga comini ite, naimacina Jusiñamui rafuena inotallena; iadedi eo janore lloraini ite. Jusiñamuimo jicano, jiaie llorainina naimie oretallena. ³ Mai jai; iadedi abi rairuicana jai. Toica lladaiaia janallari illanomo illa isoi, omoina oredicue. ⁴ Ucubena uiñeno. Ailluena rana omoi uiñellena, bolsana uiñeno. Meidolle zapatona uiñeno. Naisomo bu omoimo dafaifia, are ñañeno. ⁵ Bu ie jofomo omoi ria, jofomo itinomo marena uaido. ⁶ Nainomo maremie ia, o uaina fairioite. Maremie inenia, o uaina fairioñenia: “Jusiñamui ona canoite” naimie lloñeno. ⁷ Nie nairaimo omoi ria, dacomo omoi ri. Omoi ecalle rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno. ⁸ Nie nairai omoi ria, omoina naimaci feñoia, omoi ecalle rana uaitañeno guiño. ⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie dibeimo omoi comeciai uaina meido”. ¹⁰ Nie nairaimo omoi ria, omoina naimaci feñoñenia, ie naiso motomo jaillanona llono: ¹¹ “Omoi naisomo cai eillimo ite jearacuai jai jaidinoticaia, marañede rafue omoimo illana omoi uiñollena. Jusiñamui omoina sedaacade; ia iena jitañedomoi” llono. ¹² Sodoma nairai jiaie eo marañede. Jusiñamui iena jiaie fuidode; ia nana comini

naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

Jesús ie ñinoñedinona llua rafue
(Mt 11.20-24)

¹³ Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi ñinoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotaillamona, naimaci comeciai uai meidotimaci. Naimaci comeciai uai meiduana jiaie comini uiñotallena, ebinide iniroina jitajanona, jusefo naimaci ifogiaimo jonetimaci. ¹⁴ Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. ¹⁵ Capernaumo itino jiai duere sefuitimaci. Birui abina iedoiacadimaci; iadedi jiairuido sure iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci. ¹⁶ Omoi llua naimaci cacaacania, cuena cacadimaci. Omoi llua naimaci jitaiñenia, cuena jitaiñedimaci. Cuena jitaiñedinodi cuena oretagamiena jiai jitaiñedimaci. —Jesús naie fetocanomo iese llua mei, oni jaidimaci.

Ie setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana cidicue. Iemona cue uai naimie uai baifemo faiana uiñoticue. ¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue díbeimo iñedino omoi anamo jai itataticue. Omoina niese nibaiñeitimaci; ²⁰ iadedi omoi uaina jananiai ñnua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

Jesús ie Moo diga ñaia rafue
(Mt 11.25-27; 13.16-17)

²¹ Ie facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotina bie isoide rafuena uiñotañedio; iadedi jamai bue isoidinona iena uiñotadio. O jitailla jira, iese uiñotadio. Ie jira iobillacinona omo feaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoina naimiena uiñotadicue. Ie muidona naimiena uiñotomoi.

²³ Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci. ²⁴ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioiñedimaci. Iena cacaacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioiñedimaci. Iena cacaacadimaci; iadedi cacaiñedimaci.

Jesús cai ecimo itimierna isiruillana llua rafue

²⁵ Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Niese Moisés micori llogacinuai iena raite?

²⁷ Uai ote:

—Moisés micori jaie cuela: “O jitailla jira, o comecina facajamona, cai Nama Jusiñamuina nana o comeci jitaillamona naimiena eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoia, Jusiñamui illanomo jaca iitio.

²⁹ Naie llofueraima Jesúmo dane jicanote:

—¿Bu cue ecimo itino?

³⁰ Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiena fatimaci. Niade ie meinianona ie ecimona jaisite. ³¹ Dallu illanona, Jusiñamui diga ñairaima naie naisona jaide. Fagamiena ciode; iadedi ecido jaide. ³² Dallu illanona, Jusiñamui jofomo maijiraima jiai jaide. Fagamiena ciuanona, ecido jiai jaide. ³³ Ja muidomo Samaria nairai imie jaide. Naie nairaina enoidomoi. Fagamiena naimie ciuanona, naimiena duenaitie. Iemona naimie canoacade. ³⁴ Naimie dine jaillano, ie bofellañona manode. Jiai maitade. Ie burro emodomo jonecaida, naimiena uite. Inillinomo rilla mei, nainomo naimiena sedade. ³⁵ Ie areruido ie inia jofo namamo janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide.

³⁶ —Naie llofueraimamo Jesús dinena jicanote— ¿Fagamie ecimo itimiedi bu?

³⁷ Uai ote:

—Fagamiena duenaitimie.

Jesús raite:

—Jai raise uiñotio. Mai jai. Ie isoi finocana o jai.

Jesúdi Marta iaiñuai María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta railañaiño ie jofomo naimiena feiñote. ³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacareillena; ⁴⁰ iadedi Martamo maijille eo illa jira, naiñaiño naimie llofuiacinona cacarefiñede. Ie jira Jesúmo llote:

—Nama, cue euiño cuena canoacaiñena jira, daño maijidicue. “O euiño cano” naiñaiño lono.

⁴¹ Jesús uai ote:

—Ero, Marta, jarire itio. Diga o ramo comequina facadio; ia Jusiñamui rafuemo comequina faca. ⁴² María iemo comequina jai facade. Naiñaiño cue llofuiana nano cacaiacade. Ona canollena naiñaiño lloñeiticue.

11

Jusiñamuimo Jesús jia rafue

(Mt 6.9-15; 7.7-11)

¹ Jiairuido ie Moo diga Jesús ñaia, ie llofueganomona damie naimiemo llote:

—Nama, jiaana caina llofue, ie llofueoicaiganona Juan Bautista micori llofui isoi.

² Jesús uai ote:

—Omoi jiaia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisaí o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jiaño finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai inoñellena.

⁵ Iena naimacina nia llofuellena, Jesús jiaie rafuena llote:

—Naiona mona moto llomenicono jicallena, o nabai dine o jaia, ado lloitio: “Nabai, daje amani llomenicono jitaidicue. ⁶ Jiaie nabai cue jofomo como ride. Jaca cuemo buedi iñede, naimiena cue ecallena”. ⁷ Ie jofo jeraimona o nabai fairioite: “Cuena uaidoñeno. Cue nasedi jai cue ibaicasa. Cue uruiaí jai inidimaci. Jiai inidicue. Llomenicono omo fecallena casiacañedicue”. ⁸ Ja muidomo casillano, omo iena fecaite. Ie nabaina o illa jira, fecañeite; iadedi o eo jitailla jira, o jitailla rana fecaite. ⁹⁻¹⁰ Daje ra omoi faifia,

iena jenodomoï. Raise jenoia, iena baitomoï. Damiena omoï jenoia, naimie illanomo jaidomoï. Nainomo naimiena baillamona, omoïna feiñoite. Ie isoide. Buena omoï jitaia, Jusiñamuimo jica. Iena omoï jicaja jira, iena naimie cacajamona, omoïmo iite.

¹¹ 'Ero, omoïmona ie moomo llomeniconna ie jito jicaia, noficina fecañede. Lliciaïna jicaia, jaïona fecañede. ¹² Jigina jicaia, acaïdonna fecañede. ¹³ Jeacïnna finocabidomoï; iadedi omoï uruiaïmo mare rana fecacabillana uiñotomoï. Cai Moo Jusiñamui jaca mareuidimie. Cai baïfemo naimie faite. Ie muidomo naimacina canollena, naimiemo jicadinomo ie Joreñona itataite.

Comini Jesúna jeare ñaia rafue

(Mt 12.22-30; Mr 3.19-27)

¹⁴ Jiaïruido Janaba anamo illamiemona Jesús Janabana oni orede. Janabana nia oretañenia, Janaba anamo naimie illamona, naie ñima ñainide. Janaba oni jailla mei, naimie ñaite. Ie jira comini rajicaidimaci; ¹⁵ iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

¹⁶ Jiaïno naimiena facaciacasite. Raitimaci:

—Siño uai omo ia, Jusiñamuina siño rafuena finota.

¹⁷ Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danomo maijinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci. ¹⁸ Ie isoide. Beelzebú uaido jananiaina, omoï llua isoi, cue oretaia, Janaba ie ðibeimo itino ðiga jai nabairiñede. Iemona naimie comini danomo iñeitimaci. ¹⁹ Omoï comini jananiaina oni oretacabitimaci; iadedi naimaci finoca rafuena uaitañedomoï. Naimacimo jicano, bie isoide rafuena omoï raise uiñollena. Iemei cue finoca rafuena uaitañeitomoï.

²⁰⁻²² 'Jiaie rafuedo iena lloiticue. Ero, ie rana raise riidamona, mairidimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana finide; iadedi naimie baïfemo mairidimie bia, naimiena emodofillamona, ie rana fiñede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaia, Jusiñamui rafuena cue llua uiñotomoï.

²³ 'Cue ðibeimo iñedimie cuena enoide. Cue ðibeimo cominina itatañedimiedi naie cominina cuena iñotañede.

Janaba anamo illamie rafue

(Mt 12.43-45)

²⁴ Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiemona Janaba oni jaia, jiaie illanona baïllena, jofue iñenanomo jaide; iade baiñede. Baiñena jira, naimie comecina facade: “Navui cue anamo illamie ðine abido jaiticue”. ²⁵ Abido naimie bia, naie ñima comeci namanidena naimie baite. ²⁶ Iemei oni jaïllanona, jiaie siete jananiaina naimie ðiga atide, naimaci anamo naie ñima illena. Naie siete jananiaina naimie baïfemo maraiñedimaci. Iemona naie ñima eo fodo jaide. Ie isoide birui ite maraiñede comini. Cue rafue naimaci iñonoñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona ðañaiño Jesúsomo llote:

—O ei caïmare illesa. Naiñaiñomona comuidio. Naiñaiño monoï jirodio. Naiñaiño caïmare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena iñnuamona, jiaïno eo caïmare iitimaci.

Dajerie Jesús siño rafuena finuana jitailla rafue

(Mt 12.38-42; Mr 8.12)

²⁹ Ie facaise diga comini Jesús dine biñoidimaci. Naimacimo llote:

—Birui ite cominidomoi marañedomoi. Siño rafuena cue finuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micorí jaie ite rafuena uiñotomoi. Naiemo omoi comeciaina omoi faca. ³⁰ Naimiemo suide rafuemona Nínive railla nairaidi Jusiñamui naimiema oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñoitimaci. ³¹ Ero, Saba railla nairai ie illaiño micoridi Salomón micorí dine jaie aarena jaide. Naimie micorí uiñuacinona naiñaiño micorí cacareillena, aarena jaide. Salomón micorí baifemo birui uaidicue; iadedi cuena iñoñedomoi. Omoi comeciái icinuaina birui omoi meidoñena jira, Jusiñamui uicomo nana comini ille facaiseconi naiñaiño micorí omoína ico ñaite: “Naimiedi siño rafue finuana ciodomoi. ¿Bue ñellena naimiema iñoñedomoi?” omoína ico ñaite. ³² Lliciaí jeraimona naimie jillua mei, Nínive railla nairai dine Jonás micorí jaide. Nainomo Jusiñamui rafuena llote. Naie comini iena cacajano, naimaci comeciái icinuaina meidotimaci. Cue rafuena omoi cacajamona, omoi comeciái icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomoi” omoína raiñeiticue. Jonás micorí baifemo birui uaidicue; iadedi cuena iñoñedomoi.

Jesús comini illa rafue

(Mt 5.15; 6.22-23)

³³ Jesús llote:

—Lamparín bu unia mei, jofo anamo bainino rainañega. Cirigai anamo rainañega. Ie rairanomo rainaca, comini nainomo bia, jofo jerai lligaiñollena. ³⁴ Omoi uisi diga rana ciodomoi. Omoi uisi marañenia, rana raise cioñedomoi. Ie isoide. Omoi comeci marañenia, marañedicinona finocana jaidomoi. Jusiñamuina uiñoñedomoi. Ie rafuena jiai uiñoñedomoi. ³⁵ Ie jira omoi comeciaina raise fino, cue rafuena omoi raise iñollena. ³⁶ Nana omoi comeciái marena ia, cue rafuena iñocana jaitomoi. Iena raise uiñoitomoi. Jofomo lamparín raise lligaiñua isoi, cue rafuena raise uiñoitomoi.

Jesúdi judíuai illaicominina ñaia rafue

(Mt 23.1-36; Mr 12.38-40; Lc 20.45-47)

³⁷ Cominina Jesús llofuia mei, daje fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide. ³⁸ Naimie nia guiñenia, naimaci einamaci llogacinodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comeciña facade: “Naimie eo mare llofueraima. ¿Niese cai einamaci llogacinodo jaiñede?” ³⁹ Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciái jearede. ⁴⁰ Abi uiñoñedomoi. Jusiñamui omoi abiaína omoi comeciái diga finode. Omoi finoca rafuena uiñote. Omoi comeciaina facajacinona jiai uiñote. ⁴¹ Omoi comeciái marena ia, jiaie cominina canodomoi. Iemona Jusiñamuimona omoi abi jiai mare. ⁴² Fariseuai, omoimo rafuena lloiticue. Nana omoi illimo ite ramona Jusiñamuimo janore jisa feca-fecacabidomoi; iadedi jiaie cominimo mare rafuena raise finoñedomoi. Jusiñamuina jiai raise isiruiñedomoi. Nana naie isoide rafuena omoi jiai finua. ⁴³ Comini omoiri acarillena, ofiracomo uicomo raíacadomoi. Nine omoi macaria: “Jamai bue isoñedicai” omoi comeciaina facajamona, jiaie comini omoína uaiduana gaídomoi. Iese omoi jailla jira, Jusiñamui omoína duere finoite. ⁴⁴ “Bainino ite raírafo emodomo comini uiñoñoeno macarillamona, naimaci abi jai jearede” raitomoi. Bainino ite raírafo isoidomoi. Omoi diga jiaie cominidi omoimo ite jeacinona uiñoñoeno nabairillamona, jeacinona jiai finodimaci. Iese omoi finocana jaia, Jusiñamui omoína duere finoite.

⁴⁵ Naie facaise Moisés llogacinuaina llofueraimimona damie Jesúmo llote:

—Iese o lloia: “Jeacono finodomoi” caina jiai llotio.

⁴⁶ Jesús uai ote:

—Jusiñamuimona jiai duere sefuitomoi. Omoi einamací llogacinuaido raise naimací jaillena, diga rafue comini finuana jitaídomoi; iadedi iedo naimací raise jaillena, naimacina jaca canoñedomoi. “Jusiñamuina eo raise sedadicaí” comecina facadomoi. ⁴⁷ Omoi jaiagaidi Jusiñamui facaina llorainina meinetimaci. Naie lloraini micoriai raiafuaí birui marena finodomoi; ⁴⁸ iadedi naimací micoriai llogacinuaido omoi birui jiai jaiñena jira, omoi jaiagai finoca radi: “Mare” raitomoi. Jusiñamui rafuedo birui omoi raise jaiñena jira, omoi jaiagai isoi itomoi. Iese omoi jailla jira, Jusiñamui omoína duere finoite. ⁴⁹ Omoína Jusiñamui abi uiñuamona jai llote: “Cue rafuena llollena, naimací dine cue facaina llorainina oretaiticue. Cue rafuena eo uiñotínona jiai oretaiticue. Dajeriena meinetimaci. Jiainona duere finoitimaci”. ⁵⁰ Enirue finua facaisemona ailluena Jusiñamui facaina llorainina meinetimaci. Omoimona Jusiñamui iba oite. ⁵¹ Abel micori jaie ite. Ie ama naimiema meinete. Naimie facaisemona omoi jaiagaidi diga llorainina meinetimaci. Zacaríana jiai meinetimaci. Jusiñamui jofomo Jusiñamuimo toica ocaina jobaisoillano motomo naimiema meinetimaci. Omoimona Jusiñamui birui iba oite. ⁵² Omoi llofuiamona comini Jusiñamui rafuena uiñoñedimaci. Jusiñamui rafuena raise uiñoñedomoi. Jiaino iena raise uiñuana jitaíñedomoi. Iese omoi jailla jira, Jusiñamui omoína duere finoite.

⁵³ Fariseo jofomona Jesús jailla mei, fariseuai comini icirillamona, Jesús digá rafuena jicanotimaci, naimie uaina uaitallena. Moisés micori llogacino llofueraini daje isoi uai uaitatimaci. ⁵⁴ Naimie raise uai oñedena, naimiema duere finoacadimaci.

12

Jesúdi mareuidinona abi caitadinona llofuiá rafue

¹ Ie facaiseconi eo ailluena comini Jesús dine ofidimaci. Ailluena illa jira, conini eilliaimo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicaí” raitimaci; iadedi mareuidinona abi caitadimaci. Naimacimona abina rairui. ² Naimací birui finoca rafuena birui bainino finodimaci; ia Jusiñamui naimací comeciaí iticinona ico uiñotaite. ³ Ero, cue rafuena birui anado llocana jaidomoi; ia ico marefodo iena llocana jaitomoi.

Jesúdi jaciruiñeno llofuiá rafue

(Mt 10.28-31)

⁴ Ie llofueganomo Jesús llote:

—Cue nabaiñiaídomoi. Omoína meineiacadinona jaciruiñeno. Omoi abina meineredimaci; ie iadedi omoi joreña meinenidimaci. Omoína naimací meinia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. ⁵ Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiema jacirui. ⁶ Ero, dabecuiro janorede sillina fecadomoina, eo janore ibaca. Silliñiaí eo janore raifide; iadedi Jusiñamui naimací illana uiñote. ⁷ Ero, niga ifotirai omoimo illana Jusiñamui jiai uiñote. Naimiedi omoína sedajana jiai uiñote. Silliñiaí baifemo Jusiñamui isiruigaomoi. Omoi duere finoacadinona jaciruiñeno. Jusiñamui jitaíñenia, omoimo jaca buena suiñeite.

Jesús naimiema janoñenana llofuiá rafue

(Mt 10.32-33; 12.32; 10.19-20)

⁸ Ie llofueoicaiganomo Jesús nia llote:

—Cue rafuena omoi llouamona, jiaino omoína duere finoitimaci. Cuená birui omoi janoñenia, nana comini Jusiñamui jaienisai uicomo ico ia, nainomo omoína janoñeiticue. “Cue cominidomoi” omoína raiticue. ⁹ Cuená birui omoi janoia, nana comini Jusiñamui jaienisai uicomo ico ia, nainomo omoína janoiticue. “Cue cominiñedomoi” omoína raiticue. ¹⁰ Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreña jeare ñaitimie jeacinona feitañeite. ¹¹ Cue rafuena omoi llua muidona, duere sefuitomoi. Illacomini dine omoína llogidollena comini uia, omoi abi

riidollicinomo omoi começiaina jarire facañeno. ¹² Naie facaiseconi Jusiñamui Joreño omoi abi riidollicinona uiñotaite.

Jesúdi raruiai eo uamona abi rairuillana llofuia rafue

¹³ Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi.

¹⁶ Iena omoi raise uiñollena, jiaie rafuedo iena lloiticue. Ucuberedimiedi ie illimona ailluena rana ote. ¹⁷ Ie jira comecina facade: “Cue illimona ailluena rana oticue; iadedi ¿ninomo iena eenoiticue? ¹⁸ Birui cuemo ite eenoracona judaiticue. Ie mei aillue eenoracona finoiticue. Nainomo cue rana eenoiticue”. ¹⁹ Ie comecina facaite: “Cuemo ailluena ra jai ite. Diga años nia iiticue. Jamai iiticue. Marena guiticue. Caimare iiticue”. ²⁰ Iese comecina facade; iadedi Jusiñamui naimiemo llote: “Abi uiñoñedio. Cue llua jira, ja naiona fiodaitio. Ie mei omo ite ra omo fiebiñeite”. ²¹ Dama ramo ie comecina bu facaia, Jusiñamui jitaillacinomo ie comecina bu facañenia, faifite.

Jesúdi Jusiñamui cai sedajana llua rafue

(Mt 6.25-34)

²² Ie llofueoicaiganomo Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. ²³ Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite. ²⁴ Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faia jira, naimie omoina canoite. ²⁵ Omoimona, ¿bu ie comeci jarire facajamona a sairite? Iese jaca buna a sairíñede. Dama Jusiñamui omoina a sairitarede. ²⁶ Omoi começiaina facajamona omoi a sairíñena jira, jiaie ramo omoi começiaina jarire finoñeno. ²⁷ Safiamo omoi começiaina faca. ¿Niese sicodimaci? Maijiñedimaci. Iniroina tiforiñedimaci; iadedi Salomón micori naimaci isoi jaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. ²⁸ Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ñno. Jusiñamuina eo janore ñnotomoi. ²⁹ Omoi começiaina jarire icana jaiñeno. “¿Buena guiticaí?” raiñeno. Iemo começiaina eo facañeno. ³⁰ Jusiñamuina ñnoñedino iemo comecina facacabidimaci. Nana omoi jitaillacinona omoi Moo Jusiñamuidi uiñua jira, naimaci isoi iñeno. ³¹ Jusiñamui jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jiaí iite.

Jesúdi Jusiñamuimo comecina facaja rafue

(Mt 6.19-21)

³² Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoina itatajamona, omoina sedaite. ³³ Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Fíiriraima nainomo jaiñede. Giireco nainomo jiaí iñede. ³⁴ Aillue ra omoimo ia, Jusiñamuimo começiaina facañedomoi; iadedi naimie jitaillacinona omoi finoiá, naimiemo começiaina facadomoi.

Jesús ie abido billemo ocurillana llofuia rafue

³⁵⁻³⁸ Jesús nia llofuee:

—Monamona ico cue abido billemo ocuri. Iena omoi raise cacaillena, bie rafuedo iena lloiticue. Damie ie nabai ie ai ua rafue dine naiona jaide. Ie mullaiaia naimie abido billemo ocurillana ocuide. Naimie billemo naimaci raise ocuria, iniroina jítajanona, lamparínai unianona, ocuritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci iniñeno ocuria, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uiñoñena jira, jaca ocuricana naimaci illa. ³⁹ Ero, firiraima bille facaiseconi jofo namadi uiñotena, nia caadote, ie ra faifi raillanona. ⁴⁰ Monamona ico abido biiticue. Omoi ocuriñena facaisemo biiticue. Ie jira cue billemo raise ocuri.

Jesúdi patrón ie mullaimana ie jofona sedataja llua rafue

(Mt 24.45-51)

⁴¹ Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

⁴² Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiaina sedallena. Naimacina sedajanona, naimie naimacina jiai ecade. ⁴³ Ie mei patrón oni jaide. Jofomo abido naimie bia, ie nanoca mullaima raise maijiana fidiia, naimiena raise ibaite. ⁴⁴ Iobillamona, nana ie raruiaina sedataite; ⁴⁵ iadedi naie mullaima maraiñenia, comecina facaite: “Cue patrón are biñeite. Jiaie rafuena finoiticue”. Ie comecina iese facaja jira, naimie anamo ite mullaiaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. ⁴⁶ Ie ocuriñena facaise ie patrón abido billanona, naimiena meinetaite. Ie uaina iñoñedino isoi, duere finoite. ⁴⁷ Naie mullaima ie patrón jitailla rafuena finuana uiñote; iadedi iena finoñede. Ie jira eo duere sefuite; ⁴⁸ iadedi maraiñede rafuena raise uiñoñeno jiaie mullaima finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

Jesús muidona nana comini uri iñena rafue

(Mt 10.34-36)

⁴⁹ Jesús llote:

—Cuen a naimaci inollena, eniruemo comini dine biticue. Cuen dajerie inuamona, cue cominina jaitimaci. Cuen jiaino inoñenamona, cue cominina jaiñeitimaci. Iemona cominina duere finoiticue. Cue maijia raire fuiduana jitaidicue. ⁵⁰ Cue nia eo duere sefuiticue. Iena raire suillena jitaidicue. ⁵¹ Nana cominina uri itatallena eniruemo biñedicue. Cuen inoñedinodi cuena inotinona enoitimaci. Enoillamona, cuena inotinona duere finoitimaci. ⁵² Cue billamona, daje jofomo itino diese danomo iñeitimaci. Dabecuiro comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite. ⁵³ Cue lloga rafuena damierie inua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie mio dibeimo ie jifaiño iñeite. Iese cominina uri itatañedicue.

Jesúdi monamo ite rana llofuia rafue

(Mt 5.25-26; 16.1-4; Mr 8.11-13)

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide. ⁵⁵ Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite. ⁵⁶ Abina uiñotinona abi caitadinodomo. Monamo eruailamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi. ⁵⁷ Iemo omoi comeciaina raise facañedomoi. ⁵⁸ Ero, omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina jonetaite. ⁵⁹ Nana raise ibañenia, juez

llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

13

Jesúdi comeciai iuai meiduana dana llua rafue

¹ Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori soldaduaina orede, naie cominina fallena.

² Jesús uai ote:

—¿Niese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi. ³ Iese omoi comeciaina facañeno; ia omoi comeciai iuai meiduoamo comeciaina faca. Omoi comeciai iuai omoi meidoñenia, omoidi jiai faifitomoi. ⁴ Siloé railla tidacana navui ana goillamo, dieciocho digamie saitabidimaci. Iena fididomoi. ¿Niese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi. ⁵ Iese omoi comeciaina facañeno; ia omoi comeciai iuai meiduoamo comeciaina faca. Omoi comeciai iuai omoi meidoñenia, omoidi jiai faifitomoi.

Jesúdi ie Moo comini comeciai iuai meiduoamo fecuise ocurilla llua rafue

⁶ Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede. ⁷ Ie jira ie illina sedaraimamo llote: “Ero, daje amani años bisoidicue, riarana ollena. Nia llisiñede. Iena mai tie. Naie illanomo jiaie riarana coco rillesa”. ⁸ Ie illina sedaraima uai ote: “Dama ite. Daje año nia seda. Riarana abina caigiiticue. Eniruena caimaretaiticue. ⁹ Jiaie año llisia, mare. Llisiñenia, iena tieiticoco”. Ie isoide. Jusiñamui omoi comeciai iuai meiduoamo are ocurite; ia meidoñenia, omoina duere finoite.

Jesúdi jicaidiñaiñona jillotaja rafue

¹⁰ Jiairuido sábadoruimo judíuai ofiracomo Jesús llofuate. ¹¹ Nainomo duidiñaiñodi ite. Janaba anamo naiñaiño illa jira, naiñaiño jicaide. Atona naidainide. ¹² Naiñaiñoa Jesús cianona, naiñaiño lote:

—Ñoo, o duicomona jai jillodio. ¹³ —Ie mei naiñaiñoa jetade. Ieconí naiñaiño atona naidadate. Ie jira Jusiñamuimo iobillacinona fecade. ¹⁴ Naie ofiraco sedaraima icirite, sábadoruimo Jesús naiñaiñoa jillotaja jira. Nainomo itinomo llote:

—Seis digarui ite majjillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo majjinedicai.

¹⁵ Jesús uai ote:

—Majjinedinona abi caitadinodomoí. Sábado iruimo majjicabidomoí. Sábado iruimo omoi toiniaina imaci illanomona suiñodomoí, jinui illanomo naimaci jiruaillena. Naie isoide majjia omoimona mare. ¹⁶ Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñoa canollena, sábadoruimo naiñaiñoa Taife anamona cue jillotaia, cuemona mare.

¹⁷ Iena Jesús llumona, nana naimie díbeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue

(Mt 13.31-32; Mr 4.30-32)

¹⁸ Jesús jiaie rafuena llote:

—Jusiñamui díbeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. ¹⁹ Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo aillue riaradi sicode. Ailluena jira, nainomo sillíñai jicaiciaina finodimaci.

Jesús siritate rana llofuia rafue
(Mt 13.33)

²⁰ Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue.

²¹ Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

Jesúdi Jusiñamui dine rille llua rafue
(Mt 7.13-14, 21-23)

²² Jesús diga nairaimo llofuecana jaide. Jerusalén dine jaide. ²³ Jesús oni jaillanona, damie naimiemo jicanote:

—Nama, ¿niga comini o uaina iinoitimaci? —Jesús uai ote:

²⁴ —Monamo cue Moo dine jaille nasedi janorede isoide. Naie nasedo lliicana o jai. Ailluena comini naiedo jaiacanitimaci; iadedi fo jainitimaci. ²⁵ Naie jofo nama nase ibaila mei, ¿niese fo jaitomoi? Jino naidaiillamona, nasena tutajanona, raitomoi: “Nama, o nase econo”. Naimie uai oite: “Omoina uiñoñedicue”. ²⁶ Dane lloitomoi: “O diga navui guiticai. Cai illanomo llofuetio”; ²⁷ iadedi naimie uai oite: “Omoina uiñoñedicue. Cue cominiñedomoi. Jeacino omoi comecimo nia illa jira, mai jai”. ²⁸ Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micoriaina cioitomoi; ia omoi jino illamona, duere sefuillamona, eitomoi. ²⁹ Diga comini Jusiñamui illanomo iitimaci. Ailluena judúuaiñedino naga nairaimona Jusiñamui illanomo biitimaci. Nainomo coninina caimare nabaitimaci. ³⁰ Naga nairaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoñeno cuena inocana omoi jailla.

Jesús Jerusalémo itinomo llua rafue
(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaima Herodes ona meineiacade.

³² Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecabidicue. Duidinona jillotacabiticue. Birui siño rafuena finocabidicue. Ico iese nia finoiticue. Iese cue maijille fuite. ³³ Nia oni jaiticue. Ailluena Jusiñamui facaina lloraini micoriai nainomo jai fiodailla isoi, Jerusalémo cue rafue jiai raire fuite” llono.

³⁴ Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruai sedaja isoi, diga icaiño cue anamo omoina uaidoiacadicue; iadedi omoi dinena cuena jitaiñedomoi. ³⁵ Iemona Jusiñamuidi omoi illanona jai faionocaide. Cue Moo dine jaiticue. Cue jailla mei, cuena cioiñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

14

Jesúdi abina siridimiena jillotaja rafue

¹ Jiairuido sábadoruimo Jesúdi fariseo imie jofomo guisaide. Naie fariseo imiedi illaicomini. Nainomo itino Jesúmo eo eruaidimaci. ² Guille facaise naie jofomo duidimie bite. Naimie abina siridimie. ³ Nainomo itinomona damieriedi fariseuai comini. Moisés micori llogacinuaina llofueraini jiai itimaci. Naimacimo Jesús jicanote:

—Sábadoruimo comena cue jillotaia, ¿omoimona jeacino finodicue? ¿Niese Moisés micori llogacinuai iena llote?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede. ⁵ Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare. Bimiena cue jillotaja jira, ¿niese cuena jeare ñaitomoi? ⁶ Iena cacajanona, uainicaidimaci.

Jesúdi guillena uaidoganona llua rafue

⁷ Jesúdi naimaci guisaibillana ciode. Jiaino baifemo illena, jofu nama abimo nana raiacadimaci. Iena ciuamona, naimacimo Jesús rafuena llofuede:

⁸ —Rafue dine guillena omoína bu uaidoia, jofu nama abimo raiñeno, omoi baifemo itimie bi raillano. ⁹ Jofu nama abimo omoi raia, omoi baifemo itimie bia, jofu nama omoimo lloite: “Bimiemo omoi raillanona fecu”. Meidailanona, oni rainadaitomoi. ¹⁰ Ie jira rafue dine omoína uaidoia, naie jofomo omoi ria, oni raí. Ie mei jofu nama jitaia, omoimo lloite: “Cue abimo raí”. Ie mei nana naie itino omoi iobillana cioitimaci. ¹¹ Ie isoide. Jusiñamuidi jiaimie afemo iacadimiena jiaimie afemo iñenana itataite. Jusiñamuidi jiaimie afemo iacaiñedimiena jiaimie afemo itataite.

¹² Naimiena uaidotimiemo Jesús llote:

—Guille rafuena o finoia, naga icaiño o nabaiñiaina uaidoñeno. Naga icaiño o cominina uaidoñeno. Naga icaiño o ecimo itino ucuberedinona uaidoñeno. Naimacina o uaidotona, jairuido guillena ona uaidoitimaci, naie iba o ollena; ¹³ ia rafuena o finoia, dueredinona uaido. Ñuja-ñujacaida macaritinona uaido. Uisínidinona uaido. ¹⁴ Naimacimona iba ico o oñenamona, Jusiñamui ona caimare itataite. Jairuido fodaillamona mareuidino jilloia, monamo Jusiñamui ona ibaite.

Jesúdi ailluena guille finoca rafuena llua rafue

¹⁵ Jesús abimo itinomona Jesús lluaana damie cacajano, raite:

—Monamo Jusiñamui illanomo itimiedi marena iite.

¹⁶ Jesús uai ote:

—Iena omoi raise uñollena bie rafuena lloiticue. Damie aillue rafuena finode. Ailluena cominina uaidote. ¹⁷ Rafue illaruimo ie mullaimana orede, cominina dane uaidollena. Raite: “Mai bi. Nana guille finuadi jai fuite”; ¹⁸ ia biacaiñedimaci. Damie llote: “Eniruena como ibadicue. Iena jibuisaiacadícue. O rafuemo jaiñeitícue. Ie jira cue joreña icíñeitíosa”. ¹⁹ Jiaimie llote: “Diez diga juraretana como ibadicue. Naimacina jibuisaiacadícue. O rafuemo jaiñeitícue. Ie jira cue joreña icíñeitíosa”. ²⁰ Jiaimie llote: “Riño como otícue. Ie jira o rafuemo jaiñeitícue”. ²¹ Ie nama dine naie mullaima abido jaide. Comini biacaiñenana llote. Iena cacajano, rafue namadi icirite. Ie mullaimamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisínidinona uaido”. ²² Ie mei naie mullaima jaide. Abido naimie bia, ie namamo llote: “O lluaana finodicue. Ailluena comini jai bitimaci. O jofomo illino nia ite”. ²³ Rafue namadi uai ote: “Naisomo itinona bene atillena, cue jofona oruitallena, cai nairaimona jino jai. ²⁴ Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitaiñedino nainomo ico iñeitimaci.

Jesúdi naimie llofueganona jaiacadino rafue

²⁵ Naie facaise ailluena comini Jesús diga jai jaisoidimaci. Naimacimo llote:

²⁶ —Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruai baifemo isiruilla. Cuena ie amatiai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide. ²⁷ Cue llofuegamiena bu jaillamona, duere sefuicana jaite. Nibai naiemona fodaite. Bu iese jaiacaiñenia, cue llofuegamiena naimie raise jainide.

²⁸ 'Ero, jiaie rafuedo iena lloiticue. Jofona bu finoacania, ie ucubena bailla diese uñollena: “¿Ñiga raifite?” comecina nano facade. ²⁹ Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. ³⁰ Raitimaci: “Ie jofu finua tainede; iadedi fuidonide”.

³¹ 'Ero, jiaie rafuedo iena lloiticue. Illaima jobaimena finoacania, nano comequina facade: "Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?" Comequina facaja mei: "Emodofiñeiticue" naimie comequina facajia, ³² nia are naimie bacauai ia, daguelli uicodo orede, ie fairiconi diga ñaillena. Raite: "Jobairiacaiñedicue; ia o diga bie rafuena raise finoacaducue". ³³ Biemo comequina omoi faca. Ie raruiaimo bu comequina eo facaia, cue llofuegamiena jainide.

³⁴ 'Sal mare; iadedi ie caimano jai iñenia, ¿dane niese nibaiamona caimarenite? ³⁵ Jai marañede. Eniruemo jonegadena, jiai marañede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluomo cacarei. Iena ñino.

15

Jesúdi naimiena ñnotinomona damie faifillana jitaiñena rafue

(Mt 18.10-14)

¹ Naimaci bisoilla isoi ie rafuena cacaillena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiai ofidimaci. ² Iena ciuano, fariseuai cominidi, Moisés micori llogacinuaina llofueraini diga, Jesús joreña ñaitimaci:

—Bimie marañedicinona finorainina feiñote. Naimaci diga jiai guite.

³ Naimaci ñaiana uiñuanona, Jesús naimacimo bie rafuena llote:

⁴ —Omoimona damiemo cien toica llaudaiai nibai ite. Naimacimona daje feiraite. Ie noventa y nueve llaudaiaia fainonocaida, iena jenuaite, ie baille dinori. ⁵ Baillanona, ie fecanicomo rocanocaida, iobicana biite. ⁶ Jofomo naimie ria, ie nabaiñiaia uaidoite. Ie ecimo itinona jiai uaiduanona, raite: "Cue diga iobi. Cue feiraite llaudana jai baiticue". ⁷ Ie isoide. Cue rafuena cue lluamona, damie ie comeci jeacinona fainonocailamona, ie comeci iuai meiduanona, monamo itino eo iobitimaci; iadedi noventa y nueve comini marena illamona, janore iobitimaci.

Jesúdi faifide ucubena bailla llua rafue

⁸ Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gallaite. Eo jenoite, ucube ie baille dinori. ⁹ Iena naiñaiño baia, ie nabaiñiaia uaidoite. Ie ecimo itinona jiai uaiduanona, raite: "Cue diga iobi. Cue faifide ucubena jai baiticue". ¹⁰ Ie isoide. Cue rafuena cue lluamona, damie ie comeci jeacinona fainonocailamona, ie comeci iuai meiduanona, Jusiñamui jaienisai eo iobidimaci.

Jesúdi damie ie moo fainonocaila llua rafue

¹¹ Jesús llote:

—Jiaie rafuena omoimo lloiticue. Damiemo mena jito ite. ¹² Ie moomo jamamie llote: "Moo, o fiodailla mei, o raruiaimona janore feiñoiticue. O fiodaillana sedaacaiñedicue. O raruiaina cue facaina birui jitaiducue. Cuemo ine". Ie jira ie moo naimiemo fecade. ¹³ Ie mei nano nie dinori illamona, nana ie raruiai iraianona, jiaie eniruemo jaide. Nainomo ie ucube jamai buruemo faiaide. ¹⁴ Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite. ¹⁵ Ie jira nainomo ite patrón dine maijiaide. Naie patrón ie chanchuaina sedallena naimiena orede. ¹⁶ Naimiena jaca buna ecarainina jira, chanchuai guillemona guiacade. ¹⁷ Iese naimie duere sefuilla jira, ja muidomo abina uiñoocailamona, comequina facade: "Cue moo jofomo nana naimie mullaiaia raise guitimaci. Guille fiebicabite; iadedi bene aimeri fiodaiticue. ¹⁸ Cue moo dine abido ja jaiticue. Naimiemo lloiticue: Jusiñamuimo jeacinona finodicue. Omo jeare jiai finodicue. ¹⁹ Odi: 'Cue jito' cuena raiñeno. O mullaiaia illa isoi, cuena abido feiño". ²⁰ Ie facaise ie moo dine jai jaide. Nia aare naimie ia, ie moo naimiena ciode. Ie jitona duenaillanona, naimie dine aiside. Naimiena caimadote. Jiai llibanote. ²¹ Ie jito naimiemo llote: "Moo, Jusiñamuimo jeacinona finodicue. Omo jeacino jiai finodicue. Odi: 'Cue jito' cuena raiñeno". ²² Ie moo iena cacajano, ie mullaiaimo llote: "Cue jitona

naimie eruaillena, eo mare iniroina ati, naimie jitallena. Cue jitona naimie illa jira, iena jitallena, anillona ati. Naimie jitallena, zapatona jiai ati. ²³ Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticaí. ²⁴ Navui cuemona cue jito fiodaite isoide. Cajé cuemo dane abido rilla. Navui cuemona naimiedi faifide; iadedi birui naimiena dane ciodicue”. Naimie llua isoi, rafuena finodimaci. ²⁵ Naie facaise nano doforamie illimo ite. Jofomo abido naimie bia, comini iraisillana cacade. ²⁶ Daje mullaimana uaiduanona, naie rafuena jicanote. ²⁷ Naie mullaima uai ote: “O ama abido jai bite. O ama ramo jiriñeno abido billa jira, o moo ie janoreta farediretana jai fatatate”. ²⁸ Iena cacajano, icirite. Fo jaiacaiñede. Ie jira ie moo jino bite. Naimiena fo uaidote. ²⁹ Ie moomo llote: “Ero, diga años o diga maijdicue. O uaina jaca ñnoticue; iadedi cue nabaiñiai diga, rafuena cue finollena, chivo cuemo jaca fecañedio. ³⁰ O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”. ³¹ Ie moo uai ote: “Moo, nagarui cue diga itio. Nana cue radi oienite. ³² Cuemona o ama navui fiodaite isoide; iadedi naimiena dane ciodicue. Naimie navui faifide raiticue; iadedi cajé cuemo dane abido rilla. Cue iobillanona rafuena finodicue”. Bie rafuemona omoi fueollena, iena jai lloticue —Jesús llote.

16

Jesúdi patrón ie mullaima finoca rafuena llua rafue

¹ Ie llofueoicaiganomo Jesús jiaie rafuena llote:

—Ucuberede patrón ie mullaimana ie rana sedatate. Naie patrón eneno oni illanona, ie mullaima ie rana raise sedañenana fidide. ² Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue diga jai maijiñeítio”. ³ Iena cacajano, naie mullaima comecina facade: “¿Niese nibaiiticue? Cue nama cuena jai dotaacade. Maijiana ocuinidicue. Jiaie cominimona ucube jamai jicajana meiruiticue. ⁴ Cue finuana jai uiñoticue. Naimaci jofomo comini cuena ico feñollena cue dotaja mei, nana cue patrón debedinona uaidoiticue”. ⁵ Ie jira naimacina uaidote. Damiemo jicanote: “¿Cue patrómo niga debedio?” ⁶ Uai ote: “Cien bidones raifi aceitunamona oga aceitena debedicue”. Naie mullaima raite: “O rabemo jarire ja cueno: cincuenta bidones”. ⁷ Jiaimie jicanote: “¿Niga debedio?” Uai ote: “Cien digagai trigo raifi debedicue”. Naie mullaima dinena raite: “O rabemo ochentana cueno”. ⁸ Iena fidiano, naie mullaimamo ie patrón raite: “Jiairuido marena o illemo o comecina raise facadio. Eo abina uiñotimedio” raite. Ero, Jusiñamuina ñnoñedinodi naimiena ñnotino baifemo ra fecajana baitadimaci. ⁹ Naiemona omoi fueollena, omoimo lloticue. Omoimo ite ra diga dueredinona cano. Iemona omoi nabaiñiaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoína marena ñaitimaci. ¹⁰ Janore ra omoimo illamona, Jusiñamui facaina birui omoi raise maijia, ailluena ra omoimo itedena, Jusiñamui facaina jiai raise maijiiotomoi. Janore ra omoimo illamona, maraiñede rafuena birui omoi finoia, ailluena ra omoimo itedena, maraiñede rafue nia jiai finoitomoi. ¹¹ Omoimo birui ite ra diga Jusiñamui facaina omoi raise maijiñenia, naimiemona jiaie rana feiñoñeitomoi. ¹² Omoi anamo ite ra diga Jusiñamui facaina omoi raise maijiñenia, Jusiñamui ie rafue omoimo itatañeite. ¹³ Mena patrones diga daruido buna jaca maijinide. Mena diga bu maijiacania, damiena jiaimie baifemo gaite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiái ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi fariseuai comini diga dane ñaia rafue

¹⁴ Jesús llofuiana fariseuai comini cacajano, ucubena eo gaia jira, naimie uaina jamaidimaci. ¹⁵ Naimacimo Jesús llote:

—Omoi finoca rafuemona comini omoína: “Mare” raillana jitaídomoi; iadedi Jusiñamui omoi comeciaí maraiñenana uiñote. Iese omoi illana Jusiñamui gaiñede.

⁶ Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo sico”, naie amena omoi uaina ñnote.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemono omoi fueollena, iena lloiticue. Illimo ie mullaíma maijiamona, ie toiniaí sedajamona jofomo abido naimie ria, ie patrón naimiemo lloñeite: “Mai nano guisaíbi”; ⁸ iadedi naimiemo lloite: “Cueíena guillena nano fino. Cueno eca. Ie mei gutio”. ⁹ Naie mullaíma ocuica rana finua muidona, mullaímana naimie illa jira, ie mullaímamo patródi iobillacinona fecañeite. ¹⁰ Ie isoide. Nana cue llua omoi finodomoina, dani omoi maijadi, cue cominina omoi illa jira, cuemona iobillacinona feiñoñeitomoi.

Jesúdi diez efonaitinona jillotaja rafue

¹¹ Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite. ¹² Nairai dine naimie riacania, diez efonaitinodi naimiemo dafaífidimaci. Eneno oni naidaidimaci. ¹³ Naimiena ado uaidotimaci: —Jesús, Maestro, caina duenai. Caina ja jillota.

¹⁴ Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci. ¹⁵ Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade. ¹⁶ Naimiemo iobillacinona jiai fecallena, Jesús uicomo ana bitadate. Naimiedi judíuñedimie. Samaritano imie. ¹⁷ Jesús llote:

—Diez digamiedomoi. Omoína jai jillotaticue. ¿Ninomo jainodi nueve digamie itimaci? ¹⁸ ¿Ñiese Jusiñamuimo iobillacinona fecaacaiñedimaci? Dama bimie fecade. Naimiedi judío imieñedimie.

¹⁹ Jesús naimiemo llote:

—A naidada. Mai jai. Cueno o ñnua jira, jai jillodio.

Jesúdi Jusiñamui ie cominina sedajana llofuia rafue

(Mt 24.23-28, 36-41)

²⁰ Naie facaise fariseuai comini Jesúsno jicanotimaci:

—¿Ñiruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoína sedallena uiñoñeitomoi. ²¹ Buena ciuamona raiñeitomoi: “Jadi, Jusiñamui bene caina jai sedade”. “Jadi, batine caina jai sedade”; iadedi omoi motomo itinomona Jusiñamui díbeimo damierie illamona, Jusiñamui omoi motomo jai illana uiñoitomoi.

²² Ie llofueoicaiganomo llote:

—Ñairuido duere sefuillamona cue diga janore jisa iacanitomoi; iadedi iese nia iñeitomoi. ²³ Damierie raia: “Ero, batine Cristo jai bairede” nainomo jaiñeno. Naimaci raia: “Ero, bene Cristo jai bairede” iena ñnoñeno. ²⁴ Mona borillamona mona jillacidi usere ciode. Ie isoide. Cue abido bia, nana comini iena uiñoitimaci. ²⁵ Birui iese nia suiñeite. Nano duere sefuiticue. Birui ite comini cuena jiai feiñoñeitimaci. ²⁶ Abido cue billirui iaírei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci. ²⁷ Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina ñnoñedimaci. Noci deilla mei, ebena nana faífidimaci. Cue abido bia, ie isoite. Ebena biiticue. ²⁸ Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana íbauidimaci. Iena fecauidimaci. Illimo maijuuidimaci. Jofona finouidimaci. Naimaci isoilla isoi icana jaidimaci. ²⁹ Dani iemo

comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci. ³⁰ Ie isoide. Abido cue billiruimo comini iitimaci. Cue bia, ebena biiticue. ³¹ Naie facaise bu ie jofo emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena. ³² Iemona fueollena, Lot ai micori rafuemo comeceina faca. Naiñaiño ie raruiaimo daño comeceina facajamona, na ie abi diga faifide. ³³ Dama ie raruiaimo ie comeceina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comeceina bu facaia, monamo cue diga jaca iite. ³⁴ Cue bille facaise menamie daje cuartomo iniano iitaiamaia. Damie jaite. Jiaimie fiebite. ³⁵ Mena riño danomo doberillanona iitaiñuai. Dañaiño jaite. Jiañaiño fiebite. ³⁶ Menamie illimo maijiano iitaiamaia. Damie jaite. Jiaimie fiebite.

³⁷ Ie llofueoicaigano jicanotimaci:

—¿Nine jaitimaci?

Uai ote:

—Urujaisai rifaide ramo ofillana uñua isoi, nana cuena innotino cue abido billena uiñoitimaci. Cuemo duillamona, cue diga jaitimaci.

18

Jesúdi feciñona llua rafue

¹ Ie llofueoicaiganomo Jesús rafuena dane llote:

—Jusiñamuimo jicabi, omoi jicaca rafue omoi feiñolle dinori. Raire feiñoñenia, abina jafueño. ² Iena omoi raise uñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede. ³ Nainomo naimie dine daje feciño jai-jaicabillanona, raite: “Cuena duere finodimimona cuena cano”. ⁴ Naimie dinena raite: “Dama iesede. Ona canoñeiticue”. Ie mei ie comeceina facade: “Jusiñamuina jaciruiñedicue. Cominina jiai isiruiñedicue; ⁵ ia naiñaiño cuemo sefuire bi-bina jira, naiñaiño canoiticue, cue rairaiñellena”.

⁶ Jesús llote:

—Maraiñede juez llua cacadomoi. Ja muidomo naiñaiño canode. ⁷ Ero, biemo omoi comeciaina faca. Jusiñamui naie juez isoñede. Nagarui Jusiñamuimo naimaci jicaia, ¿niese naimie ie fetocanona canoñeite? Jaca canoite. ⁸ Raire fairuanona, naimacina raire canoite; iadedi abido cue bia, ¿niga cuena innotino iitimaci? Nibai ailluena cuena innoñeitimaci.

Jesúdi Jusiñamuimo menamie jia llua rafue

⁹ “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

¹⁰ —Jusiñamui jofomo, nainomo jillena, menamie jaidiamaia. Damie fariseo imie. Jiaimie gobierno ucubena oraíma. ¹¹ Fariseo imie nidadacaida, dama anado jide: “Jusiñamui, jiaie comini isoñedicue. Fiidimaci. Maraiñedimaci. Naimaci aiñede riño diga itimaci. Cue ecimo ite ucubena oraíma isoi iñedicue. ¹² Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jide. ¹³ Gobierno ucubena oraíma eneno nidadacaida, jide. Monamo eruaiñede; iadedi jamai bue isoillanona, jogobena farode. Raite: “Jusiñamui, jecinona finoraímadicue. Cuena duenai. Macaibaite” jide. ¹⁴ Jusiñamuidi jiaimie afemo iacadimienai jiaimie afemo iñenana itataite. Jusiñamuidi jiaimie afemo iacaiñedimienai jiaimie afemo itataite. Ie jira gobierno ucubena oraíma ie jofomo Jusiñamui mona jai marebicaillanona jaide; ia fariseo imie iese jaiñede.

Jesúdi naimie dine uruai billana jitailla rafue

(Mt 19.13-15; Mr 10.13-16)

¹⁵ Naie facaise Jesús dine comini naimaci eisaiaina atisite. Ie onolli naimacimo naimie joniana jitaídímaci. “Naimacina raise cano” ie Moomo lollena jitaídímaci. Iena

ciuanona, ie llofueoicaigano cominina Jesús dine billana rairuidimaci; ¹⁶ iadedi Jesúdi eisaiaina uaiduano raite:

—Uruiai cue dine billesa. Naimacina rairuiño. Cuen a bie isoi inotinodi Jusiñamui cominidimaci. ¹⁷ Bie uruai abina iedoñedimaci. Einamacimona jamai bue isoidimaci. Naimaci isoi bu inenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

Ucuberedimie Jesús diga ñaia rafue
(Mt 19.16-30; Mr 10.17-31)

¹⁸ Ie facaise illaicomini mona damie Jesúmo jicanote:

—Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

¹⁹ Jesús uai ote:

—¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano. ²⁰ Moisés micori llogacinuaina inocana jai. Jai e cuete: “O añede riño diga ineno. Comena meineño. Rana fiñeno. Jaiimiena o llogidoia, tainona lloño. O moo uaina ino. O ei uaina ino”.

²¹ Uai ote:

—Cue uruena illa facaisemona nana bie llogacinuaina inoticue.

²² Iena cacajano, Jesús raite:

—Daje rana nia finoñedio. O raise marebicaia cania, omo ite raruiaina feca. Naie ucubena dueredinomo feca. Cuen a inuamona, monamo ico jaca itio. Cue llofueoicaiganona o illena, mai cue diga bi.

²³ Jesús llua naimie cacajano, sunaicaide. Naimiemo eo ailluena ra illa jira, iena fecaacañede. ²⁴ Naimiemo eruaillano, Jesús raite:

—Ucuberedinodi Jusiñamui cominina jaillena eo sefuiruite. ²⁵ Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui cominina jiai raise jainide.

²⁶ Jesús llua cacadino jicanote:

—¿Iemona buca jillobiti?

²⁷ Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

²⁸ Pedro raite:

—Ero, o llua isoi cai jofuena fainonocaida, o diga jaisoidicai.

²⁹ Uai ote:

—Uanaicinona lloticue: Jusiñamui cominina naimie jaillamona, ie jofona bu fainonocaia, ie aina bu fainonocaia, ie amatiaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ³⁰ Jusiñamuimona ailluena ibana birui feiñoite. Monamo ico jiai jaca iite.

Jesúdi ie fodaillena dane llua rafue
(Mt 20.17-19; Mr 10.32-34)

³¹ Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, imana jaidicue. Jusiñamui facaina lloraini cuena jai e cuetimaci. Nana naie rafue ja suite. ³² Judúañedino judúuai illaicomini cuena fecaitimaci. Cueri jifanoitimaci. Cuen a jeare finoitimaci. Cuen a tuallaitimaci. ³³ Cuen a faitimaci. Cuen a meineitimaci; ia darui amani illanona, cue fodaillamona jilloiticue.

³⁴ Naimie llua raise cacañedimaci. Naimacina iena Jesús nia raise llofueña jira, iena raise uiñoñedimaci.

Jesúdi uisinidimiena jillotaja rafue
(Mt 20.29-34; Mr 10.46-52)

³⁵ Jericó railla nairaimo ie llofueoicaigano diga Jesús riacademo, uisnidimie naiso fuemo raillana ciode. Ucubena jamai jica-jicade. ³⁶ Ailluena comini Jesús diga jaillana naimie cacajano, naie cominimo nie isoide rafue illana jicanote. ³⁷ Uai otimaci:

—Nazaret ie Jesús como bene bite.

³⁸ Ie jira naimie cuiριοide:

—David micori Jitona o illamona, cuena duenai. Cueno cano.

³⁹ Uicodo jaidino naimiena lletade, naimiena lliicaitallena; iadedi naimie eo cuiριοide:

—David micori Jitona o illamona, cuena duenai.

⁴⁰ Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

⁴¹ —¿Niese ona cue nibaiana jitaidio?

Uai ote:

—Maestro, cioacadique.

⁴² Jesús raite:

—Mai eroda. Cueno o inua jira, jai jillodio.

⁴³ Ieconí naimie uisidi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

19

Jesús Zaqueo diga illa rafue

¹ Jericómo Jesús rillanona, nainomo macaritemo, ² naie facaise nainomo Zaqueo raillamie ite. Gobierno ucubena nanoca oraima. Naimiedi eo ucuberede. ³ Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide. ⁴ Ie jira uicodo aisicana jaide, amenamo a jaillena, naimiena cioillena. ⁵ Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofo dine jaiticue.

⁶ Ie jira raire ana bite. Ie jofomo Jesúsna iocire feiñote. ⁷ Iena jiaie comini ciuanona, Jesús joreña jeare ñaianona raitimaci:

—Mariñedinona finoraíma jofomo naimie jaide.

⁸ Jesúsna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruiaina dueredinomo biruimona fecaiticue. Bumona navui cue fiiia, cuatro diga ra abido iiticue.

⁹ Jesús uai ote:

—Iese o llua jira, o comini diga Jusiñamuina jai o inuana uiñoticaí. —Jamai bitinomo llote:

—Zaqueodi Abraham micori jito; ia Jusiñamuina navui inoñede. ¹⁰ Naimie isoidino jillobitallena, biticue. Monamona billanona, imana jaie jaidicue. Jusiñamuina inoñedinona jenuaibidicue, naimacina jillobitallena.

Illaima ie mullaiaimo ucubena fecaja rafue

¹¹ Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”. ¹² Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dine jiaie nairaimo jaide. Ie cominina sedallena, nanoca illaimamona ie uaina feiñoiacade. Iemei abido biacade. ¹³ Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. ¹⁴ Ie comini naimiena enoidimaci. Jiañona nanoca illaima dine oretajano, raitimaci: “Bimie caina sedajana jitaiñedicaí”; ia nanoca illaima dinena naimaci lluaña jaca cacaiñede. Ie jira naie nanoca illaima naie illaima jitomo ie uaina ite. ¹⁵ Ie uaina feiñua mei, abido ie eniruemo jaide. Rilla mei, ie mullaiaina uaidote. Nie diese ucubena ocana naimaci jaillana uiñoiacade. Ie jira naimacina uaidote. ¹⁶ Nano bitimie raite: “Nama, o cuemo dabe fecadio. Dabedemona jai cuemo ite diez digabe”. ¹⁷ Naie illaima naimiemo llote: “Eo marena maijidio. Mare

mullaímadío. Janore ra raise o sedaja jira, ona diez nairaiaína sedataíticue”. ¹⁸ Ie mei jiaie mullaíma billanona, raite: “Nama, o cuemo fecaca dabedemona jai cuemo ite cinco dígabe”. ¹⁹ Illaíma llote: “Ona cinco nairaiaína sedataíticue”. ²⁰ Ie mei jiaie mullaíma bite. Raite: “Nama, jadi, o cuemo iga o ucube. Iniroimo tilliano, iena eenotícue. ²¹ Ona cue jacíruillano, odí eo riimíena jira, iena jamai eenotícue. Jiaie comínimona ie rana baírocabídío. O maijñéna ramona ocabítío”. ²² Illaíma dínená raite: “Eo marañéde mullaímadío. Cuena o llua isoi, ona duere finoítícue. Cue riimíenana uíñotío. Jiaie comíní ie rana cue baíruana uíñotío. Cue maijñéna motomo ra cue uana uíñotío; ía buena maijñédío. ²³ ¿Bue ñellena bancomo cue ucube joneñédío? Bancomo itena, jiaie ucubena ocana jaide. Ie mei abído cue bia, omo cue fecaja ucube baífemo feiñotícue”. ²⁴ Nainomo itínomo llote: “Naie ucube naimíemona baíruano, diez dígabe itímíemo feca”. ²⁵ Uai otímáci: “Naimíemo ailluena ucube jai ite. ¿Bue ñellena dane jiaie fecaitío?” ²⁶ Illaíma dínená uai ote: “Ailluena raredímíe jiaie rana feiñoíte; íadedí janore raredímíe íe rana faífite. ²⁷ Cuena enoídínona bene atí. Naimacína cue sedajana jítaiñédímáci. Naimacína meíne”.

Jesús nía llote:

—Ie isoíde. Iese omoímó suíñellána, Jusíñamuí íe comíní sedallíruína omoí uíñoñéna jira, cue jítaiílacíno fínocána jai.

Jesús Jerusalémo jailla rafue

(Mt 21.1-11; Mr 11.1-11; Jn 12.12-19)

²⁸ Naie rafuena llofúia meí, Jerusalén díne comíní uícodo íe llofueoícaígano díga Jesús jaide. ²⁹ Jerusalén íaireícaídémo, mená nairaímó ríacade. Betfagémo railla nairaímó ríde. Betanía nainomo jíai íte. Olívos railla anedumo naga nairaí íaímaíai íte. Íe llofueoícaíganomona mená orede. ³⁰ Raite:

—Bíe nairaí ílla uícómo maí omíco jai. Nainomo cuínaca burrítona baítómíco. Naie burríto emodomo nía buna jaíñéna. Iena suíñuano bene atí. ³¹ Omícomo: “¿Bue ñellena íena suíñodomíco?” bu jícanoía, llono: “Coco Nama íena jítaide”.

³² Naimíe llua isoi jaídíiaímaíai. Naimíe llua isoi burrítona baítíiaímaíai. ³³ Íe facaíse íe naníai íaímaíaimó jícanote:

—¿Bue ñellena caí burrítona suíñodomíco?

³⁴ Uai otíiaímaíai:

—Coco Nama íena jítaide.

³⁵ Íe meí Jesúmo íena atídíiaímaíai. Burríto emodomo íniróina jobíanona, íe emodomo Jesúdí raínadate. ³⁶ Jesús íese jaídémo, naimíena íobítalléna, íllaíma isoi naimíe jaílléna, comíní ímací íniróí díga, naíso motomo jobédímáci. ³⁷ Jerusalémo jóide naíso íte nafái múídomo naimíe ríllanona, naie ítuémo ana jaíllanona, nana Jesús díga jaídíno caímare ítímáci. Nana Jesús síño fínoca rafuena naimáci jai cíua jira, íena naimáci uíbíñuamona, Jusíñamuímó íobíllacínona ado eo fecadímáci. ³⁸ Raitímáci:

—¿Cái Illaíma bílla! ¿Jusíñamuí mamecído bítímíemo caí íobicabíllasa! O múídoná Jusíñamuídí comíní díga urí íte. ¿O fínoca rafue múídoná Jusíñamuímó íobicabíllasa!

³⁹ Naie comínimona dájeríe faríseuái raitímáci:

—Maestro, o díga jaídínona líícaílléna, naimacína lleta.

⁴⁰ Uai ote:

—Naimáci líícaía, bíso fuémo íte nofícídí cuéna marena ñáíte.

⁴¹ Jerusalémo Jesús íaireí ría, íena cíuano, eede. ⁴² Raite:

—Jerusalén ítíno, Jusíñamuí díga omoí urí ílléna jai bítícue. Omoína naimíe comínína ítataíacadícue; íadedí íena jítaiñédomoí. Iena jítáídomoídéna, íco duere sefúíñéítoímoí. ⁴³ Jíairuído omoí bacauái jobáíména fínuanona, omoína círínóítímáci. Omoí ecído lláítímáci. ⁴⁴ Omoína meíneítímáci. Omoí uruíána meíneítímáci. Omoí íllanona júdaítímáci. Jusíñamuí omoí motomo bíruí íllána omoí uíñoñéna jira, íese omoímó suíte.

Jesúdí Jusíñamuí jófomona damíeríena dotaja rafue

(Mt 21.12-17; Mr 11.15-19; Jn 2.13-22)

⁴⁵ Jerusalémo Jesús rilla mei, Jusiñamui jofomo jaide. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaia daga, damierie fecaudimaci. Iena ciuanona, naimacina jino orede. ⁴⁶ Raite:

—Ie facaina lloraima micori Jusiñamui llogacino jaie cuega: “Cue jofo ite nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

⁴⁷ Jusiñamui jofomo nagarui Jesús llofuate. Judúuai illaicominidi Jesúsna meinea-cadimaci; ⁴⁸ iadedi niese nibañedimaci, nana comini naimie llofuiana eo jitailla jira.

20

Jesúdi ie siño uaina llua rafue

(Mt 21.23-27; Mr 11.27-33)

¹ Jusiñamui jofomo Jesúsdi cominina llofuate. Jusiñamui rafuena llofuate. Judúuai illaicomini naimie dine bitimaci. Naimacidi Jusiñamui daga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona, ² jicannotimaci:

—¿Nie isoide uaido o finoca rafuena finocabidio? ¿Bu omo iga uai daga o finoca rafuena finocabidio?

³ Jesús dinena uai ote:

—Omoimo nano jicanoitícue. ⁴ Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

⁵ Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina ññoñedomoi? ¿Bue ñellena naimie micori llua isoi bautizañedomoi?” ⁶ “Comini” cai fairioia, bene itino caina meineitimaci, Juan micoridi Jusiñamui facaina lloraima naimaci railla jira.

⁷ Ie jira Jesús uai otimaci:

—Uiñoñedicaí.

⁸ Jesús dinena raite:

—Ie muidona cuemo nie isoide uai illana omoimo lloñeitícue.

Jesúdi marañede maijiraini rafuena llua rafue

(Mt 21.33-44; Mr 12.1-11)

⁹ Nainomo itinomo Jesús llote:

—Jiaie rafue omoimo lloitícue. Iemo cacarei. Daje patrón uvas railla riaraiaina rite. Ie mei ibatajanona jiaínomo fecade, iena sedallena. Ie mei jiaie eniruemo are illena jaide. ¹⁰ Uvas jai einalla facaise riaraiaina sedaraini dine daje mullaimana orede, naimie facaise iedinona naimie feiñollena; iadedi naie sedaraini naie mullaimana fatimaci. Uvas naimiemo fecañoeno abido oredimaci. ¹¹ Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecañoeno abido oredimaci. ¹² Naie patrón jiaimiena orede. Naimiena eo bofedaitajanona jino dotadimaci. ¹³ Iemei patrón comecina facade: “¿Niese nibaitícue? Cue isiruiga jitona oretaitícue. Naimiena nibai jaciruitimaci. Naimie uaina ñnoitimaci”. ¹⁴ Riaraiaina sedaraini naimiena ciuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci. ¹⁵ Naimiena jino dotajanona, naimiena meinetimaci. Iena fidia mei, ¿niese naie patrón nibaiite? ¹⁶ Naimie biite, naie sedarainina meinellena. Ie mei jiaínona ie illina sedataite.

Naie rafuena cacadino raitimaci:

—Bie isoide rafue suillana jitaiñedicaí.

¹⁷ Naimacimo Jesús eruailano, llote:

—Naie illi sedaraini isoidomoi. Jusiñamui facaina lloraima micori omoína jaie cuete. Ie ciegafuena raise facañedomoi. Naimie micori cuega: Jofo finoraini jitaiñena nofici nana naie jofomo ite nofici baifemo jai uaide.

cuega. Jusiñamui cominina damierie jaillana naimie micori cuete. Jusiñamui oretagamiēna damierie jitaiñenamona, naimie cominina jaiñeitimaci; iadedi Jusiñamui oretagamiēna ailluena inuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. ¹⁸ Naie noficina nia ñaiticue. Noficimo bu eicaitaia, bofedaite; ia naie nofici bumo ana uaiā, naimiēna saitaitē. Ie isoide. Cue lluaana omoi jamaia, duere sefuitomoi. Iena omoi inoñenia, ja muidomo faifitomoi —llote.

Jesúmo gobiernomo ucubena fecajana jicanua rafue

(Mt 21.45-46; 22.14-22; Mr 12.12-17)

¹⁹ Jesús como lloga rafuedo naimacina ñaiana uiñotimaci. Ie jira naie facaiseconi judíuai illaicomini naimiēna gaitacadimaci; iadedi cominina jaciruitimaci. ²⁰ Ie jira naimiēna uiñododimaci. Mare rafuedo abi caitadinona oredimaci. Naimie raise uai oñenia, naimiēna duere finollena, naimiēna facaciacadimaci. Gobernadormo naimiēna llogidoiacadimaci. ²¹ Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. ²² Omo rafuena jicanoiacadicaí. Dama Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

²³ Naimiēna naimaci jifuiāna uiñuanona, Jesús dinena uai ote:

²⁴ —Ucube cuemo acata. ¿Bu ie joreño nainomo ite? ¿Bumo jainaiāide bie cuega radi? Uai otimaci:

—César.

²⁵ Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

²⁶ Jesúdi uai raise ua jira naimie lluaamona jeare rafuena uiñoñedimaci, naimiēna llogidollena. Naimie lluari rajicaillamona, llicaidimaci.

Jesús dine saduceuai railla comini billa rafue

(Mt 22.23-33; Mr 12.18-27)

²⁷ Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci. ²⁸ Jesúmo llotimaci:

—Maestro, cai facaina Moisés micori jaie cuega: “fima fiodailla meinoconi, naimie urue iñenia, ie ama naie feciño olle. Naimiedi uruiāna ie ama facaina comuitaite” cuega.

²⁹ Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiainide fiodailla. ³⁰⁻³¹ Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide. ³² Ja muidomo naie riño jiaí fiodaite.

³³ Fiodaillamona, ico naimaci jilloiadedi, ¿bu naie riño ienite? Naiñaiño siete digamiēna inirede —llotimaci.

³⁴ Jesús uai ote:

—Birui aina otomoi. Inina otomoi; ³⁵ iadedi fiodaillamona, Jusiñamui diga jaca itino jillua mei, ainitimaci. Ininitimaci; ³⁶ ia Jusiñamui jaienisai isoi illanona, dane fiodaiñeitimaci. ³⁷ Fiodaitino jilluana omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. ³⁸ Jai fiodaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiāna jiaí jillotaite. Naimiemo naimaci duillamona, naimaci abiaí diga jilluanona, naimie diga jaca iitimaci —llote.

³⁹ Iena cacajano, Moisés micori llogacinuāna llofuerainimona dajerie raite:

—Maestro, raise llotio.

⁴⁰ Ie facaise naimiemo nie isoide rafuena dane jicanuana jaciruitimaci.

Jesús dinena fariseuai cominimo jicanua rafue

(Mt 22.41-46; Mr 12.35-37)

⁴¹ Iemei naimie ecimo itinomo Jesús jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jitona raitimaci? ⁴² Salmos railla cuezafuiaimo David micori jaie cuela: Jusiñamuidi cue Namamo llote: “Illaimana o illamona, cue nabeimo ana rai.

⁴³ Ona ñinoñedino o anamo itataitacue”.

⁴⁴ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiai ie Nama.

Jesúdi judíuai illaicominina ñaia rafue

(Mt 23.1-36; Mr 12.38-40; Lc 11.37-54)

⁴⁵ Nana comini cacajano, ie llofueganomo Jesús llote:

⁴⁶ —Moisés micori llogacinuaina llofuerainimona abina rairui. Illaicominina naimaci itimacidená, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoñedínona itimacidená, comini naimacina uaiduana gaidimaci. Comini naimaciri acarillena, ofiracomo uicomo raíacadimaci. Rafue ia, naimaci jamai bue isoñedínona comecina facajanona, rafue nama ecimo raíacadimaci. ⁴⁷ Feciñuaimona rana ocabillanona, naiñaiñuaina duere finodimaci. Naimiena eo sedadimacidená, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

21

Jesúdi Jusiñamui jofomo duerede feciño ucube fecajana ciua rafue

(Mr 12.41-44)

¹ Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. ² Eo duerede feciño menaruñu joniana jiai ciode. ³ Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete. ⁴ Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoimo ite ucubena jai jonete. Janore jonete; ia Jusiñamuimona naiñaiñodi jiaimo baifemo jonete.

Jesúdi Jerusalémo ite Jusiñamui jofo judaiana llua rafue

(Mt 24.1-28; Mr 13.1-23)

⁵ Naie facaise Jesús llofueoicaiganomona dajerie Jusiñamui jofona eruailanona, raite: —Mare nofici diga finoca. Eo mare ra nainomo jiai ite.

⁶ Jesús llote:

—Birui bie rana ciodomoi; iadedi ico jiairuido nana bie jofomo ite noficiái oni judaisite.

⁷ Jicanotimaci:

—Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸ Uai ote:

—Omoína bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairede” raitimaci. Naimaci díbeimo iñeno. ⁹ Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue. ¹⁰ Daje nairai jiaie nairai diga jobairite. Daje gobierno jiaie gobierno diga jobairite. ¹¹ Eo aillena ñuisañuai suite. Diga illanomo cominidi aime guitimaci. Duicuai eo iite. Monamo comini diga jacirede rana cioitimaci. ¹² Bie isoide rafue nia suiñenia, cuena ñinoñedino omoína llogidoitimaci. Omoína gaitatajanona, omoína duere finoitimaci. Naimaci ofiracomo omoína uitimaci. Cárcelmo omoína jonetimaci. Cuemo omoi duilla jira, omoi duere sefuillena, illaicomini dine omoína uitimaci. ¹³ Naie facaiseconi cue rafuena naimacimo lloitomoi. ¹⁴ Omoi abina omoi riidoia, omoi llua uicodo jarire iñeno. ¹⁵ Omoi raise lollena, omoína canoiticue. Uñoracínona omoimo iiticue. Iemona omoi díbeimo iñedino o uaina uaitanitimaci.

¹⁶ Cuena ñinotomoi; ia ailluena cuena ñinoñeitimaci. Cuemo omoi duilla jira, omoína enoitimaci. Iemona dajerie mootiaí, dajerie eitiaí, dajerie amatiaí, dajerie nabaiñiaí

omoina llogidoitimaci. Omoimona dajeriena meineitimaci. ¹⁷ Cue cominina omoi illamona, nana nairai omoina enoitimaci; iadedi cuena fainonocaiñedimie ja muidomo monamo jaca iite. Naimiena jillotaiticue. ¹⁸ Omoi ille dinori Jusiñamui omoina raise sedaite. ¹⁹ Duere omoi sefuia, cuena fainonocaiñeno jai. Ja muidomo monamo jaca iitomoí. ²⁰ Jerusalén fuedo ruicabene icaifona soldaduai ia, ie judaille facaiseconi iairei iite. ²¹ Naiemona omoi jillobillena, duere omoi sefuiñellena, Judeamo omoi illamona, aneduai dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiñeno. ²² Ie facaina lloraini micoriai cuegafuiai suillanona, naie facaiseconi naimiena ñnoñedinomona Jusiñamui ibana oite. ²³ Naie rafuemona jillobillena, naie facaise urueside riño duere sefuite. Uruena nia jirode riñodi jiai duere sefuite. Naie facaise comini duere sefuitimaci. Llegi cacaitimaci. ²⁴ Lloebi diga meinecana uitimaci. Jiaie nairai dine naimacina jaiadoitimaci. Judfuañedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt 24.29-35, 42-44; Mr 13.24-37)

²⁵ Jesús nia llofueete:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monailai eo baguamona, comini comeciái eo jarire iitimaci. ²⁶ Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fiodaitimaci isoi iitimaci. ²⁷ Naie facaise uillie metodo cue billena nana comini cioitimaci. Ebire biiticue. Naimacina cue sedallena, illaimana biiticue. ²⁸ Bie isoide rafue suia, omoina cue jilloitajaibillirui iairei illa jira, cue billiruimo raise ocuiri.

²⁹ Iena omoi raise uiñollena, bie rafuena omoimo lloiticue. Higuera railla riaramo omoi comeciaina faca. Nana amenamo comeciaina faca. ³⁰ Bie eniruemo amena firuillamona, fiemona raire illana uiñotomoí. ³¹ Ie isoide. Bie rafue ico suia, Jusiñamui ie cominina raire sedajana uiñoitomoí. ³² Uanaicinona omoimo lloiticue. Nana bie rafue suille facaiseconi bie nairai nia iite. ³³ Mona fuite. Enirue jiai fuite; iadedi cue lloga uai jaca suite. ³⁴ Jifailacinona omoi ebirui raillano, omoi ecimo ite rana ebirui raillano, abina rairuicana jai. Cuena ñnoñedinona duere finollena, ebena abido biiticue. ³⁵ Cue bia, illaimana cue illamona, nana cominimo juez isoi lloiticue. ³⁶ Ie jira nagarui abi rairuicana jai. Naie duere sefuille facaise omoi jilloillena, Jusiñamuimo jii. Ja muidomo monamo cue diga jaca iitomoí —llote.

³⁷ Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide. ³⁸ Nagarui jitiramo naimiena cacareillena, Jusiñamui jofomo comini bisoidimaci.

22

Judúuai illaicomini Jesúna gaitallena siadua rafue

(Mt 26.1-5, 14-16; Mr 14.1-2, 10-11; Jn 11.45-53)

¹ Naie facaise pascua railla rafue iairei ite. Naie facaise llomenico guille rafue jiai ite. Naie rafue ia, siritate rana jaca guiñedimaci. Egiptomona naimaci jaiagai jillobillana comecillena, naie rafue ite. ² Judúuai illaicomini Jesúna meineiacadimaci; iadedi cominina jaciruillanona, naimiena nia meineñedimaci.

³ Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imie. ⁴ Jusiñamui diga nanoca ñairaini dine jaide. Jusiñamui jofona sedaraini dine jiai jaide. Jesúna gaitatallena, naimaci diga ñaiaide. ⁵ Iobillanona, naimiemo ucubena feaacadimaci. ⁶ Judas dinena:

—Jee —raite. Jesús diga ailluena comini iñena facaiseconi naimiena gaitatallena sedade.

Jesúdi ie fiodaille rafuena llua rafue

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Llomenico guille rafue illanona, judúuai comini toica llauda fauillarui ride. ⁸ Jesúsdi Pedro iaimai Juan diga oretajano, raite:

—Cai rafue guille uicodo finollesa omico jai.

⁹ Naimiemo jicanotiaimai:

—¿Ninomo naiena coco finuana jitaideo?

¹⁰ Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca. ¹¹ Jofo namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono. ¹² Ie mei omicomio afebebamo ite aillue cuartona acataite. Na raruia diga ite. Nainomo cai guille fino.

¹³ Jaidiaimai. Naimie llua isoi baitiaimai. Pascua rafue guille finodiaimai.

¹⁴ Guille facaiseconi ia, Jesús ie llofueoicaigano diga nainomo guisaidé. ¹⁵ Mesamo guitimacimo, ie llofueoicaiganomo llote:

—Nia cue fioidaíenia, omoi diga bie rafue guillena eo jitaidecúe. ¹⁶ Ie cominina cue Moo íco sedalle facaise ia, nana bie rafue fuite.

¹⁷ Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai llino. Biemona nana dajena omoi jiro. ¹⁸ Omoína bene dane iese caimare nabaiñeiticúe. Cue Moo sedajanomo omoi diga íco cue ia, nainomo omoína dane iese caimare marena nabaiticúe. —Iena jirodimaci.

¹⁹ Llomenicono llinuanona, Jusiñamuimo iobillacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioidaiticúe. Cue abimo omoi comecina facajano, iena guiño.

²⁰ Naimaci guilla fuilla mei, jiroracomo vino diga dane oruitajanona, naimacina jiroate. Raite:

—Cue fioidaillamona, dama cue diaillamona, jeacino anamona jilloitomoí. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

²¹ Jesús llote:

—Ero, cuena gaitataitimie cai diga guite. ²² Monamona billanona iimana jaidicúe. Jusiñamui jitailla isoi jai jaiocaidicúe; iadedi Jusiñamuimona cuena gaitataitimie eo duere sefuite.

²³ Iemei: “¿Nimie Jesúsna gaitatalle?” daní coniniri siadoside.

Naimaci moto imiena bu ille rafue

²⁴ Ie facaise coniniri siaduana raitimaci:

—¿Cai moto imiena bu ille?

²⁵ Iena cacajanona, Jesús raite:

—Naimaci jitailla ra finollena, judúuaiñedino illaimaiaidi naimaci anamo itinona oucibade. “Cai anamo itinona canocabidicai” raitimaci; ²⁶ iadedi omoimo iese iñede. Omoi moto itimie omoi moto imieñedimiena jailla. Omoimona bu imiena iacania, omoi mullaimana naimie jaicabillasa. Omoimona bu imiena iacania, omoína naimie canocana jaicabillasa. ²⁷ Ero, jiaie rafuedo iena lloiticúe. Naimiena ecallena, naimiena canollena, patrón anamo ie mullaiaí itimaci. Naimaci baifemo patrón illamona, naimacina canollena, ie mullaiaí facaina maiñede. Cue anamo itomoí; ia omoína canollena, omoi mullaíma isoi iticúe. ²⁸ Birui duere cue sefuidicúemo, cuena fainonocaiñedomoí. ²⁹ Cue Moo cuena illaimana jai itatate. Omoína fetodicúe, ³⁰ jiairuido cue illaíma illa facaiseconi cue ecimo omoi caimare marena iocire illena. Nainomo omoi judúuai doce nairaiaína sedaitomoí.

Jesúdi Pedro naimiena januana llua rafue

(Mt 26.31-35; Mr 14.27-31; Jn 13.36-38)

³¹ Jesús llote:

—Simón Pedro, ero, Taifedi Jusiñamuimo ona jıcanote, o ramo faillena; ³² iadedi ori jai jıdicue, cuena nia ĩnocana o jaillena. İco cuena raise o ĩnoñena mei, cue dıbeımo o comeci iuai dane o meidoia, iemona jiaie creyentiaı comeciaina ocuiñotaitio.

³³ Pedro uai ote:

—Nama, cárcelmo o ia, nainomo jiaı iticue. O fiodaia, jiaı fiodaiticue. Ona faınonocaiñeiticue.

³⁴ Jesús uai ote:

—Pedro, jıtıramo ĩtava nia ñaiñenia, dacaiño amani cuena janoıtio.

Jesús fiodailla facaise iairei illa rafue

³⁵ İe llofueoicaiganomo Jesús llote:

—Omoımo ite rafuena uiñoiacadicue. Cue rafue llollena, navui omoına oredicue. “Ucubena uiñoeno, bolsa uiñoeno, meıdolle zapatos uiñoeno” omoımo lloticue. Naie facaiseconi omoı, ¿bue rana jıtaidomoı?

Uai otımacı:

—Cai buena jıtaiñedıcaı.

³⁶ Jesús raite:

—Birui mona omoı duere sefuitomoı. İe jıra abına rairuıcana jai. Birui ucube omoımo ia, nine omoı jaia, iena uiño. Bolsa bumo ia, iena uiño. Abına riıdollena, omoımo lloebi ĩñenia, janore ĩnıroına feca, lloebi ollena. ³⁷ Cuenajaie cıegafııai ja suite. İsaías mıcorı cuena jaie cıega: “Maraiñede rafue fınoraima isoi naimie duere sefuite”.

³⁸ Raitımacı:

—Ero, Nama, mena lloebi caımo birui ite.

Jesús uai ote:

—Mena ia, macaıbaite.

Jesúdi Getsemanımo Jusiñamuimo jııa rafue

(Mt 26.36-46; Mr 14.32-42)

³⁹ Guille mei, ie llofueoicaıgano dıga, Jesús jıno jaide. Olıvos railla anedumo naimie jaisoılla isoi jaide. ⁴⁰ Nainomo rıa, naimacımo llote:

—Taife omoına ramo faı raıllano, iena omoı ĩnoñellena, Jusiñamuimo jıı —llote.

⁴¹ Naimie janorede nofıci bai faıa uaılla dınorı bai jaide. Caiñıci ifodo ana raıta, Jusiñamuimo jııde:

⁴² —Ore Moo, o jıtaıa, cue duere sefuıllamona cuena jıllota. Cue jıtıaılla isoi cuena fınoñeno; iadedi o jıtıaılla isoi cuena fıno.

⁴³ Naimie comecına ocuiñotallena, ie facaiseconi monamona Jusiñamui jııenıci bite. ⁴⁴ Jesús comeci jarıre illamona, naimie rıoci fııtemo, dıfai dıruena enıruemo uaide. ⁴⁵ Jııa mei, ie llofueoicaıgano dıne abıdo bite. Ocosınaıllamona, jai ĩnıdımacı. ⁴⁶ Naimacımo jıcanote:

—¿Bue ñellena ĩnıdomoı? Mai cası. Taife ramo omoına faı raıllano, iena omoı ĩnoñellena, Jusiñamuimo jıı.

Jesúna gaitalle rafue

(Mt 26.47-56; Mr 14.43-50; Jn 18.2-11)

⁴⁷ Nıa Jesús lloıa, dıga comıni naimie dıne bıtımacı. Judas İscariote mıcorı naimacına ifode. Naimıedi Jesús llofueoicaıgamie. Naimıena llıbanollena. Jesús dıne iairei bite.

⁴⁸ Jesús raite:

—Judas, cuena llıbanuanona, cuena gaitataıacadıo.

⁴⁹ İe llofueoicaıgano naie rafuena jai cıodımacı. Jıcanotımacı:

—Nama, ¿caı atıca lloebi dıga ona riıdoıtıcaı?

⁵⁰ İe facaise naimacımona damıedi Jusiñamui dıga nanoca ñairaima ie mullaıma ie nabei jefona jaıbonote. ⁵¹ Jesús dınenıa raite:

—Dama ite. —İe jefona naimie jetajamona, naimıena jıllotate. ⁵² Dıga illaıcomıni Judas dıga Jesús dıne bıtımacı. Naimacımo Jesús llote:

—Fiiriraimadicueta cuena omoi gaitajaibilla. Omoi lloebina atidomoi. Omoi butaral-luna jiai atidomoi. ⁵³ Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

*Pedro*di Jesúna janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade. ⁵⁵ Nairaibirí motomo irai bonua mei, ana raidimaci. Pedro naimaci diga jiai raide. ⁵⁶ Nainomo ite mullaiñodi irai bouamona, Pedromo eruaillano raite:

—Bimiedi Jesús diga jaisoidimie.

⁵⁷ Pedro abi janote:

—Naimiena uiñoñedicue.

⁵⁸ Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

⁵⁹ Daje hora illanona, jiaimie raite:

—Bimie galileo imiena jira, bimiedi Jesús diga ua jaisoidimie.

⁶⁰ Pedro dinena raite:

—O lluana uiñoñedicue. —Ieconí naimie ñaitemo, itava ñaite. ⁶¹ Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “itava nia ñaiñenia, dacaño amani cuena janoitio”. ⁶² Pedro jino jaillanona, eo sunaillamona, eo eede.

Jesúna jifanodua rafue

(Mt 26.67-68; Mr 14.65)

⁶³ Ie facaise Jesúna gaitadino naimiena jifanododimaci. Naimiena jiai fatimaci. ⁶⁴ Ie uisina maitimaci. Llotimaci:

—Siño jitodiosa, ¿bu o faja? caimo llono.

⁶⁵ Iese jifanodocana uitimaci.

Jesúdi judíuai illaicomini dine illa rafue

(Mt 26.59-66; Mr 14.55-64; Jn 18.19-24)

⁶⁶ Monaidemo judíuai illaicomini ofidimaci. Jusiñamui diga nanoca ñairaini ofidimaci. Moisés micorí llogacino llofueraini ofidimaci. Naimaci dine naimiena gaitadino Jesúna uitimaci. Naie illaicomini dinena raitimaci:

⁶⁷ —Ua Cristodiona, iena caimo llono.

Jesús uai ote:

—Omoimo iena cue lloia, iñoñeitomoi. ⁶⁸ Buena omoimo cue jicanoia, cue uaina oñeitomoi. ⁶⁹ Monamona jaie billanona, iimana jaidicue. Cuena omoi meiniamona, illaima isoi Jusiñamui ecimo raire iiticue.

⁷⁰ Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

⁷¹ Iena cacajano, raitimaci:

—Naimie lluana jai cacadicaí. Jiaie comini naimiena llogiduana jai jitañedicai. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

Pilato dine Jesús illa rafue

(Mt 27.1-2, 11-14; Mr 15.1-5; Jn 18.28-38)

¹ Judíuái illaicomini naidacaillanona, Pilato dine Jesúna uitimaci. ² Naimiena llogidotimaci:

—Cai cominimo marañedifuenta lloste. Gobiernomo ucubena cai fecajana rairuide. Naimie jiai raite: “Cristodicue. Illaimadicue”.

³ Pilato dinena naimiemo jicanote:

—¿Judíuái comini illaimadio?

Uai ote:

—Jii, judíuái illaimadicue.

⁴ Jusiñamui diga nanoca ñairainimo Pilato lloste. Nainomo bite cominimo jiai lloste:

—Ñicinodi naimiemo iñede.

⁵ Uai otimaci:

—Gobierno joreño comini comeciai jeare feidocana naimie uite. Nana Judeamo uite. Galileamona tainede. Bene jai caimo ride.

Herodes dine Jesús illa rafue

⁶ Iena cacajano, naimie llogidotinomo Pilato jicanote:

—¿Naimiedi Galilea imie?

⁷ —Jii —raitimaci. Galilea enirue illaima Herodes. Naie facaiseconi Jerusalémo naimie illa jira, naimie dine Pilatodi Jesúna orede. ⁸ Jesúna Herodes cianona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiai cioacade. ⁹ Jesúmo ie finoca rafuena are jicanote; iadedi Jesús dinena uaina oñede. ¹⁰ Ie facaiseconi judíuái illaicomini Jesúna riire llogidotimaci. ¹¹ Herodes ie soldaduái diga naimiena eo jeare ñaitimaci. Illaima jitauga iniroina jitatatimaci. Ie mei Pilato dine naimiena abido orede. ¹² Iemona nairuido Herodes Pilato diga nabairite. Jai conimana enoidiaimaiai.

Pilatodi Jesús fiodaillana llua rafue

(Mt 27.15-26; Mr 15.6-15; Jn 18.39-19.16)

¹³ Pilatodi judíuái illaicominina, nainomo ite comini diga, uaidote. ¹⁴ Raite:

—Bimie cue dine atidomoi. Raitomoi: “Comini comeciai feidocana naimie uite”. Naimiemo jai jicanoticue; ia naimiemo nicinodi iñede. ¹⁵ Herodes cue dine naimiena como abido orede. “Naimiemo nicinodi iñede” jiai raite. Naimiena cue meinellena, naimie jaca nicinona finoñede. ¹⁶ Ie jira naimiena cue sechedotajanona, naimiena oni oretaiticue.

¹⁷ Naie rafue facaiseconi naga año cárcelmona damiena jino jamai oretauide. ¹⁸ Pilato llua cacajano, nana comini ado cuiriidimaci:

—¿Naimiena oni uiño, naimiena meinellena! ¡Barrabás cárcelmona jino oreta!

¹⁹ Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. ²⁰ Jesúna naimie jamai oretaiacana jira, comini diga Pilato dane ñaite; ²¹ iadedi cuiriidimaci:

—¿Naimiena corai! ¡Naimiena meine!

²² Pilato dane jicanote:

—¿Nie isoide marañede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuiriidimaci:

—¿Naimiena corai! —Ja muidomo Pilato dinena:

—Jee —raite. ²⁴ Naimaci jitailla isoi Pilato fairiote. Jesúna meinellena lloste. ²⁵ Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt 27.32-44; Mr 15.21-32; Jn 19.17-27)

²⁶ Jesúna soldaduái oni uitemo, Simón raillamie diga dafaifidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaicaida

sonotate. ²⁷ Ailluena comini Jesúna racadimaci. Ailluena riñoniai eo eecana jaisite. ²⁸ Iena cacajano, Jesús naiñaiñuui dine dobaidacaida, naiñaiñuaimo llote:

—Jerusalén itañaiñuui, cue facaina eeñeno; iadedi omoi facaina mai omoi ee. Omoi urui ai facaina mai omoi ee. ²⁹ Ero, jairuido duere sefuillemona comini raitimaci: “Oiniñuui jiaie riñoniai baifemo duere sefuiñena jira, marena itimaci”. ³⁰ Jusiñamui riicaillafuemona jilloiacanamona, comini jiai raitimaci: “Aneduai caimo jaicorillana jitaídicaí”. ³¹ Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

³² Naie iaímaiaína meinellena, mena maraiñede iimana jiai uitimaci. Gobierno llogacínona iinoñediaímaiaí. ³³ Ifocoraína eruaila illanomo naimaci ria, Jesúna coraidimaci. Naie maraiñede iaímaiaína jiai coraidimaci. Damie Jesús nabeimo. Jiaímie Jesús jarifebeimo. ³⁴ Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanu soldaduai facasite.

³⁵ Ailluena comini eruaidimaci. Judúuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Niese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶ Soldaduai naimiena jiai jifanododimaci. Ie abi isirena cacaiñellena, naimiemo vino fecajanona, ³⁷ raitimaci:

—Judúuai illaímadiodena, fiodaillamona dama o abina jillota. —Naie vino Jesús jiroñede.

³⁸ Jesús ifogi afeconi rabcimo Pilato cuetatate: “Bimiedi judúuai comini illaíma”.

³⁹ Jesús díga coraíca iaímaiaímona damie naimiena taigode:

—Jusiñamuimona bitiodena, nia fiodaíñenamona dama o abina jillota. Cocona jiai jillota.

⁴⁰ Jiaímiedi naimiena lletade:

—¿Bue ñellena bimiena taigodio? ¿Niese jearede rafuena nia finoacadío? Ja fiodaitio. Iemei Jusiñamui uicomo ja iitio. ¿Niese Jusiñamui uicomo o illena jaciruiñedio?

⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesúmo llote:

—Illaímana o illa facaise cuena começi.

⁴³ Jesús uai ote:

—Uanaicino lloticue. Birui cue díga cue Moo illanomo iitio.

Jesús fiodailla rafue

(Mt 27.45-56; Mr 15.33-41; Jn 19.28-30)

⁴⁴ Jitoma naidai jai itemo, daje amani horas mona jitibicaide. ⁴⁵ Jitoma raise lligaiñoñede. Jusiñamui jofo ie fetaca iniroife ana anaba jillacimo metodo menafe cuararide. ⁴⁶ Jesús ado llote:

—Ore Moo, cue joreña feiño. —Ie mei naimie jai fiodaite.

⁴⁷ Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaillana cioidimaci. Ie mei eo sunaillamona, jogobemo fairuanona, jofomo abido jaidimaci. ⁴⁹ Jesús nabaiñiaí bie rafuena aarena cioidimaci. Galileamona bite riñoniaí bie rafuena aarena jiai cioidimaci.

Jesús raiafomo jonia rafue

(Mt 27.57-61; Mr 15.42-47; Jn 19.38-42)

⁵⁰⁻⁵² Pilato dine José raillamie jaide, Jesús abina jicallena. Naimiedi illaicomini. Maremie. Hinogamie. Jesúna meiniana jitañede. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride. ⁵³ Pilato: —Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raiñenafomo jonete. ⁵⁴ Nairui viernes. Sábadorui rille jai iairei illa jira, Jesús abina raiafomo raire jonete. ⁵⁵ Galileamona navui bite riñoniai racadimaci. Raiafona ciodimaci. Naimie abi finuana ciodimaci. ⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

24

*Jesús fiodaillamona jillua rafue**(Mt 28.1-10; Mr 16.1-8; Jn 20.1-10)*

¹ Domingo jítiramo monaidemo, naie riñoniai raiafomo jaidimaci, iñaiñuái finoca soride rana uillena. ² Raiafo ibailla nofici oni joillana ciodimaci. ³ Fo jaidemo, Jesús abina cioñedimaci. ⁴ Uainicaidimaci. Ieconi menamie naiñaiñuái ecimo bairediaimaiai. Iaimaiai iniroi eo quenirede. ⁵ Iaimaiaina jacinailamona, ifogi ana jítadacaidimaci. Naie iaimaiai dinena jicanote:

—¿Bue ñellena fiodaitimie illanomo cajedimiena jenodomoí? ⁶ Galileamo navui naimie omoimo llogacinona comeciñedomoi. ⁷ Naimie raite: “Monamona billanona, imana jaidicue. Jusiñamui jitailla jira, marañede rafue finoraini anamo iiticue. Cuen coraitimaci. Darui amani illanona, fiodaillamona jilloiticue” raite.

⁸ Iemona ie llogacinona jai comecitimaci. ⁹ Raiafomona abido jaidimaci. Ie once llofueoicaiganomo naiñaiñuái ciua rafuena llotimaci. Naie llofueoicaigano diga itinomo jiai llotimaci. ¹⁰ Naie riñoniaimona María Magdalena ite. Juana ite. María ite. Naiñaiñodi Jacobo ei. ¹¹ Naie riñoniaidi iena llotimaci; iadedi ie rafuena cacadinodi iena inoñedimaci.

—Jamaifuena ñaitomoi —raitimaci.

¹² Iena cacajano, Pedro aisicana raiafomo jaide. Nainomo ria, ana jítadacaida, fo erodate. Useroi joillana ciode. Iemo ie comecina facajano, jofomo abido jaide.

*Mena llofueoicaiganomo Jesús bairia rafue**(Mr 16.12-13)*

¹³ Jesús jilluarui mena llofuega iaimaiai Emaús railla nairaimo jaidiaimaiai. Jerusalémona ñibai once kilómetros ite. ¹⁴ Nana Jesúmo suide rafuena ñaiano jaidiaimaiai. ¹⁵ Iaimaiai ñaianona, Jesús iaimaiai diga dafaifillanona, iaimaiai diga jaide. ¹⁶ Jusiñamuidi iaimaiaina naimiena uiñotañena jira, naimiena uiñoñediaimaiai. ¹⁷ Iaimaiaimo Jesús jicanote:

—¿Buena ñaitomico? —Ieconi naidadatiaimaiai. Sunaitiaimaiai. ¹⁸ Naie iaimaiaimona damiedi Cleofas. Naimie uai ote:

—¿Niese Jerusalémo birui suide rafuena uiñoñedio? Ñibai como ridio. Nana jiai comini iena uiñotimaci.

¹⁹ Uai ote:

—¿Nie isoide rafue suide?

Uai otiaimaiai:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofue. Jusiñamui naimiedi maremie. Cominimona naimie maremie; ²⁰ iadedi cai illaicomini naimiena gaitatatimaci. Naimiena cruzmo coraitatimaci. ²¹ Jusiñamui naimie cai dine orecamiemo comecina facadicoco. Naimie cai illaimana illemo ocuridicoco; ia naimie jai fiodaite. Naimie fiodaillamona darui amani jai ite. ²² Cai cominimona dajerie riñoniaibirui caina jacinaitadimaci. Jítiramo Jesús raiafomo jaidimaci; ²³ iadedi naimie abina cioñedimaci. Abido naimaci bia: “Jusiñamui jaienisaína ciodicai” raitimaci. Naie jaienisaí naimacimo llote: “Naimiedi

caje”. ²⁴ Iemei caimona dajerie raiafomo jaidimaci. Riñoniai llua isoi cioidimaci. Jesús abina cioiñedimaci.

²⁵ Jesús dinena uai ote:

—Abi uiñoñedomico. Nana Jusiñamui facaina lloraini micoriai cuegafuiaina iñoiacaiñedomico. ²⁶ Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

²⁷ Iemei Jesús iaimaiaina llofuite. Moisés micori cuegafuiaina llofuite. Jusiñamui facaina lloraini micoriai cuegafuiaina jiai llofuite. Nana Cristona cuegafuiaina llofuite.

²⁸ Emaús dine iaiei naimaci ria, Jesús nia jaiacademo, ²⁹ naimiena caididiaimaiai. Raitiaimaiai:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaimaiai diga fiebillena fo jaide. ³⁰ Nailli guitimacimo, llomenicono Jesús llinuano, Jusiñamuimo iobillacinona fecade. Iena tairuano, iaimaiaimo fecade. ³¹ Jusiñamui jitailla jira, ieconi Jesúsna uiñotiaimaiai. Iemei iaimaiaimona naimiena jai cioicaiñena.

³² Daimaiai ñaitiaimaiai:

—Coco diga naimie ñaia, coco comeci caimare ite.

³³ Naie dacaiño Jerusalémo abido jaidiaimaiai. Jesús llofueoicaigano naimaci nabaiñiai diga danomo illana baitiaimaiai. ³⁴ Iaimaiaimo llotimaci:

—Cai Nama fiodaillamona jai jillode. Simón Pedromo jai bairede.

³⁵ Ie mei naisonaa iaimaiai jailla rafuena llotiaimaiai:

—Cai guitacimo, naimiena uiñotico —llotiaimaiai.

Jesús ie llofueoicaiganomo bairia rafue

(Mt 28.16-20; Mr 16.14-18; Jn 20.19-23)

³⁶ “Jesúna ciodicoco” llotiaimaiaimo, ie llofueoicaigano motomo Jesús bairede. Llote:

—Jai biticue. Uri omoi i.

³⁷ Naimiena ciuamona, jacinaitimaci. “Joreño ciodicai” comeciaina facajanona, jiai jaciruitimaci. ³⁸ Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana iñoñedomoi? ³⁹ Cue onollimo eruai. Cue eillimo eruai. Jesús dice. Cuena jeta, raise uiñollena. Cuemo llicisi ite. Cuemo illaici ite. Jamai joreño isoiñedicue.

⁴⁰ Iena llua mei, coraiafona naimaci cioillena, ie onolli ie eilli diga acatate.

⁴¹ Iobiacadimaci; iadedi nia raise iñoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaina fecadimaci. ⁴³ Iena feñuanona, rite. Iena cioidimaci. ⁴⁴ Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

⁴⁵ Naie facaiseconi naimacina naie cuegafuiaina raise uiñotade. ⁴⁶ Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite. ⁴⁷ Naimie muidona comeciiai iuai meidua amona, Jusiñamui naimaci jeacinona oni dotaite. Naimie rafue nana nairaimo damierie lloitimaci”. Omoimo buena lloiticue. Cue rafuena lloillena, Jerusalémo taineitomoi. ⁴⁸ Bie rafuena ciodomoi. Iena lloitomoi. ⁴⁹ Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feñolle dinori. Cue rafuena omoi lloillena, naimie Joreño omoi comeciaina ocuiñotaite.

Jesús monamo jailla rafue

(Mr 16.19-20)

⁵⁰ Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote. ⁵¹ Iena naimacimo lluanona, monamo jaide. ⁵² Jerusalémo eo caimare abido jaidimaci. ⁵³ Jusiñamuimo iobillacino fecajano, Jusiñamui jofomo nagarui itimaci. Mai. Macaibaite. Lucadicue.

JUAN JESUCRISTO ENIRUEMO ILLA RAFUE CUIAFUE

Jesucristo rafue iese tainede

¹ Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uiñotade. Jusiñamuimo jaca duide. Naimiedi Jusiñamui. ² Jusiñamui diga jaca nano ite. ³ Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. ⁴ Naimie muidona iticai. Naimiena cai iñnuamona, jaca iiticai. Lligaiñora diga rana cai ciua isoi, caina Jusiñamuina uiñotade. ⁵ Naimiena iñoñedino jitiredinomo itimaci isoidimaci. Naimaci comeciaini jitirede. Ie uaido naimaci comeciaina lligaiñote, naimaci comeciaino ite jeacino oni jaillena.

⁶⁻⁷ Naimaci comeciaina lligaiñotimiena lollena, Juan micori llucinodo Jusiñamuina nana comini iñnollena, Jusiñamuidi Juan Bautista raillamie micorina oretate. ⁸ Juan naie lligaiñoñedimie; iadedi Juan naimiena lluaibite. ⁹ Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. ¹⁰ Naimie muidona comini comuidimaci; iadedi naimie bene billa meinoconi, comini dinena naimiena uiñoñedimaci. ¹¹ Ie nairai illanomo naimie ride; iadedi nana cai nairai naimiena feiñoñedimaci. ¹² Damierie naimiena feiñotimaci. Naimiena iñnotimaci. Ie uaido naimiedi naimacina Jusiñamui uruiaina itatate. ¹³ Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicai. Comini jitaillamona iena jaiñedicai. Buena cai finuamona iena jaiñedicai.

¹⁴ Iemo caina Jusiñamuina uiñotallena, Jusiñamui Jito comena jaide. Naie facaise cai comini motomo naimie ite. Cai cominina eo duenante. Uanaicinona llouide. Ie siño uaina uiñocana jaidicai. Jusiñamui dajede ie Jitona ciodicai. ¹⁵ Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeiciñenia, naimiedi jaca ite —llote.

¹⁶ Jesucristo caina eo duenaillamona, birui caina eo canocabide. ¹⁷ Moisés micori Jusiñamui uaina jaie llote; iadedi iemona Jusiñamui caina duenaillana jaie raise uiñoñedicai. Jesucristo llamona Jusiñamui caina duenaillana jai raise uiñoticai. Naimiemona uanaicinona jai raise cacadicai. ¹⁸ Jaca buna Jusiñamuina cioiñede; iadedi dajede ie Jito caina naimiena uiñotade. Ie Moo diga danomo illamona, Jesús naimiena uiñote.

Juan Bautista micoridi Jesúsna llua rafue

(Mt 3.11-12; Mr 1.7-8; Lc 3.15-17)

¹⁹ Jerusalémona Juan micori dine judíuai illaicominidi Jusiñamui diga ñairainimona dajerie oredimaci. Jusiñamui diga ñairaini canorainimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai jilloitaraima biite raillamiemo ocuridicai. Cristo raillamie billemo ocuridicai. ¿Odi naimiedío? —raillanona jicanotimaci. ²⁰ Naimie dinena janoñede; ia:

—Imieñedicue —raite.

²¹ Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina lloraíma ico billena jaie llote. ¿Odi naimiedío?

Juan dinena raite:

—Ieñedicue.

²² Dane jicanotimaci:

—¿Budío? Caimo llono, cai oretatinomo cai lollena. ¿Ñiese naimacimo ona lloticai?

²³ Juan dinena raite:

—Jofue iñenanomo ado llotimiedicue. Isaías micori jaie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoi feiñollena, omoi comeciai raise finollena ñaiticue.

²⁴ Juan dine bitinodi fariseuai comini. ²⁵ Nia jicanoiacadimaci:

—Odi cai Jilloitaraimañenia, o Elíañenia, o Moisés micori llotimieñenia, ¿bue ñellena cominina bautizadio? ¿Nie isoide uai omo ite? ¿Ninomona o uaina otio?

²⁶ Juan dinena uai ote:

—Cominina bautizadicue; iadedi omoi motomo omoi uiñoñegamie jai ite. ²⁷ Naimie cue ifo meidoite. Cue baifemo faite. Jamai bue cue isoilla jira, naimie illafomo cue riñena jira, naimiena canonidicue.

²⁸ Naie rafuedi Betábaramo suide. Jordán railla ille ruicafebeimo ite. Nainomo Juan bautizaude.

Juan micori Jesúsna dane llua rafue

²⁹ Ie areruido Juan micoridi Jesús naimie dine billana ciuano, naimiena raite:

—Ero, Jusiñamui Jito toica llauda mamecido jai bite. Cai jeacino facaina faga llauda ifomo Jusiñamui ie Jitona jai orede. Naimie fallemona comini jeacinona dotaite. ³⁰ Navui naimiena ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamai bue isoñede. Cue nia jeiciñenia, naimiedi jaca ite”. ³¹ Cue dine naimie nia biñenia, naimiedi cai Jilloitaraimana uiñoñedicue; iadedi cominina bautizallena bene iticue, cai cominimo naimiena llollena.

³² Juan jiai llote:

—Monamona ucugi isoi Jusiñamui Joreño ana billana ciodicue. Jesúsno baite.

³³ Naimiedi cai Jilloitaraimana nia uiñoñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitio. Cue Joreño baillamiedi cue Joreño omoimo fecaité”. ³⁴ Naie rafuena ciodicue. Iemona naimiedi Jusiñamui Jitonana lloticue.

Jesús ie fetocacaga comini ie rafue

³⁵ Ie areruido Juan micori llofueoicaiganomona menamie Juan micori diga ia, ³⁶ Juan micori Jesús macarillana ciuano, raite:

—Ero, Jusiñamui Jito toica llauda mamecido jai bite.

³⁷ Juan micori diga itiaimaiai naiena cacajano, Jesúsna racadiiaimaiai. ³⁸ Jinafo dine erodajanona, Jesús iaimaiaina ciode. Iaimaiaimo jicanote:

—¿Buena jitaidomico?

Iaimaiai dinena uai otiaimaiai:

—Rabbí, ¿ní o jofo? ¿Ninomo itio? —uai otiaimaiai. Rabbí oni dobañuamona: “Llofueraima raillamie”.

³⁹ Jesús nai iaimaiai uaina ote:

—Mai. Cue diga bi, omico uiñollena. —Ie jira jaidiaimaiai. Jesús illanona ciodiaimaiai. Jitoma nia a illa jira, nairuido naimie diga fiebidiaimaiai. Jitirecaidemo oni jaidiaimaiai.

⁴⁰⁻⁴¹ Naie iaimaiaimona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai cominina Jilloitaraimana baiticue. Cristo raillamiena baiticue.

⁴² Ie mei Jesús dine naimiena uite. Jesús naimiena eo eruaillanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobañuacidi Pedro.

Jesús menamie uaidua raufe

⁴³ Ie areruido Jesús Galileamo jaiacade. Felipena baillanona raite:

—Cue llofuegamiena o jaillena, cue diga coco jaillesa, mai cue diga bi. ⁴⁴ Felipedi Betsaida nairai imie. Andrés iaimaiai Pedro diga daje nairai iaimaiai. ⁴⁵ Jesús naimiemo llua mei, Felipedi Natanaelna oni jenuaide. Higuera railla riará anamo naimiena baillanona, raite:

—Moisés micori jaie cUEgamiena jai baiticue. Jusiñamui lloraini micoriaidi naimiena jaie jiai cUetimaci. Naimiedi Jesús. Nazaret imie. Ie moodi José.

⁴⁶ Natanael naie nairaina uaitajanona raite:

—Nainomo mare comedi iñede.

Felipe dinena raite:

—Naie o uiñollena, cue diga mai bi.

⁴⁷ Jesúmona iaimaiaia iaire ia, Jesús dinena llote:

—Ero, buna jifueñegamie billa. Nanoca Israel imie bite.

⁴⁸ Natanael dinena uai ote:

—¿Bu cuena llogao? ¿Niese cuena uiñotio?

Jesús uai ote:

—Felipe ona ailli nia baiñenia, higuera railla riará anamo o illana jai uiñoticue.

⁴⁹ Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

⁵⁰ Jesús dinena uai ote:

—Amena anamo o illana cue uiñua jira, cuena iñotio. Diga siño rafuena ciojítio. Bie rafue baifemo finuana ciojítio. ⁵¹ Jusiñamuimona billanona, iimana jaidicue. Uanaicino omo lloticue. Mona ecorillana o cioia, Jusiñamui jaienisai cue dine billena cioitio. Cuemona abido jaillena jiai cioitio.

2

Jinuimona Jesús vino finua rafue

¹ Menarui illanona, Galileamo Canámo iima ie ai uarafue ite. Rafue nama uaidua jira, nainomo Jesús ei jaide. ² Jesús jiai uaidoga. Ie llofueoicaiganodicaia jiai uaidogacai. ³ Vino cueillamona, Jesús ei Jesúmo llote:

—Vino jai iñede.

⁴ Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

⁵ Iemei ie eidi rafue nama mullaiaimo llote:

—Naimie omoimo lluaña fino.

⁶ Jinui nainomo eenollena, nainomo seis noficimona finoca llerodana raisoide. Naiemona jinuina ouidimaci. Marena illena, cai einamacia llua isoi, jofomo naimaci ria, naimaci abiaia llereuidimaci. Naga lleroda nibai cinco latas totaca. ⁷ Mullaiaimo Jesús llote:

—Naie llerodaiaia jinui diga oruita. —Pozomona jinui atiano, naie llerodamo toidimaci.

Iena finua mei, ⁸ Jesús naimacimo llote:

—Llerodamona janore jisa uanona, rafue nama dine uiño.

⁹ Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaia uiñotimaci. Jirua mei, ai otimie uaiduano, ¹⁰ raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

¹¹ Galileamo Canámo Jesúsdi siño rafuena nano finode. Iemona caina ie uai siñona uiñotade. Ie muidona naimie siño Jitonana iñoticai.

¹² Rafue fuilla mei, Capernaumo Jesús ie ei diga, ie amatiaia diga, ie llofueoicaiganodicaia diga jaide. Nano nigarui nainomo iticai.

Jusiñamui jofomona Jesúsdi rana fecarainina dotaja rafue

(Mt 21.12-13; Mr 11.15-18; Lc 19.45-46)

¹³ Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite. ¹⁴ Rillano, Jusiñamui jofomo diga rana fecarainina ciode. Ucube ollena, nainomo juraretaiaia, toica llaudaiaia, ucugiaia fecauidimaci. Ucubena meidorainidi jiai itimaci. ¹⁵ Naimaci ocainiaia diga naimaci jino

jiullena, rao Jesús uanona, iena lleride. Naimaci ucubena judaide. Mesaiaia oni caitade.

¹⁶ Ucugiaina fecarainimo llote:

—Omoi ucugiaina jino uiño. Cue Moo jofomo ra feca-fecajana jitaiñedicue —llote.

¹⁷ Iemo Jusiñamuina lloraini micoriai ciegafuiaia jai comeciticaí. Iese jaie cuega: “O jofona cue riiduamona, jiaíno cuena meinetaítimaci”. ¹⁸ Nainomo ite judíuai illaicomini dinena raitimaci:

—¿Nie isoide uaido naimacina jino oredio? Siño rafuena fino, siño uai omo illana cai uiñollena. ¹⁹ Jesús uai ote:

—Bicona judaí. Darui amani maijiamona iena dane nillana fuidoíticue.

²⁰ Dane raitimaci:

—Cuarentiséis años bicomio maijidimaci, iena finollena. ¿Niese iena darui amani illanona, iena dane nillana fuidoítio?

²¹ Iese raitimaci; ia Jesúdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite. ²² Jesús fiodaillamona naimie jillua mei, ie llofueoicaiganodicaí bie llucinona comeciticaí. Ie jira naie ciegafuena ñnoticaí. Jesús llucinona jiaí ñnoticaí.

Jesúdi comini comeciáimo iticino lluaana jitaiñena rafue

²³ Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina ñnotimaci. Coniniri raitimaci:

—Naimiedi cai Jilloitaraima. ²⁴ —Naganomo comeciáina naimaci facaja jira, naie cominina naimie uiñuamona, Jesús naimaci motomo iacaiñede. ²⁵ Naimaci comeciáimo iticinuaina naimie eo raise uiñua jira, comini rafuena naimiemo bu lluaana jitaiñede.

3

Nicodemo Jesús diga ñaia rafue

¹⁻² Judíuai illaicomini mona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoticue. Siño rafuena o finua jira, Jusiñamui uai omo illana uiñoticue.

³ Jesús dinena uai ote:

—Raise llotio; ia daje rafue omo lloiticue: Uanai omo lloiticue. Dane abido comonori o jeiciñenia, Jusiñamui ie cominina sedajanomo jaca initio.

⁴ Nicodemo abido jicanote:

—¿Niese eimie ie ei jeraimo dane iite? ¿Niese dane comonori jeiciite?

⁵ Jesús uai ote:

—Uanai omo lloticue. Jusiñamui ie comini sedajanomo o illena, dama o eimona jeiciñello. Jusiñamui Joreño do bu dane comonori comuitañenia, Jusiñamui ie cominina sedajanomo jaca iñeite. ⁶ Comemona cai comuitaia, jaca comedicaí; iadedi Jusiñamui Joreño do cai comuitaiadedi, Jusiñamui uruedicaí. ⁷ Omo dane lloiticue: Comonori jeicia. Ieri rajicaíño. ⁸ Iena o raise cacaillena, jiaie rafuedo iena lloiticue. Aifidi ie jitailla dine sairide. Iena cacadio; iadedi ninena billana uiñoñedio. Nine jaillana jiaí uiñoñedio. Ie isoide. Niese Jusiñamui Joreño cominina comuitajana jiaí uiñoñedio.

⁹ Nicodemo dane jicanote:

—¿Niese biedi dane iite? Raise cacaiñedicue.

¹⁰ Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloticue; ia iena raise cacaiñedio. ¹¹ Uanaicinona omo lloticue. Abi uiñuamona omo lloticue. Cue ciua rafuena lloticue; iadedi cue lluaana ñnoñedio. ¹² Bene ite rafuena cue lloia, iena ñnoñediota, monamo ite rafuena cue lloia, iena jiaí raise ñnoñeitio. ¹³ Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoticue.

¹⁴ Monamona biticue; ia amenamo fiodaiticue. Jofue iñenanomo Moisés micori jaio joreño amenamo jaie cuinade. Jaioniaí ainillamona comini fiodaiñellena iena cuinade.

Comini ie isoi jilloillena, ie isoi cuena coraitimaci. ¹⁵ Cue fiodaillamona bu cue uaina inoia, monamo jaca iite.

Jusiñamuidi cominina eo isiruilla rafue

¹⁶ Jusiñamuidi cominina eo isiruilla jira, comini dine ie damiede Jitona orede. Ie Jitona naimaci inollena, naimiena orede. Naimiena inuamona, monamo jaca itimaci. Jiai faifiñeitimaci. ¹⁷ Naimacina duere finotallena ie Jitona oreñede; iadedi naimaci jeacinomona jilloillena, naimiena orede. ¹⁸ Jusiñamuidi Jesús uaina inotinona jaca duere finoñeite; iadedi ie dajede Jitona uaina naimaci inoñena jira, Jusiñamui duere finollicino anamo jai itimaci. ¹⁹ Comini comeciaina lligaiñollena, Jusiñamui Jito bite. Jeacino comeciaino illana naimaci uifollena, naimaci comeciaina lligaiñuaibite; iadedi naimaci comeciai jitiredinomo iacana jira, jearede rafue naimaci finua muidona, naimiena jitaiñedimaci. Ie jira Jusiñamui naimacimo duere finollicinona anamo jai itimaci. ²⁰ Naimie finoca rafue bai raillano, naga jeacino finoraíma ie comeci lligaiñuana jitaiñede; ²¹ ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

Juan micoridi Jesúsna dane ñaia rafue

²² Digarui illanona, Jesús ie llofueoicaiganodicaí diga, Judea railla eniruemo macaricana jaidicaí. Nainomo diga irui fiebidicaí. Llofuiamona inotinona bautizacana uiticaí. ²³⁻²⁴ Nia cárcelmo inenia, ailluena jinui nainomo illa jira, Enón railla nairaímo bautizajonomo Juan micori jiai ite. Salim railla nairaí iairei ite. ²⁵ Naie facaise Juan micori llofueoicaigano judíuai imie diga bautizajana siadotimaci. ²⁶ Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

²⁷ Juan uai ote:

—Jusiñamui ie uai fecañedena, Jusiñamui facaina buna jaca buena finonide. ²⁸ Cue lluaña navui cacadomoi. Lloticue: “Cai comini Jilloitaraímañedicue. Cristoñedicue. Naimie billena cue lollena, Jusiñamuidi naimie uicomo cuena orede”. ²⁹ Jiaie rafuedo iena lloiticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiai iobide. Ie isoide. Comini cue dine navui biñoidimaci. Birui Jesúsna jaioidimaci. Naimiemo jai duidimaci. Iena cue cacajamona, ieri iobidicue. ³⁰ Comini naimie uai siñona uifluana jitaídicue. Comini cue jamai bue isoidimiena uifluana jiai jitaídicue. ³¹ Jamai comedice. Ie jira eniruemo ite rafuena llocabiticue. Jusiñamuimona Jesús billa jira, cai baifemo faite. ³² Ie Moo illanomo ciua rafuena llote. Ie Moo illanomo cacaja rafue jiai llote; iadedi eo janore comini naimiena inotimaci. ³³ Naimiena inotimiedi Jusiñamui uanaicinona lluaña raise uiflote. ³⁴ Jusiñamuidi ie Joreño ie Jitomo caidiñeno fecaja jira, naimie Jusiñamui uaina llocabite. ³⁵ Jusiñamuidi ie Jitona isiruete. Ie jira naga rafue naimiemo fecade. ³⁶ Bu Jusiñamui Jitona inoia, Jusiñamui illanomo jaca iite; iadedi bu naimiena inoñena, Jusiñamui illanomo jaca ineite. Jusiñamui riicaillafue anamo jai ite.

4

Galileamo Jesús jailla rafue

¹⁻² Naie facaise ailluena comini Jesúsna fueotimaci. Iemei naimie díbeido bautizadimaci. Naimacina naimie bautizallena, janore comini Juan dine jaide. Jesúsni bautizañede. Dani ie llofueoicaiganodicaí bautizadicaí. Fariseuai bie rafuena fidiano, iena Jesús uifluana jira, ³ Judeamona Galileamo Jesús cai diga dane abido jaide.

Samaria inaiño diga Jesús ñaia rafue

⁴ Galileamo jaillena, Jesúsni Samaria railla eniruete díbeido jaiacade. ⁵ Samariamo cai ria, Sicar railla nairaímo iairei rillano, daje pozomo ridicaí. Naie pozodi Jacob micori jaiie finoca. Jacob micori naie pozo illano ie jito José micorimo jaiie fecade. ⁶ Jitoma

naidai itemo, naie pozo fuemo cai rillano, Jesús ana raide. Are macarillanona, jafaici ote. ⁷⁻⁸ Jesús pozomo fiebicaille meinona, Sicarmo jaidicai, guille ollena. Cai jailla mei, Samaria inaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirrollesa.

⁹ Naiñaiñodi uai ote:

—Judfo imiedio. Samaria inaiñodicue. ¿Niese cuemo jinuina jicadio? —Naiñaiño iese raite, judfuaí Samaria comini diga ñairainina jira.

¹⁰ Jesús dinena dane uai ote:

—Jusiñamui omo feaacalle ra uiñotiodena, o diga ñaitimiena uiñotona, cuemo jaca itataite jinuina cuemo jicadio. Iemei omo iena fecadicue.

¹¹ Naiñaiño uai ote:

—¿Niese bie pozomona jinuina oitio? Eo ana ite. ¿Ninomona jaca itataite jinuina oitio?

¹² Cai usuma Jacob micori bie pozo caimo jaie iñonocaiga. Naiemona naimie micori jaie jirode. Ie uruiai micoriai jiai naiemona jirodimaci. Ie ocainaijai dajemona jiai jirodimaci. Cai usuma micori bai femo faiñedio —raite.

¹³ Jesús uai ote:

—Nagamiiai bie jinui jirua mei, dane jiroacanite; ¹⁴ iadedi cue fecalle jinuina jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiena jaca itataite.

¹⁵ Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

¹⁶ Jesús dinena uai ote:

—O jofomo mai jai. O ini diga abido bene bi.

¹⁷ Naiñaiño uai ote:

—Ininidicue.

Jesús dinena uai ote:

—Uanai llotio. Ua ininidio. ¹⁸ Cinco diga inina jai faicaidio. Birui o diga itimiedi jiai o iniñede. Uanaicinona ua llotio.

¹⁹ Iemona abina uiñocaillamona, naiñaiño dinena uai ote:

—Odi Jusiñamui ie lloraimadio. Iena uiñoticue. ²⁰ Cai jaiagai bai bene ite anedumo Jusiñamuina sedauidimaci. Ie jira nainomo Jusiñamuina nia sedadicaí; iadedi omoi judfuaí dinena raitomoi: “Jerusalémo Jusiñamuina cai sedauilla”.

²¹ Jesús dinena dane uai ote:

—Cuen a iino. Jiairuido bai bene ite anedumo cai Moona sedañeitomoi. Jerusalémo naimiena jiai sedañeitomoi. ²² Raise uiñoñeno Jusiñamuina biruido sedadomoi; iadedi cai nairaimona cai Jilloitaraíma illa jira, naimiena raise uiñuana sedadicaí. ²³ Jiairuido, ua birui, cominidi: “¿Ninomona Jusiñamuina sedaiticaí?” raillamo comeciaina facañeitimaci. Naimiaci comeciái jitaillamona, naimiaci illanomo Jusiñamuina ua sedaitimaci. Naie isoide comini naimiena sedajana Jusiñamui jitaide. ²⁴ Jusiñamui comeñede. Naimiedi jafaici. Omoi comeciái jitaillamona naimiena omoi sedajana jitaide.

²⁵ Riño uai ote:

—Cai Jilloitaraíma billena uiñoticue. Naimiedi Cristo. Naimie bia, nana bie isoide rafuena caina raise uiñotaite.

²⁶ Jesús raite:

—Naimiedicue.

²⁷ Ieconí abido ridicaí. Riño diga Jesús ñaia jira, rajicaidicaí; iadedi: “¿Buena naiñaiño jitaide?” raillano jicanoñedicaí. “¿Buena ñaitomico?” raillano jiai jicanoñedicaí. ²⁸ Ie lleroda pozo ecimo rainanocaida, Jesús llua isoi, naie facaise naiñaiño ie nairaimo abido jaide. Nainomo abido rillanona, naiñaiño cominimo llote:

²⁹ —Ailli pozo fuemo cue jaca cioiraininamie diga dafaifidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraíma. Naimiedi nibai Cristo.

³⁰ Ie jira Jesús dine ailluena comini bitimaci. ³¹ Naie riño ie nairai dine jailla mei, abido cai dine nia riñenia, Jesúsna raiticaí:

—Maestro, mai guiño.

³² Naimie uai ote:

—Cuemo guille illana uiñoñedomoi.

³³ Coniniri siadoticaí:

—Jai nibai bu ecajaibiga.

³⁴ Jesús uai ote:

—Jusiñamui cuena oretate. Naimie jitailla rafuena finocana jaidicue. Naimie rafuena cue llumona, jai guticue isoidicue. ³⁵ Comecina facadomoi: “Jusiñamui uaina nia lloñeíticai. Ico iena lloíticai”. Ie isoide. Illimo riará nia llisiñenia, começaina facadomoi: “Riará einaillena, naga amaga fivui fiebite. Naie facaise maijiíticai”. Omoimo lloticue: Omoi ecimo eruai. Riará jai einaite isoide. Naimacimo Jusiñamui rafue lollena, iena naimaci inollena, ailluena comini jai itimaci. ³⁶ Naie llisillamo maijiítimiedi ie ucubena feiñoite. Ie isoide. Jusiñamui rafuena damierie llocabillamona, comini iena cacadimaci. Jiaino billamona, iena dane cacajamona, iena inotimaci. Naie mare rafue lloraini ibana feiñoitimaci. Jusiñamui dibeimo naimaci dajena maijia jira, dajena iobitimaci. ³⁷ Cai comini iena raicabitimaci: “Damie iduaina rite; ia jiaimie llisillana ote”. ³⁸ Ie isoide. Omoína oredicue, comini cue dibeimo itatallena. Naimacimo cue uaina nano lloñedomoi; iadedi nano jiaino naimacimo cue uaina llotimaci. Ie jira nana omoi llofuiamona cue uaina inoitimaci.

³⁹ Samaria inaiño llumona, naiñaiño nairaimona ailluena comini Jesúna inotimaci. “Naimiedi nana cue finoca rafuena cuemo llote” naimacimo naiñaiño llote. “Naimiedi cai Jilloitaraima” raillanona Jesúna inotimaci. ⁴⁰ Jesús dine naimaci rillanona, naimaci diga naimie fiebillena, Jesúmo jicanotimaci. Ie jira Jesús menarui naimaci dinomo fiebide. ⁴¹ Naimie llofuiamona, jiaie ailluena comini naimiena inotimaci. ⁴² Riñoimo llotimaci:

—Daño o llumona, navui inoticaí; iadedi naimie uaina cai cacajamona, birui raise inoticaí. Naimiedi comini ua Jilloitaraima.

⁴³ Menarui illanona, nainomona Galileamo Jesús cai diga jaide. ⁴⁴ Caímo llote:

—Jusiñamuina lloraimadi ie nairai illanomo ia, naie comini naimie llumo cacarefiacaiñedimaci; ⁴⁵ iadedi Galileamo cai rillanona, nainomo itino naimiena caimare feiñoitimaci. Pascua railla rafue facaise Jerusalémo nana naimie finoca rafue navui naimaci ciua jira, naimiena caimare feiñoitimaci.

Jesúdi illacomini jitona jillotaja rafue

⁴⁶ Galileamo Jesús cai diga macaria, dane Canámo ridicaí. Nainomo jinuimona vino navui finode. Nainomo cai ia, Capernaum railla nairaimo itimie jito duide. Duidimie moodi gobierno diga maijjuide. ⁴⁷ Judeamona Galileamo Jesús illana naimie fidiano, Canámo bite. Jesús illanomo billena, ie jito jai fiódaiacana jira, ie jitona jillotallena Jesúmo duere jicanote. ⁴⁸ Jesús naimiemo llote:

—Siño rafuena omoi cioiñenia, cuena inoñedomoi.

⁴⁹ Uai ote:

—Maestro, cue diga bi, cue jito fiódaiñellesa.

⁵⁰ Jesús uai ote:

—Mai jai. O jito jai fiódaiñeite —llote. Naie iima Jesús uaina inuano, ie jofomo abido jaide. ⁵¹ Naisona naimie jaidemo, ie mullaiaí diga afeedo beici dafaífide. Llotimaci:

—O jito jai jillode.

⁵² Ie jira naimie jicanote:

—¿Nino jítoma itemo, jillode?

Uai otimaci:

—Navui are jítoma oni lluai caidemo, abi cuarilladi fainonocaide.

⁵³ Ie começina facade: “Navui are naie facaise Jesús cuemo llote: ‘O jito jai jillode’ ”. Ie mullaiaí llumona cacajamona, naimiedi Jesúdi cai Jilloitaraimana inote. Nana naimie jofomo itino jiaí inotimaci. ⁵⁴ Judeamona Galileamo Jesús abido billano, siño rafuena iese jai finode.

5

*Joraib*imo tisitaitimie jillua rafue

¹ Digarui illa mei, cai judúuai rafue iacana jira, Jerusalémo Jesús abido jaide. ² Jerusalémo toica llaudaiaí jaisoilla nase facaimo joraibi ite. Cai judúuai uaimona nai joraibi mamecidi Betesda. Naie jorai fueo ite cinco jifocotiai. ³ Nainomo diga duidino biidimaci: uisidimaci, ñuja-ñujacaidino, tisitaitino. Jinuina begollena sedadimaci. ⁴ Feide isoidemona dacaiño Jusiñamui jaienicidi jinuina begotallena bite. Iemei nai jinuimo nano jaidimie ie duicomona jillode. ⁵ Duidino motomo tisitaitimie ite. Treintiocho años duide. ⁶ Naimiena ciuano, naimie are duillana uiñuamona, Jesús naimiemo jicanote:

—¿Jilloiacadio?

⁷ Duidimie uai ote:

—Jii; iadedi jinuina begoia, jaca buna iñede cue canoitena. Ie jira jiaimiedi cue uicodo jinuimo jaide. Ie jirari nia jilloñedicue.

⁸ Jesús uai ote:

—Mai naidacai. O biira ferinocaida macari.

⁹ Ieconi naimie jillode. Ie biira ferianona oni jai macarite.

Sábadoruimo duidimie jilloitajana siadua rafue

Sábadoruimo, judúuai jafaici oullaruimo, naimie jillode. ¹⁰ Ie jira judúuai illaicominidi jillodimiemo llote:

—Birui sábado. O biira abinocaida o uilla jira, Moisés micori rairuica rana jai finodio. Sábadomo maijinidicai. Birui jafaici uaruimo jaca buena jetanidicai.

¹¹ Naimie uai ote:

—Cuena jilloitatimie cuemo llote: “O biira mai ferinocaida macari”.

¹² Judúuai ñinena jicanote:

—¿Bu iena omo llote? —Naimie uiñoñena jira, uai oñede.

¹³ Jesúsdi comini motomo itabilla jira, ailluena comini illa jira, jai jillodimie ie jilloitatimiena uiñoñede. ¹⁴ Ie meinoconi dallu illanona, Jusiñamui jofomo Jesús ñinena naimiena baite. Llote:

—Jai jillodio. Abido dane eo duere o sefuisa, dane jeacinona finoñeno.

¹⁵ Ie mei judúuai illaicominimo jillodimie lluaide. Llote:

—Jesús raillamie cuena jillotate.

¹⁶ Sábadoruimo Jesús bie rafuena finua jira, judúuai illaicominidi naimiena duere finoacasite. ¹⁷ Jesúsdi abina riiduano llote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —llote. ¹⁸ Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judúuai illaicomini naimie meinellena eo jitaidimaci.

Jesús ie Moo isoi finua rafue

¹⁹ Naimacimo Jesús llote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. ²⁰ Cue Moo cuena isiruillanona, nana ie finoca rafuena cuena jai uiñotade. Naimie Jitona cue illa jira, bie imana cue jilloitaja baifemo jiaie siño rafuena finoiticue, omoi rajicaillena. ²¹ Fiodaitinona jilloitallena, cue Moomo ie uai ite. Naie uai cuemo jiaí ite. ²² Cue Moo juez isoi naimie iñoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga. ²³ Omoi ñine naimie cuena oretate. Naimiedi omoi cuena iobitajana jitaide, naimiena omoi iobitaja isoi. Cuena omoi iobitañenia, cue Moona jiaí iobitañedomoi. ²⁴ Uanaicinona lloticue. Cue uaina bu cacaia, cuena oretatimiena bu iñoia, monamo jaca iite. Jearede rafue naimie finua facaina duere sefuiñeite. Faifiñeite; ia monamo Jusiñamui diga jaca iite. ²⁵ Uanaicino lloticue. Jusiñamui Jitodicue. Ua birui cuena iñoñedino cue uaina cacareitimaci. Cuena cacajamona, cuena iñuamona, jaca iitimaci.

²⁶ Cominina jaca itatallena, cue Moomo uai ite. Comini jaca itatallena, cuemo ie uai jiai iga. ²⁷ Cuen a ñinoñedinomo juez isoi cue lollena, naimiemo cue duillamona, ie uai cuemo jiai iga. ²⁸ Ieri rajicaiñeno. Jaiiruido nana jai fioidaitino diese cue lluaña cacaitimaci. ²⁹ Fioidaillamona naimaci abiai jilloitimaci. Ie mei cue jitaillacinona finodino jaca illena lloiticue. Cue jitaillacinona ñinoñedino diese duere sefuillena lloiticue. ³⁰ Naimacimo cuena oretatimie jitailla isoi lloiticue. Dama cue comecimo ite rafuena cue lloñena jira, bie llucacino ñoñena uanaicino.

Jusiñamui ie Jito uaina comini ñinoñena rafue

³¹⁻³² Jesús nia llote:

—Dama cue abina cue lloiadedi, bu cuena jaca ñinoñede; iadedi Jusiñamui cue facaina jiai llote. Naimie llucacino uanaicino. Iena uñoticue. ³³ Naimiena cacareillena, Juan Bautista micori ñine cominina navui oretatomo. Abido naimaci bia, naimaci cacaja rafuena omoimo lollena, naimacina oretatomo. Juan llucacino ñoñena uanaicino. ³⁴ Naimie micori cue rafuena llouide; iadedi naimie micori llogacino omo comeci eo facajana birui jitañedicue. Cuen a omo ñinollena, naimie mamecina jai llinoticue. ³⁵ Lamparín raise lligaiñua isoi, ie rafuedo Juan micori omo comeciaino iticinona raise uñotade. Dally ieri iobidomo. ³⁶ Cue finoca rafue Juan micori finoca rafue baifemo faite. Cue siño finoca rafuena ñaiticue. Cuen a naimie oretajamona, cue Moo uaido iena finodicue. Ie jira naiemona naimie ñinena cue billana jai uñotomo. ³⁷ Cue finoca rafue muidona cuena uñotomo; iadedi naimie lluaña jaca cacaiñedomo. Naimiena jiai jaca cioñedomo. ³⁸ Cuen a omo ñinoñena jira, naimie uaina feiñoñedomo. ³⁹ Jusiñamui ñine omo rillena, Jusiñamui facaina lloraini micoriai ciegafuiaina facacabidomo. Naifuiaidi cuena ñaite; ⁴⁰ iadedi Jusiñamui ñine omo rillena, cue uaina ñinoñedomo. ⁴¹ Cuemo iobillacinona omo fecallena sedañedicue. ⁴² Jusiñamuina isiruiñedomo. Iena uñoticue. ⁴³ Cue Moo mamecido cue billanona, cuena feiñoñedomo; iadedi dama ie mamecido jaiimie bia, naimiena feiñotomo. ⁴⁴ Jaca ñinoñedomo. Iobillacino coninimo fecadomo; iadedi ua Jusiñamuidi omo ñina “Mare” raillana jitañedomo. ⁴⁵ “Cue Moomo omo marañede finoca rafuena lloiticue” raillanomo comeciaina facañeno. Moisés micori ciegafuiaino omo llogidua fue jai ite. Moisés micori ciegafuiaino muidona Jusiñamui ñine omo jaca illemo ocuiridomo. ⁴⁶ Moisés micori ciegafuiaina ñinotomo ñina, cuena naimie micori cuia jira, cuena jiai ñinotomo. ⁴⁷ Naimie ciegafuiaina ñinoñedomo. Ie jira cuena jiai ñinoñeitomo —llote.

6

Jesús cinco llomenicomona ailluena cominina ecaja rafue

(Mt 14.13-21; Mr 6.30-44; Lc 9.10-17)

¹ Jaiiruido Galilea railla jorai ie ruica ñibeimo Jesús ie llofueoicaiganodicai ñiga jaiide. Naie joraidi jiai Tiberiana mameciredo. ² Duidinona naimie jillotaullana naimaci cuia jira, ailluena comini naimiena racadimaci. ³⁻⁴ Naie facaiseconi pascua railla rafuedi jai iaire ite. Jesús cai ñiga anedumo a jaillanona, ñinomo ana raide. ⁵ Oni erodatemo, ailluena comini naimie ñine billana ciode. Felipemo jicanote:

—Naimaci guillena, ¿ñinomona llomenicono oiticai?

⁶ Naimiena facacillena, iena jicanote; iadedi Jesús ie finolle rana jai uñote. ⁷ Felipe uai ote:

—Janore naimaci guillena, doscientos digarui ie maijia ucube diese llomenico oticaina, baiñede.

⁸ Naie facaise caimona damie iena cacade. Naimiedi Simón Pedro ama. Andréna mameciredo. Naimie raite:

⁹ —Cinco cebadamona finoca jenide llomenico daje uruemo bene ite. Mena lliciai jiai naimiemo ite; ia ¿ñiese nibaiticai? Baiñeite.

¹⁰ Jesús caimo llote:

—Cominimo llono, ana imaci raillesa.

Ie jira raitire illanomo ana raidimaci. Cinco mil iñiaí itimaci. ¹¹ Llomeniconna Jesús ua meinoconi, Jusiñamuimo iobillacinona fecajano, Jusiñamuimo jiide. Iemei cominimo caina naie llomeniconna fecatate. Comini jitaila dierise lliciaí daje isoi fecatate. ¹² Naimaci monillamona, caimo Jesús llote:

—Buena jaca faifiñellena, fiebide guille danomo irai.

¹³ Ie jira iena iraidicaí. Naie cinco llomenicomona, comini guigamona fiebidemona, doce cirigaíaimo oruitaticai. ¹⁴ Jesús finoca rafuena naie cominidi ciuanona, llotimaci:

—Jusiñamui facaina lloraini micoriaidi cai Jilloitaraima ico billena jaie llotimaci. Bimiedi naimie.

¹⁵ Naimaci illaimana naimie illena, naimiena gaitacadimaci. Iena naimie uñua jira, iena naimie jitañena jira, aneduaimo naimie oni jaide.

Capernaumo Jesús abido jailla rafue

(Mt 14.22-27; Mr 6.45-52)

¹⁶ Jitoma ana itemo, jai navuidemo, ie llofueoicaiganodicaí joraimo jaidicaí. ¹⁷ Cai botemo cai jaillano, ruica Capernaumo jaiacadicaí; iadedi Jesús nia biñede. Jesúsna sedadicaímo, naimie biñena jirari, jai jítirena facaiseconi jai jaidicaí. ¹⁸ Raire aifi illa jira, jorai eo bagode. ¹⁹ Nibai cinco, nibai seis kilómetros jaidicaímo, damie cai dine jinui emododo billana ciodicai. Bote dine naimie billana ciuanona, jacinaiticaí. ²⁰ Jesús caimo llote:

—Jesúdicuesa. Jacinaiñeno.

²¹ Iena cacajanona, botemo naimiena a billana jitaídicaí. Ieconu ruica dine cai jaiacananomo ridicaí.

Comini Jesúsna jenua rafue

²²⁻²⁴ Cai jailla mei, daje bote nairuido illa jira, jinafomo fiebidino Jesús cai diga jaiñenana uiñotimaci. Cai Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaise iaire bite. Monaidemo, Jesúsna naimaci cioñena jira, cai jiaí iñena jira, naie botiaído Capernaumo Jesúsna jenollena, jaidimaci.

Jesús: “Llomenicodicue” railla rafue

²⁵ Ruica dine Jesúsna comini baillanona, jicanotimaci:

—¿Niruido bene ridio? ²⁶ Jesús uai ote:

—Navui are omoína cue ecajamona, iemona omoi monillamona, cuena jenodomoí. Siño rafuena cue finuana ciodomoi; iadedi cuena nia iñoñedomoi. ²⁷ Guille raire cueicabide. Cueiruide ramo comeciaina eo facañeno. Cueiruiñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi iñuamona, Jusiñamui diga jaca iitomoí.

²⁸ Jicanotimaci:

—Nia Jusiñamui díbeimo iticaina, ¿nie isoidifue finodicaina mare?

²⁹ Jesús uai ote:

—Naimie oretagamie uaina omoi iñuana jitaide.

³⁰ Naimaci dinena dane jicanotimaci:

—¿Nie isoide rafuena finoitio? iena cai ciuano, o uaina cai iñollesa. ³¹ Cai jaiagai jofue iñenanomo Jusiñamuimona bite guilla ra guisoidimaci. Moisés micori iena jaie cueda: “Jusiñamuimona bite guiga ra naimacimo nagarui fecauide”. Iemo jiaí birui ocuridicaí. Naie isoide siño rafuena o finuana jiaí cioacadicaí —llotimaci.

³² Jesús uai ote:

—Uanai lloticue. Moisés micori naie guiga ra jaca fecañede. Cue Moo iena fecauide. Birui naimiedi monamona bite ua llomeniconna omoimo jai fecacade. ³³ Jusiñamui fecacalle llomenico monamona jai bite. Comini iena guillamona, jaca iitimaci.

³⁴ Llotimaci:

—Nagarui caimo bie isoide llomeniconna feca.

³⁵ Jesús uai ote:

—Llomenico guillamona iticai. Omoi llomenico isoidicue. Cuen a iñnuamona, monamo jaca iitomoi. Cuen a iñnotimie dane aimetañeite. Cuen a isiruitimie jaca dane jiroacaiñeite. —Iese llote; ia naimaci comeciaina ñaite. Naimaci comeciái jitaillacino naimacimo jaca illena ñaite—. ³⁶ Cuen a ciodomoi; iadedi cuena iñnoñedomoi. ³⁷ Nana cue dibeimo cue Moo itatallinodi cuena iñnoitimaci. Cuemona naimacina jaca oni dotañeiticue. ³⁸ Cuen a oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. ³⁹ Cuen a oretatimiedi cue dibeimo itatallinomona buna faifillana jitañede. Jusiñamui lluaruimo fiodaillamona nana naimaci abiaina cue jilloitajana jiaí jitaide. ⁴⁰ Jusiñamui Jitona cue illana bu iñnoia, cuena bu iñnoia, monamo jaca iite. Jusiñamui lolliruimo fiodaillamona naimie abina jillotaiticue. Iese cue Moo jitaide.

⁴¹ Jesúsdi: “Monamona bite llomenicodicue” railla jira, judúuai illaicominidi naimie uaina jamaillano iñnosñede. ⁴² Raitimaci:

—Bimiedi Jesús. José jito. Ie moona uiñoticaí. Ie eina jiaí uiñoticaí. ¿Ñiese naimiedi: “Monamona biticue” raite?

⁴³ Jesúsdi uai ote:

—Iese omoi naiñeno. ⁴⁴ Naimiena cue Moo iñnotañenia, bu cuena iñnonide. Cuen a bu iñnoñenia, Jusiñamui lolliruimo fiodaillamona naimie abina jillotaiticue. ⁴⁵ Jusiñamuina lloraini micoriai jaie iena cuetimaci: “Jusiñamuidi nana cominina ico llofueite” cuetimaci. Birui naie rafuejai suide. Naga cue Moomo cacarefidimie, naga cue Moomona fueotimie cuena jiaí iñnoite. ⁴⁶ Buna cue Moona jaca cioñede. Naimiemona cue billamona, dama cue ciua. ⁴⁷ Uanaicinona lloticue. Cue uaina iñnotimie monamo jaca iite.

⁴⁸ Jesús dane llote:

—Llomenico guillamona iticai. Omoi llomenico isoidicue. Cuen a iñnuamona, monamo jaca iitomoi. ⁴⁹ Jofue iñenanomo omoi jaiagai Jusiñamuimona bite rana guisoidimaci; iadedi fiodaitimaci. ⁵⁰ Birui jiaie guille ra ite. Monamona ite. Iena bu guia, monamo jaca iite. ⁵¹ Bie llomenicodi cue. Monamo cominina jaca itatallena, monamona biticue. Bu bie isoide llomenicono guia, jaca iite. Bie llomenicodi cue abi. Comini facaina fiodaiticue.

⁵² Iena cacajano, judúuai illaicomini coniniri naiena siadotimaci. Raitimaci:

—¿Ñiese bimie abina riiticaí?

⁵³ Ie jira Jesús dinena raite:

—Uanai lloticue. Cue abina omoi riñenia, cue diruena omoi riñenia, cue Moo diga jaca iñeitomoi. ⁵⁴ Bu cue abina riia, bu cue diruena riia, cue Moo diga jaca iite. Fiodaillamona naimie abi iirairuimo jillotaiticue. ⁵⁵ Cue abidi ua rille. Cue diruedi ua rille. ⁵⁶ Bu cue abina riia, bu cue diruena riia, cuena nabaide. Naimiena jiaí nabaidicue. ⁵⁷ Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jiaí iite. ⁵⁸ Bie isoide guille ra monamona jai bite. Omoi jaiagai jaie guiga ra isoñede. Jaie fiodaitimaci; iadedi bie guille ra birui bu guia monamo jaca iite. —Iese llote; iadedi naimie fiodaillamona, naimiena comini iñnuamona, Jusiñamui diga naimaci jaca illena ñaite.

⁵⁹ Capernaumo judúuai ofiracomo Jesús buena llote.

Jesús diga jaisoidino naimie llua siadua rafue

⁶⁰ Jesús diga jaisoidino naimie llua cacajano, coniniri siadotimaci:

—Bie llua eo irirede. Bu iena cacaiñede.

⁶¹ Jesúsdi naimaci iese siaduana uiñote. Ie jira llote:

—Cue llua raise iñnoñedomoi. ⁶² Jusiñamuimona iimana jaillena jai biticue. Monamo abido ico cue jaillena cioitomoína, iena jiaí nibai raise iñnoñeitomoi. ⁶³ Cai joreño caimo illamona, iticai. Dani cai abi diga iñedicaí. Ie isoide. Cue llogacino Jusiñamuimo duide. Iena omoi iñnuamona, jaca iitomoi; ⁶⁴ ia omoimona nana iñnoñedomoi —llote.

Nano dofoconimona Jesúsdi naimiena ñinoñedinona uiñote. Naimiena gaitataitimiena jiai uiñote.

⁶⁵ Jesús dane llote:

—Ie jira omoimo lloticue: Cue Moo jitaiñenia, cuena jaca bu ñnonide.

⁶⁶ Iena cacajano, Jesús diga jaisoidinomona, diga comini naimiena fainonocaidimaci.

⁶⁷ Ie jira ie doce llofueoicaiganodicaimo Jesús jicanote:

—¿Jiai cuena fainonocaida, abido jaitomoi?

⁶⁸ Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi Jillotaraima iñede. Jiaimiemo jaca itatajaracinodi iñede. ⁶⁹ O lluana jai ñnoticai. Jusiñamui mare Jitodio. Iena uiñotikai.

⁷⁰ Jesús dane uai ote:

—Doce digamie fetocaomoi; iadedi omoimona damie Taifemo jainaiaide —llote.

⁷¹ Caïmona Judas Iscariote micorina ñaite. Judas micori Jesúsna gaitataiacadimie.

7

Jesús amatiai naimiena ñinoñena rafue

¹ Jiairuido Galileamo ite nairaiaimo Jesús macarite. Judúuai illaicomini naimiena meineiaca jira, Judeamo jaiñede. ² Jifocotiaiiai railla rafue iaire ite. Judúuai ie rafue.

³ Ie jira Jesús amatiai naimiemo llote:

—O diga jaicabidino o finua rafuena raise cioillena, beno fainonocaida, Judeamo jai.

⁴ Bu ie mameci are soriacania, bainino majirainina. Ie isoide. Siño rafuena o finoia, ailluena comini illa motomo iena fino.

⁵ Jesús amatiai naimiena ñinoñena jira, iese raite. ⁶ Jesús ñinena uai ote:

—Jerusalémo nia jaiñeiticue; iadedi nainomo omoi jaiacalliruido omoi jai. ⁷ Comini omoïna enoiñedimaci. Naimaci finoca jearede rafuena cue llua jira, cuena jaca enoidimaci. ⁸ Jerusalémo rafuemo jai. Cue jaillirui nia riñena jira, nia jaiñeiticue. ⁹ —Iese lluno, Galileamo naimie fiebide.

¹⁰ Naimie amatiai rafuemo jailla mei, Jesúsdi naimaci jinafona dama bainino jaide.

¹¹ Nai rafuemo judúuai illaicomini Jesúsna jenuano baiñenano, cominimo jicanotimaci:

—¿Ñinomo naimie ite? —Uiñoñena jira, comini uai oñedimaci.

¹² Nainomo ailluena comini itimaci. Comini illa motomo naimiena anado siadoside. Jiaïno ñinena: “Naimiedi mare” raitimaci. Jiaïno ñinena: “Naimiedi cominina jifujete” raitimaci. ¹³ Judúuai illaicominina iciana comini jaciruillanona, anado siadoside. Jesúsna marefodo buna ñaiñede.

Sábadoruimo Jesús majjia raufe

¹⁴ Jifocotiaiiai railla rafue atuedo fuitemo, Jesús Jusiñamui jofomo jaillano, llofujete.

¹⁵ Illaicomini naimie llofuiamona rajicaidimaci:

—¿Ñiese naimie abi uiñote? Eo rafuena uiñotimiemona jaca fueoñede —raitimaci.

¹⁶ Jesús uai ote:

—Dama cuemona oñega cue llofuiacinodi. Cuena oretatimie ie. ¹⁷ Jusiñamui jitailacinona finoiacadimiedi ñinomona cue llofuiacinona cue uana uiñoite. Jusiñamuimona cue uana uiñoite. Dama cue comecimona cue oñenana jiai uiñoite. ¹⁸ Bu dama ie comecimona ie llofuiacinona uanona lloia, naimiedi comini naimiemo iobillacinona fecajana jitaide; iadedi bu ie oretatimiena iobitaia, uanai llote. Maraiñedicinona finoñede. ¹⁹ Moisés micori Jusiñamui uaina jaie llote; iadedi birui naie llogacinuaina nia raise ñinoñedomoi. Iena raise ñnotomoidena, cuena niade meineiacañedomoi.

²⁰ Comini ñinena uai ote:

—Ñibai uairitaidio. ¿Bu ona meineiacade?

²¹ Jesús uai ote:

—Dacaiño sábadoruimo damiena jillotaticue. Ie jira cue uaina uaitatomoï.

²² Sábadoruimo jiai majjicabidomoi. Moisés micori isaiaï abiaï diana omoïmo jaie llote; iadedi naimie micori naiena nano lloñede. Naimie micori usumatiai naiena nano

lloṭimaci. Sábadoruimo iisana abi dellirui ia, detomoi. ²³ Moisés micori llogacinona inollena, sábadoruimo iisaiaina detomoi. Sábadoruimo imana raise jillotaticuemo, ¿bue ñellena cue diga iciritomoi? ²⁴ Cominimo jamai eruaillanona, naimacina jeare ñañeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

Jesúna comini siadua rafue

²⁵ Ie jira Jerusalémo itino coniniri siadotimaci:

—Illaicomini bimiena meineiacadimaci; ²⁶ iadedi beno marefodo naimie llofue. Jaca buena lloñedimaci. Illaicomini: “Bimiedi cai Jilloitaraima” raillano nibai comeaiina facadimaci. ²⁷ Bimie ie billanona cai uiñua jira, naimiedi cai Jilloitaraimañedimie. Cai Jilloitaraima baireia, jaca budi naimie billanona uiñoñeite —siadotimaci.

²⁸ Ie jira Jesús Jusiñamui jofomo naimie llofuiano lloṭe:

—Cuena uiñotomoi. Ninena cue billana jiai uiñotomoi. Cue jitailla jira biñedicue; iadedi jaiimie cuena oretate. Naimiedi uanai lloṭe. Naimiena uiñoñedomoi. ²⁹ Naimiemona cue billa jira, naimiena uiñoticue. Cuena oretate —lloṭe.

³⁰ Ie jira illaicomini Jesúna gaitacadimaci; iadedi naimie fiódaille facaise nia riñena jira, buna naimiena gaitañede. ³¹ Nairui ailluena comini naimie uaina innotimaci. Raitimaci:

—Cai Jilloitaraima bia, ¿niese naimiedi bimie baifemo jiaie rafuena finoite?

Jesúna gaitaiacana rafue

³² Fariseuaidi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede. ³³ Ie jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue. ³⁴ Cuena jenoitomoi; iadedi cuena baiñeitomoi. Cue dine binitomoi.

³⁵ Ie jira nainomo ite illaicomini dani siadotimaci:

—¿Ñine jaite? ¿Ñiese naimiena baiñeiticai? Judúañedina llofuellena, jiaie enruemo cai comini dine nibai jaite. ³⁶ ¿Ñiese naimie raite: “Cuena jenoitomoi; iadedi cuena baiñeitomoi”? ¿Ñiese raite: “Cue dine binitomoi”? —iese siadotimaci.

Jesúdi Jusiñamui Joreña ñaia rafue

³⁷ Jifocotiaiai railla rafue fuillaruimo, ua rafue ie nairuimo, Jusiñamui jofomo itinomo Jesús ado lloṭe:

—Bu jiroacania, cue dine bi. ³⁸ Jusiñamui facaina lloraini micoriai jaie cuega: “Naimiena innotimie comeaimo jaca itatate jinui isoi iite, torafomona jinui tonooilla isoi”.

³⁹ Jesúdi iese lloṭe; ia Jusiñamui Joreña ñaite. Jusúna innotinomo Jusiñamuidi ie Joreña ico illena ñaite. Jesús nia fiódaiñena jira, iena nia iñega.

Comini Jesúna dane siadua rafue

⁴⁰ Jesús lluana comini cacajano, raitimaci:

—Jusiñamui facaina lloraini micoriai Jusiñamui facaina lloraima ico billena jaie lloṭimaci. “Cristo nia baireñena, naimie biite” lloṭimaci. Bimiedi naimie.

⁴¹ Jiaño raitimaci:

—Naimiedi cai Jilloitaraima. Naimiedi Cristo.

Jiaño raitimaci:

—Cai Jilloitaraima Galileamona biñeite. ⁴² Jusiñamui facaina lloraima micori cuega: “Cai Jilloitaraimadi David micori jito. Belémo David micori illanomo jeicille”.

⁴³ Ie jira daje isoi naimiemo comeaiina facañedimaci. ⁴⁴ Jiaño naimiena gaitacadimaci; iadedi buna naimiena jetañede.

Judúai illaicomini Jesúna inoñena rafue

⁴⁵ Ie mei policías naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúna atiñedomoi?

⁴⁶ Policías dinena uai ote:

—Naimie llofuia isoi jaca buna llofueñede. Iena jacinailanona, naimiena atiñedicai.

⁴⁷ Fariseuai dane llotimaci:

—Cominina jifua isoi, omoina jiai jifue. ⁴⁸ Cai illaicomini dinena naimiena jaca iñoñedicai. Moisés micori llogacinodo raise jaidicai; ⁴⁹ ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

⁵⁰ Naie illaicominimona Nicodemo raillamie ite. Naimie naiona Jesús dine navui jaide. Fariseo imie. ⁵¹ Jesúsna riiduanona, naimie llote:

—Cai einamaci llocabitimaci: “Bu duere cai finoacania, nano naimie llamo cacarefiticai. Jearede rafue naimie finuana cacareillano, naimiena duere finoiticai”. Iena cai cacaiñenia, naimiena duere finoñeiticai.

⁵² Nicodemomo llotimaci:

—Galileamona bitino isoi ñaitio. Naimie llofuegamiena nibai jai jaiacadio. Jaie cuega-fuiaina raise faca. Jusiñamui facaina lloraini micoriaidi cai nairaina Jilloitaraima Galileamona billena jaie cueñedimaci. Bie Jesús raillamedí cai nairaina Jilloitaraimañedimie.

⁵³ Ie meinocni damerie imaci jofomo jaidimaci.

8

Ie iniñede iima diga riñodi rafuetaila ie rafue

¹ Naie facaise Jesúsdi Olivos railla anedumo jaide. ² Ie areruido jítiramo Jusiñamui jofomo abido dane jaide. Ailluena comini naimie dine billa jira, naimie ana raíta, naimacina llofue. ³ Naie facaise Moisés micori llogacinona llofueraimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñona jai eiatimaci. Comini illa uicomo atiano, ⁴ Jesúsno llotimaci:

—Llofueraima, biñaiño ie iniñede iima diga eiaticai. ⁵ Moisés micori jaie cuega: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?

⁶ Naimiena facacillena, naimie raise uai oñenia, naimiena llogidollena, iese jicanotimaci. Iena cacajano, Jesús ana jítadacaida, eniruemo ie onocai diga cuete.

⁷ Naimiemo diga icaiño jica-jicanuano, naimie naidacaida, naimacimo llote:

—Omoimona jeacino iñedimie naiñaiñomo nano noficina fairino.

⁸ Dane ana jítadacaida, eniruemo dane cuete. ⁹ Naimie luana cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena. ¹⁰ Eruaillano naiñaiñomo jicanote:

—¿Ni nai o llogidotino?

¹¹ Naiñaiño uai ote:

—Jaca iñedimaci. Cuena jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoñoeno.

Jesúdi comini comeciai lligaiñua rafue

¹² Jesúsdi cominina dane llofuianona, raite:

—Jeacino oni jaillena, comini comeciaina lligaiñoticue. Cuena inotimie jítiredinomo jaca iñeite. Jeacino anamo jai iñedimie Jusiñamui diga ico jaca iite.

¹³ Fariseuai dinena uai otimaci:

—Dama o abina ñaitio. Ie jirari uanaicinona lloñedio.

¹⁴ Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi. ¹⁵ Abi raise uiñoñoeno cuena jeare ñaitomoi. Iese omoina ñaiñedicue; ¹⁶ iadedi omoina cue ñaia, uanaicinona lloticue. Dama cue uaina omoina lloñedicue. Cuena oretatimie omoina jiai llote. ¹⁷ Moisés micori iena jiai jaie cuega: “Menamie daje isoi lloia, naie iaimaiái llucinodi omoi inua” cuega. ¹⁸ Cue facaina lollena, menamie jai ite. Cue facaina lloticue. Cue Moo cue facaina jiai llote.

¹⁹ Fariseuai dinena jìcanote:

—¿Nì o moo?

Jesúdi uai ote:

—Cuena uiñoñedomoi. Cue Moona jiai uiñoñedomoi. Cuena uiñotomoina, cue Moona jiai uiñotomoì.

²⁰ Jusiñamui jofomo ucube eenoracomo bicinona siadotimaci. Jesús fiódaille facaise nia riñena jira, jaca buna naimiena gaitañede.

Jesúna comini ñinoñena, naie jeacino díga fiódaille rafue

²¹ Naimacimo Jesús dane llote:

—Íco oni jaiticue. Cuena jenoitomoì; iadedi cuena baiñeitomoì. Na omoimo jeacino nia itemo, fiódaitomoì. Cue jaillinomo jainitomoì.

²² Ie jira judúuai illaicomini dinena iena siadotimaci:

—Dama ie abina meineite.

“Cue jaillinomo jainitomoì” Jesús railla jira, iese siadotimaci.

²³ Jesúdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie díbeimo ñnedomoi; ia naimie díbeimo iticue. ²⁴ Cue Jusiñamui Jitonana omoi ñinoñena jira, na omoi jeacino díga fiódaitomoì.

²⁵ Jìcanoside:

—¿Budío?

Jesús uai ote:

—Nano omoi motomo cue illamona bumiedicuena omoina raicabiticue. ²⁶ Díga rafue omoimo lloiacadicue. Marañede rafuena omoi finuana omoimo nia lloiacadicue; iadedi omoimo cuena oretatimie uaina dama lloticue. Nai uaidi uanaicino —llote.

²⁷ Naimiedi ie Moo Jusiñamuina llote; iadedi cacaiñedimaci. ²⁸ Ie jira Jesús llote:

—Cuena omoi meinia mei, bumiedicuena uiñoitomoì. Cue uaido dama lloñedicue; iadedi cue Moo cue llofuia uaido llocabiticue. ²⁹ Cuena oretatimie cue díga ite. Naimie jítaille rafuena cue finua jira, cuena fañonocañede.

³⁰ Iese Jesús llotemo, díga illaicomini naimie uaina como ñnoiacadimaci.

Comini Taife anamo illa rafue

³¹ Jesúdi naimie uaina como ñnoiacadinomo llote:

—Cue lluaña ñnocana omoi jaia, cue ua cominidomoi. ³² Uanaicinona uiñoitomoì. Ie mei jiaimie anamo dane ññeitomoì.

³³ Uai otimaci:

—Abraham micori ie uruiaidicai. Jiaimie anamo jaca ññedicai. ¿Bue ññellena llotio: “Jiaimie anamo ññeitomoì”?

³⁴ Jesúdi uai ote:

—Uanai lloticue. Jeacino finocabidomoi. Naga jeacino finoraima ie jeacino anamo jai ite. Omoi jeacino anamo omoi illana ññaiticue. ³⁵ Jiaie rafuedo iena lloticue. Ie patrón anamo itimiemo ie patrón rafuedi duiñede; iadedi naie patrón jítomo ie rafuedi duide. ³⁶ Ie isoide. Jusiñamui Jitona cue illamona, naimie rafuemo duidicue. Ie jira omoimo cue lloia, omoi jeacino anamo ua ññeitomoì. ³⁷ Abraham micori ie uruiaidomoi. Iena uiñoticue; iadedi cue lluaña omoi raise ñnoñena jira, cuena meineiacadomoi. ³⁸ Cue Moo díga jaie cue illamona, cue ciua rafuena llocabiticue. Omoi moomona cacaja rafuena finocabidomoi.

³⁹ Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoi. Abraham micori uruiaññedomoi. Ie jira Abraham micori finoca rafue isoi finoñedomoi.

⁴⁰ Uanai cue llua jira, cuena meineiacadomoi; iadedi Abraham micori iese finoacañede. Cue lluaicino Jusiñamuimona oticue. ⁴¹ Jusiñamui uruiaí finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiaññedicai. Cai Moodi Jusiñamui.

⁴² Jesús dane llote:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biñedicue; iadedi cuena oretate. ⁴³ ¿Bue ñellena cue llua cacañedomoi? Cacareirainidomoi. ⁴⁴ Omoi moodi Taifena jira, cue llua ññoñedomoi. Naimie jitailla rafuena finoacacabidomoi. Nano dofomona naimiedi comena meinteraíma. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi llote. Naimiemona taino llucacacabide. Naimie isoidomoi. ⁴⁵ Uanai cue llua jira, cuena ññoñedomoi. ⁴⁶ ¿Nie isoide jeacino finodicue? Cuemo llono. Uanai cue llua, ¿bue ñellena cuena ññoñedomoi? ⁴⁷ Jusiñamuina mooredimiedi Jusiñamui uaina cacade. Jusiñamui uruiaññedomoi. Ie jira cue llua cacañedomoi.

⁴⁸ Naimiena jearuillanona, naie illaicomini ññena iese raitimaci:

—Samaritano nairai imiedio. Janaba illamiedio. Uairitaidio.

⁴⁹ Jesús uai ote:

—Janaba illamieñedicue. Cue finoca rafuemona cue Moona iobitadicue; iadedi iese cuena omoi ññamona cuena iobitañedomoi. ⁵⁰ Omoi mona iobillacinona feñollena, cue rafuena finoñedicue; ia cue Moo iena oiacade. Cuena omoi ññoñena, cuemo iobillacinona omoi fecañena, cue Moo omoi ñña duere finoite; ⁵¹ ia bu cue llua ua ññoia, jaca ua fioidañeite.

⁵² Naie illaicomini ññena uai otimaci:

—Janaba illamiediona jai uiñoticai. Abraham micori jai fioidaite. Jusiñamuina lloraini micoriai jai jai fioidaitimaci; iadedi: “Bu cue llua ññoiadedi, fioidañeite” raitio. ⁵³ Cai usuma Abraham micori baifemo faññedio. Jusiñamuina lloraini micoriai baifemo faññedio. ¿Bumiediota?

⁵⁴ Jesús uai ote:

—Dama cue abina biriñedicue; ia cue Moo cuena marena ññamona, cuena iobitate. “Cai Moodi Jusiñamui” raicabitomoi; ⁵⁵ iadedi naimiena uiñoñedomoi. Naimiena uiñoticue. “Naimiena uiñoñedicue” cue raia, omoi isoi taino lloticue. Naimiena uiñoticue. Naimiena jai ññoticue. ⁵⁶ Omoi usuma Abraham micori eniruemo cue ico billena jai uiñote. Iena uiñuamona, naimie iobide.

⁵⁷ Illaicomini ññena uai otimaci:

—Odi cincuenta años ñña ññedio. ¿Ñiese Abraham micorina ciodio?

⁵⁸ Jesús uai ote:

—Abraham micori ñña ññena facaiseconi jaca iticue.

⁵⁹ Iena cacajanona, naimie fairinollena, naie illaicomini ññena llinotimaci; iadedi Jesús reirillanona, Jusiñamui jofomona oni jaide.

9

Jesús uisidimiena jillotaja rafue

¹ Jai ruidio ie llofueoicaiganodicai diga Jesús macaria, uisidimiena ciode. Iese nanomona jaca naimiedi jeiciga. ² Jesús jicanotica:

—Llofueraíma, ¿bue ñellena naimiedi iese jeiciga? ¿Nie isoide ra ie moo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

³ Jesús uai ote:

—Naimie jeacino finua muidonañede. Ie moo muidonañede. Ie ei muidonañede. Jaca bu jetajamona, iese comuñede. Jusiñamui uai siñonana comini uiñollena, iese jeiciga. ⁴ Ñña userena jira, cuena oretatimie ie jitailla rafuena finoacacacai. Raire jitreñite. Ie mei bu jaca maiññite. ⁵ Eniruemo cue ñña ia, comini comeciaina lligaññoticue. —Iese Jesús llote; iadedi jai rafuena ññaite. Naimie ñña fioidañena, Jusiñamui rafuena llocana naimie jaillana ññaite. Ie fioidaññite jai iaire iacanana ññaite. Comeciaina lligaññuana llote, jeacino oni jaillana.

⁶ Iena lluanona eniruena tuajano, eniruie ñña finuanona, uisidimie uisina naie eniruie diga riginote. ⁷ Raito:

—Siloé railla joraibimo mai noisai —raite. Siloé oni dobaññuamona: “Oretarabi”.

Ie jira naimie noisaide. Uisi jai ciodigo, abido bite. ⁸ Billa mei, naimie ecimo itino, jiai naimiena ciocabidino diga, naimie jilluana coniniri siadotimaci:

—¿Buuta naimiedi? Bene ucube jicallena raicabidimie isoide.

⁹ Jiaino raitimaci:

—Jii, naimie.

Jiaino raitimaci:

—Ieñede. Naimiena eruaide isoide.

Naimie dinena raite:

—Uisinidimiedicue; iadedi jai ciodicue.

¹⁰ Naimiemo jicanotimaci:

—¿Niese jai birui ciodio?

¹¹ Uai ote:

—Jesús raillamie enirue idiai finuano, cue uisina riginote. Cueno llote: “Siloé railla joraibimo noisai”. Ie jira noisaidicue. Jai ciodicue.

¹² Jicanotimaci:

—¿Ninomo ite nai Jesús?

Naimie uai ote:

—Uiñoñedicue.

Comini uisinidimie jai jilluana siadua rafue

¹³ Navui uisinidimie jai jillua mei, fariseuai dine comini naimiena uitimaci.

¹⁴ Sábadoruimo Jesúdi naimiena jillotaja jira, ¹⁵ fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuano, cue uisina riginote. Ie mei Siloé railla joraibimo noidicue. Iemona jai ciodicue.

¹⁶ Fariseuaimona jiaino raitimaci:

—Sábadoruimo bimierna Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finouidimiedi uisinidimiena jillotate? —Ie jira daje isoi comeciaina facañedimaci.

¹⁷ Ie jira navui uisinidimiemo dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusiñamui uai lloraima.

¹⁸ Naimie moo, naimie ei iaimaiaimo nia jicanoñenia, judúuai illaicomini nai iima jaca cioiñenano inosiñede. Ie jira iaimaiaina uaiduanona, ¹⁹ jicanotimaci:

—¿Bimiedi omico jito? ¿Naimie jaca uisinino jeiciga?

²⁰ Uai otiaimaia:

—Jii, bimie coco jito. Jaca uisinino jeiciga. Iena uiñoticoco. ²¹ Niese jai naimie uisina ciuana uiñoñedicoco. Bu naimiena jilloitajana jiai uiñoñedicoco. Naimiemo jicano. Naimiedi jai eimiesa. Dama ie facaina jai ñaite —uai otiaimaia.

²² Bie rafue nia suiñenia, judúuai illaicomini navui llotimaci: “Jesúdi cai Jilloitaraima bu lloia, cai ofiracomo naimiena fo billana rairuitica”. Iena jaciruillanona, ²³ llotiaimaia: “Naimie jai eimiesa. Naimiemo jicano”. ²⁴ Ie jira illaicomini dane naimiena uaiduano, llotimaci:

—Jusiñamuimo iobillacinona feca. Jesúmo fecaño. Naimie jearede rafuena finouidimiena uiñotica.

²⁵ Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

²⁶ Jicanotimaci:

—¿Niesede ra diga finuamona odi uisina ciodio? ¿Niese ona jillotate?

²⁷ Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloticue? ¿Ie llofueganona jaiacadomoi?

²⁸ Riire uai otimaci:

—Naimie ie llofuegamiedio. Caidi Moisés micori ie llofueganodicai. ²⁹ Jusiñamui Moisés micorimo jaie llwana uiñoticaí; iadedi bimiena uiñoñedicai. Naimie ninena billana jiai uiñoñedicai.

³⁰ Nai iima uai ote:

—Jadi, naimie ninena billana uiñoñedomoi; iadedi cuena jillotate. ³¹ Jusiñamuidi jearede rafuena finodino ñaia uaina cacarefiñede. Naie isoidino siño rafuena finoñenana uiñoticaí; iadedi Jusiñamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñoticaí. ³² Enirue finua facaisemona jaca buna uisínino jeicigamienna jilloitañede. ³³ Jesúsdi Jusiñamuimona biñedimiedena, jaca buena finonide.

³⁴ Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

Jesús uisínidimie diga ñaia rafue

³⁵ Uisínidimiena jino dotajana fidianona, Jesús naimiena jenode. Baillano, jicanote:

—¿Omoi comínina jilloitaraimana ñnotio?

³⁶ Uai ote:

—¿Bumai naimie? Cuemo llono, naimiena cue ñnollesa.

³⁷ Jesús uai ote:

—Naimiena ciodio. O diga ñaite. Cue.

³⁸ Caiñici ifodo rainadajanona, iobillacinona fecallena, uai ote:

—Nama, jai o uaina ñnoticue.

³⁹ Jesús uai ote:

—Uisínidino cioitallena, eniruemo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedicai” raitinona jillotajaibite. Jesús “Jai maredicaí” raitinomo ite jeacino naimaci uiñollena bite.

⁴⁰ Naimie ecimo ite fariseuai iena cacajano, jicanotimaci:

—¿Uisínidomoi caina raitio?

⁴¹ Jesús uai ote:

—Uisínidino isoi itomoína, omoimo ite jeacino omoi muidonañede; ia “Jai ciodicaí” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoia-caiñena jira, iese ñaite. Naimaci jeacino oni dotajana jitañedimaci.

10

Toica llaudaiai sedaraima rafue

¹⁻² Jesús dane llofuate:

—Cue rafuena omoi raise uiñollena, toica llaudaiaina ñaiticue. Llaudaiai jino uicabilla isoi, llaigafomo nasedo fo jaidimiedí naie llaudaiai sedaraima; ia jinofebei dinena bitimiedí fiiriraíma. ³ Llaigafu llaudaiai sedaraima fo jaillena, nase sedaraimadi nase econote. Llaudaiai naimie uaina uiñotimaci. Imaci mameciaido uaiduamona, llaigafomona jino bitimaci. ⁴ Nana ie llaudaiai jino bia, naimacina ifode. Naimie uaina uiñuanona, naimiena racadimaci. ⁵ Naimaci uiñoñegamienna racañedimaci; iadedi naimie uaina naimaci uiñoñena jira, naimiemona oni aisidimaci.

⁶ Bie isoidicinona Jesús llofuate; iadedi naie comini iena cacañedimaci. ⁷ Ie jira Jesús dane llofuate:

—Llaigafu ie nase isoidicue. ⁸ Damierie fiirirainina bitimaci. Ie jira llaudaiai naimaci uaina cacañedimaci. —Iese Jesús llofuate; ia naimiena ñnotinona ñaite. Naimiena abi

caitadinona ñaite. Naimie ñnotino naimiena abi caitadino llogacinomo cacarefiñena ñaite. ⁹ Nia llofuate:

—Llaigafu isoidicue. Bu cue nasedo fo bia, jilloite. Llaudaiai isoi fo biite. Jino jaitte. Mare guille baite isoite. —Iese llofuate; ia naimiena ñnotino marena illana ñaite. Naimiemona naimaci jitailla rafuena uana ñaite. ¹⁰ Nia llofuate:

—Llaudaiaina fiillena, meinellena, faifillena, firiraima bite; iadedi cominina jaca raise itatallena, biticue. ¹¹ Llaudaiai marena sedaraimadicue. Mare sedaraimadi ie toinaia facaina riiduanona ie abina faifite. ¹² Janallari bia, llaudaiai naimie ieñena jira, jamai maijidimiedi, llaudaiaina fainonocaillano, ecimona aiside. Llaudaiaina janallari gaitaacanamona, llaudaiai tuudimaci. ¹³ Jamai ucube oiacanano, isiruiñenano, jamai maijidimie aiside. ¹⁴ Iese iñedicue. Mare sedaraimadicue. Cue llaudaiaina uiñoticue. ¹⁵ Cue Moo diga conimana coco uiñua isoi, naimaci cuena jiai uiñotimaci. Cue llaudaiai facaina fiodaiticue. —Iese Jesús llofuate; ia naimiena ñnotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiai fiodaiacade. ¹⁶ Nia llofuate:

—Jiaie llaigafomo jiaie llaudaiai cuemo ite. Naimacina jiai atiacadicue. Cue uaina cacaitimaci. Ie mei danomo nana cue llaudaiai iitimaci. Naimacina dama sedaiticue. —Iese Jesús llofuate; ia jiaie nairaiaimo naimiena ñnotinona ñaite. Dajena naimacina sedajana ñaite.

Jesús fiodaille rafue

¹⁷ Jesús nia llofuate:

—Cue jai fiodaiacanamonona, cue Moo cuena isiruite. Fiodaillamonona dane jilloiticue.

¹⁸ Cue jitañenia, jaca buna cuena meineñeite. Cue jitailla jira, fiodaiticue. Siño uai cuemo illa jira, cue jitailliruimo fiodaiticue. Cuemo cue Moo siño uaidi jai illa jira, dane jilloiticue.

¹⁹ Jesús iese llofuia jira, judíuai illaicominidi daje isoi comeciaina facañedimaci.

²⁰ Jiaínodi:

—Naimiemo Janaba illamie —raitimaci—. Uairico. Naimiena cacareiacañedicai —raitimaci.

²¹ Jiaíno raitimaci:

—Bie isoidicinona Janaba illamie llofueñede. Janaba illamie uisnidimiena jillotanide.

Jesús ie Moo diga daje isoi comeci lloilla rafue

²² Rollime facaise Jerusalémo Jesús ite. Naie facaiseconi Jusiñamui jofo ie finua comecia rafue ite. ²³ Salomón micori finotaga jofo abi ibirimo Jesús macarite. ²⁴ Naie facaise judíuai illaicomini naimie dine bitimaci. Jicanotimaci:

—¿Niruido caimo ona lloitio? Odi cai jilloitaraimania, caimo marefodo llono.

²⁵ Jesús uai ote:

—Omoimo jai lloticue; iadedi ñnoñedomoi. Cue Moo mamecido cue finoca rafuemona cuena uiñotomoi. ²⁶ Cue toica llaudaiaimo omoi jainaiañena jira, cuena ñnoñedomoi.

²⁷ Cue toica llaudaiai cue uaina cacadimaci. Naimacina uiñoticue. Cuena racadimaci.

²⁸ Naimaci jaca itataticue. Jaca abina faifiñeitimaci. Cue anamonona jaca budi naimacina bairoñeite. ²⁹ Cue Moo naimacina cuemo fecade. Naimacidi jiaíno baifemo faitimaci. Naimiemona jaca budi naimacina baiironide. ³⁰ Cue Moo diga daje isoi comecina lloidicoco. —Iese llote; ia naimiena ñnotinona ñaite. Naie illaicomini naimiemo jainaiañena jira, naimiena ñnoñedimaci. Iena Jesús ñaite.

³¹ Jesús llofuiana cacajano, naie illaicomini nofcina llinotimaci, naimiena meinellena.

³² Iena ciuanona, Jesús llote:

—Cue Moo uaido diga mare rafuena finodicue. ¿Ñie isoide rafuena cue finua muidona, cuena meineiacadomoi?

³³ Uai otimaci:

—Mare rafuena o finua muidona, ona meineñeiticaí. Jamai iimadio. “Jusiñamuidicue” o railla jira, ona meineiticaí. Jusiñamui Joreñona jiai jeare ñaitio.

³⁴⁻³⁶ Jesús dinena uai ote:

—Jaie ciegafuiaina jamainidicai. Nainomo Jusiñamuidi naimie uaina cacadinomo jaie llote: “Omoidi jusiñamuillaidomoi”. Jusiñamui ie uaina cacadinomo jaie iese lloide, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ñaitio” raitomoi. ³⁷ Cue Moo isoi cue finoñenia, cuena inoñeno; ³⁸ iadedi cuena omoi inoiacaiñenia, cue Moo isoi cue finoia, naie rafuena ino. Iemei cue Moomo cue jainaiaillana uiñoitomoi. Cuemo cue Moo jainaiaillana jiai uiñoitomoi.

³⁹ Iena cacajano, naimiena dane gaitacadimaci; iadedi naimacimona jillode.

⁴⁰ Ie mei Jesús Jordán railla ille ruica dibeimo jaide. Nainomo Juan micori cominina nano bautizade. Nainomo rillanona, nainomo Jesús fiebide. ⁴¹ Ailluena comini Jesús dine bitimaci. Coninina raitimaci:

—Juan micori siño rafuena finoñede; iadedi nana Juan micori Jesúsna llucacimodi uanaicino.

⁴² Nainomo ailluena cominidi Jesús naimaci Jilloitaramana inotimaci.

11

Betaniamo Jesús abido jailla rafue

¹ Naie facaise Betaniamo Lázaro raillamiedi duide. Naimie miriñodi Marta, María iaiñuai. ² Naie Maríadi jiairuido Jesús eillimo caimare soride rana totade. Ie mei naiñaiño ie ifotie diga naimie eillina safenaillena dote. ³ Naie iaiñuai Jesús dine uaina orediañuai, naimie billena. Naimie jibuisaibillena llotatatiñuai:

—Nama, o isirugamie duide —llotatatiñuai.

⁴ Jesús naie rafuena fidiano, llote:

—Jamai fiodaillena naimie duiñede. Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodio” cuena raitimaci.

⁵ Jesúsdi Lázaron a isiruite. Ie miriño iaiñuaina jiai isiruite; ⁶ iadedi Lázaro duillana Jesús fidiano, naimie dine jaiñede. Naimie illanomo menarui nia fiebide. ⁷ Ie mei ie llofueoicaiganodicaimo llote:

—Judeamo abido dane mai cai jailli.

⁸ Uai oticai:

—Llofueraima, judíuai illaicomini birui noficina ona fairinoiacadimaci. ¿Niese naimaci dine dane jaitio?

⁹ Uai ote:

—Nagarui userede. Userenia bu macaria, raise ciua jira, eicaitañede; ¹⁰ iadedi bu naiona macaria, raise cioñena jira, eicaitaide. —Iese llofue; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

¹¹ Dane llote:

—Lázaro jai inide; iadedi naimiena casitallena, jaiticue.

¹² Uai oticai:

—Nama, naimie jamai iniia, nia dama casite.

¹³ Naimie jafaici uanona iniamo comeciaina facadica; iadedi Jesús naiena lloñede. Lázaro fiodaillana ñaite. ¹⁴ Ie jira Jesús caimo marefodo llote:

—Naimie jai fiodaite. ¹⁵ Nainomo cue inena jira, cue siño uai omoi inollena, omoi facaina iobidicue. Naimie dine mai cai jailli.

¹⁶ Caimona Tomás caimo llote:

—Maiña. Naimie diga fiodaisaiticai —llote. Tomás mameci jiaicidi Dídimi. Naimiedi gorasa.

Jesús Marta diga ñaia rafue

¹⁷ Betaniamo cai ria, Lázaro raiafomo jai nagaamagarui illana fididicai. ¹⁸ Jerusalémona Betaniamo tres kilómetros dinori illa jira, ¹⁹ diga judíuai illaicomini eedollena, Marta iaiñuai María dine bitimaci. ²⁰ Jesús billana Marta fidiano, cai dine naisomo bite; iadedi jofomo María fiebide. ²¹ Jesúsno Marta llote:

—Nama, o bene itiona, cue iio fioidañede; ²² iadedi Jusiñamuimo buena o jicaia, naimie iena finoite. Iena uiñoticue.

²³ Jesús dinena uai ote:

—O iio abido jilloite.

²⁴ Naiñaiño uai ote:

—Nana comini jilloilliruimo naimie jiai jilloite. Iena uiñoticue.

²⁵ Jesús uai ote:

—Fiodaillamona comini abiaina Jilloitaraimadicue. Jusiñamui diga jaca illena, cominina itataraimadicue. Bu cuena inuanona, fioidiadedi, iemona ico jilloite. ²⁶ Cuen a innotimiena Jusiñamui illanomo jaca illena itataitice. ¿Iena innotio?

²⁷ Naiñaiño uai ote:

—Jii, Nama; odi cai Jilloitaraimadio. Odi Jusiñamui Jitodio. Jusiñamui dinena o billamo jai eocuridicai.

²⁸ Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

²⁹ Iena cacajano, raire cai dine María bite. ³⁰ Marta diga ie ñaianomo Betania ecimo Jesús nia ite. ³¹ Jesús dine María nia jaiñenia, judíuai illaicominidi Maríana nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci. ³² María Jesús dine rillano, naimiena duenaillano, caiñici ifodo rainadacaida, llote:

—Nama, bene itiona, niadedi cue iiodi fioidañede.

Jesús Lázaron a jillotaja rafue

³³ María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite. ³⁴ Jicanote:

—¿Ninomo Lázaron a raitomoi?

Uai otimaci:

—Nama, mai jibuisaibi.

³⁵ Lázaron a duenaillanona, Jesús eede. ³⁶ Iena ciuanona, judíuai illaicomini dinena llotimaci:

—Ero. Naimiena eo isiruite.

³⁷ Jiaino raitimaci:

—Navui uisnidimiena jillotate. ¿Bue ñellena bimiena jilloitañede, naimie nia fioidañenia?

³⁸ Iena cacajanona, ie siño uai finuana naimaci nia raise innosinena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica. ³⁹ Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

⁴⁰ Jesús uai ote:

—Cuen a o innoia, Jusiñamui uai siñonana uiñoitio.

⁴¹ Iemona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue. ⁴² Jaca cuena cacadio. Iena uiñoticue; iadedi cue diga bene itino illa muidona, iese ado lloticue. Cuen a o retajana naimaci inollena, o diga ado ñaiticue.

⁴³ Ie mei eo ado llote:

—Lázaro, jino bi.

⁴⁴ Nai fioiditimie nia naimie abi nana ferinua ra diga jino bite. Jesúsdi cominimo llote:

—Naimie abi ferinua oni suiño. —Ie jira suiñodimaci.

⁴⁵ Ie muidona María diga bitinomona ailluena comini Jesúsna innotimaci. Naimie finoca rafuena ciuanona, innotimaci.

*Jesúna meinellena, illaicomini comeciaina facaja rafue
(Mt 26.1-5; Mr 14.1-2; Lc 22.1-2)*

⁴⁶ Jesúsna iinoñedinomona damierie Jesús finoca rafuena fariseuai dine lluidimaci. ⁴⁷ Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Niese naimiena nibaiticai? Diga siño rafuena ua finocabide. ⁴⁸ Naimiena niese cai nibañenia, nana comini naimiena iinoitimaci. Nana comini naimie dibeimo jaia, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaiñedicai.

⁴⁹ Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi. ⁵⁰ Iese cai nairaimo suiñellena, damie cai nairai facaina fioidaitena, mare. Iena nibai nia raise uiñoñedomoi.

⁵¹ Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fioidaite.

⁵² Cai comini facaina dama fioidañede; iadedi nana Jusiñamuina iinoitinona facaina fioidaite. Diga nairaimo itimaci; iadedi naimiemo dajena nana naimaci duillena, naimie fioidaite. ⁵³ Caifás llua naimaci cacajamona, judíuai illaicomini comeciaina nia facadimaci, naimiena meinellena.

⁵⁴ Ie jira Jesús judíuai illaicomini illa motodo marefodo macariñede. Jofue iñena dofodo jaidicai. Efraín railla nairai dine ridicai. Nainomo diga irui iticai. ⁵⁵ Pascua railla rafue iaire iacana jira, ailluena comini Jerusalémo naimaci nairaimona jaidimaci. Rafue nia taineñenia, naimacimo ite rafue oni jaillena, cai einamací llua isoi finodimaci. ⁵⁶⁻⁵⁷ Jusiñamui diga nanoca ñairainidi fariseuai diga navui ñaitimaci:

—Bu Jesúsna cioia, naimiena cai gaitallena, caimo llono.

Rafuemo bitino illamona, Jesúsna jenodimaci. Jusiñamui jofomo naimaci ia, coninimo jicanododimaci:

—¿Niese comeciaina facadomoi? ¿Jesús bene biite? Cai illaicomini llua jira, nibai jai biñeite. Illaicomini llua fidiano, naimie biñeite.

12

Betaniamo Lázaro jofomo Jesús guilla rafue

(Mt 26.6-13; Mr 14.3-9)

¹ Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaronna fioidaillamona navui jillotate. ² Jesúsna iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicaidi jiai motomo guiticai. ³ Iemei Maríadi nardomona finoca caimare soride ra Jesús eillimo totade. Daje botella raifi totade. Safenaillena naiñaiño ifotie diga ie eillina dote. Nai caimare soride ra eo raifide. Daje botella ite. Iemona nana jofu jeraidi soride. ⁴ Caimona Judas Iscariote micorina mameciredimie ite. Jesúsna gaitataitimie. Llote:

⁵ —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare — llote. ⁶ Dueredinona naimie duenañede; iadedi naimie cai ucubena sedade. Naimiedi fiiriraima. Naie ucubemona fiuilla jira, iese naimie llote.

⁷ Jesús uai ote:

—Dama ite. Bie soride ra naiñaiño jai eenoga cue fioidaillirui iena. ⁸ Dueredino omoi diga jaca iitimaci; iadedi omoi diga jaca iñeiticue.

Ailluena comini Lázaronna ciua rafue

⁹ Lázaro jofomo Jesús illana ailluena cai illaicomini fidiano, bitimaci. Navui fioidaillamona Lázaronna Jesús jillotaja jira, Jesúsna dama cioiacañedimaci; iadedi Lázaronna jiai cioiacadimaci. ¹⁰ Ie jira Jusiñamui diga nanoca ñairainidi Lázaronna jiai meinellemo comeciaina facadimaci. ¹¹ Lázaro muidona ailluena judíuai illaicomini naimaci illa dibeí fañonocaida, Jesúsna iinotimaci.

*Jerusalémo illa*ima isoi, Jesús marena jailla rafue
(Mt 21.1-11; Mr 11.1-11; Lc 19.28-40)

¹² Pascua railla rafue illa jira, ailluena comini Jerusalémo itimaci. Egiptomona cai jaiagai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaronna Jesús navui jilloitajana diga comini ciodimaci. Iena llocana uitimaci. Ie jira ailluena comini Jesús dine jaidimaci. ¹³ Raforona uanona, naimiena feiñollena, naimie uicomo jaidimaci. Ado curiisite:

—¡Cai Jilloitaraima billa! ¡Jusiñamui mamecido bitimie eo mare! ¡Cai Illaima eo mare! —curiisite.

¹⁴ Jesúsdi ailli baiga burrito emododo jaide. Jusiñamui facaina lloraima micori jaie llua isoi jaide. Jaie llote: ¹⁵ “Jerusalén imaci, jacinañeno. O Illaima burrito emododo biite”. ¹⁶ Naie facaise bie rafuemo comeciaina facañedica; iadedi Jesús jillua mei, bie rafuena comecitica. ¹⁷⁻¹⁸ Lázaronna Jesús jillotaja jira, ailluena comini Jesús dine jaidimaci. ¹⁹ Iena ciuano, fariseuai coniniri ñaitimaci:

—Jaca buena birui finoñedica. Ailluena comini Jesús dibeimo jai jaidimaci.

Judíuaiñedino Jesúsna cioiacana rafue

²⁰ Judíuaiñedino Jusiñamuina sedallena, pascua railla rafuemo jiai bitimaci. ²¹ Naie facaise cai dine bitimaci. Felipedi Galilea ie Betsaida nairai imiena jira, Felipe dine bitimaci. Felipemo llotimaci:

—Jesúna cioiacadica.

²² Felipe iena Andrémo llote. Ie mei Jesúsno lluidiaimaiai. ²³ Jesús uai ote:

—Monamona biticue; ia jai cue fiodaille facaise ride. Comini cue uaidi siñonana uñua facaise jai ride. ²⁴ Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodaiñenia, jaca bu jillobiñeite. Cue fiodaillemona ailluena comini jillobitimaci. ²⁵ Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite. ²⁶ Cuena bu raise sedaacania, cue rafuedo naimie jaite. Cue llofuegamienna naimie jaillamona, cuemona fueoite. Iemona cue Moodi naimienna caimare itataite. ²⁷ Cue comeci jai rucaicuerite; iadedi, ¿niese raiticue? Raiñeiticue: “Moo, cue fiodaillemona cuena jillote”. Fiodaillena biticue. Ie jira raiticue: ²⁸ “Moo, cominina o uai siñonana uñota”.

Ieconí monamona Jusiñamui llote:

—Jai iena finodicue. Dane iena finoiticue.

²⁹ Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaienici llote.

³⁰ Jesús uai ote:

—Cue facaina naie llua cacaiñedomoi; iadedi omoi facaina iena cacadomoi. ³¹ Cuena uñoñedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafefitaite. ³² Cruzmo cue fiodaia, naimacina jilloitallena, ailluena cominina cue dibeimo itataiticue. ³³ —Naimie fiodaillana naimaci uñollena, iese llote.

³⁴ Naie comini uai otimaci:

—Jusiñamui facaina lloraini micoriai jaie cuega: “Cai Jilloitaraima jaca fiodaiñeite”. ¿Niese raitio: “Jusiñamuimona biticue; ia fiodaiticue”?

³⁵ Jesús dane uai ote:

—Cue llofuia dinori omoi comeciaina nia lligaiñoticue. Cue llua cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uñoñede. Ie isoide. Jeacino anamo itinodi jitiredinomo itimaci isoidimaci. Uanaicinona uñoñedimaci. ³⁶ Jeacino anamona omoi jilloillena, cue llofuia uaido omoi comeciaina birui lligaiñoticue. Cue uaina ñino, cue cominina omoi jaillena.

Bie llua mei, Jesús oni jaillano, naimacimona reirite.

Comini Jesús uaina ñnoñena rafue

³⁷ Jesús diga siño rafuena finode; iadedi ailluena comini: “Naimiedi cai Jilloitaraima” raillana nia ñnosñede. ³⁸ Iemona Isaías micori jaie ciegafuiaí suide. Naimie jaie cuela: Jusiñamui, cai llucacina cacadimaci.

O siño uaido o finoca rafuena jiai ciodimaci; iadedi ñnoñedimaci.

³⁹⁻⁴⁰ Isaías micori dane cuela:

Naimaci cioi raillano, Jusiñamui naimacina uisidino isoi itatate.

Naimaci comeciñmona abina uñoi raillano, naimaci comeciñna faitate.

Naimiena ñnoi raillano, iese naimacina jai itatate.

Ie jira jai ñnonidimaci. ⁴¹ Jusiñamui ie ebirede rafuena naimie ciuamona, Isaías micori iena lloste. Isaías micori Jesúsna lloste. ⁴² Isaías micori iese lloste; iadedi ailluena judfuaí illacomini Jesús uaina ñnotimaci. Fariseuñna jaciruillanona, iena janotimaci. Naimaci ofiracomona naimacina jino dotajana jaciruitimaci. ⁴³ Comini naimacina iobitajana naimaci eo jitailla jira, dotajana jitañnedimaci. Jusiñamuimo ite iobillacina raise oiacañnedimaci.

Jesús ie Moona ñaia rafue

⁴⁴ Naie facaise Jesús eo ado lloste:

—Cuenta ñnotimie cuenta oretatimiena jiai jai ñnote. ⁴⁵ Cuenta ciodimie cuenta oretatimiena jiai ciede isoide. ⁴⁶ Comini comeciñna lligañollena biticue. Ie muidona naga cuenta ñnotimie jitedinomo jai ññede. Jeacino anamo jai ññede. ⁴⁷ Cua uaina cacajano ñnoñedimie juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; ⁴⁸ ia cuenta bu ñnoñena, cue uaina naimie ñnoñena, ja muidona faifite. Cua uaina naimie ñnoñellemona, nana naimiena ñnoñedino janafelliruimo Jusiñamui naimiena ico duere finote. Cuenta jitañnedimie, cue uaina jitañnedimie comini janafelliruimo janafefite. ⁴⁹ Dama cue comeci facaja uaido lloñedicue. Cua Moo cuenta oretaja muidona, cue Moo cuemo lloga uaido lloticue. ⁵⁰ Cua Moo lloga uaidi naimie dibeimo cominina jaca itatate. Iena uñoticue. Ie jira cue Moo cuemo lloga uaina jaca lloticue.

13

Jesúdi ie llofueoicaigano eillina jocua rafue

¹ Pascua railla rafue riacana areruido ia, Jesús ie Moo dine abido jaiacanana uñote. Naimaci diga naimie nia ia, ie cominina jaca eo isiruite. ² Jesúsna gaitatallena, naie facaise Taifedi Judas Iscariote micori comeciñna feidote. Judas micori Simón jito. ³ Jesúdi ie uai ie Moomona feñuana uñote. Ie Moo dinena billana uñote. Ie Moo dine abido jaillena jiai uñote. ⁴ Nairuido Jesús cai diga guite. Guilla meinoconi, Jesús a naidacaida ie abimo ite iniroina duiñode. Abi dora diga ie moillina ferinote. ⁵ Janorede nogomo jinuina totaja mei, cai eillina jocode. Safenaillena, ie dora diga dote. ⁶ Simón Pedro dine naimie ria, Pedro jicanote:

—Nama, ¿cua eillina jiai jocoitio?

⁷ Jesús uai ote:

—Cua finoca rafuena birui uñoñedio; iadedi jairuido uñoitio.

⁸ Pedro uai ote:

—Cua eillina jaca jocoñeitio.

Jesús uai ote:

—O eillina cue jocoñena, cue facaina ññeitio.

⁹ Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi diga, jiai joco.

¹⁰ Jesús uai ote:

—Nana o abina jocoñeiticue. Da o eillina jocoiticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

¹¹ Naimiena gaitataiacadimienna naimie uiñua jira, iese llote.

¹² Cai eilliaina jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. ¹³ Cuen a “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue. ¹⁴ Omoi Namadicue. Omoi llofueraimadicue; iadedi omoi mullaima isoi iticuedena, omoi eilliaina jai jocodicue. Omoi jamai bue isoidinomona, omoi eilliaina danirie jocua. ¹⁵ Cuemona fueo. Abi iedoñeno cue isoi omoi jai. Cue afemo iñedomoi. ¹⁶ Uanai omoimo lloticue. Mullaima ie nama afemo iñede. Oretagamie ie oretatimie afemo iñede. Ie isoide. Cue afemo iñedomoi; ia omoi eilliaina jocodicue. “Jiaimie afemo iticai” raillanomo comecina omoi facañeno. ¹⁷ Bicino omoi uiñuamona, iese omoi finoia, caimare iitomoi. ¹⁸ Nana omoina iese ñaiñedicue. Nana cue fetocanona uiñoticue. David micori jai llote: “Cue diga gutinomona damie cuena enoidimie ite”. ¹⁹ Bie nia suiñenia, iena jai lloticue. Iena cuemo suilla mei, David micori llogacino raise iñoitomoi. ²⁰ Uanai lloticue. Cue oretagamiena bu feiñoia, cuena jiai feiñote. Bu cuena feiñoia, cuena oretatimiena jiai feiñote.

Jesúdi ie gaitataitimiena llua rafue

(Mt 26.20-25; Mr 14.17-21; Lc 22.21-23)

²¹ Jesús iese llua mei, ie comeci sunaite. Llote:

—Uanai lloticue. Omoimona damie cuena gaitataite.

²² Caimona ¿nimie naimiena gaitataite? raillanona, comecina facajano, coninimo eroridicai. ²³ Cuen Jesús eo gaia jira, Jesús abimo iticue. ²⁴ Cuen uaiduanona, Pedro cuemo llote:

—“¿Bu ona gaitataite?” Jesús mo jicano.

²⁵ Ie jira Jesús mo jicanoticue:

—Nama, ¿bu ona gaitataite?

²⁶ Jesús uai ote:

—Bie llomenicono mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito. ²⁷ Llomenicono guilla meinoconi, Taife anamo Judas micori illamona, Taife naimie comecina feidote. Jesús naimiemo llote:

—O finoacaga rana raire fino.

²⁸ Jesús Judas micorimo llua raise uiñoñedicai. ²⁹ Judas micori ucubena sedaja jira, jiaño comecina facade: “Cai jitaille guille ibarisai” Jesús naimiemo llote”. Iese lloñenia, “Janore ucube dueredinomo feca’ nibai naimiemo llote”. ³⁰ Guilla mei, Judas micori jino jaide. Naie facaise jai jitireficaide.

Jesús ie fiodaillena ñaia rafue

³¹ Judas micori jailla mei, Jesús llote:

—Jusiñamuimona billanona, iimana jaidicue; ia cue fiodaillie facaise jai ride. Cue fiodailllemona cominidi Jusiñamui uai siñonana uiñoitimaci. ³² Iemona Jusiñamui uai siñonana comini uiñoia, Jusiñamuidi cominina cue siño Jitona jiai uiñotaite. Iese ja finoite. ³³ Cue comini, dallu omoi diga bene iticue. Jaiticue. Cue diga iacanitomoi. Judíuai illaicominimo navui cue llua isoi, omoimo ja lloticue. Cue jaillinomo nia jaiñeitomoi. ³⁴ Ie jira jiaie rafuena omoimo ja lloticue. Omoina cue isiruilla isoi, coninina omoi isirui. ³⁵ Coninina omoi isiruillamona, jiaie cominidi cue cominidomoina uiñoitimaci.

Pedro Jesús diga ñaia rafue

(Mt 26.31-35; Mr 14.27-31; Lc 22.31-34)

³⁶ Naie facaise Pedro naimiemo jicanote:

—Nama, ¿nine jaitio?

Jesús uai ote:

—Cue jaillinomo cue diga ja jaiñeítio. Jiairuido jaitio.

³⁷ Pedro uai ote:

—Nama, ¿bue ñellena ja jaiñeticue? O jitaia, o facaina ja fiódaiticue.

³⁸ Jesús ñinena uai ote:

—Cue facaina fiódaiacadío. Uanai omo lloticue. Nia monañenia, iitava nia ñañenia, dacaiño amani cuena janoitiosa.

14

Jesús ie Moo ñinomo rille rafue

¹ Jesús ie llofueoicaiganodícaína nia llofueete:

—Rucaicueriñeno uri i. Jusiñamuina ñinocana jai. Cuena jiai ñinocana jai. ² Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue. ³ Fuiduanona, dane abido biiticue. Omoína cue ñine uillena, cue ñine omoi illena, biiticue. ⁴ Cue jaillinona birui uiñotomoi. Nainomo omoi rillena jiai uiñotomoi.

⁵ Tomás uai ote:

—Nama, o jaillinona uiñoñedicaí. ¿Ñiese nainomo riiticaí?

⁶ Jesús uai ote:

—Omoi naiso isoidicue. Uanaicinona lloticue. Cue Moo ñibeimo cominina jaca itataticue. Cue Moo ñine joide naiso isoidicue. Jaca dasode cue Moomo ñuide naidi. Cue Moo ñine o ria, cuena ñino. ⁷ Cuena uiñotomoina, cue Moona jiai uiñotomoi. Biruidemona naimiëna uiñotomoi. Naimiëna jai ciódomoi.

⁸ Felipe uai ote:

—Nama, o Moona caimo acata. Iemo jai macaíbaite.

⁹ Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciódimie cue Moona jiai jai cióde isoide. ¿Ñiese llotio: “O Moona caimo acata”? Cue Moona jai ciódio isoidio. ¹⁰ Cue Moo diga daajedicoco. Iena nia ñinoñedio. Cue lluaði cue Moo uai. Cue lluaði cue comeci iuañede. Cue motodo naimie maijide. ¹¹ Cue Moo diga daajedicocoña ñino. Cue uaina omoi ñinoñenia, siño rafuena cue finua jira, cuena ñino.

Jesús ie Moo Joreña llua rafue

¹² Jesús nia llofueete:

—Uanai lloticue. Cuena omoi ñinoia, cue finoca rafuena jiai finoitomoi. Cue Moo ñine cue jailla jira, cue Moo Joreña omoi ñine cue oretaja mei, cue finua baifemo finoitomoi. ¹³ Cue Moo uai siñonana omoi uiñollena, buena cue ñibeido cue Moomo omoi jicaia, nana iena finoiticue. ¹⁴ Cue ñibeido omoi jicaia, iena finoiticue. ¹⁵ Cuena omoi isirua, cue llogacínuaína ñinoitomoi. ¹⁶ Ie Joreño omoimo fecallena cue Moomo jiiiticue. Naie Joreñodi omoína canoite. Omoi diga jaca iite. ¹⁷ Uanaicinona llocabite. Naimiëna naimaci uiñoñena jira, cuena ñinoñedino naimiëna feiñonidimaci; iadedi naimie omoi diga illa jira, naimiëna uiñotomoi. Omoi diga jaca iite. ¹⁸ Omoína fainonocaiñeíticue; ia dane biiticue. ¹⁹ Nano ñigarui illanona, cuena ñinoñedino cuena nia cióitimaci. Ie mei cuena cióñeítimaci; iadedi fiódaillamona cue jillua mei, cuena nia cióitomoi. Cue jaca illa jira, jiai jaca iitomoi. ²⁰ Fiódaillamona cue jillua mei, cue Moomo cue ñuillana raise uiñotomoi. Cuemo omoi ñuillana jiai raise uiñotomoi. Omoimo cue ñuillana jiai raise uiñotomoi. ²¹ Cue llogacínuaína omoi isirua, cuena isiruitomoi. Ie jira cue Moodi omoína jiai isiruite. Omoína jiai isiruiticue. Omoína cuena uiñotaiticue.

²² Iscariotena mamecireñede Judas naimiemo jicanote:

—Nama, ¿bue ñellena ñani caina ona uiñotaitio; iadedi jiaie cominina ona uiñoñañeítio?

²³ Jesús uai ote:

—Cuena isiruitinona cue rafuena uiñotadicue. Bu cuena isirua, cue llogacínuaína ñinoite. Cue Moo naimiëna isiruite. Iemona naimiëna nabaiticoco. ²⁴ Bu cuena

isiruiñenia, cue llogacinuaina ñnoñede. Cue llogacinodi cuejeñede. Cue Moo ie. Naimie cuena oretate. ²⁵ Omoi diga nia cue illamona, bie llogacinuai omoimo jai lloticue. ²⁶ Cue Moodi omoina canollena, naga rafuena omoina llofuellena, cue facaina ie Joreña omoimo oretate. Omoina nana omoimo llogacinuaina comecitaite. ²⁷ Cue Moo dine jaiticue; iadedi omoi comeciaina uri itataiticue. Cuena ñnoñedino omoi comeciaina iese itatanidimaci. Jarire iñeno. Jaciruiñeno. ²⁸ Ailli cue lluaana cacadomoi: “Cue Moo dine jaiticue; iadedi dane biiticue”. Cue Moo dine cue jailla jira, cuena omoi isiruia, cueri iobitomoi. Cue Moo cue afemo ite. ²⁹ Bie rafue cuemo nia suiñenia, uicodo omoimo iena jai lloticue. Naie suia, cuena fainonocaiñeno omoi jaillena jitaicue. ³⁰ Omoi diga are nia ñaiñeiticue. Cuena ñnoñedino anamo itimie cuena jai duere finoacade. Taifena ñaiticue. Naimie anamo iñedicue; ³¹ iadedi cue Moona cue isiruillana cuena ñnoñedino uiñollena, cue Moo cuemo llua isoi, finoiticue. Mai cai jailli.

15

Uvas railla riarra ie rafue

¹ Jesús nia llofuate:

—Cue ñibeimo marena omoi illena omoi raise uiñollena, jiaie rafuedo iena llofueiticue. Uvas railla ua riaradicue. Cue Moodi uvas railla riarra sedaraima. ² Cue amena igailaidomoi. Llisiñede igai cue Moo cugaica. Eo llisillena, naga lliside igaina janore muido jaigaica. Ie isoide. ³ Cue llogacinuaido jaillamona, jai jaigaica isoidomoi. Iemona omoi comeciái jai jeanide. ⁴ Cuena nabai. Ona jiaí nabaiticue. Naie amenamo jai duiñena jira, daje ñibegaise jaitaca igaidi jai llisiñede. Ie isoide. Cuena omoi nabaicabiñenia, llisiñede igai isoidomoi. Ie jira cuena nabai. ⁵ Uvas railla riaradicue. Cue amena igailaidomoi. Cuemo omoi duiadedi, omoimo cue duiadedi, eo lliside isoidomoi; iadedi cuemo omoi duiñenia, jaca llisiñede isoidomoi. Cuemo omoi duiñenia, cue jitailla isoi mare rafuena jaca finoñeitomoi. ⁶ Jai duide igailai safenailla mei, marañena jira, jobaillena, danomo ofitaticai. Cuemo duiñedimie jai duide igai isoide. Jusiñamuimona duere sefuite. ⁷ Cuena omoi nabaia, cue uaina omoi feitañenia, omoi jitailla rana jica. Ie mei feiñoitomoi. ⁸ Eo lliside omoi isoia, cue Moo iobide. Iese omoi ia, ua cue cominidomoi. —Iese Jesús llofuate; ia naimie ñibeimo naimaci raise illena ñaite. Mare rafuena naimaci finocana jaillena ñaite.

⁹ Nia llofuate:

—Cuena cue Moo isiruilla isoi, omoina isiruiticue. Cuena nabaicabi. ¹⁰ Cue Moo llogacinuaina cue ñnuamona, naimie isiruillacino anamo iticue. Cue Moo llogacinuaina omoi ñnuamona, cue isiruillacino anamo itomoi. ¹¹ Cue isoi omoi comeciái eo caimarellena, bicinuai omoimo lloticue.

¹² Dane bie rafuena lloticue. Omoina cue isiruilla isoi, coninina omoi isirui. ¹³ Naimaci o isiruillamona, o nabañiaí facaina o fiodaia, naimacina eo ua isiruitio. ¹⁴ Cue llogacinuaina omoi ñnoia, cuena nabaidomoi. ¹⁵ Omoina “Cue mullaiaidomoi” jaca raiñedicue; iadedi omoina “Cue nabaiñiaidomoi” birui raiticue. Mullaiaí imaci patrón finoca rafuena uiñoñedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uiñotomoi. ¹⁶ Cuena fetoñedomoi; iadedi omoina fetodicue. Omoi lliside isoicabillana omoimo jai lloticue. Ie mei buena cue mamecido cue Moomo omoi jicaia, omoimo fecaite. ¹⁷ Coninina omoi isiruillena jai lloticue.

Comini Jesúna enoilla rafue

¹⁸ Jesús nia llofuate:

—Cuena ñnoñedino omoina enoia, nano cuena jai enoidimaci. Iena uiñotomoi. Omoina nia enoiñenia, cuena jai enoidimaci. ¹⁹ Naimacimo jainaiaidomoina, omoina isiruitimaci; iadedi naimacimo omoi jainaiañena jira, omoina cue fetua jira, omoina enoidimaci. ²⁰ Omoimo jai lloticue. Illaíma duere sefua, naimie anamo itino jiaí duere sefuidimaci. Ie isoide. Cuena comini duere finua isoi, omoina jiaí duere finoitimaci. Cue llofuiacinona naimaci ñnua isoi, omoi llofuiacino jiaí ñnoitimaci. ²¹ Cuena oretatimiena naimaci uiñoñena jira, cue muidona iese finoitimaci. ²² Naimacimo ite jeacinona

naimacimo lloñedicuena, naimacimo ite jeacinona uiñoñedimaci. Cue rafuena naimaci cacajamona, naimacimo ite jeacinona jai uiñotimaci. Naimacimo jeacino nia ia, naimaci muidona. ²³ Cuen a enoidimiedi cue Moona jiai enoide. ²⁴ Eo siño rafuena naimaci motomo finodicue. Buna cue isoi jaca finoñede. Iena finoñedicuena, naimacimo ite jeacinona uiñoñedimaci. Cue siño finoca rafuena jai ciotimaci. Ie jira cuena enoidimaci. Cue Moona jiai enoidimaci. ²⁵ Naimacina David micori jaie llote: “Naimacimo buena finoñedicue; ia cuena enoidimaci”. Naie cuegafuiai jai suide.

²⁶ 'Cue Moo ie Joreño omoimo oretaitaite. Ie Joreño omoina canoite. Omoina uanaicinona uiñotaite. ²⁷ Cue nano lluaruimona cue diga omoi illa jira, cue facaisena jiai raise lloitoimoi.

16

Judúuai illaicomini Jesús llofueoicaiganona duere finua rafue

¹ Jesús nia llofueite:

—Danomo abido omoi jaiñellena, cue uaina omoi fainonocaiñellena, bicinuai omoimo ja lloiticue. ² Omoi ofiracomona illaicomini omoina dotaitimaci. Jiairuido omoina meiniamona: “Jai Jusiñamuina marena sedadicaí”, comeciaina facaitimaci. ³ Cuen a naimaci iñoñena jira, cue Moona jiai naimaci iñoñena jira, iena finoitimaci. ⁴ Bie rafue omoimo sua, naie facaise cue llua omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

Jesús Jusiñamui Joreño na llua rafue

⁵ Jesús nia llofueite:

—Cuen a oretatimie dine ja jaiticue; iadedi omoimona buna: “¿Nine jaitio?” cuemo jaca nia jicanoñede. ⁶ Omoimo bie rafue cue llua jira, omoi comeciai eo sure ite. Ie jira cue jaillinona jicanoñedomoi. ⁷ Uanai lloticue. Cue jaia, mare. Cue jaiñenia, omoina canoraima omoi dine biñeite. Cue jaia, omoi dine naimiena oretaiticue. Jusiñamui Joreñodi omoi canoraima. ⁸ Naimie bia, cuena iñoñedinona naimacimo ite jeacinona uiñotaite. Naimiedi Jusiñamui marena naimaci illana jitaillana uiñotaite. Naimiedi Jusiñamui naimacina duere finollena jiai uiñotaite. ⁹ Cuen a naimaci iñoñenia, naimacina naimacimo jeacino nia illana uiñotaite. ¹⁰ Cue Moo dine abido cue jaillinona, cuena cioiñeitimaci; ia iemona Jusiñamui Joreño cue uaina siñonana uiñotaite. ¹¹ Fiodaillamona jilloiticue. Iemona cuena iñoñedino anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jilluana uiñotaite. ¹² Diga rafue omoimo nia lloiacadicue; iadedi jai rairaifaidomoi. ¹³ Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacino llofueite. Jiairuido sulle rafuena llofueite. ¹⁴ Omoina cue rafuena uiñotaite. Ie jira cuena iobitaite. Nana cue Moomo ite uaidi cueje. ¹⁵ Ie jira bie rafuena lloticue. Jusiñamui Joreño omoina cue rafuena raise uiñotaite.

Sunaillamona caimare illa rafue

¹⁶ Jesús nia llofueite:

—Dallu illanona cuena cioiñeitomoi. Ie mei dallu illanona, cuena dane cioitomoi.

¹⁷ Ie llofueoicaiganodicaimona damierie dani coninimo jicanodosite:

—¿Niese caimo llote: “Dallu illanona, cuena cioiñeitomoi. Ie mei dallu illanona, cuena dane cioitomoi. Cue Moo dine jaiticue”? ¹⁸ ¿Buena caimo llote? Raise cacaiñedicaí.

¹⁹ Cai jicanuana Jesús uiñuanona, naimie jicanote:

—¿Cue llua raise uiñoiacadomoi? ²⁰ Cuemo sulle rafue sua, eo eeditomoi; iadedi cuena iñoñedino eo iobitimaci. Sunaitomoi; iadedi jiairuido caimare iitomoi. ²¹ Jiaie uaido iena lloiticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide. ²² Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itatañeite. ²³ Nairuimo cuemo buena

jicaño; iadedi cue Moomo jica. Ie mei cue muidona naimie omoimo fecajte. ²⁴ Cue mamecido cue Moomo buena jaca nia jicañedomoi. Jica. Ie mei feiñoitomoï, omoi comeci eo caimare illena.

Jiairuido Jesús marefodo llua rafue

²⁵ Jesús nia llofue:

—Jiaie uaido bicinona omoimo jai lloticue. Jiairuido iese lloñeiticue. Omoïna cue Moona marefodo lloiticue. ²⁶ Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoï. ²⁷ Omoïna naimie isiruillamona, omoimo fecajite. Cuen a omoi isiruilla jira, cue Moomona cue billana omoi ñnua jira, cue Moo omoïna isiruite. ²⁸ Cue Moomona eniruemo biticue. Naimie ñne abido jaiticue.

²⁹ Lloticaï:

—Jai marefodo caimo llotio. O uaina meidocana jai uñedio. ³⁰ Nana rafuena o uñuana uñoticaï. Cai comeciaino iticinona o uñuamona, caina raise uñotio. Iemona Jusiñamuimona o billana jai ñnoticaï.

³¹ Jesús uai ote:

—Cuen a jai ñnotomoï. ³² Jiairuido, ua birui, oni tuuitomoï. Nagamiiaï jofomo omoi jailla mei, dama ifoconi fiebiticue; iadedi dama ñneiticue. Cue Moo cue ñga iite. ³³ Cuen a omoi ñnuano, omoi uri illena, omoimo bie lloticue. Eniruemo omoi ia, jaca duere sefuitomoï; iadedi omoi comeciaina ocuiño. Omoïna duere finodinona jai cue emodofilla jira, omoi comeciaina ocuiño. Naimaci baifemo faiticue.

17

Jesús ie Moo ñga ñaia rafue

¹ Jesús bicinona llua mei, monamo eruaillano, jñde:

—Moo, cue fiodiacanarui jai ride. Cue uai siñonana uñota. Iemei o uai siñonana jiai uñotaiticue. ² Nana comini afemo cuena jai itatatio. Himana cue jaillamona, nana comini afemo cuena jai itatatio. Comini comeciaino uaina o meidotajamona, cue fiodaillamona, ailluena comini o ñga jaca iitimaci. ³ Ona nanoca Jusiñamuina uñoitimaci. Jai cuena o oretajana jiai uñoitimaci. ⁴ Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. ⁵ Ore Moo, enirue nia ñne facaiseconi o ñga iticue. Illaïma isoi o ecimo dane ebire iacadicue. Dane cuemo ine, daje isoi coco illesa. ⁶ Comini comeciaino uaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena ñnocana jaidimaci. ⁷ Nana cuemo ite rafue omona feiñoticue. Iena jai uñotimaci. ⁸ Nana cuemo o llogacinuaina naimacimo jai lloticue. Jai ñnotimaci. Omona cue billana jiai jai ñnotimaci. Cuen a o oretajana jiai ñnotimaci. ⁹ Naimaci facaina birui jñdicue. Naimacina cuena ñnotadio. Ie jira omo jai duidimaci. Ona ñnoñedino facaina birui jññedicue. ¹⁰ Nana o ñbeimo itinodi cueje. Nana cue ñbeimo itinodi oie. Nana naimaciri iobidicue. ¹¹ Bene eniruemo fiebitimaci. Eniruemona monamo jaiticue. O ñne abido jaiticue. Ore Moo, jeacino naimaci finoi raillano, o anamo o uai ñga naimacina seda. Coco comeci lloilla isoi, naimaci daje isoi comeciaina lloita. ¹² Naimaci ñga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraita. Jusiñamui lloaïma micori cuegafuiai suillena, naimie ua faifite. ¹³ O ñne ja jaiticue. Cue isoi naimaci comeciaino eo caimare illena, naimacimo ailluena rafuena jai lloticue. ¹⁴ O llogacinuaina jai lloticue. Ona ñnoñedinomo naimaci jainaiañne jira, ona ñnoñedino naimacina enoidimaci. Ona ñnoñedinomo jiai jainaiañnedicue. ¹⁵ Eniruemona birui o naimacina uana jicanoñedicue; iadedi Taifemona naimacina o sedajana birui jicanoticue. ¹⁶ Ona ñnoñedinomo jainaiañnedimaci. Ona ñnoñedinomo jiai jainaiañnedicue. ¹⁷ O llogacinuaido naimacina marena itata. O llogacinuaido uanaicino. O jitaillacinona naimaci finollena, o uai naimaci comeciaino raise itata. ¹⁸ Bene cuena o oretaja isoi, ona ñnoñedino ñne naimacina oretaticue. ¹⁹ Uanaicinona naimaci

uiñuamona, naimaci comeciai marebicaillena, cuena ñnotino facaina fioidaicadicue. ²⁰ Bimacina birui dane jññedicue; iadedi bimaci cue rafuena ico lloia, jiaie comini cuena ñnoitimaci. Cuena ico ñnoitino facaina birui jiai jñidicue. ²¹ Daajedicoco. Coco illa isoi, naimaci comeciaina daje isoi lloillena, nana naimaci facaina jñidicue. Daje isoi comeciai lloillamona, cuena nia ñnoñedinodi ñnoitimaci. Iemona cuena o oretajana ñnoitimaci. ²² Cuemo o iga uaidi ebirede. Naimaci comeciai lloillena, naimacimo o uai jai cue iga. ²³ Naimaciri dajedicaí. O diga daajedicoco. Naimaci comeciai daje isoi lloillana jitaídicue. Iemona cuena ñnoñedino bene cuena o oretajana uiñotitimaci. Cuena o isiruilla isoi, naimacina o isiruillana jiai uiñotitimaci. ²⁴ Ore Moo, naimaci cue dine illena jitaídicue. Enirue nia iñenia, illaíma isoi o ecimo ebire jaié iticue. Dane ie isoi ebire birui cue ia, naimaci cuena ciuana jitaídicue. ²⁵ Ore Moo, mareuidimedio. Jiaie comini ona uiñoñedimaci; iadedi ona uiñoticue. Cue llofueoicaiganodi o cuena oretajana jai uiñotitimaci. ²⁶ Naimacimo ona jai lloticue. O cuena isiruilla isoi coninina naimaci isiruillena, naimacimo nia lloiticue –jñide.

18

Jusúna gaitalle rafue

(Mt 26.47-58; Mr 14.43-54; Lc 22.47-54)

¹ Jiaí mei, Jesús ie llofueoicaiganodicaí diga, Cedrón railla iconi enefebeimo ruica aceituna railla riaraiái illanomo naíona jaide. ² Jesús caí diga nainomo jaisoilla jira, Judas micori naie illanona jiai uiñote. Jesúsna gaitatallena nainomo Judas jaide. ³ Soldaduai diga policías diga jaide. Naimacina ifode. Jusiñamui diga nanoca ñairaini naimacina oredimaci. Fariseuai naimacina jiai oredimaci. Soldaduidi lamparínaiari bitimaci. Reinaíari jiai bitimaci. Sidaniaíari jiai bitimaci. Judas naimacina ifode. ⁴ Jesúsdi nana naimiemo suille rafue uiñuanona, naimaci dine billano, jicanote:

—¿Buna jenodomoí?

⁵⁻⁶ Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinaiillamona, abido ñajillamona, eniruemo uaidimaci. Jesúsna gaitatallena, Judas micori naimaci diga ite.

⁷ Jesús dane jicanote:

—¿Buna jenodomoí?

Uai otimaci:

—Nazaret ie Jesús.

⁸ Jesús uai ote:

—Omoímo jai lloticue: “Imiedicue”. Cuena omoí jenoia, cue diga itino oni jaillena rairuiñeno.

⁹ Naimie ie Moomo como lloga uai suillena, iese llote. Iese ie Moomo como llote: “Cuena o ñnotaganomona jaca buna faífiñedicue”. ¹⁰ Ie daacaiño Simón Pedrodi ie lloebi llinocaida, Jusiñamui diga nanoca ñairaima mullaíma jefona jaíbonote. Naie mullaíma mamecidi Malco. ¹¹ Iena ciuanona, Jesús Pedromo llote:

—O lloebina eeno. Cue Moo jitailla isoi, fioidaiticue.

¹² Ie mei soldaduai, imaci capitán diga, judúuai imaci policías diga, Jesúsna gaitajano, naimiena maitimaci. ¹³ Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. ¹⁴ Navui Caifás judúuai illaicominimo llote: “Damie nana cai comini facaina fioidaitena, mare”.

Pedro Jesúsna nano janua rafue

(Mt 26.69, 70; Mr 14.66-68; Lc 22.55-57)

¹⁵ Simón Pedro Jesús jinafo racade. Jiai racadicue. Cuena Jusiñamui diga nanoca ñairaima uiñua jira, ie nairaibirimo Jesús diga jaidicue; ¹⁶ iadedi Pedro nasemo fiebicaide.

Ie jira jino abido jaillano, Pedro fo atillena, nasena sedaraiñomo jicanoticue. ¹⁷ Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

¹⁸ Rosirena jira, naie jofo mullaiaí, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiaí ite.

Jesús Anás dine illa rafue

(Mt 26.59-66; Mr 14.55-64; Lc 22.66-71)

¹⁹ Ie facaise Anás Jesúmo ie llofueoicaiganodicaina jicanote. Ie llofuiacinuaina jiaí jicanote. ²⁰ Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiaí jaca llofuecabiticue. Nainomo nana o comini oficabidomoi. Bainino buena jaca lloñedicue. ²¹ ¿Bue ñellena birui cuemo jicanotio? Cuenacacadinomo iena jicano. Cue llofuiana uiñotimaci.

²² Iese Jesús llua jira, daje policia naimie uiecona butade. Jesúmo jicanote:

—¿Bue ñellena iese uai otio?

²³ Jesús dinena naie uai ote:

—Naimie uai jeare oticuen, cuemo llono. Jeare oñedicuemo, ¿bue ñellena cuena butadio?

²⁴ Jesús uai oñede. Iemei Anásdi Caifás jofomo Jesús maianona orede.

Pedro Jesúna dane janua rafue

(Mt 26.71-75; Mr 14.69-72; Lc 22.58-62)

²⁵ Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

²⁶ Naie facaise daje mullaíma Pedromo llote:

—Aceitunas railla riaraiái illanomo ona ciodicue —llote. Jusúna soldaduai gaitaja facaiseconi Pedro naie mullaíma ie come jefona ailli jaibonote, soldaduai Jesúna gaitaja ie daacaiño. ²⁷ Pedro dane janote. Iecon iitava ñaite.

Jesús Pilato dine illa rafue

(Mt 27.1-2, 11-14; Mr 15.1-5; Lc 23.1-5)

²⁸ Ie mei Caifás jofomona gobernador jofomo Jesúna jitaramo uitimaci. Naie facaise gobernadori Pilato. Naimiedi judíuaiñedimie. Naimaci einamací rairuilla jira, judíuaiñedimie jofomo naie facaise fo jaiñedimaci. Fo jaiadedi, pascua railla rafue guilledí guiñega. ²⁹ Ie jira Pilato jino bite. Naimacimo jicanote:

—¿Nie isoide rafue muidona llogidotomoi?

³⁰ Uai otimaci:

—Bimie maraiñede rafue finoñedena, o dine naimiena atiñedicaí.

³¹ Pilato llote:

—Naimiena uiño. Omoi einamací llogacínuaído naimiena duere fino.

Uai otimaci:

—Come meinellena caímona rairuidomoi. Naimie coraiana jitaídicaí —llotimaci.

³² Navui Jesúdi: “Cuenacruzmo coraiitimaci” llote. Naie llucino jai suisaide.

³³ Pilato fo abido jaillano, Jesúna uaiduano, naimiemo llote:

—Judíuai illaíma raillamiedio.

³⁴ Jesús dinena jicanote:

—¿O comecina dama iese facajano llotio? Iese comecina o facañenia, jiaimie omo lloga.

³⁵ Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci. Jusiñamui diga nanoca ñairaini cuemo jiaí fecadimaci. ¿Nie isoide maraiñede rafuena finodio?

³⁶ Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicuedena, cue comini cue facaina fuiridimaci.

³⁷ Pilato uai ote:

—Ie jira odi illaimadio.

Jesús uai ote:

—Jaca railla. Uanaicino lollena, jeicigacue. Nana uanaicinona jitaídino cue lluana cacadimaci.

³⁸ Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo ñede.

Jesúna coraiacana rafue

(Mt 27.15-31; Mr 15.6-20; Lc 23.13-25)

³⁹ Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jitaia, omoi illaíma raillamiena marena oretaiticue.

⁴⁰ Comini dinena cuiriidimaci:

—Dama ite. Bimiena jitaíñedicai. Barrabásna cárcelmona marena jino oreta. —Iese cuiriidimaci. Barrabásdi firiraima.

19

¹ Ie mei Pilato Jesúna oni uillanona, naimiena sechedotade. ² Jifanodosillena, soldaduai eecuaímona finoca nuiciraina naimie ifogímo jítadimaci. Jiduirede iniroina jítatajano raitimaci:

³ —Judíuai illaimadio. —Iemei ie uiecona bucoidimaci.

⁴ Pilato dane jino billano, raite:

—Naimie omoi dine jino ja bite. Naimiemo nicinodi ñede —raite.

⁵ Ie facaise Jesús jino bite. Eecuaímona finoca nuiciraina jítaca. Jiduirede iniroina jítaca. Pilato naimacimo llote:

—Jadi, naimie.

⁶ Jusiñamui diga nanoca ñairainidi, jiaie illaicomini diga, naimiena ciuano, cuiriidimaci:

—Naimiena corai.

Pilato llote:

—Naimiemo nicinodi ñede; ia oni uillanona, naimiena omoi corai.

⁷ Uai otimaci:

—Moisés micori jaie cueda: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caitadimie. Caímona naimiedi marañede rafue jai finode.

⁸ “Naimiedi Jusiñamui Jito” comini raillana Pilato cacajano, eo jacinaite. ⁹ Jesúna dane fo uite. Jesúdi Jusiñamui Jitona naimie raise uiñollena, Jesúmo jicanote:

—¿Ninena bitio?

Jesús uai ñede. ¹⁰ Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraitallena.

¹¹ Jesús uai ote:

—O anamo Jusiñamui cuena itataja jira, o uai ite, cuemo lollena. Ie jira omo cuena fecadino o baífemo jeacino finodimaci.

¹² Ie facaimona Pilato Jesús marena jino oretaiacade; iadedi judíuai illaicomini dinena cuiriisite:

—Bimie o jino marena oretaia, cai nanoca illaíma ie nabaiñedio. “Illaimadicue” Jesús lluamona, cai nanoca illaíma díbeimo naimiedi ñede. Cai nanoca illaimadi César.

¹³ Comini lluana cacajano, Pilato Jesúna jino atide. Ie cominimo lloranomo raide. Naie illano nofinina mameciredede. Judúuai uaido Gabatana mameciredede. ¹⁴ Pascua rafue guilla finoraruijimo jitoma naidai illanona, Pilato dinena llote:

—Jadi, omoi illaima.

¹⁵ Iemona cominidi cuiirisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaimana coraiiticue?

Jusiñamui diga nanoca ñairaini uai otimaci:

—Cai illaimadi César. Jiaie illaimadi caimo ñede. Jaca dallaimade cai illaimadi.

¹⁶ Ie mei Pilato naimacimo naimiena fecade, coraillena.

Jesúna coraiacana rafue

(Mt 27.32-56; Mr 15.21-41; Lc 23.26-49)

Pilato llua jira, Jesúna uitimaci coraillena. ¹⁷ Jesúdi ie cruzna rocaoicaida sonode. Ifocoraina eruaila mameciredede illanomo jaidimaci. Judúuai uaido naie illano Gólgotana mameciredede. ¹⁸ Nainomo naimiena coraidimaci. Naimie abimo menaimie coraica. Damie Jesús nabeimo. Jiaimie jarifebeimo. ¹⁹ Cruzmo jonellena, Pilato rabicimo cuetatate: “Nazaret ie Jesús. Judúuai Illaima”. ²⁰ Judúuai uaido cuega. Romanos comini uaido jiai cuega. Griego uaido jiai cuega. Jesús coraiano Jerusalén ianori illa jira, ailluena comini iena cioidimaci.

²¹ Iena ciuamona, naie rabicina meidollena, Jusiñamui diga nanoca ñairaini Pilatomo llotimaci:

—“Judúuai Illaima” raillano jai cuetatatio. Iena meiduana jitaidicai. Bimie dinena raisoide: “Judúuai Illaimadicue” raillanona, o cuetatajana jitaidicai

²² Pilato uai ote:

—Jai cuetataticue. Jiaie rabicimo dane cuetatañeiticue.

²³ Jesúna coraia mei, soldaduai naimie iniroi uanona, naga soldado digamie jonega iniroi. Nagaamaga soldaduai ite. Ie camisa fiebide. Naie daje jamai nigaroi. ²⁴ Ie jira dani coniniri ñaitimaci:

—Bie camisa cuaranoñeiticai, dani cai fecallena. Mai. Conima jabomaiticai, iena ollena. —Iese finuano Jusiñamuina lloraima micori cuegafuiai suide. Jaiie cuega: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

²⁵ Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite. ²⁶ Jesús ie eina ciode. Cuenaiñaiño ecimo jiai ciode. Cuenai eo gaide. Ie jira ie eimo llote:

—Jadi, o jito isoi itimie anamo iitio.

²⁷ Cuemo llote:

—Jadi, o ei isoidiñaiño anamo iitio.

Naie dacaiño naiñaiño cue jofomo uillanona, naiñaiño sedadicue.

²⁸ Ie mei Jesús nana rafue jai fuillana uiñuano, llote:

—Jiroacadicue. —Iese lluanona, Jusiñamuina lloraima micori jaiie cuegafuiai jai suide.

²⁹ Nainomo llerojimo vino ite. Radosimo fibecode rana joniano, vinomo faite. Iemei Jesúmo fecade jaronollena. ³⁰ Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jitadacaida, fiodaite.

Jesús sida diga ducia rafue

³¹ Pascua railla rafue guille finuarui illa jira, judúuai illaicomini Pilato dine jaidimaci. Raire fiodaillena, coraicano idaiaina uellullena naimiemo jicanuaidimaci. Sábado rafue ie nairui nia illanona, sábadorui jai raire taineacana jira, coraicano cruzmo sábadoruimo illana jitaiñedimaci. ³² Soldaduai jaillano, Jesús ecimo coraica iaiaimiai idaiaina uellude. ³³ Jesús dine billano, naimie jai fiodaillana cioidimaci. Ie jira naimie idaiaina uelluñedimaci; ³⁴ iadedi daje soldado Jesús ciraigiconi sida diga ducide. Naifo diaide. Naifomona jinui jiai bite. ³⁵ Nana iena cioidicue. Uanai lloticue. Omoi

ñinollena, iena lloticue. ³⁶ Soldaduai iese finuamona, jaie cuegafuiai jai suide. Jaie Jesúna cuega: “Naimie illaicina tainoñeitimaci”. ³⁷ Jiai jaie cuega: “Judíuai dinena naimaci ducitagamiemo ico eruaitimaci”.

Nofici ifomo Jesús raia rafue

(Mt 27.57-61; Mr 15.42-47; Lc 23.50-56)

³⁸ Naie facaise Pilato dine José raillamie jaide. Cruzmona Jesús abi oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abi ana uanona, iena oni uite. Judíuai illaicominina naimie jaciruillanona, Jesúna bainino ñnote. ³⁹ Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. ⁴⁰ José, Nicodemo diga, Jesús abina useroina ferinotíiaimaiai. Naimaci comini finouilla isoi, naie siorede radi ñniraimo jonega. ⁴¹ Amenaiai iaire illanomo Jesúsdi coraica. Nainomo nofici ie raiafodi ite. Nia buna naifomo raíñafo. ⁴² Naifo iaire illa jira, sábadorui jai riacana jira, jiaie raiafo jenollena abi juanina jira, nainomo naimiena jonetiiaimaiai. Nofici diga raiafo raise íbaila mei, jofomo jaidíiaimaiai.

20

Fiodaillamona, Jesús jillua rafue

(Mt 28.1-10; Mr 16.1-8; Lc 24.1-12)

¹ Domingo jitiramo nia monañenia, raiafomo María Magdalena jaide. Raiafo íbaila nofici oni joillana ciode. Jesús abina cioñede. ² Ie jira aisicana Pedrona jenuaide. Cuenajai jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uiñoñedicue.

³ Ie mei raiafomo jaidícoco. ⁴ Aisicana jaidícoco; iadedi riire cue aisicana jailla jira, nano ridicue. ⁵ Ana bitadacaida, fo erodaticuemo, useroi joillana ciodicue; iadedi fo jaiñedicue. ⁶ Ie mei Simón Pedro rillano, fo jaide. Useroi joillana jiai ciode. ⁷ Ie ífogimo ferinoga ñiroi eneno illana ciode. Raise nacuana ciode. ⁸ Iemei jiai fo jaidícue. ñniroina ciuamona, Jesús jai jilluana ñnoticue. ⁹ Jaie cuegafuiai llote: “Fiodaillamona jilloite”. Naie cuegafuiaina como raise ñnoticoco. ¹⁰ Ie mei jofomo jaidícoco.

María Magdalenamo Jesús bairia rafue

(Mr 16.9-11)

¹¹ Raiafomo abido billano, coco jailla mei, nainomo María fiebide. Eede. Ana bitadacaida, fo erodatemo, ¹² Jusiñamui mona mena jaienicí jai billana ciode. Userede ñnirói jítadíaimaiai. Jesúna navui jonianomo ana raídíaimaiai. Damie ífogi díbeimo raide. Jiaimie eilli díbeimo raide. ¹³ Naiñaiño como jicanotíiaimaiai:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

¹⁴ Naie facaise jinafo dine erocailanona, Jesúna ciode; iadedi naimiena uiñoñede. ¹⁵ Naiñaiño comequina facade; “Naimiedi bie illano sedaraima”. Jesús naiñaiño como jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

¹⁶ Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboni! —Naie uai oni dobaíñuamona: “Llofueraima”.

¹⁷ Jesús uai ote:

—Cuenta lliñoñoeno cuenta faica. Cuenta Moo dine nia a jaiñedicue. Cuenta amatiaí dine mai jaillanona, cuenta rafuena lluai. Cuenta Moo dine jaiticue. Naimiedi cuenta Jusiñamui. Naimie jiaí omoi Moo. Jiaí omoi Jusiñamui.

¹⁸ Ie jira María Magdalena Jesús llofueoicaiganodicaímo lluaibite:

—Cai Namana jai ciodicue. —Iemei caímo naimie naiñaiñoemo lluaña llote.

Jesús ie llofueoicaiganomo bairia rafue

(Mt 28.16-20; Mr 16.14-18; Lc 24.36-49)

¹⁹ Domingo naío Jesús llofueoicaiganodicaí jofomo ofidicaí. Judíuaí illaicominina caí jaciruillanona, nasiaí nana caí ibaica. Nase econoñoeno ieconi Jesús caí motomo billanona, caína uaiduano, llote:

—Uri omoi i.

²⁰ Ie onollina acatate. Ie ciraigina jiaí acatate. Cai Namana jai caí ciuari eo iobidicaí.

²¹ Jesús dane llote:

—Uri omoi i. Cuenta Moo cuenta oretaja isoi cuenta rafuena lloña, omoína oretaiticue.

²² Ie facaise caína firaiñuanona, raite:

—Jusiñamui Joreñoña omoi feiñuana jitaídicaí. ²³ “O jeacina jai dotade” bumo omoi lloia, Jusiñamui jai dotaca. “O jeacina nia dotañede” bumo omoi lloia, Jusiñamui nia dotañega.

²⁴ Naie naío Tomásna mameciredede llofueoicaigamie caí diga iñede. Dídimona jiaí mameciredede. Naimiedi gorasa. ²⁵ Naimiemo lloticaí:

—Cai Namana ailli ciodicaí.

Tomás uai ote:

—Clavo ifona naimie onolli jeraimo cuenta cioiñenia, naie ifona cuenta jetañenia, naimie ciraigi ifona cuenta jetañenia, ññoñeiticue.

Jesús ie llofueoicaiganomo dane bairia rafue

²⁶ Ocho digarui illanona, Jesús llofueoicaiganodicaí dane ofillano, Tomás caí diga ite. Nana nasiaí ibaica; iadedi nase econoñoeno ieconi Jesús caí motomo dane fo billano, uaiduano, llote:

—Uri omoi i.

²⁷ Iemei Tomásno llote:

—Eroda cuenta onollimo. Naifo jeta. Ciraigi ifona jiaí jeta. ññoñoeno jaiñoeno. Mai ñño.

²⁸ Tomás uai ote:

—Cuenta Namadio. Cuenta Jusiñamuidio.

²⁹ Jesús dane uai ote:

—Cuenta o ciua jira, cuenta ñnotio; iadedi cuenta cioiñedino cuenta ññoia, jiaí caimare iitimaci.

³⁰ Jesús diga siño rafuena finode. Iena ciodicaí. Nana naie rafuena bie rabenicomo cueñedicue; ³¹ iadedi dajerie cueticue. Jesúsdi caí Jilloitaraimana omoi ñnollena, iena cueticue. Naimiedi Jusiñamui Jitona omoi ñnollena, iena jiaí cueticue. Naimiema omoi ñnuano, naimie diga jaca iitomoí.

21

Jesús ie llofueoicaiganomo ane bairia rafue

¹ Diga irui illanona, Tiberiana mameciredede jorai fuemo Jesús ie llofueoicaiganodicaímo dane bairedede. ² Nainomo diese iticaí: Simón Pedro, Tomás, Natanael, cuenta ama Jacobo, cuenta, jiaie iaímaiaí. Tomás mameci jiaicidi Dídimio. Natanael Galilea ie Caná nairaí imie.

³ Simón Pedro caímo llote:

—Lloiji faíaiticue.

Naimie uai oticaí:

—O diga jaiticaí. —Iese raillano, botemo jaidicaí. Namona naío llojina faíticaí; ia jaca buena oñedicai. ⁴ Monaiacademo, Jesús jorai fuemo bite; iadedi naimiema uiñoñedicai.

⁵ Jesús caímo jicanote:

—Caimaci, ¿nie diese lliciaína jai otomoí?

Uai oticaí:

—Jaca oñedicaí.

⁶ Naimie dane uai ote:

—Omoi bote nabei dine omoi llojjina faíno.

Ie jira faiticaí. Ailluena lliciaí naiemo jilla jira, a aiñonidicaí. ⁷ Iena ciuamona, Pedromo lloticue:

—Cai motomo cai Namadi ite.

Pedro iena cacajano, naimie taimiena jira, ie iniroi jítade. Jesús dine naimie raíre rillena, joraimo daiade; ⁸ iadedi botedo biticaí. Enirue iaíre illa jira, na lliciaímo sonocana, llojjina atidicaí. Nibai cien metros oni ite. ⁹ Jorai fuemo cai ria, coocimona bonoca iraina ciodicai. Lliciaí iraimo ruica jai ite. Llomenico jiaí ite. ¹⁰ Jesús caímo llote:

—Omoi oga lliciaímona janore ati.

¹¹ Ie jira Simón Pedro botemo jaillano, llojjina llínuanona, eniruemo ari sonode. Ciento cincuenta y tres jemíerie jítaticai. Ailluena ite; iadedi llojji cuarariñede. ¹² Jesús llote:

—Mai guisaíbi. —Jesúna cai uíñua jira: “¿Budío?” jaca buna raíñena. ¹³ Jesúdi llomenico díga lliciaína caína ecade. ¹⁴ Fiodaillamona jillua facaísemo dacaiño amani caímo Jesús jai abina baíretate.

Jesús Pedro díga ñaía rafue

¹⁵ Guilla mei, Jesús Simón Pedromo llote:

—Simón, odi Juan jítodio. —Jiaí jicanote— ¿Nana o nabaiñiaí baífemo cuena isiruitio?

Simón uai ote:

—Jíi, Nama, ona cue isiruillana uíñotio.

Jesús uai ote:

—Toíca llaudaíai uruiaína omoi raise sedaja isoi, cuena ínotinona raise seda. Naimacina cue rafuena raise llofue.

¹⁶ Dane llote:

—Simón, odi Juan jítodio. —Dane jicanote— ¿Cuena isiruitio?

Simón uai ote:

—Jíi, Nama, ona cue isiruillana uíñotio.

Jesús dinaína uai ote:

—Toíca llaudaíai uruiaína omoi raise sedaja isoi, cuena ínotinona seda.

¹⁷ Dane jicanote:

—Simón, ¿cuena isiruitio? —Jesús naimiemo dane jicanua jira, “Jesús cue uaina ínoñede” raíllanona, Pedro comeci sunaite.

Uai ote:

—Nama, naga rafuena uíñotio. Ona cue isiruillana uíñotio.

Jesús uai ote:

—Toíca llaudaíai uruiaína omoi raise sedaja isoi, cuena ínotinona seda. ¹⁸ Daje rafue omo nia lloticue. O nia conirue facai o iniroi dama jítadio. Ie mei o jitaíllanomo jaidío. O uaicíroma facaiseconi o onolli oni ñuitaitío. Ie mei jiaímie o iniroi ona jítajano, o jitaíñenanomo ona uite. Cue llua ínocana o jai.

¹⁹ Fiodaíllena Pedro uíñollena, uicodo Jesús íese llote. Cristo llua isoi, Cristo rafue muidona, illaícomini Pedrona jiaíruido meinetimaci. Naimie fiodaíllanona, Jusíñamuína íobitade.

Jesús íe gaía llofueoícaígamiemo llua rafue

²⁰ Pedro díga Jesús nia ñaía facaíse, Pedro dobaícaíllanona, cuena cíode. Iaimaíai jinafona racadicue. Jesús gaíamiedicue. Navui cai guía, Jesús nia fiodaíñenia, Jesús abímo cue ía, Jesúmo jicanotícue: “¿Bu gaitatallío?” ²¹ “Cuena ínotinona seda” Pedromo Jesús llua mei, Pedro dobaícaíllanona, cuena ciuano, Jesúmo jicanote:

—Nama, ¿níese naimie fiodaíte?

²² Jesús uai ote:

—Naimie nia ítemo, cue abído bia, dama íesede. Naimie rafuedi omo dúíñede; ía cue llua ínocana o jai.

²³ Ie jira creyentiaí naie llua ídiano cuena raítimaci:

—Naimie fioidaiñeite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

²⁴ Nana rafuena ciuano lloticue. Iena cueticue. Uanaicinuaina cueticue.

²⁵ Jesús ailluena jiaie rafuena finode. Nana ie rafue cuedadena, enirue baiñede, naie libros eenollena. Mai. Juandicue.

JESUCRISTO ORETAGANODI NAIMIE RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o dine, ¿nigacino? ¿Nie isoidio? Omo jiaie rabe birui dane oretaiacadie. Lucadie. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue. ² Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci. ³ Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo nia fiebi. ⁵ Naimie rafuena comini iinuamona, Juan Bautista micori jinui diga bautizade; iadedi cue rafuena omoi iinuamona, nano nigarui illanona, cue Moo ie Joreña feiñoitomo —raite.

Monamo Jesús jailla rafue

⁶ Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judíuai cominina jai sedaitio, David micori cai usumatiai micoriai jai sedaja isoi?

⁷ Naimie uai ote:

—Naie rafue suille facaiseconi jaca uiñoñeitomo. Naimie siñona illamona, dama cue Moo naie rafue suilliruina uiñote; ⁸ iadedi cue Moo ie Joreña omoi feiñua mei, siño uai omoimo iite. Ie jira Jerusalémo cuena lloitomoi. Judeamo, Samariamo, ua nana eniruemo ite nairaímo lloitomoi —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede. ¹⁰ Monamo nia eruaidemo, ieconi naimaci dine Jusiñamui jaienici, mena ima bairia isoi, baireñiaimaiai. Naie iaímaiai iniroi userede. ¹¹ Raitiaimaiai:

—Galileo imaci, ¿bue ñellena monamo eruaidomoi? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaiai.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. ¹³ Rillano imaci cuartomo jaidimaci. A dibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Dese nainomo itimaci. ¹⁴ Naimaci jitaillamona, Jusiñamuimo jillena, nagarui danomo ofidimaci. Jillena, jaino naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

¹⁵ Comini ofilla motomo Pedro naidaita, rafuena llote. Nibaí ciento veinte comini nainomo itimaci. Pedro llote:

¹⁶ —Amatiai, David micori jai lloga rafue birui jai suide. Jusiñamui Joreño jai David micorina Judas micorina ñaitatate. Salmos rabenicomo naie ñaiacinodi cuega. Iena uiñoticaí. Judas micorina uiñoticaí. Naimie Jesúsna gaitadinona ifode. ¹⁷ Naimiedi da

cai llofueoicaigano imie. Cai diga maijiuide. ¹⁸ Ie maraiñoeno fino ca rafue mona ucubena feiñua mei, ie comeci iuaina meiduanona, naie ucubena oni judaide. Judíuai illaicomini naie ucube diga enirueña ibadimaci. Nainomo Judas micori ie cimaio cuinajanona, ie abina dama meinete. Rifaillamona, ana uaillamona, ie jebegi boficaillamona, nana ie jebegi jino uaide. ¹⁹ Nana Jerusalémo itino iena fididimaci. Ie jira cai uaido naie enirue mameciredede Acéldama. Oni dobaiñuamona dirue toillanie. ²⁰ Ero, Salmos rabenicomo Judas micorina iese David micori jaie cuega:

Naimie illano taino iite.

Buna jaca iemo iñeite.

Naimie maijille jiaimiemo iite.

Iese cuega. ²¹⁻²² Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaise mona, Jesús monamo caimona jaillarui facaiseconi, naimaci cai diga jiaí itimaci. Naimacimona damiena fetoiticaí, Jesús jilluana cai diga llollena. —Iese Pedro raite.

²³ Ie mei mena iimana fetodimaci. Damiedi José Barsabas. Jiaici mameci Justo. Jiaimiedi Matías. ²⁴ Ie mei Jusiñamuimo jiidimaci:

—Nama, nana comini imaci comeciaina uiñotio. ¿Nie iimana jitaideo? Caina uiñota.

²⁵ Naimiedi Judas ifo meidoite. Jesús ie oretagamiena naimie jaillamona, cai diga maijjite. Ie fiodaillamona Judas micori ie maijiana jai fainonocaide —jiidimaci. ²⁶ Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

2

Cristo oretagano Jusiñamui Joreñoña feiñua rafue

¹ Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite.

² Danomo ia, ebena illacinomona monamona riire aifi billa isoi buena cacadimaci. Nana jofomo itino naiena jiaí cacadimaci. ³ Iena naimacimo bairede. Iena cioidimaci. Irai boua isoi eruaide. Nana naimacimo baite. ⁴ Iese Jusiñamui Joreñoña feiñotimaci. Nana naimaci comeciaina namatade. Iemei diga nairai uailaído ñaitimaci, Jusiñamui Joreño naimacina ñaitatajamona. Naimaci ñaia uailaina uiñoñedimaci.

⁵ Naie facaiseconi Jerusalémo Jusiñamui rafuedo eo jaide judíuaídi itimaci. Diga nairaiaimona bitimaci. ⁶ Creyentiaí ñaiana naimaci fidiano, ailluena comini jino tainomo ofidimaci. Nagamiiaídi ie nairai uaina cacade. Ie jira jacinaitimaci. ⁷ Eo rajicaidimaci. Coninimo jicanotimaci:

—¿Buta ñaite? Nana Galileos imaci. ⁸ ¿Niese naimacina cacadicaí? Cai uaido dajerie ñaiana cacadicaí —raitimaci. ⁹ Diga comini imiaí itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, ¹⁰ Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiaí itimaci. ¹¹ Judíuai itimaci. Judíuaíñedino jiaí itimaci. Judíuai isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede fino ca rafuena cacadicaí —raitimaci. ¹² Nana eo rajicaidimaci. Danirie jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñaí naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluamo cacarei. Naie rafuena lloiticue. ¹⁵ Omoi comeciaina omoi facaja isoi, jifaiñedicaí. Jitoma nia fuiri daidemo, bu jaca jifairainina.

¹⁶ Joel micori bie rafuena jaie llote. Joel micori Jusiñamui rafuena lloraíma. Naimie jaie lloga rafue birui caimo jai suide. ¹⁷ Llote:

Jusiñamui caimo llote: “Jiaíruído bie rafue suite.

Cue Joreñoña diga cominimo fecajitícue.

Iedo omoi uruiai cue lluana lloitimaci.

Iemona omoi coniruiaina nicairitaitícue.

Iemona omoi einamacina jiai nicairitaitícue.

¹⁸ Ua nana cuena sedadinomo cue Joreñoña fecajitícue.

Naimaci cue lluana lloitimaci.

¹⁹ Monamo eo jacirede rafuena ico suiñotaitícue.

Eniruemo eo jacirede rafuena ico jiai suiñotaitícue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ iadedi birui cuemo bu jicaia, ie jeacinomona naimiena jillotaitícue” Jusiñamui lloite.

Ie Joreño caimo birui illamona, Joel micori llogacino jai suide.

²² 'Caimaci, bie uaina omoi cacarei. Nazaret ie Jesúna ñaitícue. Jusiñamuidi omoi motomo naimiena siño rafuena jai finotate. Iena jai uiñotomoi. ²³ Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúna coraitatomoi. Jusiñamuina iñoñedinona naimiena meinetadomoi; ²⁴ iadedi fiodaillamona naimiena Jusiñamui jillotajano, lligi ie cacajamona naimie jillobide. Naimie fiodaite; iadedi fiodaillamona nainomo iñoñede. ²⁵ David micori naimiena jaie lloite:

Jusiñamui cue diga jaca illana uiñotícue.

Cue ecimo naimie ite, cue comecina ocuiñotallena.

²⁶ Ie jira cue comeci caimare ite. Eo iobidícue.

Cue marena illemo jai jiai ocuiridícue,

²⁷ raiafomo cue joreñoña naimie fainonocaiñena jira,

ie mare Jito abi rifaiñana naimie jitañena jira.

²⁸ Naimie cuena jilloitallena uiñotícue.

Cue diga naimie illa jira, cue comeci caimare iite.

²⁹ 'Caimaci, cai usuma David micorina marefodo ñaitícue. David micori ñaia, dama naimie facaina ñaiñede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñoticaí. ³⁰ Ie ia David micori Jusiñamui rafuena lloite. Naimie micoridi Jusiñamui naimiemo uanaicinona llua uiñote. Jaie Jusiñamui naimiemo lloite: “O uruiaimona damie illaimana illanona, ie cominina sedajite” lloite. ³¹ Cristona ñaite. David micori nia suiñede rafuena lloite. Naimie micori Cristo jilloillena lloite: “Raiafo Jusiñamui fiodaillanomo Cristo Joreño fainonocaiñeite. Cristo abi rifaiñeite” lloite. ³² Jesúna ñaite. Jusiñamui Jesúna jai jillotate. Nana cai iena ciodicai. Ie jira iena lloticaí. ³³ Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi. ³⁴ Naimie abi monamo jaiñena jira, David micori dama naimie facaina ñaiñede; ia Cristona ñaite. Ero, jaie David micori raite:

Jusiñamui Cristomo lloite: “Cue ecimo ana raí.

³⁵ Ona iñoñedinona o anamo itataitícue” raite. David micori llua isoi, birui jai suide.

³⁶ Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuai comini naiena uiñuana jitaídícue.

³⁷ Pedro llua cacajano, naimaci comeciemo riire baite. Pedromo iena jicanotimaci. Ie nabaiñaímo jiai jicanotimaci:

—Caimaci, o llua jai cacadicaí. ¿Bue finoiticaí?

³⁸ Pedro uai ote:

—Omoi comeci iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreñoña jiai feiñotomoi. ³⁹ Omoimo

ie Joreño fecallena navui llote. Omoi uruiaimo jiai fecaite. Jiaie nairaiaí itinomo jiai fecaite. Ua nana Jusiñamui fetocanomo jiai fecaite.

⁴⁰ Diga uai naimacimo Pedro llote. Raite:

—Ailluena comini maraiñede rafuena birui finocana jaidimaci. Faifitimaci. Naimaci isoi jaiñeno; iadedi cue lluaana omoi cacajamona, iena ñino.

⁴¹ Diga comini ie lloga uaina feiñuano, bautizadimaci. Nairuido nibai tres mil comini creyentiaina jaidimaci. ⁴² Cristo oretagano llofuiana fueouidimaci. Cristo oretaganona eo nabaidimaci. Nagarui ofillanona, Jesús fiodaillana começiuidimaci. Jusiñamuimo jiiuidimaci.

Cristona ñinotino illa rafue

⁴³ Cristo oretaganodi diga siño rafuena finuamona, nana comini jacinaitimaci. ⁴⁴ Nana creyentiaí damacina itimaci. Naimaci raruaí coninimo fecauidimaci. ⁴⁵ Dueredino ia, naimacina canollena, raruairedino naimaci raruaína vendedimaci. Iemei naie ucube dueredinomo fecadimaci. ⁴⁶ Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiai sedauidimaci. Nainomo danomo guillanona, Jesús fiodaillana começiuidimaci. Caimare imaci comeciaí illamona, caidiñeno guisoidimaci. ⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

3

Jusiñamui jofomo Pedro llucino

¹ Jusiñamui jofomo jiaa facaise Pedro iaímaiaí Juan diga jaide. Jitoma ana ia, comini jiiuidimaci. ² Iaímaiaí jaillanomo jiaie comini tisitaitimiena atiana ciodiaímaiaí. Tisitaitimiena naimie jaca jeiciga. Naimiena nagarui atiano, Jusiñamui jofo ie ebiredena railla nase fuemo rainauidimaci. Nainomo naimiena rainauidimaci, fo jaidinomona ucube jica-jcallena. ³ Iaímaiaí fo jaiacania, ucube jicallena, ie onolli ñuitade. ⁴ Iaímaiaí naimiemo eruaillano, Pedro raite:

—Cocomo eruaí.

⁵ Ie jira iaímaiaímo eruaide. Ra feiñoitena, ocianona sedade. ⁶ Pedro raite:

—Ucube cuemo ñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaicue.

⁷ Pedro naimie onollido llinuano, a naidanete. Ieconí naimie eillidi jillode. Ie taisicoñuai jiai jillode. ⁸ Daiacaillanona naidacaide. Macarillanona, iaímaiaí diga fo jaide. Jusiñamuimo iobillacinona fecajano, daiacaillanona macarite. ⁹ Nana comini naimie macarillana cioidimaci. Naimie iobillacinona fecajana jiai cacadimaci. ¹⁰ Naimie nase fuemo ana raisoilla jira, naimiena uiñotimaci. Naimiemo jai suide rafuena eo rajijcaidimaci. ¹¹ Naimiedi Pedro iaímaiaí Juan diga nia llinuano, naimaci dine Salomón micorí finotaga jofo abi ibirimo comini aisidimaci. Rajijcaidimaci. ¹² Iena ciuano, Pedro naimacina raite:

—Caimaci, ¿bue ñellena biemo rajijcaidomoi? ¿Bue ñellena caimo iese eruaidomoi? “Daímaiaí iaímaiaí uaido naimiena jilloitate” raillanona cocomo eruaidomoi. ¹³ Iena finoñedicoco; iadedi Jusiñamui iena finuano, ie Jito Jesúsna iobitade. Cai usumatiaí micoriaí, Abraham, Isaac, Jacob, ua nana cai usumatiaí micoriaí bie Jusiñamuina sedadimaci; iadedi Jesúsna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi. ¹⁴ Mareuidimiena jitaiñedomoi; iadedi come fatimiena cárcelmona jino billana jitaídomoi. Barrabás raillamiena jitaídomoi. ¹⁵ Jusiñamui díbeimo caina itatatimiena meinetomoi. Naimie fiodaite; ia Jusiñamui naimiena jillotate. Iena ciodicoco. Ie jira iena lloticoco. ¹⁶ Tisitaitimie jilluana jai ciodomoi. Naimiena uiñotomoi. Jesúsna naimie ñinua jira, Jesús naimiena maíritate. Naimiena raise jillotate. Iena jai ciodomoi.

¹⁷ Caimaci, ero, omoi finoca rafuena abina uiñoñeno finodomoi. Omoi illaicomini jiai daje isoi finodimaci. ¹⁸ Jaiie Jusiñamuidi ie facaina llorainina jiaíruído suille rafuena

llostatate. Naimacina Cristo llogacina cacajana llostatate. Birui naie llogacino suide. ¹⁹ Omoi comeciaia iuaillai meido. Jusiñamui díbeimo omoi comeciaina meido. Iemei Jusiñamui omoi jeacinona dotaite. Iena jaca feitaite. ²⁰ Omoi uri illa facaise illena, Jusiñamui omoi díga illena, iena fino. Jusiñamui Jesucristona omoi díne dane oretallena, iena fino. Naimiedi omoi Jilloitaraima. ²¹ Jusiñamui facaina lloraini micoriai jaie lloga rafue suille dínori monamo naimie fiebiite. Jaie Jusiñamuidi ie mare lloraini micoriai uaido buena llote. ²² Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi damiena fetoite. Nana naimie omoimo llwana cacarei. ²³ Bie lloraimana bu cacarefiñenia, Jusiñamui naimiena duere finoite. Iemona faifite”. ²⁴ Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci buena llotimaci. ²⁵ Jusiñamuidi cai usumatiai micoriaimo rafuena llote; ia bie rafue birui omoimo jiai duide. Jusiñamui Abraham micorimo jaie llote: “Nana cominidi o uruiai muidona caimare iitimaci”. ²⁶ Ie rafue suiñollena, Jusiñamui ie Jitona omoi díne navui orede. Omoi caimare illena, nano omoi marañedicinona fañonocaitallena, omoi díne naimiena nano jai oretate.

4

Cristo oretagamaiaia llaicomini motomo illa rafue

¹ Comini díga Pedro iaiaiaia Juan díga ñaia facaise, Jusiñamui díga ñairainidi naie iaiaiaia díne bitimaci. Jusiñamui jofona sedaraini illaia díga, saduceuai railla comini díga jiai bitimaci. ² Fiodaillamona Jesús jai jillwana llofuetiaiaiaia. Cominina iaiaiaia llofua jira, naie iaiaiaia díga iciritimaci. ³ Iaiaiaia gaitajanona, jai navuilla jira, cárcelmo jonetimaci, ie jitiramo naie rafuena siadollena. ⁴ Iese suide; ia Pedro llogacinona cacadinomona ailluena comini naiena innotimaci. Cinco mil dígamie creyentiaia jai itimaci.

⁵ Icoiti Jerusalémo nana judúuai illaicomini siadollena ofidimaci. ⁶ Anás jiai bite. Naimiedi Jusiñamui díga nanoca ñairaima. Caifás bite. Juan bite. Alejandro jiai bite. Nana Jusiñamui díga nanoca ñairaima cominidi ofidimaci. ⁷ Naimaci motomo Pedro iaiaiaia Juan díga atianona, iaiaiaimo jicanotimaci:

—¿Bu uai díga buena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue. ⁹ Tisitaitimie jillwana birui cocomo jicanotomoi. “¿Buemona naimie jillode?” raillanona cocomo jicanotomoi. ¹⁰ Jesucristo uai díga jillode. Omoi buena uiñuana, ua nana judúuai comini buena uiñuana jitaidicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tisitaitimie jai benoconi naidaillana ciodomoi. ¹¹ Omoi jofo finoraini isoidomoi. Omoi jitaiñede noficidi jiaie nofici baifemo jai jaide. Jesúsdi naie nofici isoide. Naimie rafuena omoi jitaiñena jira, naimiena meinetomoi. ¹² Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —llote.

¹³ Jaciruiñeno marefodo llofuetiaiaiaia. Nainomo itino iena cacajano, comecina facadimaci: “Abina uiñoñediiaiaiaia. Jamai bue isoidiaiaiaia”. Ie jira raicadimaci; iadedi Jesús llofueoicaigaiaiaiaia illana uiñotimaci. ¹⁴ Jilloitagamie iaiaiaia díga naidaillana ciodimaci. Ie jira naimaci uai iñede. ¹⁵ Naie rafuena siadollena, naie illaicomini iaiaiaiaia bai oredimaci. ¹⁶ Coninimo jicanotimaci:

—¿Niese naie iaiaiaiaia nibaiticai? Nana Jerusalémo itino iaiaiaiaia siño rafuena finuana jai fididimaci. Iena janonidicai. ¹⁷ Jiaie comini iena fidi raillano, Jesús rafuena iaiaiaia llofuaiaia rairuiticai.

¹⁸ Ie mei iaiaiaiaia naimaci díne dane uaidotimaci. Iaiaiaimo Jesús rafuena llofueñellena riire llotimaci. ¹⁹ Pedro iaiaiaia Juan díga naimaci uai ote:

—Ie rafuena coco lloillena Jusiñamui jitaide. Omoi uaina coco innoia, Jusiñamui jitailla rafuena finoñeiticoco. Cocomo llono. ¿Bu uaina innoiticoco? ¿Jusiñamui? ¿Omoi?

Cocomo iese llono. ²⁰ Daimaiai coco ciua rafuena lloticoco. Daimaiai coco cacaja rafuena lloticoco —raite.

²¹ Iaimaiaia jacinaitajamona, iaimaiaia jino oretatimaci. Iaimaiaia duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira. ²² Jai jillodimiemo cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo jiiacino

²³ Iaimaiai jino jailla mei, iaimaiai nabaiñiai dine jaidiiaimaiai. Ilaicomini iaimaiaimo lluaana llotiaimaiai. ²⁴ Naimaci iena cacajano, Jusiñamuimo damie llua isoi jiidimaci:

—Ore Moo, mona finodio. Eniruena finodio. Monailaina finodio. Nana naiemo ite rana jiai finodio. ²⁵ Cai usuma David micorina raise uiñotica. Naimiedi ona sedadimie. Naimiena bie rafuena o Joreño jaie llotatajamona, naimie llote:

¿Bue ñellena Jusiñamui diga judfuañedino iciritimaci?

¿Bue ñellena Jusiñamuimo comini tainomo comeciaina facadimaci?

²⁶ Ilaicomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jiai iñedimaci

llote. ²⁷ Naie rafue birui bene suide. Bie nairaimo Herodedi, Poncio Pilato diga, judfuañedino diga, judfuai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci. ²⁸ Naimaci ofillamona, nana o jitaille rafuedi, o jaie lloga rafue diga, jai suide. ²⁹ Nama naimaci jaciruitajacinona jai uiñotio. Cai comeciaina ocuiñota, o rafuena jacitaiñeno cai lollesa. ³⁰ Duidinona jilloita. O mare Jito Jesús uaido caina siño rafuena finota —jiidimaci.

³¹ Jusiñamuimo jiiacino fuilla meinoconi, naimaci ofiracodi jaidisite. Jusiñamui Joreño nagamiiai comecimo namatade. Iemona Jusiñamui uai jacitaiñeno llocana jaidimaci.

Creventia damacina illa rafue

³² Nana creventia damacina itimaci. Naimacimo rarui ia, dajena naimacimo duide.

³³ Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode.

³⁴ Naimaci dine buna buena jaca jitaiñedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, ³⁵ Cristo oretaganomo fecadimaci. Ie mei dueredinomo imaci jitailla isoi fecauidimaci. ³⁶ Naimaci motomo José mameciredimie ite. Cristo oretagano jítaca mamecidi Bernabé. Ie mameci oni dobaiñuamona firadotimie. Naimie nairaidi levita. Naimiedi Chipre railla uiasi imie. ³⁷ Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

5

Ananías micori ie ai micori diga Jusiñamuina jifuia rafue

¹ Naie facaise Ananías ie ai diga iaimaiai eniruena jiai fecade. Ie ai mamecidi Safira. ² Naie iba naimiemo dabei fiebide. Ie ai iena uiñote. Atuedo atianona, Cristo oretaganomo fecade, “Nana ucube atidicue” raillanona. ³ Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niese Taife o comecimo namatade? Jusiñamui Joreño taino llotio, dabei ucube omo fiebilla jira. ⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina maraiñeno facadio? Cominimo taino llotio. Jusiñamuimo tainona jiai llotio.

⁵ Ananías bie uaina cacajano ieconi fiodaillamona oni caide. Nana iena ciódino eo jacinaitimaci. ⁶ Iemei nainomo ite coniruenia naimiena feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uiñoñoeno bite.

⁸ Pedro naiñaiñomo jicanote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

⁹ Pedro jicanote:

—¿Bue ñellena Jusiñamui Joreñoña jifuetomico? Ero, o ini raiafomo jonetino saisia jai nasemo cacade. Naimaci ona jiai jino ja uitimaci.

¹⁰ Naimie ecimo ieconi naiñaiño fiodaillamona, oni caide. Conirueniai fo billano, naiñaiño fiodaillana cioidimaci. Jino uillano, ie ini abimo dafomo jonetimaci. ¹¹ Iena fidiamona, nana creyetai eo jacinaitimaci. Nana bie rafuena fididinodi jiai eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jofu abi ibirimo ofisoidimaci. ¹³ Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

¹⁴ Jaciruitimaci; iadedi creyentiaina ailluena comini jaidimaci. Ailluena iñiai, ailluena riñoniai, diese creyentiaina jaidimaci. ¹⁵ Imaci biramo duidinona jonecaida, naisomo atidimaci. Pedro nainomo macarillano, o lloti naimie joreño naimacimo ibaillamona, “Jillobiticai” raillano, atidimaci. ¹⁶ Jerusalémo ie fuemo ite nairaiaimona comini biadedi, duidinona jiai atidimaci. Janaba anamo ite cominina jiai atidimaci. Nana jillodimaci. Ie isoi Cristo oretagano siño rafuena finoudimaci.

Cristo oretagano duere sefuilla rafue

¹⁷ Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiai eo uradoidimaci. Saduceuai railla cominimo duidimaci. ¹⁸ Eo uradoillamona, Cristo oretaganona gaitajano, cárcelmo jonetimaci. ¹⁹ Naiona Jusiñamui jaienicidi cárcel nasena econote. Cristo oretagano jino atiano, naimacina raite:

²⁰ —Jusiñamui jofomo mai abido jai. Cominimo Jusiñamui dine naimaci ille rafuena llono.

²¹ Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaiaina oretate, Cristo oretaganona atillena. ²² Cárcelmo jaidemo, naimacina cioiñedimaci. Abido billanona, llotimaci:

²³ —Cárcel ie nase jaca ibaicana cioidicai. Raise llaveca. Nase fuemo jaca soldaduai itimaci; iadedi econoticaimo, jaca buna cioiñedicai.

²⁴ Jusiñamui jofu nanoca sedaraima, Jusiñamui diga ñairaini diga, bie llwana cacajano, uainicaidimaci. Comecina facadimaci: “¿Nie isoide rafue naimacimo jai suide?”

²⁵ Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

²⁶ Iena cacajano, Jusiñamui jofu nanoca sedaraima ie policías diga jibuisaide. Cristo oretaganona atide. Fecuisse atide, comini dinena policiaiaina noficiaido fairinoi raillano.

²⁷ Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

²⁸ —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecacia, “Cai illaicomini Jesúna meinetimaci” llotomoi.

²⁹ Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina iñoiacadicai. ³⁰ Cai usumatiai micoriai Jusiñamuina sedauidimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei, ³¹ Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiai jai itatate. Cai judúuai comini comeciai iuai meidollena, naimaci jeacinuai dotallena, iese naimiena itatate. ³² Bie rafuena llofuecabiticai.

Jusiñamui Joreño uaido iena jiai llofueticai. Jusiñamuina ñnotinomo Jusiñamuidi ie Joreñoa jai fecade —raite.

³³ Iena cacajano, illaicomini eo iciritimaci. Cristo oretaganona meineiacadimaci; ³⁴ ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina ñnotimaci. Cristo oretaganona dallu bai oni oretajanona, naimie llote:

³⁵ —Caimaci, omoi bie cominimo omoi finolle rafuemo comeciaina raise faca. ³⁶ Jaie Teudas micori illaimana jaiacade. “Jai uaina baitimieducue” raillano, naimie dibeimo cuatrocientos iññiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. ³⁷ Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite. ³⁸ Ie jira ja omoimo lloiticue: Bie cominina faionocai. Jamai cominimona naimaci llogacino iade, jamai cominimona naimaci finuacino iade, ieconi duite. ³⁹ Jusiñamuimona bie rafue ia, jaca niese nibaiñeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie llua feiñuano, ⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; ⁴¹ iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci. ⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

6

*Creycientia*ina canollena, siete digamie diáconuaina illena, fetua rafue

¹ Naie facaise ailluena comini creycientiaina jaidimaci. Uradoillamona griego uaido ñaite comini dinena, judúuai uaido ñaite cominina jeare ñaitimaci. Grieguai feciñuai judúuai feciñuai isoi nagarui rana feiñoñena jira, jeare ñaitimaci. ² Ie jira naie doce oretaganodi creycientiai danomo ofillena, nana naimacina uaidotimaci. Naimacimo llotimaci:

—Jusiñamui uaina llollena, ra fecalle diga, abi juanide. Jusiñamui uaina llofuiana cai faionocaiadedi, maraiñede. Ra jamai cai fecaiadedi, jiai maraiñede. ³ Ie jira, amatiai, omoimona siete digamiensa fetu. ñnoganona fetu. Jusiñamui Joreño nana comecimo namatadinona fetu. Eo abi uiñotinona fetu. Ie isoide iññiaina fetu. Bie ra fecarainina maijaitimaci. ⁴ Ie mei cai abi juarenite, Jusiñamuimo cai jillena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo ñnote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judúuai comini isoi naimiedi Jusiñamuina ñnote. ⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷ Naie facaise Jusiñamui uaidi cominido uiñotacana jaide. Jerusalémo ailluena comini creycientiaina jaidimaci. Jusiñamui diga ñairainimona creycientiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiensa namatajamona, naimie uai eo siño. Comini motomo ailluena siño rafuena finouide. ⁹ Naie facaise daje judúuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; ¹⁰ iadedi naimaci uaitalle uaidi

iñede. Naimacimo Esteban uai isoidiuidi iñede. Jusiñamuimona ie uaina ua jira, Esteban abina uiñuano ñaite. ¹¹ Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

¹² Iese llumona, comini comeciaina feidocana jaidimaci. Ilaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci. ¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. ¹⁴ Naimiedi Jesús bie jofona judaillena llote. Moisés micori caimo llogafuiai fainonocaillena jiai llote. Iena cacadicaí.

¹⁵ Iemo nana illaicomini naimiemo eruaidimacimo, naimie uieco Jusiñamui jaienici isoi eruaide.

7

Esteban micori abi riidua rafue

¹ Jusiñamui diga nanoca ñairaima Esteban micorimo jicanote:

—¿Ua ie isoi naimaci llucino ite?

² Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiamona naimie micori nia ia, Harámo naimie micori nia jaiñenia, Jusiñamuidi naimie micorimo bairiano ³ llote: “O eniruemona mai jai. O cominimona mai jai. Omo cue acatalle eniruemo jaitio”. ⁴ Ie jira Caldea railla eniruemona naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate. ⁵ Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajititue” raite. “O uruiaimo fecajititue” jiai llote; iadedi naie facaise Abraham micori uruenide. ⁶ Jusiñamui jiai llote: “O uruiaí jiaie comini eniruemo jaiñititimaci. Egiptomo jaiñititimaci. Naimacina duere finoititimaci. Cuatrocientos años llogi cacajititimaci. ⁷ Naimacina maijitaite nairaina duere finoititue. Ie mei o uruiaí naie eniruemona biititimaci. Bie illanomo cuemo iobillacinona fecajititimaci” llote. ⁸ Ie cominina naimaci jaillena, Jusiñamui Abraham micorimo isaiaí diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaimona cai doce diga nairai comuidimaci.

⁹ Caimaci, José micorina Jacob micori uruiaí micoriaí uradoillamona, Egipto cominimo naimiena fecadimaci; ¹⁰ iadedi Jusiñamui naimiena eo sedade. Ie llogi ie cacajamona naimiena jillotote. Naimiemo uiñoracinona fecade. Ie jira Faraón micori naimiena jiai gaide. Faraón micoridi Egipto illaíma. Ie muidona Faraón Joséna fetode, nana Egiptomo itinona sedallena. Ie jofona jiai sedatate. ¹¹ Naie facaiseconi nana Egipto comini aime guititimaci. Canaámo Jacob micori illanona, nana nainomo itino diga aime jiai guite. Eo duere sefuidimaci. Cai usumatiaí micoriaí naimaci illanomo guillena baiñedimaci. ¹² Egiptomo guille illana Jacob micori fidiano, guille ollena, nano facaise ie uruiaí micorina nainomo oretate. ¹³ Ie mei José ie amatiaina naimiena uiñotade. Faraóndi José comini illana fidide. ¹⁴ Ie jira Josédi ie moonu uaidote. Nana ie cominina uaidote. Setenta y cinco digamie ite. ¹⁵ Ie jira Egiptomo Jacob micori jaide. Nainomo fiodaite. Ie uruiaí micoriaí nainomo jiai fiodaitimaci. ¹⁶ Siquem railla nairai illanomo naimaci comini naimaci micoriaina uillano, nofici ie raiafomo jonetimaci. Siquemmo Abraham micori naifona Emmor uruiaí micoriaimona jaie ibade.

¹⁷ 'Caimaci, Jusiñamui Abraham micorimo lloga rafue suille iairei illa facaiseconi, Egiptomo cai cominidi eo jebuidimaci. Abraham micorimo: "Egiptomona o uruiái biitimaci" Jusiñamui jaie llote. ¹⁸ Naie facaise jiaie illaíma Egiptona sedade. José micorína uiñoñede. ¹⁹ Ie jira cai cominina jifuiano maijitaude. Uruiai fiodaillena, naimacina imaci uruiaina fainonocaitate. ²⁰ Ie facaiseconi Moisés micori jeiciga. Jusiñamuimona naimie micori eo ebire eruaide. Ie moo jofomo daje amani fivui ite. ²¹ Ie mei naimiedi fainonocaiga. Faraón jisa micoridi naimie micorína uanona, naiñaiño jito isoi naimie micorína uiuicaide. ²² Naimie micori nana Egipto comini uiñuacinona fueote. Illaíma uai isoi naimie uaidi ite. Eo abina uiñotimie.

²³ 'Caimaci, naimie micori cuarenta años illa facai, ie comini dine ie jaillemono ie comecina facade. Naimie cominidi cai judíuai comini. ²⁴ Egipto imiemona damie llegei cacajana ciuano, naimiena riidote. Riiduanona, Moisés micoridi Egipto imiena meinete. ²⁵ Moisés micori comecina facade: "Cue muidona Egiptomona Jusiñamuidi cue cominina oretaitie". "Cue comini buena uiñotimaci" raillanona comecina facade; ie iadedi iena uiñoñedimaci. ²⁶ Ie arediruido Moisés micoridi mena come iaimaiaí fuirillana ciode. Iaimaiaína marena itataiacade. Raite: "¿Bue ñellena conimana duere finoacadomico? ¿Bue ñellena o come diga fuiridomico?" ²⁷ Duere finoacadimie naimiena oni ñuitade. Jicanote: "¿Bu odi cai illaímana jonegao? ¿Bu caimo ona llotatate juez isoi? ²⁸ ¿Na are Egipto imie o meinia isoi cuena jiaí meineiacadio?" ²⁹ Iena cacajano, come fajana naimie llinua jira, jacinaillanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

³⁰ 'Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. ³¹ Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote: ³² "O usumatiaí imaci Jusiñamuidicue. Abraham, Isaac, Jacob, imaci Jusiñamuidicue" llote. Jacinaillanona Moisés micori abi dokaide. Jaciruillanona, erodañede. ³³ Jusiñamui naimiena raite: "Jamai bue o isoilla jira, o zapatona duiño. Benomo cue illa jira, o naidaillanodi eo mareno. ³⁴ Egiptomo cue comini llegei cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue" llote; ³⁵ iadedi comini dinena Moisés micorína jaie jitaiñenamona, naimiena raitimaci: "¿Bu illaímana odi jonegao? ¿Bu o juezna jonegao?" Comini dinena naimiena jitaiñedimaci; iadedi Jusiñamui naimiena illaímana itatate. Naimiena Egiptomona cominina jilloitaraimana jiaí itatate. ³⁶ Egiptomona Moisés naimacina atide. Egiptomo nia ia, diga siño rafuena finode. Jiairede monaillai fuemo naimaci rillanona, siño rafuena jiaí finode. Jofue iñenanomo cuarenta años siño rafuena finocana jaide.

³⁷ 'Caimaci, Moisés micoridi cai judíuai cominimo llote: "Omoimona Jusiñamuidi damiena ie rafue lloraímana ico oretaitie, naimie cuena oretaja isoi". ³⁸ Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiaí micoriaí diga naie jaienici facaina Moisés ñaite. Caimo fecallena, naimiedi cominina itatate uaina feiñote; ³⁹ iadedi cai usumatiaí micoriaí naimiena iñoiacaiñedimaci. Naimiena jitaiñedimaci. Egiptomo abido jaillemono naimaci comeciaí facadimaci. ⁴⁰ Ie jira comini dinena Aarón micorimo llotimaci: "Egipto eniruemona Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruaide jiraraina fino, Egiptomo abido caina ifollena". ⁴¹ Iemo jurareta urue joreña finodimaci. Iena sedallena, faga toica ocainaiaína fecadimaci. Naimaci finoca rafueri eo caimataidimaci. ⁴² Ie jira Jusiñamui naimacimona oni jaillanona, naimacina fainonocaide. Iemona jitomana sedauidimaci. Fivuina jiaí sedauidimaci. Ucuaina jiaí sedauidimaci. Jusiñamui rafue lloraíma ie rabenicomo buena jaie iese cuega:

Jusiñamui llote: "Judíuai imaci, cuarenta años jofue iñenanomo omoi ia, cuemo omoi faga toica ocainaiaí fecañedomoi;

⁴³ iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomo.

Le jira Babilonia nairai baifemo omoina oretaiticue”

cuega. Naie facaise cai usumatiai micoriai Jusiñamuina jitaiñedimaci.

⁴⁴ Caimaci, bie rafuena cai fueollena, cai usumatiai micoriai motomo Jusiñamui illana lloiticue. Jofue iñenanomo cai usumatiai micoriai motomo daje jofu aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noficidi naicomo eenoga. ⁴⁵ Josué diga bie eniruemo naimaci billa facaise, cai usumatiai micoriai naicono atidimaci. Bie enirue jiaie nairaiamo jainaiide; iadedi Jusiñamui naie nairaiaina dotajano, cai usumatiai naie eniruena bairodimaci. Naico nainomo ite David micori facaiseconi. ⁴⁶ Jusiñamui David micorina eo canode. Le jira David micoridi cai usuma Jacob micori ie Jusiñamui jofona finollena jicanote: ⁴⁷ ia Salomón micoridi jofona Jusiñamui iena finode; ⁴⁸ iadedi Jusiñamuidi iima finoca jofomo i-iñede. Jusiñamui facaina lloraima micoridi Jusiñamuina iese cuete:

⁴⁹⁻⁵⁰ Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.

⁵¹ Ero, omoi comeciai jaiarede. Omoi comeci iinoñede. Jefonidomoi isoidomoi. Le jira Jusiñamui Joreño anamo iacaiñedomoi. Omoi usumatiai micoriai isoi itomoi. ⁵² Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue. ⁵³ Jusiñamui jaieniciaimona Moisés micori llogacinona feiñotomoi; iadedi iena iinoñedomoi.

Judíu Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite. ⁵⁵ Jusiñamui Joreño nana Esteban micori comecimo namatajamona, monamo eruailano, naimiedi Jusiñamui ebirenana ciode. Naimiedi Jusiñamui nabeimo Jesús naidaillana ciode. ⁵⁶ Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

⁵⁷ Esteban lluaana cacajano, jefo oroisite. Eo cuiriillano, naimie dine aisicaidimaci. ⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside. ⁵⁹ Estebana nofici diga fairinuano, Estebadi Jusiñamuimo ado jüide:

—Cue Nama Jesús, cue joreño feiño.

⁶⁰ Ieconicaiñici ifodo rainadacaida ado jüide:

—Naimaci bie jeacino finua muidona, ibana oñeno.

Iese naimie jüia mei, fiodaite.

8

Saulo creyentia ina duere finua rafue

¹⁻² Saulo dinena Esteban meiniana jiai jitaide. Cristo rafuena eo iñotinomona damerie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiai duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jaiñodi Samaria railla eniruemo jaidimaci; iadedi Cristo oretagano nine jaiñedimaci. ³ Le facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jiai gaitade.

Felipe Samariamo illa rafue

⁴ Tuficaida jaidino naga illanomo Jesús rafuena llocana uitimaci. ⁵ Samariamo Felipedi daje nairaimo jaide. Nainomo Cristo rafuena llofueuide. ⁶ Ailluena cominidi Felipe llofuiana eo raise feiñotimaci, naimie siño rafuena finua jira. ⁷ Felipedi diga jananiai anamo ite cominimona jananiaina oretate. Riire cuirioillano, jaidimaci. Ailluena

tisitaitinona jillotate. Ailluena ñuja-ñujacaidinona jiai jillotate. ⁸ Ie jira naie nairaïmo ite comini eo iobidimaci.

⁹ Naie nairaïmo Simóna mameciredimie ite. Naimie siño rafuena finouide. Iemona Samaria cominina rajjicaitade. Naimie raite:

—Siñomiedicue.

¹⁰ Nana comini naimiena ñnotimaci. Abina uiñoñedino ñnotimaci. Abina uiñotino jiai ñnotimaci. Raitimaci:

—Naimie uaidi Jusiñamui ie. Naimiedi siño jito —raitimaci. ¹¹ Iese naimacina are jifuate. Naimaci rajjicailla jira, naimaci naimiena cacadimaci. ¹² Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeïmo naimaci comeciai iuaina meiduana llote. Naimaci Felipe llofuiana ñnotimaci. ñnuamona, Felipe naimacina bautizade. ññiaïna bautizade. Riñoniaïna jiai bautizade.

¹³ —Jiai ñnoticue —Simón di raite. Naimie bautizaja mei, Felipe diga jaoicaide. Felipedi diga siño rafuena finua jira, Simón naimena ciuano, rajjicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaïmaiai Juan diga, batine oredimaci. ¹⁵ Iaïmaiai rillano, naimaci Jusiñamui Joreña feiñollena Jusiñamuïmo jiidiaïmaiai, ¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreña nia feiñoñedimaci. ¹⁷ Ieconï iaïmaiai onolli naimacimo joniano, Jusiñamui Joreña feiñotimaci.

¹⁸ Naimaci Jusiñamui Joreño feiñuana Simón di ciuano, ucubena iaïmaïmo fecacade. ¹⁹ Raite:

—Cuemo omico uaina ine, bumo cue onollina cue joniamona, naimie Jusiñamui Joreña feiñollena.

²⁰ Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naimena jamai fecade. ²¹ Bie rafuedi omo duiñede. Jusiñamuïmona o comeci nia maraiñede. ²² O comeci iuai meido. Naimie o comecimo ite maraiñede facajacinuaina oni dotallena, cai Namamo jica. ²³ Omo ailluena maraiñedicino illana uiñoticue. O comeci eo uradoide. Maraiñedicinona o comecimo namaredio.

²⁴ Simón uai ote:

—O llua cuemo suiñellena, o Nama diga cue facaina ñaino.

²⁵ Cristo rafuena iaïmaiai llua mei, Jerusalémo abido bitiaïmaiai. Abido billano, Samariamo diga comini illanuaimo Jesús ie mare rafuena llocana bitiaïmaiai.

Etiopía imie creyentena jailla rafue

²⁶ Naie facaise Jusiñamui jaienisaimona damie Felipemo llote:

—Beicido joide naido mai jai. Jerusalémona Gazamo joide naisona jai —llote. Naie naiso jofue iñenanodo joide. ²⁷ Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuide. Naiñaiño mamecidi Candace. Naimiedi nana naiñaiño gobierno ucubena sedade. ²⁸ Naimie jai abido jaillano, ie carretamo raïta, Isaías micori cuela rabenicono ado facade. ²⁹ Jusiñamui Joreño Felipemo llote:

—Naimie dine iaïrei jai. Carreta dine jai.

³⁰ Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uiñotio?

³¹ Naimie uai ote:

—¿Ni ese uiñoiticue, bu cuena canoñenia?

Felipemo jicanote, naimie diga a jaillano danomo raïllena.

³² Naimie facaca cuela fue iese raite:

Toïca llaua fallena uilla isoi, naimiena uitimaci.

Toïca llaua itiraï garedino dine eñena isoi, naimie ñaiñede.

Ie abina riidollena, uaina oñede.

³³ Maraiñede rafuena naimie finoñede; ia naimiena duere finodimaci. Naimie uruiai iñededï, ¿bu naimie rafuena lloite?

¹⁵ Cai Nama naimiemo llote:

—Mai. Naimie jai cue fetoca, judúuaiñedinomo cue rafuena lollena, illaicominimo cuena lollena, judúuai cominimo cue rafuena jiai lollena. ¹⁶ Cuena naimie jai ñnua muidona, naimie nie isoi llegi cacajite. Naimiemo iena lloiticue.

¹⁷ Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairedo. Naimie cuena o dine orede, dane o cioillena, Jusiñamui Joreño nana o comecimo namatallena.

¹⁸ Ieconí Saulo uisimona lliciai ico isoide ra uaide. Dane ciuana, naidaide. Ie mei jai bautizaga. ¹⁹ Ie mei jai guite. Dane mairide. Diga irui Damascómo ite creyentiai diga naimie ite.

Damascómo Saulo illa rafue

²⁰ Judúuai ofiracómo naimie jaillanona, Jesús ie rafuena llofuede. “Jesúdi Jusiñamui Jito” raillanona llofuede.

²¹ Nana naimiena cacadinodi rajicaide. Raitimaci:

—Bimie Jerusalémo Jesúsna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús díbeimo jai ite.

²² Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofui jira, judúuai dinena iena uaitanidimaci.

²³ Digarui illa mei, judúuai comeciaina facadimaci, naimiena meinellena. ²⁴ Naimie aisii raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano, ²⁵ naiona creyentiai naimiena oni uitimaci. Naimie jillobillena, llaigafo jinofebeimo cirigaímo rainajanona, naimiena ana ñuitadimaci.

Jerusalémo Saulo illa rafue

²⁶ Jerusalémo naimie jaide. Naimie ria, creyentiaina nabaiacade; ia naimiena jaciruitimaci. Creyentena naimie jaillana ñnoñedimaci. ²⁷ Ie jira Bernabé naimiena Cristo oretagano dine uillano, naimacimo naiso motomo Saulo cai Namana ciuana llote. Naiso motomo cai Nama Saulomo lluaña jiai llote. Damascómo naimie ia, Jesúsna jacitaiñeno llofuiana jiai llote. ²⁸ Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. ²⁹ Iena cacajanona, griego uaina ñaite judúuaidi naimie llofuiana uaitatimaci. Naimiena meineiacadimaci. ³⁰ Creyentiai iena fidiano, Cesareamo Saulona uitimaci. Ie mei Tarsomo naimiena oredimaci.

³¹ Judeamo, Galileamo, Samariamo nana creyentiai uri itimaci. Cai Namana ñnocana jaidimaci. Cai Namana jaciruioicaida jaidimaci. Jusiñamui Joreño naimiaci comeciaina eo ocuiñotade. Ailluena comini creyentiaina jaidimaci.

Eneas jillua rafue

³² Naie facaise diga illanuaimo Pedro macarite. Lidamo ite creyentiai dine ride. ³³ Nainomo damie biiramo biidena ciode. Naimiedi Eneas. Ocho años tisaillamona biide. ³⁴ Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O biira ferí. —Ieconí naimiedi naidadate. ³⁵ Nana Lidamo ite comini, nana Sarónmo ite comini diga, naimiena jilluana ciuanona, creyentiaina jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaiño ite. Griego uaimona oni dobaiñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominina canouide. ³⁷ Naie facaise naiñaiño duicotaide. Ie mei fiodaite. Naimiaci einamací finua isoi, ie nabaiñiai naiñaiño abina jocodimaci. Iemei aneba ie cuartomo naiñaiñoña jonetimaci. ³⁸ Lidamona Jope iaire ite. Pedro Lidamo creyentiai illana fidiano, menamie naimie dine oredimaci. Iaimaiaina llotatimaci:

—Buena sedañoño cai dine raire bi.

³⁹ Ie jira Pedro naidacaida, naie iaimaii diga jaide. Naimie ria, aneba ie cuartomo naimiena uitimaci. Nana feciñuai Pedro ecimo eecana naidaidimaci. Dorcas finouiga ñiroina naimiemo acatatimaci. ⁴⁰ Dorcas finouiga rafuena Pedro fidiano, Pedro nana

naimacina jino orede. Caiñici ifodo naimie raita, Jusiñamuimo jiiide. Abido dobaicaida, naiñaiño erodate. Raite:

—Tabita, mai rainaicaí.

Ieconí naiñaiño uisi oni erodate. Pedrona ciuano, a rainadate. ⁴¹ Naiñaiño onolli llinuanona, a naidanete. Ie mei Pedrodi feciñuaina, jiaie creyentiaí diga, uaidote, naiñaiño jai cajenana naimaci cioillena. ⁴² Nana Jopemo ite comini naie rafuena fididimaci. Ie jira ailluena comini cai Namana innotimaci. ⁴³ Jopemo Pedro diga irui Simón jofomo ite. Simóndi ocaina igoína cuidoraíma.

10

Cornelio comeci iuai meidua rafue

¹ Cornelio raillamiedi Cesareamo ite. Naimiedi capitán. Italamona bite soldaduái naimie anamo itimaci. ² Naimiedi Jusiñamui llogacínodo jaide. Nana ie comini diga Jusiñamuina innote. Judúuai cominimo ailluena rana jamai fecauide. Jusiñamuimo jiiuide. ³ Jitoma ana ia, naimiemo jai nicairilla isoi ite. Naimiedi Jusiñamui jaienicina naimie dine billana ciode. Jaienici di uaidote:

—Cornelio.

⁴ Naimiena Cornelio jaciruioicaida eruaiide. Jicanote:

—Nama, ¿buena jitaideo?

Naimie uai ote:

—Jusiñamui o jiiacínuaina jai cacade. Jusiñamuidi duerede cominina o canuana jiai feitañede. ⁵ Mai, Jopemo damierie o mullaiaimona oreta, Simón raillamiena atillena. Naimie jiaie mamecidi Pedro. ⁶ Naimiedi igoí cuidoraíma jofomo ite. Naie cuidoraíma mamecidi Simón. Monailai fuemo naimie jofo ite.

⁷ Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai innote. ⁸ Nana naimiemo Jusiñamui jaienici llua naimacimo llua mei, Jopemo oretate. ⁹ Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jiiillena. ¹⁰ Naimie aimetaite. Guiacade. Guillena comini finodemo, naimiemo nicairilla isoi ite. ¹¹ Mona oni econuana ciode. Aillue sávana isoi, buena ana billana ciode. Eniruemo naga muiduedo maigado ana bite. ¹² Naiemo jiaiforie eruaiide ocainaiaí ite. Diga eniruemo jorode raniaí ite. Diga nuiciniaí jiai ite. Nana Moisés micori fimaidoga rille radi ite. ¹³ Naimiedi monamona damie llua cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micori fimaidoga rille rana jaca riñedicue.

¹⁵ Monamona damie llua dane cacade:

—Jusiñamui jai fimaidoñede. Ie jira iese lloño.

¹⁶ Dacaiño amani iese suide. Ie mei naie radi monamo abido jaide.

¹⁷ Pedro ie comecina facade: “¿Niese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride. ¹⁸ Simón Pedrona naie jofomo illana jicanotimaci. ¹⁹ Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani iima ona jenode. ²⁰ Naidacaida, ana jai. Naimaci diga buena sedaño mai jai. O dine naimacina oredicue.

²¹ Pedrodi comini dine ana jaide. Raite:

—Omoi jenocamedicue. ¿Bue ñiaibitomoí billa?

²² Uai otimaci:

—Cornelio raillamie anamo iticai. Cornelio Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina innotimie. Nana judúuai comini dinena naimiedi mareuidimie.

²³ Iena Pedro cacajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiaí naimie diga jiai jaidimaci. ²⁴ Ie are Cesareamo

ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote. ²⁵ Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena. ²⁶ Pedrodi naimiena a naidanete. Raite:

—Mai a naidada. Cue jiai jamai iimadicue.

²⁷ Naimie diga ñaiano fo jaidiiaimaiai. Ailluena comini ofillana ciode. ²⁸ Naimacimo llote:

—Moisés micori judío imie judúñedimie nabairillana rairuide. Iena uiñotomoi. Judúñedimie jofomo illana jiai rairuide. Ie areruido Jusiñamui nicairilla isoidifuenta cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoina cue jearuillana jai jitañede. ²⁹ Ie jira buena sedaño biticue, cuena o uaidua jira. ¿Bue ñellena cuena uaidotomoi? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Iecon Jusiñamui jañenici cuemo bairede. Naimie iniroi quenirede. ³¹ Cuena raite: “Jusiñamui o jiana cacade. Naimiedi duerede cominina o canuana feitañede. ³² Ie jira Jopemo damierena oreta, Simón Pedrona uaidollena. Jiaie Simón jofomo ite. Simóndi igoi cuidoraíma. Ie jofo monaillai fuemo ite”. ³³ Iemona ona uaidoticue. O comeci marena jira, bene bitio. Jai nana bene iticai. Jusiñamui cai diga jiai ite. Cai Nama nana omo llua cacareillena, bene iticai.

Corneliomo Pedro llua rafue

³⁴ Pedro uai ote:

—Jusiñamui nana comini naimie inuana jitaillana jai uiñoticue. ³⁵ Naga nairaímona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide. ³⁶ Cai judúuai cominimo Jesucristo llua mona, Jusiñamui díbeimo cai illena jai uiñoticai. Iemona Jusiñamui diga cai uri illana jai jiai uiñoticai. Jesúdi nana cai Nama. Bie rafuena navui janore fididomoi. ³⁷ Nana Judeamo bie rafue llocana jai jaide. Juan micori bautizajana llua mei, Galileamo Jesús naimie llofuiana tainede. ³⁸ Jusiñamuidi ie Joreña Jesúmo fecade. Jesúdi Nazaret imie. Naimiemo ie uaina jiai fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. ³⁹ Judúuai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; ⁴⁰ iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciotimaci. Cajedimiena ciotimaci. Jiai ciodicai. ⁴¹ Nana comini naimiena cioñedimaci; iadedi Jusiñamui fetocano diese naimiena ciotimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uiñua jira, Jusiñamui caina fetode, naie rafuena llollena. ⁴² Cominimo bie rafuena llua caimo llote. Jusiñamui Jesúna jai fetode, naimiena inoñedinona duere finollena. Nia fiodañedinona duere finoite. Jai fiodaitinona jiai duere finoite. Ie jira Jesús rafuena llocana jaidicai. ⁴³ Jesús muidona naga naimiena inotimie ie marañedicinodi Jusiñamui dotalle. Iena nana Jusiñamui facaina lloraini micoriai jai llotimaci.

Judúañedino Jusiñamui Joreña feiñua rafue

⁴⁴ Pedro biena nia llofueia, Jusiñamui Joreño nana bie rafuena cacadinomo bite. ⁴⁵ Iena cianona, Pedro diga bite creyentiai rajicaidimaci. Naimicidi judúuai comini. Judúuaiñede cominimo Jusiñamui ie Joreño jai fecaja jira, rajicaidimaci. ⁴⁶ Jusiñamui Joreño naimacimo illamona, judúuaiñedinodi jiaie nairai uaillaido ñaitimaci. Naie ñaia uaillaina uiñoñedimaci. Jusiñamuimo iobillacinona jai fecadimaci. Pedro diga bitino iena cacajano, rajicaidimaci. Iemei Pedro raite:

⁴⁷ —Cai feiñua isoi, Jusiñamui Joreña jiai feiñotomoi. Omoi bautizallena jaca budi rairuiñeite.

⁴⁸ Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

11

*Jerusalémo Pedro*di naimiemo jai suide rafuena llote

¹ Judeamo ite Cristo oretagano, jiaie creyentiai diga, judíuainede comini Jusiñamui uaina feiñuana fididimaci. ² Pedro Jerusalémo abido ria, judíuai comini naimiena icidimaci. ³ Jicanotimaci:

—¿Bue ñellena judíuainedino jofomo jaidio? ¿Bue ñellena naimaci diga guitio?

⁴ Pedro uai uanona, naimacimo naie rafuena nagacinuaina llote:

⁵ —Jopemo navui cue ia, Jusiñamuimo cue jiaia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride. ⁶ Nainomo eruaidicue, diga rana ciodicue: ocainaiaina, eniruemo jorocana jaidinona, nuiciniaina. Iena ciodicue. ⁷ Monamona damie cuemo lluaana cacadicue. Raite: “Pedro, naidacaillanona, fajanona, rino”. ⁸ Naie uai oticue: “Nama, dama ite. Moisés micori fimaidoga rille rana jaca riñedicue”. ⁹ Monamona dane cuemo llote: “Jusiñamui iena jai fimaidoñede. Ie jira iese lloñeno”. ¹⁰ Dacaiño amani iese suide. Ie mei monamo nana abido dane jaide. ¹¹ Ieconidaje amani iima cai illa jofomo ridimaci. Cesaremona cue dine damie naimacina orede. ¹² Jusiñamui Joreñodi naimaci diga buena sedaño cue jaillena cuemo llote. Cue diga seis creyentiai jiaia jaidimaci. Cuenaauidotimie jofomo jaidicai. ¹³ Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienici naimiemo llote: “Jopemo cominina oreta, Simón Pedrona atillena. ¹⁴ O jitailla rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote. ¹⁵ Nainomo cue llofuia facaiseconi, nano dofoconi caimo billa isoi, Jusiñamui Joreño naimacimo bite. ¹⁶ Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreño birui feiñoitomo”. ¹⁷ Cai Nama Jesucristona cai iñuamona, Jusiñamuidi ie Joreño caimo navui fecade. Naimacimo daje isoi birui fecademo, ¿niese Jusiñamui díbeimo iñeiticue?

¹⁸ Iena Cristo oretagano cacajano, jai naimaci uaina uaitallicino iñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judíuainede comini comeciai iuai meiduana jai jitaide. Naimie díbeimo naimaci illana jai jitaide. Ie jira naimieri iobidicai.

Antioquíamo ite creyentiai illa rafue

¹⁹ Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiaia jaidimaci. Antioquíamo damierie jiaia jaidimaci. Dani judíuai cominimo naimaci rafuena llotimaci; ²⁰ iadedi tuficaidinomona jiaino Chipremona billanona, Cirenemona billanona, Antioquíamo rillano, judíuainedonomo cai Nama Jesús rafuena llotimaci. ²¹ Cristo uai naimacimo illamona, ailluena comini iñnotimaci. Cai Nama díbeimo jaidimaci. ²² Jerusalémo ite creyentiai iena fidiano, Antioquíamo Bernabéna oretatimaci. ²³ Naimie ria, naimaci marena illamona, naimiedi Jusiñamui naimacina dueruillana uiñote. Ie jira iobide. Imaci comeciai ocuiñocana iñnocana jaillana naimacimo llote. ²⁴ Naimiedi maremie Jusiñamui Joreño nana naimie comecimo namatadimie. Jusiñamuina eo iñnotimie. Naie facaise ailluena comini creyentiaina jaidimaci.

²⁵ Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. ²⁶ Daje año creyentiai diga nabairillanona, naimacina llofuetiaimaiaia. Antioquíamo creyentiaidi cristianona nano mameciredimaci.

²⁷ Iemei Jerusalémona Antioquíamo damierie Jusiñamui rafuena lloraini bitimaci. ²⁸ Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaimana illa facaiseconi iese jai suide. ²⁹ Ie jira Antioquámo ite creyentiaidi, Judeamo ite creyentiaimo, ucubena oretaiacadimaci. ³⁰ Nagamiiai imacimo illa dierise ucubena oredimaci. Creyentiaina llofuerainimo Bernabé diga, iaímaiai Saulo diga, naie ucubena oredimaci.

12

Herodes Agripadi creyentiaina duere finua rafue

¹ Naie facaise Herodes railla illaimadi creyentiaimona damieriena gaitatate, naimacina duere finollena. ² Lloebi diga Jacobo cimaiona jaitatate. Jacobodi Juan ama. ³ Ieri judíuai illaicomini iobidimaci. Iena uiñuamona, Herodes Pedrona jiai gaitatate. ⁴ Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaína orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedaudimaci. Naie llomenico guilla rafue fuilla mei, comini illa uicomo naimiena meineiacade. ⁵ Ie jira Pedro cárcelmo fiebide; iadedi creyentiaí naimie facaina eo jiidimaci. ⁶ Herodes naimiena meineiacanarui naio Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci. ⁷ Ieconi cai Nama ie jaienici dí cárcelmo bairede. Cárcelmo lligaiñote. Naimiena casitallena, jaienici Pedro ciraigina jetade. Raite:

—Raire naidacai.

Ie mei naimie onollimo ite lloedí oni uaide. ⁸ Jaienici naimiena raite:

—O iniroina jita. O zapatona jiai jita— Iena jitaja mei, naie jaienici dane raite—. O iniroi o abimo ferino. Cue diga mai bi.

⁹ Naie jaienici jinafona Pedro jino jaide. Pedrodi naie jaienici naimiemo finoca rafuena uiñoñede.

—Nicaírilla isoi comequina facadicue —raite. ¹⁰ Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaímaiai. Daje calle jaillanona, jaienici naimiena faínonocaide. ¹¹ Iemona Pedro naimiemo suide rafuena jai uiñoñede. Raite:

—Cue Nama ie jaienicina uanai oretate. Herodemona cuena jillobitade. Judíuai illaicomini cue meinellena cue sedajamona cuena jillobitade.

¹² Iena jai naimie uiñuano, María jofomo jaide. Maríadi Juan Marcos ei. Jusiñamuimo jillena, naicomo ailluena comini ofidimaci. ¹³ Rillanona calle fuemo ite nasena tute. Daje mullaíño bite. Naiñaiño mamecidi Rode. ¹⁴ Naimie uaiduamona, naiñaiño Pedro uaina uiñote. Iobilla jira, nase econoñede; iadedi abido fo aiside. Pedro nasemo illana llote.

¹⁵ Raitimaci:

—Odí uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

¹⁶ Pedro nasena nia tua jira, nasena econuaíbitimaci. Econuamona naimiena naimaci ciuamona, rajicaidimaci. ¹⁷ Fo jaillano, Pedro ie onolli jaidide, naimaci lliicaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jiaínomo jaide.

¹⁸ Monaidemo, Pedro nainomo iñena jira, soldaduai rajicaillanona, siadotimaci. ¹⁹ Herodes iena fidiano, naimiena jenotate. Naimiena baiñena, soldaduaímo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

Herodes micori fiodailla rafue

²⁰ Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci díbeimo naimie illena. Herodes

eniruemona naimaci guille billa jira, uri illena naimiemo jicanote. ²¹ Naie cominina Herodes feiñollena, ie ebirede iniroina jítade. Naimacina feiñollena, ie rairabicimo raide. Iemona raita, rafuena are llote. ²² Iena cacajano, comini ado cuiiriidimaci:

—Jamai iimadi ñaiñena. ¡Jusiñamui ñaia!

²³ “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiaí naimiena aite. Iemona naimiedi fiodaite.

²⁴ Naie facaiseconi Jusiñamui uai llocana jaide. Ailluena comini iena innotimaci.

²⁵ Iaimaiaí uiga ucube illanona, Bernabé, Saulo diga, Jerusalémoma Antioquíamo abido bitiaimaiaí. Juan Marcos jiaí atidiaimaiaí.

13

Bernabéna, iaímaiaí Saulo diga, fetua rafue

¹ Antioquíamo creyentiaí motomo Jusiñamui facaina lloraini itimaci. Llofueraíni jiaí itimaci: Bernabé, Simón. Simóndi jiaíe mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiaí ite. ² Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

—Bernabé iaímaiaí Saulo diga fetu, cuejena. Cue rafuena iaímaiaí lllollena, iaímaiaína jai fetodicue.

³ Jusiñamuimo naimaci jiaí mei, Jusiñamui iaímaiaína fetuana naimaci uiñuamona, naimaci onollí iaímaiaímo jonia mei, iaímaiaína naimacimona oni oretatimaci.

Pablo, iaímaiaí Bernabé diga, Chipremo illa rafue

⁴ Iaímaiaína Jusiñamui Joreño oretaja jira, Seleuciamoma jaidiaimaiaí. Nainomona botedo Chipremo jaidiaimaiaí. Chipredi uiasi. ⁵ Chipremo ria, Salaminamo judúuai ofiracuaimo Jusiñamui uaina llofuetiaimaiaí. Juan Marcos iaímaiaí diga jiaí jaide. ⁶ Nana naie uiasimo jaillanona, Pafos railla nairaímo ridimaci. Nainomoma Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raite; iadedi taino lloraima. ⁷ Gobernador diga maijiuide. Gobernadori Sergio Paulo. Gobernadori abina uiñotimie. Jusiñamui uaina cacacana jira, naimie Bernabé iaímaiaí Saulo diga uaidote. ⁸ Barjesús ie jiaíe mamecidi Elimas. Naie iaímaiaí llofuiana uaitate. Gobernador inuana jitañede. ⁹ Saulodi jiaíe mameci Pablo. Pablo dinena naimiena eo eruaillano, Jusiñamui Joreño nana Pablo comecimo namatajamona, ¹⁰ naimiemo llote:

—¡Eo jifueraimadio! ¡Eo maraiñedio! ¡Tañe díbeimo itio! Nana mare rafue díbeimo iñedio. Cai Nama ie mare uanaicinona dobairaidodio. ¹¹ Cai Nama ie uaido ona ja iracotaitaiticue. Nano nigarui useredinona cioiñeítio.

Ieconi naimie cioiñede. Cominina jenuaide, ie onollido llinocaida ie uillena. ¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaita.

Jesús rafuena llocana jaidiaimaiaí

¹³ Pafomona botedo Pablo ie nabaiñiaí diga jaide. Perge railla nairaímo ride. Perge Panfilia railla eniruemo ite. Juan Marcos iaímaiaína fainonocaida, Jerusalémo abido jaide. ¹⁴ Pergemona Antioquíamo jaidiaimaiaí. Pisidia railla eniruemo Antioquí ite. Sábadoruimo judúuai ofiracoma jaillano, ana raidiaimaiaí. ¹⁵ Moisés micori cuegafuena facaja mei, Jusiñamui facaina lloraini micoriaí cuegafuena facaja mei, judúuai ofiraco sedadino iaímaiaímo llotimaci:

—Caimaci, cominimo bue omico lloiacania, mai llono.

¹⁶ Pablo naidadajano, ie onollina jaidide, comini lliicaillena. Raite:

—Jusiñamuina sedallena bene itomoi. Omoimona damierie judúuaidomoi. Jiaíno judúuaiñedomoi; iadedi judúuai isoi Jusiñamuina sedadomoi. Cue lluomo mai cacarei.

¹⁷ Iemona omoi fueollena, cai jaiagai rafuena lloticue. Cai judúuai comini Jusiñamuina

birui sedadicaí. Naimiedi cai jaiagaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide. ¹⁸ Jofue iñenanomo cuarenta años naimacina canode. ¹⁹ Canaán eniruemo siete nairaina cuenode. Cai jaiagaimo, naimaci uruiái diga, naie eniruena fecade, naimaci iena. ²⁰ Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie díbeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitaiñedimaci. Samuel micoridi Jusiñamui facaina lloraima. ²¹ Illaimana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatiai micorina sedade. ²² Naimie ifo meidollena, naimaci illaimana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitailla rafuena finoite”. ²³ Jusiñamui llua isoi, David micori uruaimona Jesúdi cai judíuai comini Jilloitaraimana jaide. ²⁴ Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona fainonocaida, Jusiñamui díbeimo omoi comeciai iuailai meido. Iena omoi meidoia, comini iena uiñotallena, mai omoi bautizallomoi”. ²⁵ Juan micori ie llofua fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoiñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

²⁶ 'Caimaci, cai eirue jito Abraham micorimona comuidicaí. Jusiñamuina birui sedadicaí. Ie jira cai jeacinomona naimie jilloitalle rafue caimo duide. Jesúna ñaiticue. ²⁷ Jerusalémo itinodi, cai illaicomini diga, Jesúna jaie meinetimaci. Naga sábado Jusiñamui facaina lloraini micoriai cuegafuaina facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoriai cuegafuaina jai suitatimaci. ²⁸ Jesús marañede rafuena finoñede; iadedi naimiena meinetimaci. Pilatomo jicanotimaci, naimiena meinellena. ²⁹ Nana Jusiñamui facaina lloraini micoriai cuegafuaina suilla mei, cruzmona naimie ana uano, nofici ie raiafomo naimiena jonetimaci; ³⁰ iadedi fiodaillamona Jusiñamui naimiena jillotate. ³¹ Galileamona Jerusalémo naimie diga jaidino naimiena diga icaiño ciodimaci. Iemei cominimo naimie rafuena jai llocabitimaci. ³² Jusiñamui cai jaiagaimo jaie lloga rafue jai suide. Iena omoimo ja lloiticoco. ³³ Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cuega: “Jusiñamui llote: ‘Cue jitodio. Birui ona Jilloitaraimana itataticue’ ”. ³⁴ Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiai raite: “Davidmo cue llogacinona omoi facaina jaca finojiticue”. ³⁵ David micori jiaie salmomo iena cuete: “O mareuidimie jaca rifailana jitaiñedio” raite. ³⁶ Jusiñamui David micorina ñañede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; ³⁷ iadedi Jusiñamui Jito abidi ie isoi rifaiñede.

³⁸ 'Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacinodi omoi marañedicinomona omoina jillotañede; ³⁹ iadedi Jesúna birui omoi iñoia, omoi jeacino anamona jilloitomoi. ⁴⁰ Abina omoi rairui, Jusiñamui facaina lloraini micoriai jaie cuegafuiai omoimo sui raillano. Jaie cuetimaci:

⁴¹ Ero, Jusiñamui uaina jamaidomoi. Ieri rajjicaidomoi; iadedi faifidomoi.

Omoi motomo siño mare rafuena birui finodicue.

Bu omoimo iena iese lloia, bie rafuena iñoñeitomoi.

Ie isoi omoimo suiñellena, Jesúna birui omoi mai iño.

⁴² Ie mei Pablo lliicaide. Iaimaiái jino jaidemo, comini iaimaiaimo jicanotimaci, jiaie sáboruimo bie rafuena naimacimo dane llollena. ⁴³ Comini jino jailla mei, ailluena comini Pablo, iaimaiái Bernabé diga, ñaicana jaidimaci. Judíuai iese jaidimaci. Judíuaiñedino iese jiai jaidimaci. Naie judíuaiñedinodi judíuai isoi Jusiñamuina iñotimaci. Pablo, iaimaiái Bernabé diga, ñaicana jaillanona, naimacimo llotiiaimaiái:

—Jusiñamui omoina duenaillana omoi jai uñua jira, Jesús rafuena mai omoi ñno.

⁴⁴ Jiaie sábadoruimo ailluena comini ofidimaci, Jusiñamui uaina cacareillena. ⁴⁵ Ailluena cominina ciuano, judúuai comini dinena eo uradoidimaci. Pablo joreña ñaitimaci. Naimie llofuiacinuaina uaitatimaci; ⁴⁶ iadedi Pablo, iaimaiai Bernabé diga, jacitaiño llofuetiaimaiai:

—Omoimo Jusiñamui uaina nano lloiacadicoco. Iena jitaiñedomoi. Jusiñamui diga omoi jaca illena jitaiñedomoi. Ie jira judúuaiñedinone dine jaiticoco. ⁴⁷ Iese Jusiñamui jai llote:

Judúuaiñedinomo ona oretaiticue, naimacimo cue rafue llollena, naga enruemo ite cominimo jeacinomona jilluana llollena.

⁴⁸ Iena cacajano, judúuaiñedinone iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci. ⁴⁹ Nana bie enruemo cai Nama Jesús uaina llocana jaide; ⁵⁰ iadedi judúuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illacomini fuemo faicana uitimaci. Ie jira Pablo, iaimaiai Bernabé diga, duere finodimaci. Naimaci illanomona iaimaiaina jino dotadimaci; ⁵¹ iadedi jioracuai iaimaiai eillimona jaidinotiaimaiai, naimacimo ite jeacinuaina naimaci uñollena. Ie mei Iconio railla nairaimo jaidiaimaiai; ⁵² iadedi Antioquíamo ite creyentia eo iocire itimaci. Jusiñamui Joreño nana naimaci comecimo namatade.

14

Iconiomo Pablo, iaimaiai Bernabé diga, illa rafue

¹ Iconiomo judúuai ofiracomo, iaimaiai Antioquíamo jailla isoi, jaidiaimaiai, Cristo rafuena duere llotiaimaiai. Ie jira ailluena comini creyentiaina jaidimaci. Judúuai cominimona ailluena ñnotimaci. Judúuaiñede cominimona ailluena jiai ñnotimaci; ² iadedi ñnoñede judúuaidi judúuaiñedinone fuemo faitimaci. Naimacimo creyentiaina tainona llotimaci; ³ iadedi nainomo are fiebidiaimaiai. Cai Nama facaisena jacitaiño llotiaimaiai. Cai Nama Jesús iaimaiaina siño rafuena finotate. Ie jira cominidi cai Nama Jesús naimacina dueruillana fididimaci; ⁴ iadedi nana comini naiena ñnoñedinone. Comeciaina daje isoi lloisñede. Damierie judúuai facaisena itimaci. Damierie naie iaimaiai facaisena itimaci. ⁵ Judúuaiñedinodi, judúuai diga, naimaci illacomini diga, naie iaimaiaina duere finoacadimaci. Noficina iaimaiaina fairigiacadimaci. ⁶ Iena fidiano, Licaoniamote nairaimo aisicano jaidiaimaiai. Listra railla nairaimo jaidiaimaiai. Derbe railla nairaimo jiai jaidiaimaiai. Naie nairai ecimo ite enruemo jiai jaidiaimaiai. ⁷ Nainomo Jesús ie mare rafuena llofuetiaimaiai.

Listramo iaimaiaimo suilla rafue

⁸ Listramo damie tisitaite. Nanomona naimie iese jeicia jira, jaca macariñede. ⁹ Pablo llofuiana naimie raise cacajamona, “Jusiñamui cuena jillotarede” raillanona, tisitaitimie ñnote. Pablo dinena naimiemo eruailano, naimie ñnuana uñnote. ¹⁰ Naimiemo ado llote:

—A naidada.

Iemei daiacaida naimie macarite. ¹¹ Ailluena comini Pablo finoca rafuena cioidimaci. Naimaci uaido ado cuiridimaci:

—Ñiaiai isoi Jusiñamui cai dine bite.

Naie cominidi Júpter railla jusiñamuina sedauidimaci. Mercurio railla jusiñamuina jiai sedauidimaci. ¹² Ie jira Bernabé mamecidi jiaicina jonega Júpter. Pablo mamecidi jiaicina jonega Mercurio, naimie ñairaimana illa jira. ¹³ Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretaiaina abina finoduanona, Júpter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo feaacadimaci. ¹⁴ Iaimaiai iena ciuanona, “Comini marañede rafuena finoacade” raillano, iaimaiai ñiroina cuaranotiaimaiai. Comini motomo aisicana jaidiaimaiai. Ado llotiaimaiai:

¹⁵ —Nabaiñiai, ¿bue ñellena cocomo iese finodomoi? Jamai iimadicoco. Omoi isoidicoco. Jusiñamuina omoi sedallena, jamai rana omoi sedañellena, mare rafuena omoimo jai lloticoco. Cajede Jusiñamuina sedadicoco. Naimiedi mona finode. Eniruena finode. Monaillaina jiai finode. Nana nainomo ite rana jiai finode. ¹⁶ Jaie Jusiñamuidi nana omoi judúuaiñedino omoi jitailla rafuena finuana rairuiñede; ¹⁷ iadedi naimie finoca rafuemono naimiena uiñoredomoi. Omoi facaina mare rafue naimie finocabide. Noci deitate. Omoi rira sicotate. Omoimo guille itatate. Iemona omoi comeциаina caimare itatate. Iemona Jusiñamuina uiñoredomoi.

¹⁸ Iese Pablo llote; iadedi iaimaiaimo juraretaiaina fecajana jaca fainonocaiacaiñedimaci. ¹⁹ Nano nigaru illamona, Pisidiamo ite Antioquíamona judúuai comini bitimaci. Iconiomona jiai bitimaci. Judúuai dinena fuemo faimona, naimaci díbeimo comini jaidimaci. Iemona noficido Pablona fairigite. Naie nairaímona naimiena sonocana uitimaci, fiodaitimiena naimie eruaila jira. ²⁰ Naimiena iese fainonocaila mei, creyentiai naimie ecimo billamona, naimie a naidadate. Nai nairaímo abido jaide. Ie are Derbemo, Bernabé diga, jaide. ²¹ Naie nairaímo Jesús ie mare rafuena llotiaimaiaí. Diga comini creyentiaina jaidimaci. Ie mei Listramo abido jaidiaimaiaí. Iconiomo abido jiai jaidiaimaiaí. Pisidiamo ite Antioquíamo jiai abido jaidiaimaiaí. ²² Creyentiai comeциаina ocuiñotadiaimaiaí. Cristona nia inuana llotiaimaiaí. Raitiaimaiaí:

—Jusiñamui dine cai nia riñenia, eo duere sefuiticai.

²³ Naga creyentiai illanomo creyentiaina sedarainina fetodiaimaiaí. Guiñeno Jusiñamuimo jia mei, guiñena facaise mei, naimiena naimaci jai inua jira, cai Nama illa anamo naimacina fainonocaidiaimaiaí.

Siriamo ite Antioquíamo abido jaidiaimaiaí

²⁴ Pisidiamo jaillanona, Panfiliamo ridiaimaiaí. ²⁵ Pergemo Cristo uaina llua mei, Ataliamo jaidiaimaiaí. ²⁶ Nainomona botedo Siriamo ite Antioquíamo abido ridiaimaiaí. Nano naie iaimaiaí illanomo abido ridiaimaiaí. Nainomona iaimaiaí navui nia jaiñenia, creyentiai dinena Jusiñamui iaimaiaina duenaillana uiñuamona, iaimaiaina oredimaci. Jusiñamui rafuena iaimaiaí lllollena, iaimaiaina oredimaci. Naie maijia fuilla jira, jai abido bitiaimaiaí. ²⁷ Iaimaiaí rilla mei, creyentiaina ofitatiaimaiaí. Nana Jusiñamui iaimaiaimo finoca rafuena llotiaimaiaí.

—Jusiñamuidi judúuaiñedino naimiena inuana jai jitaide —llotiaimaiaí. ²⁸ Dinomo creyentiai diga are itiaimaiaí.

15

Jerusalémo Moisés micori llogacinona siadua rafue

¹ Antioquíamo Jerusalémona janore comini billano, creyentiaina iese llofuetimaci:

—Moisés micori caimo llua isoi, omoi abina omoi detatañenia, jeacinomona jillobiñeit-omoi.

² Ie jira creyentiai uri iñedimaci. Pablo, iaimaiaí Bernabé diga, Jerusalémona bitino llofuiana eo uaitatiaimaiaí. Ie muidona creyentiai dinena iaimaiaina, jiaie creyentiai diga, Jerusalémo jaillena fetodimaci. Cristo oretagano diga, Jerusalémo ite creyentiaina sedaraini diga, bie rafuena siadoiacasite. ³ Creyentiai naimacina oretaja mei, Fenicia raila enirue díbeido jaidimaci. Ie mei Samaria raila enirue díbeido jiai jaidimaci. Creyentiai illanuaimo llofuecana jaidimaci. Judúuaiñedino creyentiaina jai jaillana naimacimo jiai llotimaci. Ie jira naie creyentiai caimare itimaci.

⁴ Jerusalémo ria, creyentiaidi naimacina feiñotimaci. Cristo oretagano itimaci. Creyentiaina sedaraini jiai itimaci. Naimacimo nana Jusiñamui iaimaiaimo finoca rafuena llotiaimaiaí. Cristo rafuena iaimaiaí llofuiamona, judúuaiñedino Cristona inuana llotiaimaiaí. ⁵ Iena cacajano, fariseuai díbeimo ite creyentiaimona jiaíno naidaita raitimaci:

—Moisés micori llogacinuaina inuamona, judúuaiñede creyentiai abina diana jitaídicaí.

⁶ Bie rafuena siadollena, Cristo oretaganodi, creyentiai sedaraini diga, danomo ofidimaci. ⁷ Iena are siadua mei, Pedro naidacaillano, raite:

—Amatiai, judúuaiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona iñnotimaci. ⁸ Nana comini comeaiña naimie uiñuamona, judúuaiñedino naimiena iñnuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judúuaiñedinona jitaillana jai uiñoticaí. ⁹ Jusiñamuidi naimacina cai isoi jai feiñote. Naimiena naimaci iñnua jira, naimie naimaci comeaiamona jeacinona jai dotade. ¹⁰ ¿Bue ñellena Jusiñamuina iñnoiacaíñedomoi? Jusiñamui jitaillacino omoi finoacaiñena jira, naimie omoína duere finuana jitaídomoi. Cai jaiagai Moisés micori llogacinodo jaidimaci; iadedi iena raise iññoñedimaci. Nana ie llogacinona jaca finonidimaci. Iedo jaie jiai jaidicaí; iadedi iena jiai finonidicaí. ¿Bue ñellena iedo birui cai jaillana jitaídomoi? ¹¹ Jesucristo caina duenaila jira, cai jeacinomona jilloiticaí. Judúuaiñedino cai isoi jilloitimaci.

¹² Iena cacajano, nana ofidino uai lliicaidimaci. Iemei Bernabé lluaana cacadimaci. Pablo lluaana jiai cacadimaci.

—Jusiñamui judúuaiñedino motomo cocona siño rafuena finotate —lloitiiaimaiaí.

¹³ Iaimaiaí ñaia mei, Jacobo raite:

¹⁴ —Amatiai, cuemo cacarei. Judúuaiñedinomo Jesús rafue Simón Pedro nano llua rafuena jai cacadicaí. Creyentiaíña naimaci jaillena, Jusiñamui naimacina jai fetode. ¹⁵ Jusiñamui facaina lloraini micoriaí iena jaie cuetimaci:

¹⁶⁻¹⁸ Jusiñamui jaie llote: “David micori illaimana isoi illaimana illena, cue Jitona ico oretaiticue.

David jicori jito illaimana birui iñede;

iadedi David micori ifomo illaimana cue Jito iite.

Iemona judúuaiñedino cuena iñnoitimaci.

Naimaci cue cominina jaillena jiai jitaídicaí.

Iena cue llua jira, iena finoiticaí” llote.

¹⁹ Ie muidona cue comeci raite: Judúuaiñedinomona creyentiaíña jaidinona duere finoñeiticaí. ²⁰ Naimacimo rabena oreta, dama buena lloillena: “Jiraraimo fecaca llicisina riñeno. O aiñede riño diga iñeno. O iniñede iima diga iñeno. Llerinoga rana riñeno. Diruena jiai riñeno”. ²¹ Jaiemona naga sábado naga judúuai ofiracomo judúuaídi Moisés micori ciegafuiaimona naie isoide lletarafuena cacadimaci. Ie jira naie isoide rafuedo nia jaiticaí: iadedi jiaie Moisés micori lletarafuedo jaiñeiticaí.

²² Ie mei Cristo oretaganodi, creyentiaíña sedaraini diga, comeaiña facadimaci, naimacimona cominina fetollena, Antioquíamo oretallena. Nana creyentiai comeaiña facajano: “Jee” raitimaci. Pablo, iaimaiaí Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baifemo rafuena baitadiiaimaiaí. ²³ Rabena cuetimaci, iaimaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticaí. Jerusalémo iticaí. Cristo oretaganodicaí. Creyentiaíña sedarainidicaí. Omoídi cai amatiai. Omoimo jai cueticaí. Judúuaiñediomoi; iadedi cai amatiaídomoi. ²⁴ Cai motomona jiaie comini naimaci llofuiado omoína uri itatañenana fididicaí. Omoi jeacinomona omoi jilloillena, Moisés micori llogacinodo omoi jaillana jitaídicaí. Ie jirari omoi comeai rucaicuerite. Naimacina oretañedicaí. ²⁵ Danomo cai ofilla mei, menamiena fetodicaí, omoimo oretallena, Bernabé, iaimaiaí Pablo diga. Bernabéna isiruiticaí. Pablona jiai isiruiticaí. ²⁶ Iaimaiaí cai Nama Jesucristo muidona navui niadedi fiódaitiaimaiaí. ²⁷ Ie jira Judas, iaimaiaí Silas diga, oretaiticaí. Omoimo bie rabe cuia isoi lloitiiaimaiaí. ²⁸ Jusiñamui Joreño caimo illamona, bie rafuena omoimo lloiticaí. Ailluena rafue omoi finuana lloñeiticaí. Dani bie rafuena finojitomoi. ²⁹ Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno. Iese omoi iñenia, marena iitomoi. Macaibaite” cuetimaci.

³⁰ Ie mei Antioquíamo jaidimaci. Ailluena cominina ofitaja mei, naimacimo cartana fecadimaci. ³¹ Iena facajano, naie llucaciori iobidimaci. ³² Judas Jusiñamui facaina lloraima. Silas daje isoide. Diga rafuena creyentiaimo llofuetiaimaiai. Naimaci comeaiaina jiai ocuiñotadiiaimaiai. ³³ Diga irui nainomo illa mei, iaimaiaina oretatinomo creyentiai iaimaiaina marena abido oretatimaci.

³⁴ Nainomo Silas comeaina facajano, fiebide. Ie jira Judas dama abido jaide. ³⁵ Antioquíamo Pablo, iaimaiai Bernabé diga, cai Nama Jesús rafuena llofuellena fiebidiaimaiai. Diga comini jiai iese llofuetimaci.

Pablo jiaie eniruemo ite creyentiai dine dane jailla rafue

³⁶ Diga irui illa mei, Pablo Bernabémo llote: p —Naga navui coco llua nairaimo creyentiai dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

³⁷ Bernabédi, naie iaimaiai diga, Juan Marcos uiacade. ³⁸ Panfiliamo iaimaiaina navui Juan fainonocaide. Iaimaiai diga llofuellena jaiñena jira, Pablo naimiena dane uiacañede. ³⁹ Riire ñaitiaimaiai. Comeaina daje isoi lloñediaimaiai. Ie jira dajena jaiñediaimaiai. Bernabé Juan Marcona uillanona, Chipremo aillue botedo jaidiaimaiai. ⁴⁰ Ie mei Pablo Silana uite. “Jusiñamui omicono canoite” creyentiai dinena raillanona, iaimaiaina oredimaci. ⁴¹ Siria railla eniruemo Jesús rafuena llocana jaidiaimaiai. Cilicia railla eniruemo jiai llocana jaidiaimaiai. Creyentiai comeaiaina ocuiñotacana jaidiaimaiai.

16

Timoteo iaimaiai diga jailla rafue

¹ Nano Derbemo Pablo, iaimaiai Silas diga, ridiaimaiai. Iemona Listramo ridiaimaiai. Nainomo Timoteo railla creyente ite. Naimie eidi judía iñaiño. Jiai creyente. Ie moo micoridi griego imie. ² Listramo ite creyentiai, Iconiomo ite creyentiai diga, naimiena: “Mare” raitimaci. ³ Pablodi Timoteona uiacade, naimie diga jaillena. Timoteo moo micori griego imiena jira, naimie abina nia detatañede; iadedi nainomo ite judíuai illa jira, Moisés micori llua isoi, Pablo Timoteo ie abina dete. Judíuñedimie naimaci motomo ia, naimaci motomo inide. ⁴ Naga nairaimo naimaci jaillanona, Jerusalémo siadogacina creyentiaimo llote. Jerusalémo Cristo oretagano, creyentiaina sedaraini diga, navui naicinona siadotimaci. Creyentiai naie lluaña inollena, iena llocana jaidimaci. ⁵ Ie jira creyentiai inocana jaidimaci. Nagarui ailluena comini creyentiaina jaidimaci.

Pablo nicairilla ra isoidena ciua rafue

⁶ Jusiñamui Joreño Asia railla eniruemo ie uaina naimaci llofuiana rairuilla jira, Frigia railla eniruemo macaricana jaidimaci. Iemona Galaciamo jaidimaci. ⁷ Misiamo naimaci rillano, Bitiniamo jaiacade; iadedi Jesús Joreño dane imaci jaillana rairuide. ⁸ Ie jira Misiamona ecido jaillano, Troas railla nairaimo jaidimaci. ⁹ Nainomo naie naiona Pablo nicairilla ra isoidena ciode. Daje Macedonia imiedi uicomo naidaita naimiemo jicajcanode. Raite: “Macedoniamu ruica o bi. Caína canuaibi”. ¹⁰ Naiena Pablo ciua mei, naie facaisemona Pablo diga jaidicue. Lucadicue. Ie jira bie rafuena raise uiñoticue, iena omo cuellena. Macedoniamu ruica dine cai jaille botena jenodica. Comeaina facadica: “Jusiñamuidi caína uaidote, nainomo ie mare rafuena cai lollena”.

Filipomo illa rafue

¹¹ Ie jira Troamona Samotraciamo monaillaido atona ie mamedo jaidica. Ie icoitidiruido Neápolis railla nairaimo ridica. ¹² Dinomona Filipomo duide naisodo jaidica. Macedoniamu ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomo itica. ¹³ Sábadoruido naie nairaimona nasedo jino jaidica. Comeaina facajamona: “Dinomo nibai comini oficabidimaci, Jusiñamuimo jillena”, ille fuemo jaidica. Nainomo dañaiñorie riñoniai billanona,

dinomo ana raidicai, naiñaiñuaimo Cristo rafuena llollena. ¹⁴ Naimacimona dañaiño cai llofuiana eo cacade. Naiñaiño mamecidi Lidia. Tiatira railla nairai iñaiño. Naiñaiñodi jiduirede iniruenta fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie llwana feiñotade. Naie facaise creyentena jaide. ¹⁵ Naiñaiño ie jofomo itino diga bautizaja mei, caimo llote:

—Cuedi cai Namana cue jai inuana omoi uñuamona, cue jofomo mai bi, nainomo omoi fiebillesa. —Duere caina uai-uaidode.

¹⁶ Jusiñamuimo jiranomo jairuido jaidicaimo, daje jitaiñomo dafaidicai. Naiñaiñodi jainomona ibacañaiño. Janaba anamo naiñaiño jiai ite. Iemona naiñaiño jairuido suille rafuena llouide. Naie rafuena llwana ibatajano, naiñaiño namaiaidi ailluena ucubena feiñoudimaci. ¹⁷ Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

¹⁸ Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño llwamona ucubena jai oñenana naiñaiño namaiai jai uñua jira, Pablo, iamaiai Silas diga, gaitadimaci. Iaimaiaina plazamo illacomini illanomo sonocana uitimaci. ²⁰ Dinomo iaimaiaina illacomini dine atidimaci. Iese iaimaiaina llogidotimaci:

—Naie iamaiaidi cai nairaina uri itatañediamaiai. Iamaiai judúuai comini.

²¹ Romanuai cominina cai illa jira, iamaiai llogacinuaina cai inoia, iedo cai jaja, marañede.

²² Iena cacajano, nana comini naie iaimaiaina fanaisitimaci. Illacominidi naie iamaiai iniroina cuaranuanona duiñode. Rasi diga, iaimaiaina diga icaiño fatatatimaci.

²³ Iaimaiaina eo faja mei, cárcelmo jonetimaci. Cárcelna sedaraimamo iaimaiaina raise sedallena llotimaci. ²⁴ Iese llua jira, iaimaiaina llaveracomo fo iaimaiaina uite. Donoramo iamaiai eilliai ñuitajano, raise donode.

²⁵ Naiona daferui facai Pablo, iamaiai Silas diga, Jusiñamuimo ifuerillacinona ro-rodiamaiai. Jiai jidiamaiai. Jiaie llavecana naiena cacadimaci. ²⁶ Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie dcaño nana llavecana imaci donua radi oni ecoride. ²⁷ Cárcelna sedaraima casidemo, cárcel ie nasiai ecocorinaillana ciode. “Llavecana jai aisidimaci” raillamo naimie comecina facade. Ie jira ie lloesi aiñoicaida, dama abi faitacade. “Illaicomini bia, ¿bue lloiticue?” raillamona comecina facade; ²⁸ iadedi Pablodi eo riire cuiriode:

—¡O abina dama meineño! Bene nana iticaisa.

²⁹ Lamparína atillena cárcelna sedaraima jicajanona, jarire fo jaide, Pablo iamaiai Silas dine. Jacinaillano, naimie abidi docaillamona, iamaiai uicomo cañici ifodo ana rainadate. ³⁰ Iaimaiaina jino ua mei, nai iaimaiaimo jicanote:

—¿Buena fnojiticue, cue jeacinomona cue jilloillena?

³¹ Uai otiaamaiai:

—Coco Nama Jesúsna ino. Iese na o jofomo ite comini diga o jilloillesa.

³² Iemei naimiena Jesús ie rafuena llofuetiaamaiai, nana ie jofomo itino diga. ³³ Naie facaise iamaiai bofellaña jocode. Iemei naimiedi, nana ie comini diga, bautizaga.

³⁴ Guillena, ie jofomo naie iaimaiaina uite. Jusiñamuina jai inua jira, na ie comini diga, naimie caimare ite.

³⁵ Ie oni monaidemo, illacominidi dajerie policiana cárcelmo oretatimaci, nai iaimaiaina jino orellena. ³⁶ Cárcel sedaraimadi naie rafuena Pablomo llote. Raite:

—Omico jaillena, illacominidi omicono oredimaci. Mai marena jai.

³⁷ Iadedi policiamo Pablodi llote:

—Cocodi romanuai cominidicoco; iadedi cocomo ite rafuena raise uñoñoeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

³⁸ Illaicominimo policías naiena lluaibitemo, illaicominidi naiena cacajanona, eo jacinaita, romanuai cominina iaimaiaina jira. Cai nanoca illaicominidi romanuai nairai cominina jamai ebena duere finuana rairuidimaci. ³⁹ Ie jira naie iaimaii dine illaicominidi jaidimaci, iaimaiaina: “Dama dino iesede” raillena. Jino atia mei, nairaimona jino iaimaii jaillena oredimaci. ⁴⁰ Cárcelmona jino billano, Lidia jofomo fo jaidiiaimaii. Creyentiaina ciuano, naimaci comeciaina ocuiñotallena, naimacina dane llofuetiiaimaii. Ie mei oni jaidiiaimaii.

17

Pablo, iaimaii Silas diga, Tesalónicamo illa rafue

¹ Anfípolis railla nairaimo macaritiiaimaii. Apolonia railla nairaimo macaritiiaimaii. Ie mei Tesalónica railla nairaimo ridiiaimaii. Dinomo judúuai ofiracodi ite. ² Pablo fibilla isoi, nainomo fo jaide. Daje amani sábadoruimo Jusiñamuina cuegafuiaimona naimacina llofuate. ³ Iese naimacina llofuate:

—Cristo llegi cacaita. Fiodaillamona naimie jilloite. Naimiedi Jesús. ⁴ Naiena cacadinomona ailluena ñnotimaci. Pablo, Silas iaimaii díbeimo jaidimaci. Jusiñamuina ñnote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jiai jaidimaci; ⁵ iadedi judúuaidi uradoillano, jamai itinomona eo marañede ññiaina uaiduanona, ailluena cominina ofitatimaci. Ie jira naie nairai uri ññedimaci. Iaimaiaina comini uicomo uillena, Jasón jofomo binaisite. ⁶ Iaimaiaina baiñenano, Jesóna, jiaie creyentiaí diga, illaicomini illanomo aiñoicaida uitimaci. Cuirisite:

—Naga nairaimo cominina uri itatañediiaimaii. Benomo jai bitiaimaii. Jai benomo billanona, Jasón ie jofomo iaimaiaina feiñote. ⁷ Cai nanoca illaíma ie llogacinona jai ññoñedimaci. Ie anamo jai iacaiñedimaci. Raitimaci: “Jiaie illaíma anamo iticai. Jesús raillamie anamo iticai”.

⁸ Judúuai iese lluaímona, cominidi uri ññedimaci. Illaicominidi jiai uri ññedimaci. ⁹ “Naie iaimaii dane biñeitiiaimaii” illaicominimo creyentiaí raillano, illaicominidi Jasón jiaie creyentiaí diga, jino oretatimaci.

Bereamo Pablo, iaimaii Silas diga, illa rafue

¹⁰ Naie naio creyentiaídi Pablona, iaimaii Silas diga, Bereamo raire oretatimaci. Dinomo rillano, judúuai ofiracomo jaidiiaimaii. ¹¹ Nainomo ite judúuai eo mare. Tesalónicamo ite judúuai isoiñedimaci. Bereamo itinodi Cristo rafuena iocire feiñotimaci. Niedi uanaicinoni raillanona, nagarui Jusiñamuina cuegafuiaina facadimaci. ¹² Ie jira naimacimona ailluena ñnotimaci. Judúuaiñedinomona ailluena nanocañaiñuaidi ñnotimaci. Ailluena ññiaí jiai ñnotimaci; ¹³ iadedi Bereamo Pablo Jusiñamui ie uaina jai lluaína Tesalónicamo ite judúuaidi fidiano, dinomo jaidimaci. Cominina fuemo faillena, jaidimaci. ¹⁴ Naie facaise creyentiaídi Pablona oni oretatimaci. Monailai fuemo duide naisona oretatimaci. Silas, iaimaii Timoteo diga, fiebidiaimaii. ¹⁵ Pablo uigamací naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaimaii Timoteo diga, raire cue dine billesa” llono.

Atenamo Pablo illa rafue

¹⁶ Atenamo iaimaii rillena Pablo sedademo, naie nairaimo ailluena jiraraíaina ciode. Iena ciuanona, Pablo comecidi jeareficaide. ¹⁷ Naiena ciua mei, judúuai ofiracomo judúuai diga coniniri Jusiñamui rafuena siadote. Jusiñamuina jai ñnote judúuaiñedino diga coniniri iena jiai siadote. Plazamo nagarui jamai itino diga coniniri iena jiai siadote. ¹⁸ Jamai comecina facadinomona damierie naimie diga jiai ññaitimaci. Epicúreo railla rafuedo jaisoidimaci. Estoico railla rafuedo jiai jaisoidimaci. Damierie naimacimona raitimaci:

—¿Buena nai ññailareuidimie caímo lloiacade?

Jiaíno raite:

—Jiaie nairai jusiñamuillaicaïmo lloiacade isoide.

Jesús fiodaillamona jilluana Pablodí llouilla jira, iese raitimaci. ¹⁹ Ie jira naimiena naimaci siadouillanomo uitimaci. Naie illano Areópagona mameciredede. Jicanotimaci:

—¿Nie isoide o comocinuai? Caimo llono, cai uiñollena. ²⁰ Eo feiredicinuaina cacadicaï. ¿Buena nai llofuiacinodi llote? Iena uiñoiacadicaï.

²¹ Nana Atenamo ite comini, jiaie illanomona bitino diga, jamai ailli como imaci fidia rafuena ñai-ñaidimaci. Jamai ailli fidia rafuena caca-cacadimaci. Jiaie rafuena finoñedimaci.

²² Jicanua mei, Areópago railla illanomo Pablo naidacaida llote:

—Atenas imaci, omoïmo rafuena lloiacadicue. Omoi jusiñamuillaina eo sedacabidomoi. ²³ Cue macarillamona, omoi jusiñamuillaina sedaja jiraraina ciodicue. Daje jirarai abïmo iese cuega: “Uiñoñega Jusiñamuina sedadicaï” cuega. Uiñoñoeno naimiena sedadomoi. Ja omoïmo naimiena lloiticue. ²⁴ Jusiñamui biniena jaie finode. Ie emodoconi Jusiñamuidi nana biniemo itinona jiai finode. Naimiedi mona ie Nama. Enirue ie Nama. Ie jira ïima finoca jofomo naimie ïñede. ²⁵ Naga jitaille rana naimiemo illa jira, naimiena canonicicaï. Naimie nana cominina comuitate. Jiai nagarui jafaici cai uadi caïmo iga. Uanai nana rana caïmo iga. ²⁶ Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiai jonega. ²⁷ Iese jonega, naimaci naimiena jenollena. Jenuano, nibai naimiena baitimaci. Caimona naimie are ïñede. ²⁸ Naimie jaca illa jira, cai jiai iticaï. Jiai cajedicaï. Ie isoi omoi rafue lloraini jiai llotimaci: “Naimie ie uruaidicaï”.

²⁹ Naimie caina comuitaja jira, Jusiñamuidi jirarai isoïñedena uiñoticaï. Jusiñamuidi oromona finoca ra isoïñede. Platamona finoca ra isoïñede. Noficimona finoca ra isoïñede. ïima ie onolli diga finoca ra isoïñede. ³⁰ Cominidi abi uiñoñoeno jeacino jaie finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciaï iuai meidollena jitaide. ³¹ Naimaci comeciaï iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúsna naimie jai jilloitaja jira, iena uiñoticaï.

³² Fiodaillamona Jesús jilluana cacajano, damierie jaisitimaci. Iecon jiaïnodi raite:

—Jiaïruido o lluana dane cacajiticaï.

³³ Iemei naimaci motomona Pablo jino jaide. ³⁴ Naie cominimona damierie naimie ðibeïmo jaidimaci. ïnotimaci. Naimacimona damie Areópagomo siadouidimie. Ie mamecidi Dionisio. Jiaiñaiño ïnote. Naiñaiño mamecidi Dámaris. Daje facaiseconi jiaie cominidi ïnotimaci.

18

Corintomo Pablo illa rafue

¹ Atenamona Corinto railla nairaimo Pablodí jaide. ² Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaïmaiaï. Romamona Claudio nana judúuai cominina jai oretate. Ie jirari bitiaïmaiaï. Roma ie nanoca illaïmadi Claudio. ³ Pablo iaïmaiaï daje isoi maijia jira, Pablo iaïmaiaï jofomo fiebide. Iaïmaiaï conima diga maijide. Chivos itiraiaï ie nilla iniroina tiforisoidimaci, naimemona jofona finollena. ⁴ Naga sábadoruïmo judúuai ofiracomo llofuede, judúuaina ïnotallena, judúuaiñedinona iena jiai ïnotallena. ⁵ Macedoniamona Silas, iaïmaiaï Timoteo diga, bitemo, Pablodí nagarui Jusiñamui uaina llofueuide. Judúuaimo: “Jesúdi cai Jilloitaraima” llouide; ⁶ ia naimie uaina ïnosïñedimaci. Jiai naimie jinafomo jeare ñaitimaci. Naimaci comeciaï jeare ciua jira, Pablo ie iniroina jaidinote, naimacina raillano:

—Dani omoi muidona Jusiñamui omoïna duere finojite. Cue muidonañeite. Jai judúuaiñedino ðine jaiticue, naimacina cue llofuellena.

⁷ Iese raillano, oni jaide. Justo jofomo jaide. Naimiedi Jusiñamuina ñnouidimie. Ie jofu judúuai ofiraco ecimo ite. ⁸ Crispodi, nana ie jofomo itino diga, cai Nama Cristona ñnote. Naimiedi judúuai ofiraco ie sedaraima. Ailluena Corintomo ite comini creyentiaina jaidimaci. Ie mei naimacidi bautizaga. ⁹ Daje naiona Pablo nicairilla isoidemona, Pablomo cai Nama Jesucristodi llote:

—Mai jaciruiñeno. Faicaiñeno cue rafuena llocana jai. ¹⁰ O diga iiticue. Budi ona maraiñeno finoñeite. Bie nairaimo ailluena cominidi cue dibeimo jaitimaci.

¹¹ Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

¹² Corinto railla nairaidi Acaya railla eniruemo jainaiaide. Naie facaise Acaya ie gobernadori Galión. Naie facaiseconi damierie judúuai comini Pablona faiacadimaci. Galión dine naimiena uitimaci. ¹³ Raitimaci:

—Cai illaima llogacino isoi bimiedi cominina Jusiñamuina sedallena llofueñede.

¹⁴ Pablo uai oiacademo, judúuaimo Galióndi llote:

—Judúuai, cacarei. Naimie maraiñede rafuena finodena, naimie omoína jifuetena, omoi lluomo nia cacarefidicue; ¹⁵ iadedi jamai naimie uailai cuemo llotomoi. Omoi usumatiai micoriai mameciai cuemo jiai llotomoi. Omoi einamací llogacinuaina cuemo jiai llotomoi. Iena omoi coniniri siadotomoi. Bie isoide rafuena siadoiacaiñedicue.

¹⁶ Iemona naimiedi nainomona naimacina oni orede. ¹⁷ Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibaiñede.

Antioquíamo Pablo abido jailla rafue

¹⁸ Naifue suilla mei, nainomo Pablo are fiebide. Ie mei creyentiaina facaduano, Priscila iaiaimai Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. ¹⁹ Efesomo rillanona, iaiaimai fainonocaiide. Judúuai comini Jusiñamui rafuena siadollena, Pablodi judúuai ofiracomo fo jaide. ²⁰ Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue— ²¹ Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riiticue. —Iemei Efesomona jaide. ²² Cesareamo sijiano, Jerusalémo macarite. Creyentiai dine jaide. Ie mei Antioquíamo jiai macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiai imaci comeciaina ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai ciegafuiai raise uiñote. ²⁵ Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiai uiñoñede. ²⁶ Judúuai ofiracomo naimie llofuia, jacitaiñeno llofuate. Priscila, iaiaimai Aquila diga, naiona cacadiiaimai. Ie jira naimiena oni eneno uitiaimai. Ie uiñoñega rafuena eo raise naimiena llofuetiaimai. ²⁷ Acayamo Apolodi jaiacana jira, creyentiaidi naimie comecina ocuiñotajano, naimiena oresite. Acayamo ite creyentiaimo rabemo cuetimaci. Jusiñamui naimacina dueruilla jira, creyentiaina jai jaidimaci. Naimiena marena feiñollena iese cuetimaci. Nainomo naimie rillanona, creyentiaina eo canode. ²⁸ Judúuai diga marefodo jiai eo ñaite. Iemona naimaci uai ollinodi ñede. Naimiedi Jusiñamui ciegafuiaimona Jesúdi cai Jilloitaraimana llofuate.

19

Efesomo Pablo illa rafue

¹ Corintomo Apolo nia itemo, nairaii onifedo joide naido jailla mei, Pablo Efesomo ride. Dinomo rillanona, creyentiaina baite. ² Naimacimo jicanote:

—¿Cristona omoi ñnuaruimo Jusiñamui Joreñona feiñotomoi?

Uai otimaci:

—Jusiñamui Joreñona nia jaca cacaiñedicai.

³ Dane jicanote:

—¿Nie isoi omoi bautizagaomoi?

Uai otimaci:

—Juan micori lloga rafue facaina bautizagacai.

⁴ Pablo uai ote:

—Mare. Juan lloste: “Omoi comeciai iuaina meido. Iemei bautizallomoi”. Ie ifo meidoitimiena comini ñnollena lloste. Jesúna ñnollena lloste. Jesús rafuena omoimo raise lloiticue.

⁵ Iena cacajano, cai Nama Jesús ñibeido bautizadimaci. ⁶ Naimacimo Pablo ie onollina joniama, Jusiñamui Joreñona feiñotimaci. Ie mei naimaci uiñoñega nairai uaido ñaitimaci. Jusiñamui Joreño naimacimo llua rafuena jiai llotimaci. ⁷ Nibai nana naimacidi doce ññiai.

⁸ Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui ñibeimo naimaci comeciai iuaina meiduana Pablodi jacitaiño eo llouide. Nainomo daje amani fivui fiebide. ⁹ Naimacimona jainodi Pablo uaina uaitatimaci. Jiai ñnoiacañedimaci. Naimaci ñnoñena ira, ofiracomo bitinomo: “Cristo rafuedi maraiñede” llouidimaci. Ie jira Pablodi creyentiai ñiga naimacimona eneno oni jaide. Tiranno ie lloracomo nagarui Pablodi llofueuide. ¹⁰ Mena fiemona iese llofueuide. Ie jira ñiga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

¹¹ Jusiñamuidi Pablona siño rafuena finotate. ¹² Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajama, duidinodi jillodimaci. Janaba anamo itinodi jiai jillodimaci. ¹³ Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

¹⁴ Esceva ie siete jitotiaidi iese finoacadimaci. Escevadí Jusiñamui ñiga ñairaíma.

¹⁵ Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

¹⁶ Ieconí Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiai ñiga jino aisidimaci.

¹⁷ Nana Efesomo itino iena fididimaci. Judíuai, judíuaiñedino ñiga, naifuená fididimaci. Naifuená fidiana, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. ¹⁸ Ie jira ailluena creyentiaidi billano, imaci navui maraiñede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. ¹⁹ Ailluena icorilla rafuiai illabiai atianona, marefodo jobaidimaci. Niga raifi rabiai jobaillana facadimaci. Cincuenta mil ucube ñese facai rabiaina jobaidimaci. ²⁰ Cai Nama Jesús uaina eo llocana jaide. Cominidi naie uai siñonana uiñotimaci.

²¹ Naie rafue illa mei, Pablodi comecina facajano raite: “Macedoniamó cue macarillama, Acayamo cue jiai macarillama, Jerusalémo riacadicue”. Ie emodoconi naimiedi raite: “Nainomona Romamo jiai jaiacadícue”. ²² Naimie nia Asiamó nano nigarui illanona, mena canoraímana Macedoniamó oretate. Timoteona, iaímaiai Erasto ñiga, oretate.

Efesomo ite comini maraiñede rafue finoacadimaci

²³ Naie facaiseconi Pablo nia oni jaiñenia, Jesucristo rafue muidona Efesomo ite cominidi maraiñede rafuena comuitatimaci. ²⁴ Demetrio raillamie platamona ñiga rana finouide. Naimiedi Diana ie jofo joreñuaina finouide. Naimie anamo ailluena

maijjuuidimaci. Dianadi naimaci jusiñamui. ²⁵ Naimie isoi maijjuuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uiñotomoi; ²⁶ iadedi Pablo raillamiedi diga cominina jai llofuede: “Comini finoca raniaidi jusiñamuillaiñede”. Naie llofuiamona ailluena comini naimie dibeimo jaidimaci. Dama Efesomo iese suiñede; iadedi ua nana Asiamo iese suide. ²⁷ Ie jira abina rairuiacadicaí, cai maijille faifi raillano, comini Diana jofona jiai sofei raillanona. Cominidi naiñaiñona ebiruillana feittaitimaci. Naiñaiñori rajicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuiacadicaí.

²⁸ Iena cacajano, eo iciritimaci. Riire cuiiriidimaci:

—¡Efeso ie Diana eo ebirede!

²⁹ Danirie siadumona, nana comini eo failliñaidimaci. Iemo nana comini da-jena naimaci ofiracomo fo raire jaisite. Gayona, iaimaiaí Aristarco diga, gaitajano uitimaci. Naie iaimaiaidi Pablo ie nabai iaimaiaí. Iaimaiaí comuillanodi Macedonia. ³⁰ Pablo ofiracomo jiai fo jaiacade; iadedi creyentiaidi naimie fo jaillana rairuidimaci. ³¹ Illaicominimona damerie nabaiñiaí naimiemo fo jaillana jiai rairuidimaci. ³² Fo itinomona damerie daje rafuena ebena cuiiriidimaci. Jiaino jiaifuenta ebena cuiiriidimaci. Eo failliñaidimaci; ie iadedi bue ñellena naimaci ofillana raise uiñoñedimaci. ³³ Comini motomona judíuai dinena damie uicomo oredimaci. Ie mamecidi Alejandro. Cominina llicaitallena, ie onolli jaidianona, cominimo lloiacade; ³⁴ iadedi naimie judío imiema naimaci uiñuanona, nana daacaiño cuiiriidimaci. Mena horas raifi cuiiri-cuiiriidimaci:

—¡Efeso ie Diana eo ebirede!

³⁵ Iemei naie nairai rabe cueraimadi cominina llicaitatate. Naimaci llicaitallena meinoconi, naimie lluacinona cacadimaci. Raite:

—¡Cacarei! Cai nairaidi Dianana sedacabidicaí. Naiñaiño ebirediñaiño. Naiñaiñona eruaide jiraraidi monamona jaie uaide. Iena jiai sedacabidicaí. Nana bie eniruemo ite comini iena uiñotimaci. Bu naiena uiñoñediemiema jaca iñede. ³⁶ Bu cue lluaana jaca uaitañeite. Ie jira omoi llicai. Comeciaí facañeno buena finoñeno. ³⁷ ¿Bue ñellena Gayo iaimaiaí Aristarco diga, benomo atidomoi? Iaimaiaidi cai jusiñamui joreña ñaiñediiaimaiaí. Naiñaiñona jeare finoñediiaimaiaí. ³⁸ Demetrio, ie maijiraini diga, iaimaiaína llogidoiacania, cominina llogidoraco ite. Diga jueces jiai ite. Coniniri nainomo iena siado; ³⁹ iadedi jiai nicino omoimo ia, cai illaicomini ofia, buena siaduno, caimo lloitimaci. ⁴⁰ Birui bie rafue cai finua jira, illaicomini nibai caina duere finoitimaci. ¿Ñiese cai nibaille? Illaicomini caimo buena jicanoia, ¿ñiese raiticai?

⁴¹ Naie llua mei, ofidinona jino orede. Iemei jai jono tuudimaci.

20

Macedoniamo Pablo dane jailla rafue

¹ Efesomo ite rafue suilla mei, Pablodi creyentiaína uaidote. Naimaci comeciaina ocuiñotafuena llote. Iemei naimacina naimie facaduano, Macedonia railla eniruemo jaide. ² Nainomo ite nairaiño macarite. Comecina ocuiñotallena, naimacina llofuecana jaide. Iese Macedoniamona Grecia railla eniruemo risaide. ³ Nainomo daje amani fivui illa mei, Siriamo botedo abido jaiacade; iadedi judíuaidi naimiema meineiacanana Pablo fidiano, Macedoniamo abido macarite. ⁴ Jiaino naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaimaiaí Segundo diga, jaide. Tesalónica nairai imie iaimaiaí. Gayo naimie diga jiai jaide. Gayodi Derbe nairai imie. Timoteo naimie diga jiai jaide. Tíquico, iaimaiaí Trófimo diga, jiai jaidiiaimaiaí. Asia imie iaimaiaí. ⁵ Coco uicodo naimaci jaillano, Troamo cocona sedadimaci. ⁶ Llomenico guillaruillaí railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fiodaillana começillena, danomo ofidicaimo, Pablodi caina llofujete. Icoiti naimie jaiacana jira, Pablo are ñaite. Naiona jitoma daferui illa facai nia ñaite. ⁸ Cai ofillanomo ailluena lamparíniai ite. ⁹ Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana cioidimaci. ¹⁰ Ie jira Pablo ana jaide. Naimie emodomo jítadacaida, naimiena meniñote. Cominimo llote:

—Omoí rucaicueriñeno. Naimie cajede. Jafaicina nia faite.

¹¹ Abido a jaidimaci. Jesús fiodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide. ¹² Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaïmo Pablo jailla rafue

¹³ Pablodi Troamona Asón railla nairaïmo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicai. ¹⁴ Ie jira Asónmo naimiena cai baillanona, cai diga botemo bite. Ie mei Mitilene railla nairaïmo jaidicai. ¹⁵ Nainomona dane monaillaido cai jaillano, ie areruido Quío railla nairaïmo ruicafebellemo jaidicai. Dane ie areruido Samos railla nairaï mamedo atona jaidicai. Ie areruido dane cai jaillano, Miletomo sijidicai. ¹⁶ Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinocni, cincuenta digarui illanona bie rafue ite. Asia railla eniruemo naimie are iacaiñena jira, Pablo começina facade: “Efeso ecido monaillaido jaiticai”.

Efesomo ite creyentiaï sedarainimo Pablo llua rafue

¹⁷ Creyentiaïna sedarainina uaidollena, Miletomona Efesomo Pablo cartana orede. ¹⁸ Naimie dine naimaci rillanona, Pablo naimacimo llote:

—Asiamo nano cue rillaruimona, niese omoí diga nagarui cue illana uiñotomoi.

¹⁹ Cai Nama diga abina iedoñeno maijuidicue. Eecana sure maijidicue. Judíuaï cuena duere uiñodosia jira, ie facaiseconi dueredicue. ²⁰ Cueno ite marecinona omoïmo jaca janoñedicue. Nana Jusiñamui rafuena omoïmo jai lloticue. Omoï ofillanomo omoïna llofueuidicue. Omoï jofuemo omoïna jiaï llofueuidicue. ²¹ Judíuaïna llofueticue. Judíuaïñedinona daje isoi llofueticue. Jusiñamui dibeïmo omoï começiaï iuaina meiduaana lloticue. Cai Nama Jesúna omoï ñnuana jiaï lloticue. ²² Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue; ²³ iadedi Jusiñamui Joreño naga nairaïmo cuemo llote: “Llaveracomo ona gaitajano ona jonesiite. Duere sefuitio”. ²⁴ Cue ille ñnori are illemo começina facañedicue. Dama cue ille ñnori fuidoiacadicue. Cai Nama Jesúmona cue feiñoga maijiana fuidoacadicue. Mare rafuena omoïmo lloiacadicue. Jusiñamui omoïna duenaillana jiaï lloticue. ²⁵ Jusiñamui anamo omoï illa rafuena omoïmo jai lloticue. Jai dane cue uiecona cioiñeitomoi. Iena uiñoticue. ²⁶⁻²⁷ Cue uaina jaca janoñedicue; ia nana Jusiñamui uai omoïmo lloticue. Ie jira cuemona omoï diga cue começi mare. Jusiñamui uaido omoï jaiñenia, cue muidonañeite. ²⁸ Mai omoï abi rairui. Jusiñamui Joreñodi omoïna creyentiaïna sedatate. Naimacina raise seda. Jusiñamui dibeïmo itinona llofue. Naimie Jito fiodailla muidona, naimacina ote, naimie iena. ²⁹ Naimacidi toica llaudaiaï isoidimaci. Nia abina raise uiñoñedicue. Cue jailla meinocni, taino llorainidi, janallari isoi, omoïmo biite. Naimaci nana omoï sedaca cominina ramo faite, danomo abido naimaci jaillena, jiconiaï llaudaiaï gaitaja isoi. ³⁰ Omoïmona uanañedicinona llorainidi iite. Creyentiaïna ramo faitimaci, omoï llucinona fainonocaillena, naimaci dibeïmo illena. ³¹ Ie jira abina rairui. Bie rafuena feitañeno. Daje amani fiemona nana omoïna jai llofueticue. Naiona omoïna llofueticue. Aremona omoïna jiaï llofueticue. Omoïna cue duenaillamona, eianona omoïna llofueticue. ³² Mai. Cai Nama illa anamo omoïna fainonocaiticue. Naimie uaimona naimie omoïna duenaillana jai uiñotomoi. Naie uaidi omoïna jiaï

ocuiñotaite. Iemona Cristona ñnocana jaitomoi. Nana naimie fetocano diga naimie illanomo ico jaca iitomoi. ³³ Jiaino ie ucubena jaca nicidoñedicue. Bu ie ñiroillaina jaca jiai oiacañedicue. ³⁴ Cue jitaille rana dama cue maijiano oticue. Cue diga jaidino imaci jitaille rana jiai dama cue maijiano oticue. Iena nana omoidi uiñotomoi. ³⁵ Iese cue illamona omoina llofueticue. Iese maijiano duerede cominina canocana jaiacadicaí. Cai Nama Jesús ie llogacinona uiñoticaí. Naimie raite: “Raruiaina cai feiñoia, iobidicaí; iadedi cai eo iobiacania, jiainomo raruiaina fecadicaí”. ³⁶ Naie llua meino, naimaci diga caiñici ifodo rainadajano, Jusiñamuimo jiiide. ³⁷ Nana naimacidi eo eedimaci. Pablona caimaduanona, naimiena llibanotimaci. ³⁸ “Cuenada cioñeitomoi” naimacimo llua jira, eo sunaitimaci. Ieconí naimie diga botemo jaidimaci.

21

Jerusalémo Pablo jailla rafue

¹ Naimacina cai facadua meinoconi, suiñodicaí. Cos railla nairaimo atona jaidicaí. Ie are Rodas railla uiasimo ridicaí. Iemei Pátara railla nairaimo ridicaí. ² Nainomo Fenicia railla eniruemo jaiacade botena baiticaí. Nai botemo cai jailla mei, suiñodicaí. ³ Chipre railla uiasina cai ciojia, cai nabei díbeimo ite. Iemei Siria railla eniruemo jaidicaí. Tiro railla nairaimo sijidicaí. Botedo uiga raruiaina nainomo joneacadimaci. ⁴ Tiromo ite creyentiaí cai baillanona, siete digarui naimaci diga iticaí. Jerusalémo naimiena judíuai meineñellena, nainomo naimie jaiñellena, Jusiñamui Joreño naimacina Pablomo llotatate. ⁵ Digarui illa meinomo oni jaidicaí. Naie nairaimona nana naimaci cai diga jaidimaci. Riñoniaí, naimaci uruaí diga, jaidimaci. Caiñici ifodo monailai fuemo ana rainadajano Jusiñamuimo jiidicaí. ⁶ Naimaci facadua meinoconi, botemo jaidicaí. Naimaci imaci jofuemo abido jaidimaci. ⁷ Tiromona Tolemaida railla nairaimo jaidicaí. Creyentiaina uaiduano, darui naimaci diga iticaí. ⁸ Ie are jaillano, Cesareamo cai ria, Felipe jofomo jaidicaí. Felipedí Jesucristo ie rafuena lloraima. Jerusalémo díaconuaina creyentiaí jaie fetua facaise, Felipeña fetodimaci. ⁹ Naimie dinomo fiebidicaí. Naimiemo cuatro jisa ite. Naiñaiñuái nia iima abina uiñoñede. Jusiñamui naiñaiñuaimo llucacina llocabitimaci.

¹⁰ Digarui nainomo cai illamo Judeamona damie bite. Naimie mamecí Agabo. Jusiñamui facaina lloraima. ¹¹ Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite: “Jerusalémo judíuai illaicomini bie cinturón jainaoide ñimana daje isoi maitimaci. Judíuaiñedinomo naimiena fecajitimaci” raite.

¹² Naiena cai cacajano, naie comini diga, Pablona caididicaí, naimie Jerusalémo jaiñellena. ¹³ Pablo uai ote:

—¿Bue ñellena eedomoi? ¿Bue ñellena cue comecina ocuiñotañedomoi? Cue maiana jaca jitaidicue. Ua cue fiodaillana jaca jiai jitaidicue. Cue Nama Jesús muidona cue fiodaíadedí, damamai fiodaíticue.

¹⁴ Cai lloga uai naimie ñnoñena muidona, raiticaí:

—Cai Nama jitaille rafuena finuana jitaidicaí. —Iemei llicaidicaí.

¹⁵ Nano ñigarui illanona, cai raruiaina finuano, Jerusalémo jaidicaí. ¹⁶ Cesareamo ite creyentiaimona jiaino cai diga jaidimaci. Mnasón jofomo caina uitimaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo diga Pablo ñaia rafue

¹⁷ Jerusalémo cai ria, creyentiaí caina caimare uaidotimaci. ¹⁸ Ie are Pablo, cai diga, Jacobo dine jaide. Nana creyentiaina sedaraini nainomo jai ofidimaci. ¹⁹ Uaidua mei, Pablo nagacínuaído Jusiñamui judíuaiñedinomo finoca rafuena llote:

—Cue llofuiamona ailluena judíuaiñedino creyentiaina jaidimaci —llote.

²⁰ Naie rafuena cacajano, Jusiñamuimo iobillacina fecadimaci. Iemei naimiemo llotimaci:

—Ama, ero, judúuaimona ailluena comini jai creyentiaina jaidimaci; ia nana naimaci Moisés micori llogacinodo eo jaidimaci. ²¹ O finoca rafuena jai fididimaci. Ona comini ñaiana jai fididicai. Jiaie nairai motomo ite judúuaina Moisés micori llogacinona fainonocallana llofuetio. Naimaci uruiai abina deñenana llofuetio. Moisés micori llogacinuaido jaiñellena llofuetio. ²² Ie jira ¿niese nibaiiticaí? O rillana jai fididimaci. ²³ Ie jira omo cai lluaana fino. Cai ecimo cuatro iima jai ite. Nie isoide rafuena Jusiñamuimo jai llotimaci. ²⁴ Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiana naimaci facaina iba. Naie rafue omoi fuiduanona, omoi ifogina rijiruda gareitomoí. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicaí. ²⁵ Judúuaiñedino Moisés micori llogacinodo jaillena lloñeiticaí. Naimacimona creyentiaina jaidinomo navui cueticaí: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cueticaí.

²⁶ Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui lollena. Jusiñamuimo nagamiiai rana fecajaruina jiai llote. Siete digarui illanona, Moisés micori llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillai fuiacanuillaímo Asiamona damierie judúuaidi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona, ²⁸ cuiriidimaci:

—Caimaci, caina cano. Bimie naga illanomo llofuiamona, cominina raise itatañede. Moisés micori llogacinuaido jaiñede. Bifona raise sedañede. Judúuaiñedino bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona ciodimaci. Trófimodi Efeso nairai imie. Judúuñedimie. Pablo naimiena Jusiñamui jofomo uillamo comecina facadimaci; iadedi uiñede. Judúuai cominimona judúuñedimie Jusiñamui jofomo jaillana maraiñede. ³⁰ Asiamona bitino cuiriillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. ³¹ Pablona meineiacania, soldaduai ie comandantedi nana comini ieillana fidide. ³² Ieconí naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci. ³³ Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

³⁴ Nana ieidinodi jiaiforie llotimaci. Ie jira naie rafuena naimie jaca uiñoñede. Ie muidona cuatelmo naimiena uillena llote.

³⁵ Cuartel tidabacuimo naimaci ria, comini jarire jailla jira, soldaduai Pablona uitimaci.

³⁶ Ailluena comini racadimaci. Ocuioisite:

—¡Naimiena meine!

Pablo ie abi riidua llua rafue

³⁷ Cuartelmo jaiaiania, Pablo comandantemo llote:

—O diga ñaiacaducue.

Rajjicaillamona, naimie uai ote:

—Griego uaido ñaitio— ³⁸ Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue lollena, omo jicanoiacadicue.

⁴⁰ —Jee —raite. Pablo tidabacui muidomo naidaide. Cominina lliicaitallena, ie onollina jaidide. Comini lliicailla mei, Pablo judúuai uaido naimacimo llote:

22

¹—Caimaci, einamaci, cue abi riiduacinomo mai omoi cacarei.

²Naimie judúuai uaido llua naimaci cacajano, llicaidimaci. Ie jira Pablo llote:

³—Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue. ⁴Jesucristo ñnotinona jaie eo duere finodicue. Diga creyentiaina maianona, cárcelmo joneticue. Ñiñiaina duere finodicue. Riñoniaina jiai duere finodicue. ⁵Jusiñamui diga nanoca ñairaima cuena uiñote. Nana omoi illaicomini cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judúuaimo cuetimaci. Damascomo jaidicue, nainomo ite creyentia maiano, Jerusalémo atianona, naimacina duere finollena.

Pablodí Jesúna ñnuana llua rafue

(Hch 9.1-19; 26.12-18)

⁶'Omoimo bie rafuena lloiticue. Jerusalémona jaidicue; iadedi Damascomo cue iaireicaia, jitoma naidai iacania, ieconi monamona damie cue abina eo quetiñote. ⁷Eniruemo ana uaidicue. Monamona damie cuemo llua cacadicue: “Saulo, Saulo, ¿bue ñellena cuena duere finodio?” ⁸Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”. ⁹Cue diga itinodi cue quetiñua rana cioidimaci; iadedi cue diga ñaitimiena cacaiñedimaci. ¹⁰Raiticue: “Nama, ¿bue ñeiticue?” Cai Nama cuena raite: “Nidadajanona, Damascomo jai. Nainomo o finolle rafuena omo lloiticue”.

¹¹'Cuena eo quetiñua jira, cioiñedicue. Cue diga itino cue onollido llinocaida, Damascomo cuena uitimaci. ¹²Nainomo Ananías raillamiedi ite. Jusiñamuina eo ñnote. Moisés micori llogacinuaido eo jaisoide. Nainomo ite judúuaidi naimiena: “Mare” raitimaci. ¹³Naimie cuemo bite. Cuemo llote: “Saulo, ama, mai oni eroda”. Ieconi dane erodajanona, naimiena cioidicue. ¹⁴Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uiñollena, ie mare Jitona o cioillena, naimie uaina o cacareillena. ¹⁵Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio. ¹⁶Mai cue llua ñino. Nidadajanona, o jeacino oni dotallena, Jusiñamuimo jica. Ie mei bautiza” raite.

Judúuaiñedinomo Pablo jailla llua rafue

¹⁷'Ie mei Jerusalémo abido cue billa mei, Jusiñamui jofomo Jusiñamuimo cue jñia, nicairiticue isoidicue. ¹⁸Cai Namana cioidicue. Cuemo llote: “Jerusalémona raire mai jai. Cominidi o cuena llua feiñoñeitimaci”. ¹⁹Uai oticue: “Nama, naga judúuai ofiracomo ona ñnotinona fauidicue. Cárcelmo naimacina joneuidicue. Nama, Jerusalémo itino iena uiñotimaci. ²⁰Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiena meinetino ñiroina sedadicue”; ²¹iadedi cue Nama cuemo llote: “Mai jai. Judúuaiñedinomo ona are oretaiacadicue”.

Comandante anamo Pablo illa rafue

²²Bie lloga ñinori comini Pablo llua cacadimaci. Iemei cuiriidimaci:

—Bie isoide ñima illana benomo jitañedicai. ¡Naimiena meine!

²³Cuirillamona naimaci ñiroina jaidisite. Icirisiano eniruena jiai fadosite. ²⁴Judúuai uaido cominimo Pablo llua jira, comandante iena cacaiñede; iadedi comini icirillana ciuanona, naimie llote:

—Naimiena cuartelmo uiño. Naimiena fano. Naimiemo ite rafuena caimo naimie llollena, naimiena duere fino.

²⁵Naimiena maiano naimiena fallena, Pablodí nainomo ite capitámo jicanote:

—¿Juez ña lloñenia, romano nairai imiaina fajana mare? Romano nairai imiedicue.

²⁶Capitán iena cacajano, comandante ñine jaide. Iena llote. Jicanote:

—¿Ñiese ñibaiticai? Bimie romanuai nairai imie.

²⁷Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

²⁸ Comandante dinena raite:

—Romanuai nairai imiēna cue jaillena, eo ibadicue.

Pablo uai ote:

—Romanuai nairai imiēna jeicigacue.

²⁹ Ieconī naimiēna duere finoacadino naimiēmona raire oni jaidimaci. Pablo romanuai nairai imiēna jira, naimiēna jai ebena maia jira, comandante jiai jacināite. Comecina nibai facade: “Iese naimiēmo cue finua jira, ie ibana ollena, cue illaimamo cuena jiai llogidoite”.

Illai comini motomo Pablo illa rafue

³⁰ Comandantedi judúuai Pablona llogiduana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judúuai illai comini diga, ofillena llote. Pablona atiano, naimaci motomo uillanona, naimiēna naidanete.

23

¹ Ie abina riidollena, Pablo naie judúuai illai comini motomo ite. Naimacimo eruaillano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiēmona cue comeci mare.

² Ananádi Jusiñamui diga nanoca ñairaima. Pablo llua naimie gaiñenamona, Pablo ecimo itinona Pablo fuenā farotate. ³ Pablo dinena naimiēmo llote:

—Jusiñamui o fuenā faroite. Mareuidimēna abina caitadio. Moisés micori llogacinuai muidona benomo itio, cuemo llollena; iadedi cue finoca rafuena raise o uiñoñoeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micori iēna jaie cuiāna uiñoticue. “Illai cominina jeare ñaiñoeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiēmo iēna lloñedicue.

⁶ Cominimo Pablo eruaillamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacinomo ocuiriticue. Ie jira bene cuena llogidoiacadomoi.

⁷ Naimie iēna lloia, naimaci comeciāi daje isoi lloñedicaci. ⁸ Saduceuai cominidi fariseuai comini isoi iñoñedicaci. “Fiodaillamona jilloñeiticai” saduceuai comini rail-lana iñoside. “Jusiñamui jaiēnisai iñede. Comini joreñuai iñede” raillana iñoside; iadedi fariseuai comini dinena nana naie rafue illana iñotimaci. ⁹ Ie jira eo faillñaidimaci. Fariseuai motomona jiaño naidadajanona, llote:

—Bimiēmo jeacino iñede. Jusiñamui jaiēnici naimiēmo nibai jaie llua mona, bie rafue naimiēmo ite.

¹⁰ Naimaci iēse riire faillñaidimaci. Naimaci Pablona llagui raillano, comandantedi soldaduaimo cuartelmo naimiēna uillena llote.

¹¹ Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitio —raite.

Pablona meineiacana rafue

¹² Monaidemo, judúuaimona jiaño comeciāina facadimaci: “Pablona nia cai meineñenia guiñeiticai. Jiroñeiticai”. ¹³ Cuarenta baifemo ite comini iēse comeciāina facadimaci.

¹⁴ Naimaci judúuai illai comini dine jaillano, raitimaci:

—Dani comeciāina facadicai: Pablona nia cai meineñenia, jaca buena guiñeiticai.

¹⁵ Omoi dine Pablona atillena, naimiēmo eo raise jicanua isoi, comandantemo jicano. Pablo iairei bia, naimiēna cai meinellena, ocuidoiticai.

¹⁶ Pablo enaise naie rafuena fidiano, cuartelmo jaide, Pablomo lollena. ¹⁷ Iena cacajano, Pablodi capitána uaidote. Raite:

—Bie coniruena comandante dine uiño. Naimie diga ñaiacade.

¹⁸ Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

¹⁹ Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

²⁰ Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci. ²¹ Naimaci jitailla isoi finoño. Cuarenta digamie baifemo naimiena reiduanu sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

²² Comandante coniruena facaduano raite:

—Jaca bumo cuemo o lluaña lloño.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduana uaido, imaci raruiái finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiaí uaido.

²⁴ Jiaie caballona ati, naie emodomo rainadacaida Pablo jaillesa. Félix railla gobernador dine naimiena raise uiño —llote. ²⁵ Cartana jiaí cuete. Iese cuete: ²⁶ “Félix, omo cueticue. Claudio Lisiadicue. Cai mare gobernadorio. ¿Nigacino? Cue uai o dine oredicue.

²⁷ Damie o dine oredicue. Judíuai naimiena meineiacana jira, soldaduai diga naimiena gaitaticue. Naimiena gaitataja mei, naimiedi romanuai nairai imienana fididicue.

²⁸ Judíuai illaicomini dine naimiena uiticue, naimaci llogiduacinona raise cue uiñollena.

²⁹ Naimaci einamací llogacinuai muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacañedicue.

³⁰ Jiaíno naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiaí lloiticue. Naimaci naimiena omo lloitimaci” cuete.

³¹ Comandante llua isoi, soldaduai naiona Pablona Antípatrismo uitimaci. ³² Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide. ³³ Cesareamo railla nairaimo rillanona, gobernadormo cartana fecadimaci. Naimie dine Pablona jiaí uitimaci. ³⁴ Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

³⁵ Gobernador dinena raite:

—O llogidotino bia, o rafuena cacajiticue.

Soldaduaimo jiaí llote:

—Omoi anamo Herodes railla illaíma micori jofomo naimiena seda.

24

Félix dine Pablo riidua rafue

¹ Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiaí bite. Naimiedi llogidoraima. Gobernadormo Pablona llogiduaitimaci. ² Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimedio. O muidona eo uri iticai. Cai nairaina canollena, diga mare rafuena finodio. ³ Iobillamona, nana cai iena feiñotícaí.

⁴ Ona iciaicañedicue; iadedi o fue maria jira, cue lluaño dallu cacarei. ⁵ Bimiedi eo cai abina aruire finode. Nana eniruemo ite judíuaina uri itañede. Naimiedi Jesús raillamie rafuedo jaidino illaíma. ⁶ Jusiñamui jofona jeare naimie finoiacana jira, naimiena gaitadicaí. Moisés micori llogacinuaido naimiena duere finoacadicaí; ⁷ iadedi

comandante Lisias ride. Caimona naimiena riire bairode. Naimiena cai llogidollena, o dine cai billena caimo llote. ⁸ Pablomo o jicanoiacania, naimiemona bie rafuena uiñoitio. Nana naimiena cai llogiduacinona uiñoitio.

⁹ Judúuai illaicomini, Tértulo llua isoi, dacinodo llotimaci.

¹⁰ Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue. ¹¹ Doce digarui illanona, Jerusalémo como birui ridicue. Iena uiñoiacadiosa jiaie cominimo jicano. Jusiñamuina sedallena, Jerusalémo iticue. ¹² Bu diga conima uaina jaca uaitañedicue. Jusiñamui jofomo uaina uaitañedicue. Judúuai ofiracuaimo uaina jiai uaitañedicue. Naisomo uaina jiai uaitañedicue. Cominina uri itatañenana lloñedicue. ¹³ Nie isoide rafuena cue finuana cioñedimaci. Ie jira cuena raise llogidonidimaci; ¹⁴ iadedi jiaie rafuena lloiticue. Cai usumatiai Jusiñamuina sedadimaci. Naimiena jiai sedadicue. Nana Moisés llogacinuaina ñnoticue. Nana Jusiñamuina lloraini micriai cuegafuaina ñnoticue. Bimacimona jiaie llogacinuaido jai jaidicue. Bimacimona uanañedicinodo jaidicue. ¹⁵ Fiodaillamona comini ico jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiai jilloitimaci. Beno itino iena jiai ñnotimaci. ¹⁶ Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. ¹⁷ Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue. ¹⁸ Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. ¹⁹ Naie facaise Asiamona jiaie judúuai bitimaci. Cuemo nicino ia, ¿bue ñellena naimaci bene biñedimaci, cuena llogidollena? ²⁰ Naimaci biacaiñenia, ¿bue ñellena bene itino bie rafuena raise lloiacañedimaci? Naimaci motomo Jerusalémo cue ia, maraiñede rafuena cue finuana lloñedimaci. ²¹ Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

²² Félixdi Jesús díbeimo itino rafuena raise uñua jira, Pablo rafuena nairuido siadoiacañede.

—Comandante Lisias bia, dane omoi rafuena siadoiticue —raite. ²³ Félix capitámo Pablo cárcelmo sedajana llote. Naimiena maiñellena jiai llote. Naimiena canollena, naimie nabaiñiai naimie dine jaillena rairuñede.

²⁴ Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiaimaiai. Jesúna ñnuana cacadiiaimaiai. ²⁵ Jeacino finoñellena, dama ie jitailla rafuena finoñellena, jiairuido Jusiñamui riicaillafue anamo iñellena cacadiiaimaiai. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

²⁶ Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena. ²⁷ Mena años illa mei, Porcio Festodi Félix ifo meidote. Félixdi judúuaina iobitaacana jira, cárcelmo Pablona fainonocaide.

25

Festomo Pablo llua rafue

¹ Naie provinciamo darui amani rilla mei, Cesareamona Jerusalémo Festo jaide. ² Nainomo Jusiñamui diga nanoca ñairainidi, jiaie judúuai illaicomini diga, Festomo Pablona llogidotimaci. ³ Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci. ⁴ Festo uai ote:

—Pablo Cesareamo fiebiite. Raire nainomo abido jaiticue. ⁵ Omoi illaicominimona damerie cue diga jaitimaci, nicino naimiemo ia, naimiena llogidollena.

⁶ Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo lloullanomo raide. Pablo atillena llote. ⁷ Pablo billa mei, Jerusalémona bite judúuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci. ⁸ Pablo uai ote:

—Judúuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

⁹ Iena cacade; iadedi Festo judúuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

¹⁰ Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue llole. Judúuaimo jaca buena finoñedicue. Iena raise uiñotio. ¹¹ Romanuai railla nairai illaicomini llogacinona cue inoñenia, damamei jearede rafuena cue finoa, cue fiodallemo jaca ocuridicue; iadedi cuemo nicino iñenia, cuena meinellena bu cuena judúuaimo fecañeite. Cue rafue naimie siadollena, Romamo cai nanoca illaima dine jaiacadicue.

¹² Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaimaiai. Agripadi naie enirue illaima. ¹⁴ Diga irui nainomo itiaimaiai. Naimiemo Festodi Pablo ie rafuena llote:

—Félix Pablona cárcelmo bene fainonocaide. ¹⁵ Jerusalémo navui cue ia, Jusiñamui diga nanoca ñairaimadi, judúuai einamací diga, naimiena llogidote. Naimiena duere finollena cuemo jicanotimaci. ¹⁶ Naimaci uai oticue: “Cai Romanos cominidi llogidogamiena jamai tainomo duere finoñedicai; iadedi llogidogamiedi ie llogidotino uai nano cacareiticaí. Ie mei ie abi riidollicinomo jiai cacareiticaí”.

¹⁷ Ie jira naimaci cue dine benomo navui bia, ie are cominimo cue lloullanomo raidicue. Pablona cue dine uaidoticue. ¹⁸ Naimiena llogidotinodi lloia, naimiena marañede finoca rafue cue facaja isoi, llogidoñedimaci. ¹⁹ Dani naimaci inuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. ²⁰ Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”; ²¹ iadedi Pablo nainomo jaiacañede. Cai nanoca illaima dine jaillena jicanote. Nainomo ie rafuena siadollena jitaide. Ie jira naimie sedajana lloticue, cai nanoca illaima dine naimiena cue nia oretañenia.

²² Agripadi Festomo llote:

—Naimie ñaiana cacacadicue.

Festo uai ote:

—Ico are naimie ñaiana cacareitio.

²³ Ie jira ie are Agripa, iaimaiai Berenice diga, gobernador ofiracomo bitiaimaiai. Finobillano ebire bitiaimaiai. Soldaduai imaci illaicomini jiai bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote. ²⁴ Festo llote:

—Agripa, nana beno itino, bimiena ciodomoi. Jerusalémo ailluena judúuai naimiena llogidotimaci. Bene cue dine jiai bitimaci. Naimie meiniana eo jitaídímaci; ²⁵ iadedi naimiemo nicinodi iñenana jai uiñoticue. Naimiena meinellena cue llollena, nicinodi naimiemo iñede. Augusto dine naimie jaillena naimie jicanua jira, naimiena oretaiticue. ²⁶ Nicinodi nia iñede, cai illaimamo cue cuellena. Ie muidona omoi dine naimiena jai atidicue. Agripa, naimie ñaiamo raise cacarei. Naimiemo cai jicanua mei, nibai nicino naimiemo illana uiñoiticaí. Iemona Augustomo cueiticaí. ²⁷ Augusto dine llavecamié cue oretaia, naimiemo nicino iñenia, cuemona marañede.

¹ Naie facaise Agripa Pablomo lloste:

—Mai lloño. O abi riiduacinona cacaacadicue.

Pablo: “Jii” raillanona, ie onolli a ñuitade. Raite:

² —Agripa, bene o illa jira, cuemona mare. Cue fue baillafuedo o uicomo cue abina riidoiticue. Judúuai cominidi diga rafuena cuena llogidotimaci. ³ Nana cai judúuai rafuena raise uiñotio. Nana cai einamací rafuena jiaí uiñotio. Cuemo raise cacarei. ⁴ Jerusalémo naimaci motomo cue illa jira, diga judúuai cue coniruenamona cuena uiñotimaci. ⁵ Cuena naimaci lloiacania, fariseo imiëna cue illana are uiñotimaci. Jiaie comini baifemo fariseuaidi cai einamací llogacinuaina iñotimaci. ⁶ Jusiñamuidi cai usumatiai micoriaimo fiodaillamona comini ico jilloillena jaie lloste. Ie suillemo jai ocuiridicue. Ie jira llogidoracomo birui jai iticue. ⁷ Nagarui Jusiñamuina naimaci eo sedajamona, cai doce nairaidi naie llogacino suillemo jiaí nia ocuiridimaci. Ore illaíma, bie ocuirillacino muidona judúuai illaicomini cuena llogidotimaci.

⁸ ¿Bue ñellena Jusiñamuidi comini fiodaillamona jillotajana iñoiacaiñedomoi? ⁹ Jaie ie isoidicue. Nazaret ie Jesúsna iñotinona diga jearede rafuena jaie finoacadicue. ¹⁰ Jerusalémo iena finodicue. Cárcelmo ailluena Jesúsna iñotinona joneticue. Jusiñamui diga nanoca ñairaini uaido iena finodicue. Naimacina meinelle cai illaicomini raia: “Jee” raisoidicue. ¹¹ Diga judúuai ofiracomo, diga icaiño, naimacina duere finodicue. Naimaci Jesúsna jeare ñaiana jitaídicue. Naimaci diga cue eo icirilla jira, jiaie eniruemo ite nairaimo jiaí jaidicue, naimacina duere finollena.

Pabloti Jesúsna iñuana llua rafue

(Hch 9.1-19; 22.6-16)

¹² Ie jira Damascomo jaidicue. Jusiñamui diga nanoca ñairaini uaido jaidicue. ¹³ Ore illaíma, jitoma naidai ia, monamona quetiñotena ciodicue. Naidi jitoma baifemo quetiñote. Cue abina quetiñote. Cue diga itino abina jiaí quetiñote. ¹⁴ Eniruemo cue ana uaia, damie llua cacadicue. Judúuai uaido cuemo lloste: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadio”. ¹⁵ Uai oticue: “¿Budiota?” Cai Nama cuemo lloste: “Jesúdicue. Cuena duere finodio. ¹⁶ Mai a naidacai. Cue rafuena o llofuellena ona fetodicue. O birui ciua rafuena lloitio. Ona cue uiñotalle rafuena jiaí lloitio. ¹⁷ Naimaci ona duere finoia, omoi cominimona ona jillotaiticue. Judúuaiñedinomona ona jiaí jillotaiticue; iadedi judúuaiñedino dine ona oretaiticue, ¹⁸ naimaci comeciai tainomo iñellena. Taife anamona Jusiñamui anamo naimacina itataitio. Jeacino anamo naimaci birui illa jira, jitiñedinomo jai itimaci isoidimaci. Jusiñamuina uiñuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci iñuamona, nana cuena iñotino diga cue illano ico jaca iitimaci”.

¹⁹ Ore Agripa, monamona cue cacaja rafuena iñoticue. Jesúsdi Jusiñamui Jitona iñoticue. ²⁰ Damascomo itinomo iena nano lloticue. Ie mei Jerusalémo itinomo iena jiaí lloticue. Diga Judeamo itinomo iena jiaí lloticue. Judúuaiñedinomo iena jiaí lloticue. Lloticue: “Omoi comeciaimo iticinona meido, Jusiñamui díbeimo omoi illena. Omoi comeciaimo iticinona omoi meidua mei, mare rafuena finocana jai”. ²¹ Ie jira judúuai illaicomini Jusiñamui jofomo cuena gaitadimaci. Cuena meineiacadimaci; ²² iadedi Jusiñamui cuena canode. Ie jira birui bene iticue. Illaicomini beno nia lloticue. Illaicominiñedinomo jiaí nia lloticue. Dama Jusiñamui facaina lloraini micoriai ico suille cuegafuena birui lloticue. Dama Moisés micori ico suite cuegafuena jiaí birui lloticue. Jiaie rafuena lloñedicue. ²³ Jaie cuetimaci: “Cristo legi cacajite. Fiodaillamona jilloite. Naimiedi nano dofoconi jilloitimie. Iemona cai judúuai comini jeacinomona jilloillena uiñoitimaci. Iemona judúuaiñedino jeacinomona jilloillena uiñoitimaci”. Ie jira bie rafuena llocana jaidicue.

Creyentena Agripa jaillena Pablo jitailla rafue

²⁴ Iese Pablodí abi riiduanu, Festo riire llote:

—Pablo, odí uairico isoidio, eo comecina o facaja jira.

²⁵ Pablo uai ote:

—Uairicoñedicue. Festo, odí cue illaimadio. Cue lluacínodi uanaicino. Ebena ñai-ñaiacaiñedicue. ²⁶ Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede. ²⁷ Ore Agripa ¿Jusiñamui lloraini ciegafuiaina iñotio? omo jicanoticue. Iena o iñuana jai uiñoticue.

²⁸ Agripa dinena uai ote:

—Dallu o ñaiamona, cuena creyentena nibai itataiacadio.

²⁹ Pablo uai ote:

—Nibai dallu ñaiticue. Nibai are ñaiticue; iadedí cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedí omoi bie lloeo diga maiana jitaiñedicue.

³⁰ Iemona Agripa naidacaide, Festo diga, Berenice diga. Nana raidino jiai naidacaidimaci. ³¹ Jino jaillano, Pablo joreñona siadotimaci:

—Bimie jaca buena finoñede, naimiena cai meiniana lollena. Buena finoñede, cárcelmo illena.

³² Agripa Festomo llote:

—Naimie cai nanoca illaíma dine jaillana jicanoñeden, niadedí naimie jino marena oreca.

27

Romamo Pablo jailla rafue

¹ Italiomo Augusto dine Pablo oretajana Festo llua mei, Pablona jiaie llavecano diga capitámo fecade. Naie capitádi Julio. Augustona mameciredede batallómo jainaiade. ² Adramitiomona bite botemo jaidicai. Naie bote Asia railla enirue igobiaimo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai. ³ Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaille rana ote. ⁴ Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai. ⁵ Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia. ⁶ Naie bote Roma dine jaiñena jira, capitádi jiaie botena jenode. Capitádi Alejandriamona bite botena baite. Naie bote Italiomo jaiacade. Ie jira naie botemo cai jonecaida, caina uite. ⁷ Diga irui fecuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai. ⁸ Uiasi iaireise iese sefuicana jaillanona, Maregobe railla illanomo ridicai. Lasea railla nairai jiai ianori ite.

⁹ Digarui cai faifilla jira, noci deisoilla facaise jai illa jira, jaillena eo jaciredede. Ie jira botemo maijidinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticai. Botena jiai nibai faifiticai. Cai nibai jiai faifiticai —llote.

¹¹ Iese llote; iadedí naie bote piloto oni jaiacade. Naie bote nama jiai oni jaiacade. Capitán iaimaiai llua Pablo llua baifemo iñote. ¹² Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide. ¹³ Beici dinena aifidi bia, “cai jitailla aifidi bite” raillanona, suiñodicai. Creta iairei monaillai fuemo jaidicai. ¹⁴ Ie mei raire cai dine eo riire aifi bite. Naie aifi noci deisoilla dinena bite. ¹⁵ Botena oni uite. Botena atona eronenidicai. Ie muidona jamai ebena jaidicai. Aifidi caina iese uite. ¹⁶ Janorede uiasi fuemo aifi raise iñenanomo jaidicai. Nai uiasi mameci Clauda. Faifiñellena bote ie janorede nocae sefuire a aiñodicai. ¹⁷ A aiñua mei, rao diga botena ruica maiticai. Sirte railla conillie illanomo cai joodai raillano, velaiaina duiñodicai. Iemei aifi jamai uigacai.

¹⁸ Ie areruido aifi riire illa jira, cargana oni dotadicaí. ¹⁹ Dane ie are bote ie raruiaí, cai onolli diga, oni dotadicaí. ²⁰ Diga irui jitoma bainide. Diga irui ucuai jiaí bainide. Aifi eo riire nia ite. Cai jillobiñellemo jai ocuiriñedicaí.

²¹ Diga irui cai guiñena mei, Pablo naimacimo llote:

—Nabaiñiaí, cue uaina navui iñnotiomoidena, niadedi bie isoi sefuiñedicaí. Cretamo cai fiebidicaina, bie isoi sefuiñedicaí. ²² Omoi comeciaina ocuiño. Bie botedi faifite; iadedi caimona jaca buna faifiñeite. ²³ Jaive naiona Jusiñamui jaienicidi cuemo bairede. Jusiñamuimo jainaiaidicue. Naimiena sedadicue. ²⁴ Naie jaienicí cuemo llote: “Pablo, jaciruiñeno. Romamo o nanoca illaíma dine itio. Jusiñamui ona duenaila jira, nana o diga jaidino jilloitimaci”. ²⁵ Ie jira omoi comeciaina ocuiño. Cuemo llua isoi, naimiedi bie rafuena suitaite. Jusiñamui iena finuana iñnoticue. ²⁶ Nibai uiasimo jutadaiticaí.

²⁷ Catorce digarui naio illamona, Adria railla monaillaimo jamai cai jaia, naiona daferui facai marineruaidi: “Enirue iaire ite” raillanona comeciaina facadimaci. ²⁸ Ie jira ie afoředinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. ²⁹ Nofici illanomo naimaci bai raillano, fairillaillena, ie jillacimona cuatro lloelluna faitimaci. Mona monaille sedadimaci. ³⁰ Naie facaise marineruai botemona aisiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

³¹ Iena ciuano, Pablo capitámo llote. Soldaduaimo jiaí llote:

—Botemo bimaci fiebiñeniadedi, jilloñeitomoi.

³² Ie jira soldaduaidi nocae maia raona jaitadimaci. Jai dinomo nocaena faionocaidimaci. ³³ Nia monaiñenia, Pablo nana caimo llote:

—Guiño. Catorce digarui illanona, jai guiñedomoi. ³⁴ Ie jira guiño, omoi mairillesa. Ua faifiñeitomoi.

³⁵ Iese naimie raillanona, Jusiñamuimo iobillacinona fecade, nana comini illa uicomo. Llomenicono tairuano, guite. ³⁶ Nana naimaci comeciái ocuiñocaida, jiaí guitimaci. ³⁷ Botemo doscientos setenta y seis diese iticaí. ³⁸ Cai monillamona, fiebide trigona monaillaimo oni fadodicaí, bote meenaiñellena.

³⁹ Ie oni monaidemo, erodatemo, naie eniruena uiñoñedicaí. Iogobemo conillici illana ciodicai. Nainomo jamai ebena sjiacadicaí. ⁴⁰ Ie jira lloelluna nainomo oni faionocaidicaí. Datarabe maiana suiñodicaí. Vela aifimo sebiñoticaí. Monaillai fuemo enirue dine jai jaidicaí. ⁴¹ Iemei jaiciridifomo ridicaí. Eniruemo jodate. Bote muido eniruemo jaiaire jodate. Eo baguamona jillaci taicosite. ⁴² Naimaci iamona jillobi raillano, soldaduái llavecana meineiacadimaci. ⁴³ Pablona jillotaiacana jira, capitán iena rairuide. Llote:

—Nano iana uiñotino diese monaillaimo ana daia. Eniruemo jai. ⁴⁴ Jiaíno bote ie rabricido juicaida icana jai. Jiaíno bote ie raruiaido juicaida icana jai. —Iese eniruemo nana marena ridicaí.

28

Maltamo naimaci illa rafue

¹ Jai cai jillua mei, Malta railla uiasimo cai illana uiñoticaí. ² Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. ³ Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide. ⁴ Jaio naimie onollido llaillena Malta comini ciuano, coniniri ñaitimaci:

—Nibai bimie comena meinetimie. Monaillaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. ⁶ Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi nibai Jusiñamui.

⁷ Naie illanomona uiasi illaíma enirue iaire ite. Naimie mamecidi Publio. Caina marena feiñote. Darui amani ie jofomo caina marena itatate. ⁸ Publio moo duide biide. Abi

cuaride. Jeraina feide. Ie jira naimie ðine Pablo jaide. Jusiñamuimo jia mei, ie onolli naimiemo joniano, naimiena jillotate. ⁹ Bie rafue suilla jira, naimie ðine nana uiasimo ite duidino bi-bidimaci. Naimacina jillotate. ¹⁰ Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

Romamo Pablo rilla rafue

¹¹ Daje amani fivui illa mei, Alejandríamona bite botedo jaidicai. Naie uiasimo nana rollime facaiseconi naie bote ite. Mena jusiñamui iaimaiai joreño bote muidomo ite. Damie Cástorna mameciredede. Jiaimie Póluxna mameciredede. ¹² Naie botedo oni cai jaillanona, Siracusamo sijidicai. Darui amani nainomo iticai. ¹³ Nainomona jaillano Regiomo sijidicai. Darui illa mei, aifi beici ðinena billa jira, ie areruido Puteolimo ridicai. ¹⁴ Sijia mei, nainomo creyentiaina baiticai. Naimaci diga siete digarui cai illana jitaidimaci. Ie mei Roma ðine jaidicai. ¹⁵ Romamo nia cai riñenia, nainomo ite creyentiai cai billana fididimaci. Cai ðine bitimaci. Foro de Apio railla nairaimo damierie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiai ocuiñote. Cai diga Romamo jaidimaci. ¹⁶ Romamo cai ria, capitán llavecanona ie illaimamo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisii raillano, daje soldado nainomo naimiena sedade.

Romamo Pablo llofuia rafue

¹⁷ Darui amani illa mei, Pablo Romamo ite nanoca judúuaina uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacínuaína jaca ñnoticue; ¹⁸ iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo ñnena jira; ¹⁹ iadedi judúuai: “Dama ite” railla jira, cai nanoca illaima ðine jaillena jicanoticue; iadedi cue nairai diga jaca iciriñedicue. ²⁰ Omoi diga ñaillena, omoína cioacadícué. Fiodaillamona íco comini jillollena cue llofuecabilla jira, bie lleo diga maigacue.

²¹ Uai otimaci:

—Judeamona jiaino ona cuega cartana jaca feiñoñedicai. Caímo o rafuena llollena, jaca buna biñede. Bene jaca bu ona jeare ñaiñede. ²² Ie jira omona naie rafuena cacaacadícai. Naga illanomo comini o llofuiana uaitajana uiñotícai. Creyentiaina jeare ñaitimaci. Iena fididícai. Ie jira caimo iena raise llono.

²³ Naimie ðine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui ðibeimo naimaci comeciai iuaina meiduana llofue. Moisés micori llogacínuaímona, Jusiñamui facaina lloraini micoriai cuegafuíaímona, Jesúsna llofue. ²⁴ Jiaino naimie llofuiana ñnotimaci. Jiaino ñnoñedimaci. ²⁵ Nana naimaci comeciaina daje isoi lloñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorina cai usumatíaimo raise llotatate. Omoi usumatíai micoriai illa isoi nia itomoi. Isaías micoridi omoína jai cuega rafue jai suide. Naimie micori cuete:

²⁶ Jusiñamui llote: “Bie comini ðine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisínidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi. Cue ðibeimo iacaiñedomoi, omoína cue jilloitai raillanona’ ”.

²⁸ Jusiñamui rafuena omoi ñnoñena muidona, judúuaiñedinodi Jusiñamui naimacina jilloitaiacanana jai fididimaci. Naimaci iena cacareitimaci.

²⁹ Iese naimie llua mei, judúuaidi coniniri siadocana abido jaidimaci.

³⁰ Mena años Pablo ie jofomo ite. Ie illa ðinori naie jofona ibauide. Nainomo nana naimie ðine bite cominina feiñote. ³¹ Naimie anamo naimaci illana Jusiñamui jitailla jira, Jusiñamui ðibeimo naimaci comeciai iuaina meiduana llofuate. Marefodo llofuate. Naimie ði cai Nama Jesucristo rafuena llofuate. Jaca buði naimie llofuiana rairuiñede. Teofilo, jaca ðigacino omo jai lloticue. Mai. Lucadicue.

ROMAMO ITE CRISTONA HNOTINOMO PABLO ORETAGA RABE

*Romamo ite creyentia*imo Pablo cartana orede

¹ Romamo ite creyentiai, omoi dine cartana oredicue. Pablodicue. ¿Nigacino? Jesucristo dibeimo maijidicue. Jusiñamui fetocamiedicue. Ie mare rafuena cue llollena, cuena orede.

² Jusiñamuidi naimie facaina lloraini micoriaido bie rafuena jaie llote. Naimaci micoriai iena jaie jiai cuega. Iemona birui facacabidicai. ³ Bie rafuedi Jusiñamui Jitona llote. Naimie jaie ite usumadi cai illaima David micori. ⁴ Naimie Jusiñamui Jitonana uiñoticaí. Jusiñamui Joreñodi siño rafuedo caina iena uiñotade. Jusiñamui Jito fiodaillamona, Jusiñamuidi ie Jitona jillotate. Jusiñamui Jitodi Jesucristo. Cai Nama. ⁵ Caina duenaillanona, caina oretate, naga nairaiaina naimiena inotallena, naimiena naimaci iobitallena. ⁶ Naimacimona itomoi. Naimiemo omoi duillena, Jesucristo omoína jai fetode.

⁷ Romamo ite creyentiai, Jusiñamui isiruiriganodomoi. Naimie isoi mareuidinona omoi illena, fetocanodomoi. Cai Moo Jusiñamui, cai Nama Jesucristo diga, omoína duenaite. Iena uiñocana mai omoi jai. Iaimaiaí omoína uri jai itatatiamaiaí. Iena omoi uiñocana mai omoi jai.

Roma dine Pablo jaiacade

⁸ Diga comini, diga illanuaimo, Jesucristona omoi inuana jai fididimaci. Ie jira nano dofoconi omoi facaina Jesucristomo iobillacinona fecaacadicue, Jusiñamuimo iena naimie fecallena. ⁹ Jusiñamuimo cue jiiia, omoiri jiidicue. Jusiñamui iena uiñote. Naimie Jito rafuena cue lluanona, cue comecimona naimiena sedadicue. ¹⁰ Jusiñamuimo cue jiiia, naimiemo jicadicue, cuena canollena. Naimie jitaia, omoi dine ja muidomo cue riiticue. Iena jicadicue. ¹¹ Omoína eo cioacadicue. Jusiñamui Joreño uai cuemo illamona, omoi comeciaina ocuiñotaiacadicue. ¹² Jesucristona omoi inuamona, naimiena cue inuamona, coninina cai comeciaina ocuiñotaiticai.

¹³ Cue amatiai, diga icaiño omoi dine jaiacadicue. Iena omoi uiñuana jitaicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaie nairaiái jai inotimaci. Omoi dine Jesucristo rafuena lluaiacadicue, iena omoimona dajerie inollena. ¹⁴ Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaiñedinomo iena jiai lloiacadicue. Abina uiñotinomo iena lloiacadicue. Abina uiñoñedinomo iena jiai lloiacadicue. ¹⁵ Ie jira omoimo Jesucristo rafuena eo lloiacadicue.

Jesucristo rafue siño

¹⁶ Jesucristo rafueri iobidicue. Naie rafuedi siño. Jusiñamuidi naga iena inotinona naimaci jeacinomona jillotate. Judúaidino nano iena cacadimaci. Ie mei judúaiñedinono iena jai cacadimaci. ¹⁷ Naie rafuemonona Jusiñamui caina feiñuana uiñoticaí. Jusiñamui caina marebicaitajana uiñoticaí. Naimiena cai inuamona iena uiñoticaí. Jusiñamui facaina lloraima micori jaie cuega: “Jusiñamuina inuamona marebicaidimedi Jusiñamui dibeimo ico jaca iite” cuega.

Comini jeacinona finoiadedi, dani naimaci muidona

¹⁸ Nana Jusiñamuina jitañedinodi naimie duere finollifue anamo jai itimaci. Iena uiñoticaí. Jusiñamui caina iena uiñotade. Maraiñede rafue naimaci finuanona, Jusiñamui ie uanaicinona jamaidimaci. ¹⁹ Jusiñamui naimacina naimiena uiñotaja muidona, imaci comeciaimona Jusiñamui illana uiñotimaci. ²⁰ Enirue finua facaisemona naimie finoca ramona naimie illana uiñotimaci. Naimiena cionidimaci; iadedi naimie finoca ramona naimiena uiñotimaci. “Naimiena uiñotimaci” omoi raia, naimiedi bu. Naimie uai jaca siñonana uiñotimaci. Ie jira: “Jusiñamuina uiñoñedicaí” rainidimaci.

²¹ Jusiñamui uiñotimaci; iadedi naimie uaina iñoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciai jai tainomo ite isoide. Jai marebificaiñedimaci. ²² “Abina uiñoticaí” raitimaci; iadedi abina uiñoñedimaci. Jamai ebe isoidimaci. ²³ Jusiñamui jaca ite. Naimie uai siño. Naimiena sedaacaiñedimaci; iadedi jiaie rana sedaacadimaci. Fiodairuide iimana eruaiide jiraraina finodimaci. Ofomana eruaiide jiraraina finodimaci. Ocainana eruaiide jiraraina finodimaci. Jaiona eruaiide jiraraina finodimaci. Naie isoide jiraraina sedauidimaci.

²⁴ Ie jira Jusiñamui naimacina fainonocaide, naimaci jitailla jearede rafuena imaci finollena. Ie mei conini diga eo meirede rafuena finouidimaci. ²⁵ Jusiñamui ie uanaicinona jitañedimaci. Uanañedicinodo jaidimaci. Jusiñamui finoca rari iobidimaci; iadedi naie rana finodimieri iobiñedimaci. Ero, dani Jusiñamuimo iobillacinona jaca cai fecacabillasa. Uanaicinona lloticue.

²⁶ Iese naimaci illa jira, naimaci jitailla meirede rafuena finollena, Jusiñamui naimacina fainonocaide. Coniñona aifuedotimaci. ²⁷ Naimaci jitailla jira, conimana aifuedotimaci. Naimaci marañede finoca rafuemonu duere sefuillemona ibana feiñoitimaci.

²⁸ Jusiñamuina naimaci uiñoiacaiñena jira, marañede rafuemo naimaci comeciaina facallena, Jusiñamui naimacina fainonocaide. Naimaci finorainiga rafuiaina finocana jaidimaci. ²⁹ Naga isoide marañedicinona finouidimaci. Naga isoide jearedicinona finouidimaci. Jiaie comini rana nicidoudimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñaillaredimaci. ³⁰ Jiaie comini joreñona ñaoidimaci. Jusiñamuina jaca gaiñedimaci. Cominina jeare ñaoidimaci. Abina iedoudimaci. Abina biriuidimaci. Diga jearede rafuemo comeciaina facauidimaci. Naimaci moo uaina inorainidimaci. Naimaci ei uaina inorainidimaci. ³¹ Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiai dueruirainidimaci. Iese jaisoidimaci. Iese nia jaicabidimaci. ³² Jusiñamuidi jai lote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” lote. Jusiñamui lluaña uiñotimaci; iadedi naie rafuena finocana jaidimaci. Iena jiaie comini fnoiadedi, iobillanona, “Macai mare iese imaci finua” raitimaci.

2

Jusiñamuidi marañede rafuena finodinona duere finoite

¹ Ero, omoi judúuaimona damie comecina nibai facade: “Bie isoide marañede rafuena fñoñedicue. Iena finuamona, jiaie comini Jusiñamuimona duere sefuitimaci. Cue duere sefuiñeiticue” raillamo naimie comecina facade; iadedi naie isoide marañede rafuena naimie finua jira, Jusiñamui naimiena jiai duere finoite. ² Jusiñamuidi uanaicinona uiñuamona, marañede rafuena finodimiena duere finoite. Iena uiñoticaí. ³ “Jusiñamui duere finollicino anamona jilloñeitimaci” comecina facadio. Naimacimo o comecina o facaja isoi, naimaci isoi o finua jira, Jusiñamui ona jiai duere finoite. ⁴ Ona naimie duenaillamona, ona naimie duere finoacaiñellemona, o comecimo iticino marecinona meiduana naimie jitaide. Naimie dibeimo o illana naimie jitaide. Naiena jamaiñeno. ⁵ O comeci jaiarena jira, o comeci Jusiñamui dibeimo meidoiacaiñedio. Ie jira ico eo duere sefuitio. Ie riicallifuemona Jusiñamuidi nana naimiena iñoñedinona duere finoite. Iena Jusiñamui finoia, Jusiñamuimona mare. ⁶ Nagamiiai imaci finua ille dinori Jusiñamui naimacina duere finoite. ⁷ “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemonu iobillacino naimaci jitaia, naimie illanomo naimaci jaca iacania, iese Jusiñamui lloite. ⁸ Marañede rafuedo jaidino Jusiñamui duere finollicino anamo iitimaci. Dani imaci abina isiruitimaci. Uanaicinona iñoñedimaci. ⁹ Jusiñamui naga jeacinona finodimiena eo duere finoite. Judúuai comini ua duere finoite. Judúuaiñedino cominina jiai duere finoite; ¹⁰ iadedi Jusiñamuidi naga

mare rafuedo jaidimiēna ebire itataite. Iobitaite. Uri itataite. Judúuaimo iese ua finoite. Judúuaiñedinomo iese jiai finoite, ¹¹ naga nairaina daje isoi naimie finua jira.

¹² Judúuaiñedinodi Moisés micori llogacino anamo iñedimaci; iadedi jeacinona naimaci finua jira, Jusiñamui naimacina duere finoite. Judúuai Moisés micori llogacino anamo itimaci; iadedi iena naimaci iñoñena jira, jiai jaca daje isoi duere sefuitimaci. ¹³ Moisés micori llogacinona cacajamona, Jusiñamuimona jaca buna marebicaiñede; iadedi iena iñuamona marebicaide. ¹⁴ Judúuaiñedinodi Moisés micori llogacino anamo iñedimaci; iadedi naimaci comeciai facajamona, marecinona finuana uiñotimaci. Marecinodo jaillana jiai uiñotimaci. ¹⁵ Moisés micori llogacino anamo naimaci illa isoi, naimaci comeciaimona marecinona naimaci finoiadedi, iena uiñotimaci. Ie jira maraiñedinona naimaci finoiadedi, iena jiai uiñotimaci. ¹⁶ Biena llofuecabiticue. Ico Jusiñamui llua jira, Jesucristodi cominimo imaci comeciaimo iticinona juez isoi lloite. Maraiñedinona finouidinomo duere finollicinona lloite. Marecinona finouidinomo duere finollicinona lloñeite.

Moisés micori llogacinodo judúuai comini raise jaiñedimaci

¹⁷ Abina ieduaamona, omoimona damierie raitomoi: “Judúuai imacidicai. Moisés micori llogacino anamo cai illa jira, duere finollicinomona jilloiticaí. Jusiñamui cai diga ite” raitomoi. Iena omoi raillamona, abina iedotomoi. ¹⁸ Naimie jitailla rafuena uiñotomoi. Moisés micori llogacinona omoi uiñuamona, marecinona finuana uiñotomoi. ¹⁹ Jusiñamuina uiñoñedinona llofueiacadomoi. Naimiēna naimaci uiñoñena jira, jitiredinomo itimaci isoidimaci. Uanaicinona naimacimo omoi llua-mona, naimaci comeciaina lligaiñoiacadomoi. Naimacina uanaicinona uiñotaiacadomoi. ²⁰ Jusiñamuina raise uiñoñedinona llofueiacadomoi. Naimacina abina uiñotaiacadomoi. Naimie rafuena nia raise uiñoñedinona llofueiacadomoi. Moisés micori llogacinomo nana uiñuacino illa jira, naiemo uanaicino illa jira, iese iacadomoi. ²¹ Jiaie cominina llofueiacadomoi; iadedi ¿niese omoi comeciaimo fueoiacaiñedomoi? “Rana fiñeno” llotomoi; iadedi fiidomoi. ²² Omoi aiñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiidomoi. ²³ Moisés micori llogacinori abina iedotomoi; iadedi iena omoi iñoñena jira, Jusiñamuina jeare finodomoi. ²⁴ Iena Isaías micori jaie cuete: “Omoi muidona judúuaiñedinodi Jusiñamuina jeare ñaitimaci” cuete.

²⁵ Jusiñamui díbeimo jai omoi illana jiaie comini uiñollena, omoi abina detatatomoi. Moisés micori llogacinona omoi iñoiadedi, omoi abina detatajadi mare; iadedi naicinona omoi iñoñenia, abina detatañedino isoi jai itomoi. Jusiñamui díbeimo iñedomoi. ²⁶ Moisés micori llogacinona judúuaiñedino iñoiadedi, naimaci abina detatañenia, Jusiñamuimona naimie díbeimo ite judúuai isoidimaci; iadedi abina detatañedimaci. ²⁷ Moisés micori llogacinuaina uiñotomoi. Omoi abiaina detatatomoi; iadedi Moisés micori llogacinona judúuaiñedinodi iñua jira, Moisés micori llogacinuai omoi iñoñena jira, Jusiñamuimona omoi baifemo uaidimaci. ²⁸ Omoi jeiciamona Jusiñamui ua cominiñedomoi. Omoi abiaina detatajamona, Jusiñamui ua cominiñedomoi; ²⁹ iadedi omoi comeciai marena illamona, Jusiñamui ua cominidomoi. Abi detataja jira, Jusiñamui cominiñedomoi; iadedi omoi comeciai marena illa jira, Jusiñamui cominidomoi. Raise naimiēna iñotinodi cominimona iobillacinona feiñuana jitaiñedimaci; iadedi Jusiñamuimona iobillacinona jitaídímaci.

3

¹ Bie cartana omoi feiñuanona, iena facallemona, damierie comecina facaite: “Judúuaidicai; ia naiemona, ¿niese jiaie comini baifemo faiticai? Cai abiaina detataticai; ia naiemona jaca buena oñedicai”. ² Ie jira omoimo lloiacadicue: “Judúuaina cai illana eo mare”. Jusiñamuidi dani caimo ie rafuena llote. Jiaie cominimo lloñede. ³ Cai cominimona dajerie Jusiñamui rafuena iñoñedimaci; iadedi Jusiñamuidi ie lloga rafuena

jaca finode. ⁴ Comini tainona llotimaci; iadedi Jusiñamuidi uanaicinona jaca llote. David micori iena jaie llote:

O lloga uaimona uanaicinona o llouillana uiñoticaí.

O finoca rafuena jaie comini uaitaia, o dinena jaca anafenodio.

Iena uiñoticaí.

⁵ Dane damerie comecina facaite: “Jusiñamuidi mareuidimie. Cai baifemo uaide. Cai marañedicinona cai finuamona caina Jusiñamui jitaia, jaie cominidi Jusiñamui jaca mareuillana uiñoitimaci. Cai illa muidona Jusiñamuina iese uiñotimaci. Ie muidona naimiedi cai jeacino facaina caina duere finoñena, jaie cominina naimiena cai uiñotaja jira”. Omoimona iese dajerie comeciaina facadimaci; ⁶ iadedi iese iñede. Cai jeacino facaina caina duere finoñeniadedi, Jusiñamuidi jaie cominina jiai duere finonite.

⁷ Taino cue lloia, iena naimie oni dotaia, naimiedi mare rafuena finuana cominidi uiñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. ⁸ Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uiñollena, marañedicinona finocana cai jailla’”. Iese cue lloñena jira, Jusiñamui naimacina duere finoia, cuemona mare.

Jeacinona nana cai finodicaí

⁹ Judúuaídicaí; iadedi jeacinona nana comini finua jira, jaie nairai baifemo faiñedicaí. Judúuaídicaí; iadedi jeacinona finodicaí. Judúuaíñedinodi jeacinona jiai finodimaci.

¹⁰ Jusiñamui facaina lloraini micoriai iena jaie cuete:

Marebicaidino jaca iñede. Nana comini marañedimaci.

¹¹ Jaca buna Jusiñamuina raise uiñoñedimaci. Naimiena raise uiñoiacaiñedimaci.

¹² Mare rafuedo nana jaiñedimaci. Marañedicinona finoodimaci.

Jaca buna marecinona finoñedimaci.

¹³ Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

¹⁴ Naimaci fuiái eo borede.

¹⁵ Icirillamona jaie cominina raire meinetimaci.

¹⁶ Níne naimaci jaia, diga marañede rafuena comuitatimaci.

¹⁷ Uri illana uiñoñedimaci.

¹⁸ Jusiñamuina jaciruiñedimaci

jaie iese cuete. ¹⁹ Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uiñuamona, dani abi imaci riidolle uai iñede. Nana comini Jusiñamui duere finollicino anamo itimaci. Iena uiñoticaí. ²⁰ Moisés micori lloga uaina iñnuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai finuana uiñoticaí.

Jesucristona cai iñnuamona jillobidicaí

²¹ Jusiñamuidi birui caina marebitatajana jai uiñotade. Moisés micori lloga rafuedo iena birui uiñoñedicaí; iadedi Moisés micori iena jaie llote. Jusiñamui facaina lloraini micoriai iena jiai llotimaci. ²² Jesucristona cai iñnuamona, Jusiñamuidi caina marebicaitate. Nana Jesucristona iñnotinona marebicaitate. Nie isoide cominina cai ia, caina marebicaitallena, caina daje isoi feiñoite. ²³ Nana caidi jeacinona finodicaí. Jusiñamui caina jitailla isoi, marena iñedicaí. ²⁴ Caina naimie duenaillamona, naimie jitailla jira, Cristo Jesúsna cai iñnuamona, caina marebicaitate. ²⁵ Jesucristo nia biñena facaise ite cominimo jeacino facaina Jusiñamuidi ibana oñede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai iñoia, caina duere finoñeite. Jusiñamuina mareuidimiena uiñoticaí. ²⁶ Naimiena iese oretajamona, Jesúsna iñnotimiena Jusiñamuidi marebicaitaja jira, Jusiñamuina mareuidimiena uiñoticaí.

²⁷ Cai jeacinomona marena cai illena, buena finoñedicaí. Ie jira cai finuamona abi iedoñedicaí. Buena finoñedicaí; iadedi Jesucristona cai iñnuamona, jillobidicaí. Ie

jira cai finoca rafueri abina iedoñedicai. ²⁸ Moisés micori lloga uaina cai inuamona, marebicaiñedicai; iadedi Jesucristona cai inuamona marebicaidicai.

²⁹ Jusiñamuidi dani judfui imaci Mooñede; iadedi naimiedi nana comini imaci Moo. ³⁰ Cai Moodi jaca damiena jira, naimiena naimaci inua jira, judfuiaina marebicaitate. Naimiena naimaci inua jira, judfuiñedinona jiai marebicaitate. ³¹ Cai inuamona cai marebicaila jira, Jusiñamui facaina lloraini micoriai jai lloga uaina caitañedicai; iadedi iena ua inocana jaidicai.

4

Abraham micorimona fueotica

¹ Abraham micori rafuena ja ñaiacadicue. Naimie marebicaillafuena omoimo lloiacadicue. ² Ie finoca rafuemona naimie micori marebicaidena, naimie micori abina iedote; iadedi ie finoca rafuemona naimie micori marebicaiñede. Ie jira Jusiñamuimona naimie micori abina iedoiacaiñede. ³ Iena Moisés micori jai cueba: “Jusiñamuina Abraham micori inua jira, Jusiñamuidi naimie micorina jeacinona jaca finoñedimiena isoitate. Naimie micorina marebicaitate” cueba. ⁴ Maijillena buna damie ocuiadedi, ibajana jamai fecañeite; iadedi maijia facaina fecaite. ⁵ Ero, ie maijiamona jaca bu jeacinona jaca finoñedimiena isoicaiñede. Jusiñamuina naimaci inua jira, Jusiñamuidi marañedinona marebicaitate. ⁶ Bie rafuena David micori jiai jai cueba:

Ie maijiamona bu marebicaiñena jira, Jusiñamui marebicaitagamiedi iocire iite.

⁷ Naimaci marañedinona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

⁸ Naie jeacinomo Jusiñamuidi comecina dane facañeite.

Naimiedi jai feitaite.

Ie jira iocire iitimaci.

⁹ Dani abina detatatino iocire illena lloñede; ia abina detatañedinomo iena jiai llote. Jusiñamuina Abraham micori inua jira, Jusiñamui naimiena marebicaitate.

¹⁰ Naimie micori abina nia detatañenia, naimie micori marebicaide. ¹¹ Naimie micori marebicaila mei, Jusiñamui dinena Abraham micorimo abi detatajana llote. Abraham micori ie abina detatajamona, Jusiñamuina naimie micori inuana uiñotica. Ie abina detatajamona, judfo imiena jai jai; iadedi Jusiñamuina inuamona, naimie micori marebicaide. Ie jira Abraham micoridi nana Jusiñamuina inotino moo. Nana comini abiaina detatañedimaci; iadedi naimaci inua jira, Jusiñamui naimacina marebicaitate.

¹² Cai comini abiaina detatatimaci; iadedi cai moo Abraham micori isoi naimaci inua jira, Abraham micori isoi marebicaidimaci. Ie jira Abraham micori nana naimaci moo.

Abraham micori inuamona, Jusiñamui lloga uaidi suide

¹³ Abraham micorimo Jusiñamuidi: “Nana enirue omo iiticue” llote. “O uruiamo iena jiai iiticue” llote. Moisés micori llogacinona Abraham micori inua jira, iese Jusiñamui lloñede; iadedi Jusiñamui lloga uaina Abraham micori inua jira, iese Jusiñamui llote. Abraham micori inua jira, Jusiñamuidi naimiena marebicaitate. ¹⁴ Moisés micori lloga uaina inotinomo: “Nana eniruena omoimo iiticue” Jusiñamuidi llotena, Jusiñamuina inotino tainona inotimaci. Jusiñamui lloga uai jiai jai saide; iadedi iese iñede. Dani naimiena inotinomo: “Nana eniruena omoimo iiticue” llote. ¹⁵ Moisés micori lloga uaina naimaci raise inoñenia, Moisés micori lloga uaido jaidino Jusiñamui ricailifue anamo itimaci; iadedi Moisés micori lloga uai iñedena, Jusiñamuimona buna duere sefuiñeite.

¹⁶ “Eniruena omoimo iiticue” naimiena inotinomo Jusiñamuidi llote. Duenaillamona llote. Nana Abraham uruai micoriaimo iena llote. Dani Moisés micori lloga uaido jaidinomo lloñede; iadedi Abraham isoi inotinomo jiai llote. Abraham micori isoi cai jai jira, naimiedi cai moo. ¹⁷ Jusiñamui iena jai llote: “Ona diga nairai imaci moona jai itataiticue” llote. Jusiñamui fiodaitinona jilloitarede. Nia iñede rana ie uaido jiai comuitate. Ie jira Jusiñamui Abraham micorimo llua isoi, suide. Jai fiodaitino illa isoi

Abraham micorì abì illa jira, Jusiñamui naimie abina mairitate. Ie ai oiniñomo urue comuillena llote.

¹⁸ Jusiñamui Abraham micorìmo jiaì llote: “Ailluena uruiaì omo iite. Diga nairai omona jebuite” llote. Abraham micorìdi naie ìnorainiga rafuena ìnote. ¹⁹ Jaca ìnote; iadedì cien años naimie micorìmo illamona, naimie jai eeiroma. Naimie micorì aidi, Sara micorìdi, oiniñona jira, naiñaiño uruedì comuìñede. ²⁰ Abraham micorìdi Jusiñamui lluaña ìnote. Ìnocana jaillano, iobillacinona Jusiñamuimo fecade. ²¹ Abraham micorìdi Jusiñamui lloga uaina finuana eo ìnote. ²² Ie jira Jusiñamui naimiena marebicaitate.

²³ Naie rafue jaie cuega; iadedì dama Abraham micorìmo duiñede; ²⁴⁻²⁵ iadedì caimo jiaì duide. Jusiñamuina ìnotinona marebicaitate. Cai Nama Jesús fiodaillamona, Jusiñamuidì naimiena jillotate. Cai jeacino facaina fiodaite. Caina marebicaitallena, naimiena jai jillotate.

5

Jai cai marebicaidìcai

¹ Jusiñamuina cai ìnuamona cai marebicailla jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. ² Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuridìcai; ³ iadedì duere cai sefuiadedì, jiaì iobidìcai. Duere sefuillamona, cai comeciaì ocuiñocana cai jaillana uiñotìcai. ⁴ Cai comeciaì ocuiñuamona facacifidìcai. Facacifillamona, Jusiñamuimo ocuridìcai. ⁵ Jusiñamui caina isiruilla jira, tainomo ocuriñeitìcai. Ie Joreña caimo fecade. Ie Joreño cai comeciaimo illa jira, ie Joreño Jusiñamuidì caina naimie caina isiruillana uiñotade.

⁶ Cai jeacinomona danì jillonidìcaimo, Cristo cairi fiodaite. Maraiñedicai; iadedì naie facaiseconi cairi fiodaite. ⁷ Maraiñedimie facaina caimona jaca buna fiodaicaiñede. Caimona nìbai damie maremie facaina fiodaite; iadedì nana cominì iese fiodaicaiñedimaci. Maraiñedimie facaina jaca buna fiodaicaiñede; ⁸ iadedì nia maraiñedicaimo, Jusiñamui caina isiruillamona, Cristo cairi fiodaite. ⁹ Cristo cairi fiodaillamona, jai marebicaidìcai. Ie muidona Jusiñamui caina duere finuacinomona Cristodì caina jillotaite. ¹⁰ Cai dinena Jusiñamuina cai enoilla facaiseconi naimie Jito cairi fiodailla muidona, ie Jito jillua muidona, Jusiñamui caina jai nabaide. Naimie caina nabaila jira, cai ìco jilloillena raise uiñotìcai. ¹¹ Cai Nama Jesucristo muidona, Jusiñamuirì iobidìcai. Cristo muidona Jusiñamui diga uri iticai.

Adán micorì finoca rafue

¹² Bie rafue jai suide. Adán micorì jeacinona finuamona, nana caimo jeacinodì jai comuide. Jeacino caimo illa muidona, cai jeacino ite diga nana fiodaicana jaidìcai. ¹³ Moisés micorì llogacino nia iñenia, jeacinona finodimaci; iadedì Moisés micorì llogacino nia iñenia, Jusiñamuidì jeacino facaina ìbana oñede. ¹⁴ Moisés micorì llogacino nia iñenia, Adán micorì facaisemona Moisés micorì facaisemo naimaci jeacino ite diga nana cominì fiodaicana jaidìmaci. Adán micorì isoi jeacinona finoñedimaci; iadedì fiodaicana jaidìmaci. Adán micorìdi Cristo isoiñede. Adán micorì finoca rafuemona jeacino comuide. Cristo finoca rafuemona Jusiñamui cai jeacinona oni dotade.

¹⁵ Adán micorì finoca rafuedì Jusiñamui finoca rafue isoiñede. Adán finoca rafuemona cai jeacino ite diga nana cai fiodaicana jaidìcai; iadedì Jusiñamui finoca rafue Adán micorì finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena. ¹⁶ Dama Adán micorì jeacinona finuamona, Jusiñamuidì nana caina duere finollicino anamo itatate; iadedì Jesucristo fiodaillamona, Jusiñamui jitailla jira, caina marebicaitate. Ailluena jeacinona finodìcai; iadedì marebicaidìcai. ¹⁷ Dama Adán micorì jeacinona finuamona, cai jeacino ite diga nana cai fiodaicana jaidìcai. Jusiñamui caina eo duenaillamona, Jusiñamui caina marebicaillamona, dama Jesucristo muidona, Jusiñamui diga jaca iiticai.

¹⁸ Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemonu Jusiñamui diga naimaci jaca illena, nana comini marebicairidimaci. ¹⁹ Adán micori Jusiñamuina inoñenamona, nana comini jeacinona finodimaci. Jesucristo Jusiñamuina inuamona, ailluena comini marebicaitimaci.

²⁰ Jusiñamui Moisés micorimo rafuena llote. Iena comini inoñenamona, diga jeacinona naimaci finuana uiñotimaci. Jeacinona finocana jaidimaci; iadedi Jusiñamuidi naimacina eo duenaite. ²¹ Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenailacino anamo birui iticai. Ie jira cai marebicaillamona, cai Nama Jesucristo muidona, Jusiñamui diga jaca iiticai.

6

Jesucristomo cai duillamona, jeacino anamo jai inedicai

¹ Jeacino anamo jai inedicai; iadedi omoimona damierie comecina facaite: “Naga icaño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uiñollena, jeacino eo finocana jaiticai. Iemona cai jeacinona oni dotajamona, naimie caina duenailana eo raise uiñoitica”. ² Iese comecina facaño. Jeacino anamo jai cai inena jira, jeacinona finocana cai jaiñena. ³ Biena uiñotomoi. Cristo Jesús dibeimo cai illamona, nana caidi bautizagacai. Cristo fiodailla jira, cai comeciaino ite jearedicino anamo jai inedicai. ⁴ Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie dibeimo cai illamona, cai jeacino anamona jillodica. Cai comeciaino jiaie rafue birui illa jira, jiaie rafuedo jai jaidicai.

⁵ Cristo fiodaite; iadedi naiemona jillode. Naimie dibeimo cai illanona, cai comeciaino ite jearedicino anamona cai jillua jira, Cristo ie mare rafue anamo birui iticai. ⁶ Cristo fiodailla jira, cai comeciaino ite jearedicino anamo jai inedicai. Caimo jai jainaiañena jira, jeacino finocana cai jaiñena. ⁷ Jeacino anamo jai cai inena jira, jeacinona finocana cai jaiñena. ⁸ Cristo fiodaite; iadedi jillode. Naimie fiodailla jira, cai jearedicino anamo jai inedicai. Naimie jillua jira, jiaie rafuedo birui jaidicai. ⁹ Fiodaillamona Cristo jillua jira, naimiedi dane fiodañeite. Naimie fiodaitemo, cai jeacino facaina naimiedi jai fiodaite. Jai dane fiodañeite. ¹⁰ Jeacino facaina jeacinona oni dotallena, naimie dacaiño fiodaite; iadedi ie Moona jaca iobitajanona, naimie ie Moo dibeimo jaca iite. ¹¹ Ie jira jeacino anamo inenanomo omoi comeciaina faca. Cristo Jesús dibeimo jai omoi illanona, Jusiñamui jitailla rafuena finollemo omoi comeciaina faca.

¹² Jeacinona finocana jaiñeno. Omoi comeciaino jeacinona finoacania, iena inoñeno. ¹³ Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina ino. Jeacino anamo jaie omoi illa jira, naimiemo omoi nia duiñena jira, Jusiñamuimona fiodaitino isoidomoi; iadedi jeacino anamo birui omoi inena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaie naimiemo duiñedomoi; ia birui naimiemo jai duidomoi. ¹⁴ Moisés llogacinuai anamo omoi jai inena jira, jeacino anamo jai inedomoi. Jeacinona finocana omoi jaiñellena, Moisés micori llogacinodo jaiñedomoi; iadedi jeacino omoi finoñellena, omoina Jusiñamui duenaillamona, naimie omoina birui canocabide.

Patrón anamo itinomona cai fueolle

¹⁵ Moisés micori llogacino anamo jai inedicai; iadedi omoimona damierie comecina facade: “Moisés micori llogacino anamo cai inenamona, jeacino cai finoia, Jusiñamui caina duere finoñeite”. Iese comecina facaño. Jeacinona finocana cai jaiñena. ¹⁶ Biena uiñotica. Patrón anamo bu ia, ie patrón comeci jitailla rana finode. Ie ocuica rana inote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico ineitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi. ¹⁷ Jeacino anamo jaie itomoi. Iemei omoimo jiaie comini Jesucristo rafuena

jai llotimaci. Iena cacajanona, iena raise ñnotomoi. Ie jira Jusiñamuimo iobillacinona fecadicue. ¹⁸ Jeacino anamona jai jillobillamona, marecinona finocana jai jaidomoi.

¹⁹ Cue llwana omoi raise cacaillena, bie isoide rafuena lloticue. Omoi comeciai railla jira, jeacinona navui finodomoi. Maraiñedicinona finocana navui jaidomoi. Cristo ðibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciai Jusiñamui jitailla isoi marena iitomoi.

²⁰ Jeacino anamo navui omoi ia, Jusiñamui jitailla isoi, marecinona finoñedomoi. ²¹ Jeacinona navui omoi finuamona mare rafuena oñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico iñeitimaci. ²² Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie ðiga iitomoi. ²³ Jeacinona finocana omoi jaia, omoi jeacino ite ðiga fiodaikomoi. Jusiñamui illanomo ico iñeitomoi; iadedi cai Nama Jesucristona omoi ñnuamona, Jusiñamuidi omoina jaca itataite. Naimie illanomo ico iitomoi.

7

Inirede riñomona cai fueolle

¹ Cue amatiai, Moisés micori llogacinuaina uiñotomoi; iadedi iena nia raise cacaiñedomoi. Ie fiodailla mei, jaca buna Moisés micori llogacinuai anamo iñede. Ie fiodailla mei, jai iñena jira, nainomo ðuiñede. ² Ie isoide. Nana naimie ille ðinori, inirede riño ie inimo duide. Iese Moisés micori jai lote. Ie ini fiodailla mei, ie inimo jai ðuiñede. Naimie anamo naiñaiño jai iñena jira, jiaimiena naiñaiño oia, ie inina illena, Jusiñamuimona mare. ³ Ie ini nia fiodañenia, jiaimie ðiga naiñaiño ia, ie ini abimo jeacinona jai finode, Moisés micori lloga uai naiñaiño ñnoñena jira. Ie ini fiodailla mei, naimie anamo naiñaiño jai iñena jira, jiaimiena ie inino naiñaiño oia, jeacinona jai finoñede.

⁴ Ie isoide. Cristo fiodailla jira, Moisés micori llogacinuai anamo jai iñedicai. Iemo jai ðuiñedicai. Ie jira Cristomo jai ðuidicai. Jusiñamui jitailla rafuena finocana cai jaillena, fiodaillamona Cristo jai jillode. ⁵ Jusiñamuina nia cai ñnoñenia, cai jitailla rafuena finocana jaidicai. Moisés micori llogacinona uiñotica; ia cai maraiñede jitailla rafuena finocana jaidicai. Cai jeacino ite ðiga fiodaicana jaidicai; ⁶ ia Moisés micori llogacino jai saide. Caimo jai ðuiñede. Navui ie anamo iticai; iadedi birui ie anamo jai iñedicai. Jusiñamuina cai sedajamona, Jusiñamui Joreño rafuedo jai jaidicai. Moisés micori ciegafuiaido jai jaiñedicai.

Cue comecimo ite maraiñedicino

⁷ “Moisés micori llogacino maraiñede” lloñeiticai; iadedi naie llogacino iñedena, jeacinona uiñoñedicue. Jiaimie mo ite rana cue niciduana maraiñenana jai uiñoñedicue. Moisés micori jai lote: “Jiaimie mo ite rana nicidoñeno” lote. Ie jira naiemona niciduanana maraiñenana uiñoticue. ⁸ Naie llogacino muidona cue comeci jeacinona finoacade. Ie muidona rana nicidoticue. Naie llogacino iñedena, jeacino finuana uiñoiacaiñedicai. Naie llogacino iñedena, jeacino anamo iñedicai. ⁹ Moisés micori llogacinona nia cue uiñoñenia, caimare uri iticue. Naiena cue uiñuamona, jeacino cue finuana uiñoticue. Ico Jusiñamui ðiga cue iñenana uiñoticue. ¹⁰ Nano cue comecina facadicue: “Naiedo cue jaillamona, Jusiñamui ðiga ico jaca iiticue”. Iese cue comecina facadicue; iadedi naie llogacinona cue uiñuamona, Jusiñamui ðibeimo cuena jaca itatañede. ¹¹ Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui ðiga jaca cue illena oñedicue; iadedi ðuere cue sefuillicinona oticue. Naimie ðibeimo Moisés micori llogacino cuena itatañede; ia naimie ðibeimona cuena itatate.

¹² Iese ite; iadedi Moisés micori llogacinodi mare. Jusiñamuimona ite. ¹³ Naie llogacino mare. Naie rafue muidona fiodañeiticue; ia jeacino muidona fiodaiciticue. Jeacinona cue

finua jira, Jusiñamui illanomo ico jaca iñeiticue. Naie mare llogacinomona jeacino cue finuana eo maraiñenana uiñoticue.

¹⁴ Jusiñamui Joreño Moisés micorina naie llogacinona cuetatate. Ie jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana iticue. ¹⁵ Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidicue. ¹⁶ Cue maraiñede finoacaiñega rafuena cue finojade, Moisés micori llogacino marenana uiñoticue. ¹⁷ Cue comeci iena dama finoñede; iadedi cue comecimo ite jeacino cuena finotate. ¹⁸ Cue comecimo marecino iñede. Mare rafuena finoacadicue; iadedi iena finonidicue. ¹⁹ Cue mare finoacaga rafuena finoñedicue; iadedi cue maraiñede finoacaiñega rafuena finodicue. ²⁰ Cue finoacaiñega rafue cue finojade, cue comeci iena dama finoñede; iadedi cue comecimo ite jeacino cuena iena finotate. ²¹ Biese cuemo suicabide. Mare rafuena cue finoacaniadedi, jeacinona finocabidicue. ²² Cue comeci Jusiñamui lloga uaina gaide; ²³ iadedi cue comecimo maraiñede rafuena illana uiñoticue. Cue comecina namataacade. Cuen a jeacinona finotaiacade.

²⁴⁻²⁵ Eo dueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jaia, duere sefuiticue. Jusiñamui illanomo ico jaca iñeiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Ie jira Jusiñamuimo cue iobicabillasa.

8

Jusiñamui Joreño cai comeciaina namatacana cai jailla

¹ Cristo Jesúmo duidinodicai. Ie jira Jusiñamuidi caina duere finoñeite. ² Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeiticai. Duere sefuiticai; iadedi naiemona Jusiñamui Joreño caina jai jillotate. Jesucirstomo cai duillanona, caina jaca itataite. ³ Moisés micori llogacinona cai raise iñoñena jira, jeacinomona dani jillonidicai. Ie jira Jusiñamuidi ie Jitona orede, iimana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fiodaillena, naimiena orede. Naimie uaidi cai jeacinona anafefitate. Ie jira jeacino anamona jai caina jillotate. ⁴ Iese finode, cai marena illena, Moisés micori llogacino llua isoi. Ie jira cai comecimo ite maraiñede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

⁵ Cai comecimo ite maraiñede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai. ⁶ Maraiñede jitaillacinomo comeciaina facacabidino Jusiñamui diga ico jaca iñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci. ⁷ Jiaño Jusiñamuina enoidimaci. Jusiñamui lloga uaina jitañedimaci. Iena iñonidimaci. ⁸ Iese itino Jusiñamuina iobitanidimaci.

⁹ Iese iñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño iñenia, Cristomo nia duiñede. ¹⁰ Jeacinona omoi finua jira, fiodaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira. ¹¹ Cristo Jesús fiodaillamona, Jusiñamuidi naimiena jillotate. Omoimo ie Joreño illa jira, omoi fiodiaide, Jusiñamuidi ie Joreño uaido omoi abiaina jiai jillotaite.

¹² Cue amatiai, iese caimo suite. Ie jira cai comeciaino ite maraiñedicinodo cai jaiñelli. ¹³ Naicinodo cai jaia, Jusiñamui illanomo ico jaca iñeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iiticai.

¹⁴ Nana Jusiñamui Joreño namatadinodi Jusiñamui urui. ¹⁵ Jusiñamui Joreña feiñoñedomoi, naimiena omoi jaciruillena; iadedi Jusiñamui uruiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: "Cai

Moo" raillanona, Jusiñamuina uaidotomoi. Ie jira naimiena jai jaciruiñedomoi. ¹⁶ Cai começiaina Jusiñamui Joreño uiñotajamona, cai começiaimona Jusiñamui uruiaidicaina jai uiñoticaí. ¹⁷ Naimie uruiaidicaina jira, ie uruiaimo fecaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iiticaí.

¹⁸ Biena uiñoticue. Bene birui duere sefuidicaí; iadedi iemo cai começiaina cai facañena, monamo ico eo marena jaca cai illena jira. ¹⁹ Iese cai illemo nana Jusiñamui finoca radi iocire birui ocuridimaci. ²⁰ Nana eniruemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci, ²¹ naimaci rifaillamona ico naimaci jillua jira. Ie mei Jusiñamui uruiaidicaina isoi marena iitimaci. Dane fioidañeitimaci. ²² Biena uiñoticaí. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci. ²³ Dani naimaci duere sefuicana jaidimaci; iadedi jiai duere sefuidicaí. Jusiñamuidi ie Joreño caimo fecaja jira, ico cai marena illena uiñoticaí. Monamo Jusiñamui uruiaina ico cai illemo ocuridicaí. Cai fiodaia, fiodaillamona cai abiaína jillotaite. Jiaífo eruaita cai abiaimo meidollemo ocuridicaí. Ie mei cai abiaí dane fioidañeitimaci. ²⁴ Naiemo cai ocurillamona, cai jeacinomona navui jillobidicaí. Bumo ie jitaílle ra ia, iemo naimie ocuriñede. Ie feiñoñega ramo ocuride. Ie isoidemo ocuridicaí. ²⁵ Caimo suiñede rafuemo cai ocurilla jira, iemo fecuise ocuridicaí.

²⁶ Birui duere cai sefuia, ico marena cai illemo ocuridicaí. Jusiñamui Joreño caina jiai canode. Jusiñamuimo cai jiaíia, naimiemo cai jicanua rafuena cai raise uiñoñenia, ie Joreño cai facaina ñaite. Naimiedi cai jino botanide uaina Jusiñamuimo llote. ²⁷ Jusiñamui cai começiaina uiñote. Naimie jitaíllacinona ie Joreño jiaíia jira, iena uiñote. Jusiñamui cominidicaí. Ie Joreño cai facaina ñaiana cacade.

Jusiñamui caina isiruite

²⁸ Jusiñamuina isiruitinodicaí. Naimie jitaílla jira, naimie caina fetode. Jusiñamuidi caimo suide rafuena marena suicana jaitate. Iena uiñoticaí. ²⁹ Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena. ³⁰ Caina iese jaie itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iiticaí.

³¹ Iese caina itataja jira, Jusiñamuidi cai facaina illa jira, bu cai facaina iñellena, damamai iesedicaí. ³² Jusiñamuidi ie Jitona duere sefuillamona jillotañede; iadedi namie jitaílla jira, cai facaina ie Jitona orede, cairi fiodaíllena. Ie muidona naimie dibeimo marena cai ille rafuena caimo jiai iite. ³³ Jeacinona navui finodicaí; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina naimiemo llogidoñeite. ³⁴ Ie jira cai jeacino facaina jaca buna caina duere finotañeite. Cristo Jesús jaie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite. ³⁵ Cristo caina isiruite. Jaca buna Cristo caina isiruillacinona baíronide. Jiaíe comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaíe comini caina meineia, Cristo caina nia isiruite. ³⁶ Iena Jusiñamui facaina lloaíma micori jaie cueda: Jusiñamui muidona caina jaca meinetimaci, mercadomo toica llaudaíai fallena illa isoi cueda. ³⁷ Cristo caina isiruilla jira, caina naimie canuamona, naga bie isoide rafue caimo sua, cai começiaí ocuiñocana cai jaílla. ³⁸ Jusiñamui caina isiruite. Naimiemona jaca budí caina baíronide. Cai fiodaia, cai nia ia, Jusiñamui caina nia isiruite. Jusiñamui jaienisaídi, Taífedí, Janabadi Jusiñamui isiruillacinomona caina baíronidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo sua, Jusiñamui caina nia jaca isiruite. Jaca buna ie uaido Jusiñamui isiruillacinomona caina baíronide. ³⁹ Monamo ite radi Jusiñamui isiruillacinomona caina baíronide. Eniruemo ite radi Jusiñamui isiruillacinomona caina baíronide. Nana Jusiñamui finoca

radi Jusiñamui isiruillacinomona caina baironide. Cai Nama Cristo Jesúmo cai duilla jira, Jusiñamui caina isiruillana uiñoticaí.

9

Jusiñamuidi judíuai railla cominina fetode

¹⁻² Jiaie rafuena nia lloiticue. Cue comecidi eo sunaite. Cristomo cue duilla jira, tainona lloñedicue. Jusiñamui Joreño cue comecina uiñotajamona, iena uiñotícue. Cue cominiri sunaitícue. ³ Cue comini Cristo rafuena ñnoiacaiñedimaci. Ie muidona Jusiñamui riicaillífue anamo birui itimaci. Naiemona naimaci jilloillena, naimaci duere sefuillicino ifomo cue iticuedena, cuemona mare. Naimacidi cue amatiaí. ⁴ Israel railla cominidimaci. Jiaicidi judíuai railla cominidimaci. Jusiñamuidi naimacina fetode, ie uruiaina. Jusiñamui siño finoca rafuena ciodimaci. Iena naimaci ñnollena, Moisés micorimo Jusiñamuidi rafuena jiaí llote. Naimiena sedallena jiaí llote. Naimaci ñne naimaci jilloitaraimana oretallena jiaí llote. ⁵ Naimaci jaiagaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidícue.

⁶ Cai cominimo Jusiñamuidi ie uaina llote; iadedi nana cai comini iena ñnoñena jira: “Jusiñamui ie lloga uaina finoñede” raiñeiticai. Jusiñamuina naimaci raise ñnoñena muidona, nana Israel micorimona comuide cominidi Jusiñamuimo duiñedimaci. ⁷ Nana Abraham micorimona comuidinodi naimiemo duiñedimaci. Jusiñamui iena jaie llote: “Dama Isaacmona comuidinodi ua Abraham uruai”. ⁸ Naie llumona nana Abraham micorimona comuidinona ie uruaiñenana uiñoticaí. Jusiñamui lloga uaina ñnotinodi naimie ua uruai. ⁹ Jusiñamuidi Abraham micorimo jaie llote: “Jiaie año bie facaiseconi o ñne abido biitícue. Naie facaiseconi o ai Saradi jitona jocoite” llote. Ie mei iese suide.

¹⁰ Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaímaiaí micorina jocode. Nano doforamiedi Esaú micori. Jiaimiedi Jacob micori. ¹¹⁻¹³ Naiñaiño micori nia jocoñena, Jusiñamuidi naiñaiño micorimo llote: “Nano doforamie ie ama anamo jaca iite” llote. Jusiñamui facaina lloraima micori Jusiñamui llumona jiaí cuete: “Jusiñamui llote: ‘Jacobna eo isiruitícue; iadedi Esaúna janore isiruitícue’ llote”. Naie iaímaiaí micori nia jeciñena, iaímaiaí micori marecinona nia finoñena, iaímaiaí micori maraiñedicinona nia finoñena, Jusiñamuidi iaímaiaí micorina iese llote. Ie finoca rafuemona Jacob micorina fetode; iadedi Jusiñamui jitailla jira, Jacob micorina fetode.

¹⁴ “Jusiñamuidi dama Jacob micorina fetuana maraiñede” raiñeiticai. Jusiñamuidi maraiñedicinona jaca finoñede. ¹⁵ Jusiñamui bie isoide rafuena Moisés micorimo llote: “Cue ñnena cue jitaillanona duenaitícue; ia cue ñnena cue jitañenanona duenaiñeiticue” llote. ¹⁶ Comini naimiena jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite. ¹⁷ Jusiñamuidi bie isoide rafuena Faraón micorimo llote. Moisés micori illa facaise Egipto railla enirue illaimadi Faraón micori. Naimiemo llote: “Ona illaimana jai itataticue. O uicomo siño rafuena finodicue, cue uai siñonana jiaie comini uiñollena, nana cominido cue mameci sorillena”.

¹⁸ Jusiñamui iese ite. Naimie ñnena ie jitaillanona duenaite. Naimie jitailla jira, jiaie cominina naimiena ñnotañede.

¹⁹ Nibai comeciaina facadomoi: “Cominina iese Jusiñamui itataia, ¿bue ñllena naimacina duere finoacade?” ²⁰⁻²¹ Iese comeciaina facañeno. ¿Niese nainona naimiemo ducañtomoi? Ero, jiñoramona nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. ²² Ie isoide. Nana comini dajena eruaiñedicaí. Ie jitailla isoi, jiaíforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiaí uiñotaacade; iadedi naimacina nia duere finoñede. ²³ Cominina Jusiñamuidi jiaí duenaila jira, naimacina ie siño uai ebirenana uiñotaacade. Naimie illanomo nanomona naimaci marena itimaci. Iese naimie

naimacina itatate. ²⁴ Jusiñamui caina iese itatate. Da judúuaina iese itatañede; ie iadedi judúuaiñedinona jiai iese itatate. ²⁵ Jusiñamui iena jaie lluaana Oseas micori jaie cuete: Cue cominiñedinodi cue cominina jaitimaci. Isiruiñeganona isiruiticue.

²⁶ Dane jiai cuete:

Navui cue cominiñedomoi; iadedi jiaie comini omoína ico lloitimaci: “Naimacidi jaca cajede cai Jusiñamui ie uruiaidimaci” lloitimaci

cuete. ²⁷ Isaías micori railla lloraíma jaie cuete: “Monailai fuemo conillie eo ite. Ie isoi Israel micori uruiái eo jebuitimaci; iadedi Jusiñamuidi nana naimacina jillobitañeite. Dajeriena jillotajanona, ²⁸ jiaínomo ie lloga uaina raire finoite. Naimacina duere finoite” cuete. ²⁹ Isaías micori jiai cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiai jaie cuenode.

Naimaci micoriai isoi iñedicaí, nana cai cominina naimiedi duere finoñena jira.

Judúuaidi Cristo rafuena jitañedimaci

³⁰ Biemo comeciaina faca. Judúuaiñedinodi Jusiñamui jitailla isoi, marena illana navui uiñoiacaiñedimaci; iadedi iena jai uiñotimaci. Jesucristona naimaci ñnuamona, marena illana jai uiñotimaci. ³¹ Jusiñamui jitailla isoi marena naimaci illena, judúuaidi Moisés micori llogacinodo jaidimaci; iadedi Moisés micori llogacinona naimaci raise ññoñena jira, marena illana jaca uiñoñedimaci. ³² Naimaci finoca rafuemonona marena iacadimaci. Marena naimaci illena, Jesucristona ññoiacaiñedimaci. Naimie muidona marena iñeitimaci. ³³ Isaías micori iena jaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiena naimaci ññoñenia, faifitimaci;

iadedi naimiena ñnotinodi tainona ññoñeitimaci.

Suubicañeitimaci” llote.

10

¹ Cue amatiaí, judúuai comini jilluana eo jitaídícue. Jusiñamui díga cue ñaia, iena jicadícue. ² Jusiñamui jitaillacinona eo finoacadimaci. Iena uiñotícue. Iena finoacadimaci; iadedi iena finuana raise uiñoñedimaci. ³ Jusiñamui naimacina marena itatallena uiñoñedimaci. Naimaci finoca rafuemonona marena iacadimaci. Jusiñamui llua isoi jaiacaiñedimaci. ⁴ Nana Cristona ñnotimiedi Moisés micori llogacinodo naimie marena illena jai jaiñede. Cristona ñnuamona, Jusiñamui jitailla isoi, naimie marena jai ite.

⁵ Moisés micori jaie cuete: “Naimie marena illena, cue lluaado jaidimiedi jaca iite, cue lluaana naimie raise ññoia” cuete. ⁶ Iese jaie cuete; iadedi jaca buna iese ññoñede. Cristona ñnuamona, marena Jusiñamui jitailla isoi, birui iticaí. Jusiñamui uai llote: “Omoi comeciaina facañeno: ‘Cristona cai baillena, naimiena bene cai atillena, monamo jaiticaí. ⁷ Fiodaitino dine jaiticaí, Cristona cai jillotallena’. Iese comeciaina facañeno” llote. Cristodi eniruemo jaie bite. Fiodaite; ia naiemona jai jillode. ⁸ Jusiñamui uai llote: “Naie rafue cai dine jai ite. Iena jai uiñoticaí”. Cai jilloillena Cristona cai ñnuana birui lloticaí. ⁹ Jiaie cominimo: “Cristodi cai Nama” omoi lloia, Cristo fiodaillamona Jusiñamui naimie jillotajana omoi ññoia, jilloitomoí. ¹⁰ Cai comecimona cai ñnua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

¹¹ Isaías micori iena jaie cuete: “Cristona ñnotinodi tainona ññoñeitimaci. Suubicañeitimaci” cueda. ¹² Naie rafuedi nana cominina ñaite. Judúuaina ñaite. Judúuaiñedinona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite. ¹³ Cristodi naga naimiemo jicanonidimaci. Cristo naimaci facaina fodailla rafuena naimaci nia cacaiñenia, naimiena ñnonidimaci. Naimacimo naie rafuena jiaie comini lloñenia, iena cacaiñeitimaci. ¹⁵ Jusiñamui ie rafue lloraína jai

orede. Isaías micori iena jaie cuete: “Mare rafuena llotino cai dine billano, eo iobidicai” cuete.

¹⁶ Iese cuete; iadedi ailluena comini naie rafuena nia jitaiñedimaci. Isaías micori iena jiai jaie cuete: “Jusiñamui, ailluena comini cai lluaña ñinoiacaiñedimaci” cuete. ¹⁷ Cai lluaña Cristo rafuena cacadimaci. Cristo rafuena cacajamona, damierie naimiena ñinotimaci.

¹⁸ Judúuai comini naie rafuena jai cacadimaci. Jusiñamui facaina lloraima micori iena jaie cuete:

Naga eniruemo ite cominimo Jusiñamui lloraini micoriaidi naie rafuena jai llotimaci cuete. ¹⁹ Judúuai comini naie rafuena cacadimaci; iadedi iena ñinoñedimaci. Moisés micori iena jaie cuete:

Jusiñamuidi llore: “Cue rafuena naimaci feiñua jira, judúuaiñedino diga uradoitomoí. ‘Naimaci abina uiñoñedimaci’ raitomoí; iadedi cue rafuena naimaci feiñua jira, naimaci diga iciritomoí” llore.

²⁰ Isaías micori marefodo jiai cuete:

Jusiñamui llore: “Cuena jenoñedino cuena jai baitimaci.

Naimacina cue jilloitallena cuena jicanoñedinomo jai bairedicue” llore.

²¹ Jusiñamui judúuai cominina jiai llore: “Naimacina cue dine jaca uaidoticue; iadedi ñinoiacaiñedimaci. Cuena jitaiñedimaci” llore.

11

Judúuai cominimona dajerie ñinoitimaci

¹ Jusiñamuidi judúuaina fainonocaillamo omoi comeciaina facañeno. Judío imiedicue. Abraham uruai micoriaimona comuidicue. Benjamín railla nairai imiedicue.

² Naimacina jaie naimie fetua jira, Jusiñamui judúuaina fainonocaiñede. Elíamo jaie ite rafuena uiñotomoí. Jusiñamuimo naimiedi judúuaina llore: ³ “Cue Nama, o facaina lloraini micoriaina meinetimaci. Ona cai sedajanona judaidimaci. Dama cue fiebidicue. Cuena jiai meineiacadimaci”. ⁴ Jusiñamui dinena uai ote: “Dama iñedio. Siete mil ñiñiai cue ñibeimo nia eenoticue. Baal railla jiraraina jaca sedañedimaci. Cuena nia sedadimaci” llore. ⁵ Birui ie isoide. Naimacina duenailamona, naimacina Jusiñamui fetua jira, dajerie Jusiñamui ñibeimo itimaci. ⁶ Naimacina duenailamona, naimacina fetode. Naimaci finoca rafue muidona naimacina fetoñede. Naimaci finoca rafue muidona naimacina fetodena, naimacina duenailamona naimacina fetoñede.

⁷ Ie jira iena iese lloiticue. Ailluena judúuaidi mareña Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena ñinoiacaiñedimaci. ⁸ Jusiñamui facaina lloraini micoriai iena jaie cuela: “Jusiñamuidi naimacina abina uiñoñañede. Jusiñamui finoca rana naimaci cioia, iena uiñoñedimaci. Jusiñamui rafuena naimaci cacajia, iena cacaiñedimaci. Birui iese nia itimaci” cuela.

⁹ David micori iena jiai llore:

Naimacimo aillue ra illamona, Jusiñamui naimacina duere finoite.

¹⁰ Naimaci comeciái Jusiñamui rafuena uiñoñeitimaci.

Naimaci finoca rafue anamo duere sefuicana jaca jaitimaci.

Judúuaiñedinomona dajerie ñinoitimaci

¹¹ Naimie rafuena judúuai comini jitaiñena jira, Jusiñamui naimacina duere finode; iadedi naimacina sofeñede. Jusiñamuina judúuai ñinoñena jira, Jusiñamuidi judúuaiñedinona jai jillotate. Naimacina jai jillotate, judúuai dinena judúuaiñedinona uradoillena. Uradoillamona Jusiñamuidi naimaci naimiena ñinollena jitaide. ¹² Cristona judúuai jitaiñena jira, Jusiñamuimona judúuaiñedinodi diga marecinona birui feiñotimaci. Cristo ñibeimo ico judúuai ia, Jusiñamuimona judúuaiñedino ailluena feiñoitimaci.

¹³ Judúuaiñedino, omoimo rafuena lloiacadicue. Omoi dine Jusiñamuidi cuena orede. Cue maijari eo mareña ñaiticue, ¹⁴ cue comini cuena uradoillena, Cristona dajerie ñinotallena. ¹⁵ Cristona naimaci nia ñinoñena jira, judúuaiñedino jai ñinotimaci. Cristona

ico judúuai ñnoia, Jusiñamui dıga jaca iitimaci. ¹⁶ Janore jisa juillıruñu marenia, nana juillıruaidı mare. Riara ie jainauai marenia, nana ie igailıai mare. Judúuaidı ie isoidımaci. Naimaci jaiagai micoriai jainauai isoidımaci. Naimaci jaiagai marenia, naimacıdı jıai mare. Birui ite judúuaidı igailıai isoidımaci.

¹⁷ Taıde igailıaidı ie amenamo jai duiñede. Ie isoidımaci. Naimacımona Cristona jıaino ñnoñena jira, Cristomo jai duiñedımaci. Sotaca riara isoi, naimaci ifomo itomoi. Ie jira Jusiñamuımona rafuena jai feiñocabitomoi. ¹⁸ Naimaci ifomo omoi illa jira, abına uradoiñeno. Igailıaimona jainao cajellena, ie ijina oñede; iadedı iemo duilla jira, jainaomona igailıai cajellena, ie ijina ote. Ie isoide. Naimiemo omoi duilla jira, Jusiñamuımona rafuena jai feiñocabitomoi.

¹⁹ Comeciaina facadomoi: “Taıde igailıai ifomo itıcai isoidıcai. Jusiñamui judúuaina oni dotade, caina fetollena”. ²⁰ Uanaicınona comeciaina facadomoi. Naimaci ñnoñena jira, Jusiñamuidı naimacına oni dotade. Omoi ñnua jira, naimaci ifomo itomoi. Ie jira abına uradoiñeno; iadedı Jusiñamuına omoi jacıruı. ²¹ Naimiena naimaci ñnoñena jira, judúuaina duere finode. Naimiena omoi ñnoñenia, daje isoi omoina duere finoite. ²² Biemo comeciaina faca. Naimiena ñnoñedinona jai duere finode; iadedı omoina duenaite. Naimiena ñnocana omoi jaia, naimie omoina nia duenaite. Iese omoi jaiñenia, naimie omoina dotaite. ²³ Judúuai Cristona ñnoñeno navui jaidımaci: iadedı Cristona naimaci birui ñnoia, naimie dıbeımo Jusiñamui naimacına itatarede, igai riaramo sotaja isoi. ²⁴ Aillı riarana cueticue. Naie amenamo nano duiñedomoi. Judúuai nainomo nano duidımaci. Jusiñamui jitailla jira, sotaca igai isoi, naimaci ifomo omoina jai itatate. Ie jira Jusiñamui jitaia, nainomo nano naimaci duilla jira, naimiedi judúuaina abıdo oite.

Io ailluena judúuai jilloitimaci

²⁵ Bie rafuena omoi uıñuana jitaıdicue. Iena navui uıñoñedıcai. “Judúuai baıfemo faitıcai” omoi raiñellena, biena omoiımo llotıcue. Dıga judúuai Cristona birui ñnoiacaıñedımaci. Jusiñamui jitailla dıese judúuaiñedıno jillua facaisena, iese iitimaci. ²⁶ Ie meı eo ailluena judúuai jilloitimaci. Jusiñamui facaina lloraıni micoriai iena cuetimaci:

Jerusalémona cai Jilloitaraima bıite.

Jacob micori uruiaımona jeacınona dotaite.

²⁷ Naimaci jeacınona oni dotajanona, Jusiñamui jaie lloga uai suite.

²⁸ Cristona birui ñnoiacaıñedımaci. Jusiñamuına enoidımaci. Jusiñamuına naimaci jitaıñena jira, naimie omoina fetode. Ie jira jillodomoi; iadedı Jusiñamuidı judúuaina nano jaie fetode. Naimaci jaiagai micoriaımo ie lloga uaina jira, naimacına nia isıruite. ²⁹ Jusiñamui ie lloga uaina saıñede. Naimacına fetua jira, naimacına faınonocaiñeıte. ³⁰ Jusiñamuına navui ñnoñedomoi; iadedı Jusiñamuına naimaci ñnoñena jira, Jusiñamui omoina jai duenaite. ³¹ Jusiñamuına jai ñnoñedımaci; iadedı omoina naimie duenailla isoi, Jusiñamuidı naimacına ıco jıai duenaite. ³² Jusiñamui nana comınına naimiena ñnoñenana uıñotade, naimacına naimie duenaillena. ³³ Jusiñamui caina eo duenaite. Io abına uıñote. Naga rana uıñote; ie iadedı naimie lloga uaina raise cacaiñedıcai. Naimie fınoça rafuena raise jıai uıñoñedıcai. ³⁴ Jusiñamui facaina lloraıma micori iena jaie cuete: “Jaca buna cai Nama Jusiñamui comeıı facajacınona uıñoñede. Jaca buna naimiemo ie fınoça rafuena lloñede. ³⁵ Jıairuido ibana feiñollena, jaca buna naimiemo rana fecañede” cuete. ³⁶ Naga ra naimiemo illa jira, naga ra naimiemonı bite. Naga rana fınode. Naimiemo iobillacınona cai fecacabıllasa. Iena jitaıdicue.

12

Jusiñamui anamo raise omoi i

¹ Cue amatıai, omoiımo bie rafuena lloitıcue. Jusiñamui caina duenailla jira, omoi jeanide comeciaimona, naimie jitaılle rafuena omoi fınuamona naimie anamo raise omoi i. Naimie jitailla isoi omoi i. Naimiedi omoi iese illana gaıde. Omoi comeciaimona naimiena raise omoi seda. ² Cristona uıñoñedıno isoi omoi iñeno; iadedı omoi comeııai

iuaina meiduanona, jiaie rafuedo mai omoi jai. Ie mei Jusiñamui jitailla rafuena finuana uiñoitomoí. Mare rafuena finuana uiñoitomoí. Naimiena iobitajacinona jiai uiñoitomoí. Eo mare rafuedo jaillana uiñoitomoí.

³ Jusiñamui cuena duenaillamona, bie rafuena omoimo cue lollena, naimie uai cuemo ite. “Jiaie comini baifemo faiticue” raillamo o comecina facañeno; iadedi: “Nie isoidimiedicue” o raillamo o comecina raise faca. Jusiñamuimona o feiñoga diese inuacinomo o comecina faca. ⁴ Nagamie ie abimo diga ra ite. Ie onolli ite. Ie uisi ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiaide. ⁵ Ie isoide. Cristona jai inoticaí. Aillosiedicaí; iadedi daajena naimiemo jainaiaidicaí. Dani caimo jiai jainaiaidicaí.

⁶ Jusiñamuidi daje isoide uaina naimie dibeimo cai maijillena, caimo fecañede. Ie jitailla diese caimo fecade. Ie jira omoi feiñoga uaido naimie facaina maiji. Rafuena omoimo Jusiñamui lloia, iena raise lloño. Roracomo omoi maijillena Jusiñamui lloia, nainomo raise maiji. Omoi llofuellena Jusiñamui lloia, naimie rafuena raise llofue. ⁷ Roracomo maijiacinona uiñotimiedi nainomo raise maijia. Llofuiacinona uiñotimiedi raise llofua. ⁸ Comeci ocuiñotajacinona uiñotimiedi comini comeciaina ocuiñotacana jailla. Rana fecajacinona uiñotimiedi rana caidiñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiailamona, iese coninina canocana jaiticaí.

Cristo rafuedo cai jailla

⁹ Omoi comeciainomona nana cominina isirui. Maraiñedinona gaiñeno; iadedi mare rafuedo omoi jai. ¹⁰ Coninina isirui, omoi cominina omoi isiruilla isoi. Omoína jiaimie nia iobitañenia, naimiena raise omoi iobita.

¹¹ Cristo rafuena sefuiruiñeno finocana omoi jai. Cai Namana iocire seda.

¹² Naimie dine omoi illemo iocire omoi ocuiri. Duere omoi sefua, omoi comeciaina ocuiño. Jusiñamui diga ñaicabillanona omoi jai.

¹³ Jiaie creyentiaí rania, naimacina cano. Omoi jofuemo creyentiaí ria, naimacina nafue.

¹⁴ Jusiñamui dibeimo naimaci marena illena, omoína duere finodinona Jusiñamuimo jii. Naimaciri marena ñaino. Naimacina faidoñeno.

¹⁵ Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

¹⁶ Daje isoi omoi comeciái lloillamona uri omoi i. Abina birioicaiñeno. Jamai bue isoidino diga nabairi. “Jiaie comini baifemo uiñoticaí” raiñeno.

¹⁷ Jiaie comini omoína jeare finoia, naimacina daje isoi jeare finoñeno. Ibana oñeno. Omoi marena illana jiaie comini uiñollena, marena omoi i. ¹⁸ Omoimona rafuena suiñoñeno. Nana comini diga uri omoi i. ¹⁹ Cue isiruigano, bu omoína jeare finoia, ibana oñeno. Jusiñamui naimacina duere finoite. Moisés micori iena jaie cuete: “Cai Nama llote: ‘Cominina duere finodice. Ibana oiticue’ ” cuete. ²⁰ Ibana oñeno. Jusiñamui facaina lloraíma iena jaie jiai cuela: “Omoi enoigamie aimetaia, naimiena eca. Naimie jiroiacania, naimiena jirote”. Ie mei naimie meire omoimo eruaite. ²¹ Jiaie comini omoína jeare finoia, iciriñeno; iadedi naimacimo mare rafuena fino. Iese omoi finoia, naimacina omoi dibeimo itataitomoí.

13

¹ Nana illaicominina naimaci ifomo Jusiñamuidi itataja jira, illaicomini lloga uaina nana cai inua. ² Illaicomini uaina bu inoñenia, Jusiñamuína jiai inoñede. Ie mei Jusiñamui naimiena duere finoite. ³ Mare rafuena finodinodi illaicominina jaciruiñedimaci; iadedi maraiñede rafuena finodino naimacina jaciruitimaci. Omoína duere finoñellena, mare rafuena finocana omoi jai. Iese omoi jaia, omoína marena ñaitimaci. ⁴ Jusiñamui facaina omoína canodimaci. Maraiñede rafuena omoi finoia, naimacina jacirui. Omoína duere finollena, naimacimo uai ite. Maraiñede rafuena finodimiena Jusiñamui facaina duere finoitimaci. ⁵ Ie jira naimaci uaina ino, Jusiñamuimona omoi duere sefuiñellena.

Omoína: “Mare” jiai raitimaci. ⁶ Gobierno omoina ibataia, Jusiñamui facaina naimaci maijia jira, iena iba. Naimaci raise maijillena, iena iba.

⁷ Gobierno omoina ibataia, iena iba. Illaicominimo iobillacinona feca. ⁸ Ra omoi oia, ibaño jaiño; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode. ⁹ Moisés micori diga lletarafuena jaie cuete: “O aiñede riño diga iño. O iniñede iima diga iño. Jiaimiena meineño. Rana fiño. Jiaimiero ite rana nicidoño” cuete. Jiai lletarafue ite: “Dani omoi abiana omoi isiruilla isoi, jiaie cominina omoi isiruilla”. Bie lletarafuena omoi iñoia, nana lletarafuena jai iñotomoi. ¹⁰ Jiaie cominina omoi isiruia, naimacina jeare jai finoñedomoi. Jiaie cominina omoi isiruia, nana Jusiñamui lloga uaina jai iñotomoi.

¹¹ Iena birui cai finua. Jesucristo billiruidi iairei jai ite. Naimiena cai nano iñua facaiseconi, naimie billiruimo cai comeciaina facadica; iadedi nagarui naimie billirui iairei iñoicaide. ¹² Jesucristo nia dane biñena jira, enruemo cai illa jira, jitreñonomo itica isoidica. Naimie bia, naimie diga cai illemona, useredonomo raire ja itica isoitica. Ie jira jeacinona finocana cai jaillana mai cai fainonocaili. Jesucristo rafue anamo raise cai illesa. ¹³ Cai marena illana nana comini uiñollena, mare rafuena finocana cai jailla. Jearede rafuena cai finoñena. Cai jifaiñena. Cai aiñede riño diga cai iñena. Cai fuiriñena. Cai abina uradoiñena. ¹⁴ Iese cai iñena; iadedi naimie caina namatallena, cai Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

14

Jiaie creyentena jeare ñaiño

¹ Cristona iñotimiena omoi dine biade, naimiena raise feiño. Naimie Cristona nia raise iñoñena, naimiena nafue; iadedi omoi isoi naimie iñoñena, conima uina caitaño.

² Dajerie naga rana guitimaci; iadedi jiaimie difai guiga rana guite. Naimie riñede. Ie comecina facade: “Cue riia, jeacinona jai finoiticue”. ³ Naga rana guiñedimiena miño. Naga rana guitimiena miño. Jusiñamuidi naimacina jai feiñote. Ie jira miño. ⁴ Omoi facaina maijiñedimaci. Jusiñamui facaina maijidimaci. Jeacinona naimaci finoia, Jusiñamui naimacina duere finoite. Jeacinona finoi raillanona, Jusiñamuidi naimacina canoite.

⁵ Dajerie creyentia comeciaina facadimaci: “Judíuai rafue finuaruillai Jesuñamuina sedajitica, nairuillai jairuillai baifemo ualla jira”. Jiaino raitimaci: “Nagarui daje isoide” raitimaci. Nagamie ie comecina raise facajamona, ⁶ cai Namana iobitallena, nagamie ie jitaillaruimo cai Namana sedaite. Naga rana guitimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

⁷ Cristomo cai duilla jira, dani cai jitailla rafuena finonidica. Cai fiodailliruina jiai llonidica. ⁸ Naimiedi cai finolle rafuena ocuide. Cai fiodailliruina jiai lloite. Naimiero cai duilla jira, iese itica. ⁹ Cristodi fiodaite. Ie mei jillode. Ie jira naimie anamo itica. Cai cagenia, naimie anamo itica. Cai fiodaia, naimie anamo jiai itica.

¹⁰ Naimie baifemo omoi iñena jira, jiaie creyentena miño. Naimie uaina caitaño. Naimiedi Cristo díbeimo ite. Jusiñamui uicomo nana ico itica. Jusiñamuidi marañedinona duere finoite. Maredinona duere finoñeite. ¹¹ Isafas micori jaie iena cuete:

Jusiñamuidi lloite:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” lloite.

¹² Nainomo Jusiñamuimo nana cai finouiga rafuena lloitica. Ie jira jiaie creyentia diga marena omoi i.

Jiaie creyentena jeacino finoi raillano, mare rafuedo cai jailla

¹³ Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla. ¹⁴ Cai Nama Jesúmo cue duilla jira, naga riga radi cuemona mare. Iena raise uiñoticue. Iena cue riia, jeacinona

finoñedicue. Iena uiñoticue; iadedi jiaimie comecina facade: “Biena cue ríia, jeacinona jai finodicue”. Naimie comecina iese facajamona, iena naimie ríia, naimiemona jeacinona jai finode. ¹⁵ O ríga ra muidona jiaie creyente comeci maraiñeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañellena. ¹⁶ Ie jira o jitailla rana finoñeno. Jiaie comini ona miiñellena, naie rana riñeno. ¹⁷ Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiai cai facaja. Iocire cai illamo cai comeciaina jiai cai facaja. Jusiñamui Joreño caimo illa jira, iese caina itataite. ¹⁸ Iese cai jaia, Cristona raise sedadicaí. Jusiñamuina iobitadicaí. Jiaie comini caina marena jiai ñaitimaci.

¹⁹ Ie jira uri icana cai jailla. Dani cai comeciaina ocuiñocana cai jailla. ²⁰ Omoi ríiacaga ra muidona, jiaie cominina Jusiñamuina fainonocaitañeno. Naga radi mare, ríllena; iadedi bue isoide omoi ríia muidona, jiaimie Jusiñamuina fainonocaia, jeacinona jai finodomoí. ²¹ Bue isoide omoi ríia muidona, jiaimie jeacino finoi raillanona, iena riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide. ²² Mare ra omoi finoia, omoi comeciaimona iena uiñotomoí. Jusiñamuidi omoi comeciaina uiñua jira, iena marefodo lloñeno. Omoi comeciaimona jeacinona omoi finoñenana uiñotomoí. Ie jira iocire itomoí. ²³ “Nie isoide ra cue ríia, jeacinona finodicue” raillanomo bu iese comecina facaia, iena naimie riñena. Iena naimie ríia, Cristona naimie raise iñnoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

15

Jiaie creyentena cai canua

¹ Cristo rafuedo raise jaidicaí; iadedi jiaino Cristo rafuedo cai isoi nia jaiñedimaci. Naimacina cai canua. Ie jira dani cai jitailla rafuena finoñeiticai; ² iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena. ³ Eniruemo navui naimie ia, Cristo ie jitailla rafuena jiai finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiai cuete: “Jusiñamuina jeare ñaiacadimacimo, cuena jiai jeare ñaitimaci” cuete. ⁴ Naiemona cai fueollena, naiemona cai comeciai ocuiñotallena, Jusiñamuina jaie ciegafuiaídi caimo ite. Naiemona Jusiñamui illanomo cai illemo ocuridicaí. ⁵ Jusiñamui cai comeciaina ocuiñotade. Naimie coniniri omoína uri itatajana jitaídícue. Cristo Jesús llua isoi, omoi uri illana jitaídícue, ⁶ daje isoi omoi comeciai lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaídícue.

Judúuaiñedinodi Cristo rafuena jiai cacadimaci

⁷ Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño. ⁸ Iena nia lloiticue. Judúuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico suille rafuena jaie llote. Eniruemo billanona, Cristo iena fuiduaíbite. ⁹ Judúuaiñedino Jusiñamuina iobitallena, Jusiñamui naimacina duenailla jira, Cristodi bite. David micori Cristo llua jaie cuete:

Judúuaiñedino motomo cue illamona ona iobitaitimaci.

Ruamona cue muidona ona jiai iobitaitimaci.

¹⁰ Moisés micori jiai cuete:

Judúuaiñedino, Jusiñamuimo duide comini díga iobi.

¹¹ David micori jiai cuete:

Nana judúuaiñedino, Jusiñamuimo iobillacinona fecá.

Nana comini naimiemo iobillacinona fecacabillasa.

¹² Isaías micori cuete:

Isái micori uruiaimona damie comuitajamona, naimiedi judúuaiñedinona sedaite. Naimie naimacina jillobitallena, naimiemo ocuritimaci.

¹³ Jusiñamui iemo omoína ocuritate. Naimiema omoi iñuanona, naimie omoína caimare itatajana jitaidicue. Uri itatajana jiai jitaidicue. Iemei Jusiñamui Joreño naimie siño uai diga omoi jilluamo omoína ocuritaite.

¹⁴ Cue amatiai, omoína uiñoticue. Eo maredomoi. Cue lloga rafuena eo uiñotomoi. Coninina llofueredomoi. ¹⁵ Iena omoi começillena, dafuerie rafuena omoimo marefodo cueticue. Jusiñamui cuena fetuanona, ie rafuena cue lollena, cuena orede. ¹⁶ Judúuaiñedinomo Jusiñamui ie mare rafuena cue lollena, Cristo Jesús facaina maijidicue. Jusiñamui ðibeimo naimacina cue itatajanona, Jusiñamui naimacina feiñollena, naimacimo lloticue. Jusiñamui Joreñodi naimacina jiai maretaite.

¹⁷ Jusiñamui ðibeimo cue maijia jira, Cristo Jesús muidona cue maijari iobidicue. ¹⁸ Cue maijiana marefodo lloticue. Judúuaiñedinona Jusiñamuina iñotallena, Cristodi cuena canode. Cue lluaña cacadimaci. Cue illana ciotimaci. ¹⁹ Cristodi cuena siño rafuena finotate. Jusiñamui Joreño uaido cuena finotate. Iemei Cristona jai iñotimaci. Jerusalémona Ilírico railla enirue ðinomo Cristo ie mare rafuena ailluena cominimo raise jai lloticue. ²⁰ Nainomo Cristona nia uiñoñedino ðine navui cue jaiacana jira, nainomo Cristo rafuena lluidicue. Jai cacadino illanomo cue jaiacaiñena jira, nainomo lluaiñedicue. ²¹ Isaías micori buena jaie cuete:

Cristo rafuena nia cacaiñedinodi iena cacaitimaci.

Naimiema uiñoitimaci

cuete.

Romamo Pablo jaiacade

²² Nainomo cue maijiacana jira, Romamo omoi ðine nia jaiñedicue. ²³ Diga nairaimo Cristo rafuena bene jai cue llua jira, cue maijille bene jai iñede. Diga años omoi ðine cue jaiacana jira. ²⁴ Españamo cue jaia, omoi ðine jaiticue. Omoi diga nano nigarui caimare ñaiticue. Ie mei Españamo cue jaillena, cuena canoitomoi. ²⁵ Omoi ðine jaiticue; iadedi Jerusalémo ite creyentiaína cue canollena, nainomo nano jaiticue. ²⁶ Macedoniammo ite creyentiaidi ucubena ofitatimaci. Acayamo ite creyentiaidi ucubena jiai ofitatimaci. Jerusalémo ite duerede creyentiaína canoacadimaci. Jerusalémo ite creyentiaína canollena, iena birui uiticue. ²⁷ Iena fecaacadimaci. Judúuaiñedinomaci; iadedi judúuaina canoacadimaci, naimacimo Cristo rafuena navui judúuai llua jira. Ie jira naimacina birui canodimaci. ²⁸ Naimacimo bie ucubena raise cue fecaja mei, Españamo cue jaillemona, omoi ðine nano jaiticue. ²⁹ Omoi ðine cue ria, naimie rafuena cue lollena, Cristo cuena raise canoite.

³⁰ Cue amatiai, cai Nama Jesucristomo omoi duilla muidona, Jusiñamui Joreño coniniña omoína isiruitaja muidona, Jusiñamuimo omoi jiiia, cue facaina jiai omoi jii. ³¹ Judeamo ite creyenteñedinomona cue jillobillena, Jerusalémo ite creyentiaimo cue fecaacalle ucubena naimaci raise feiñollena, cue facaina omoi jii. ³² Jusiñamui jitailla isoi omoi ðine iocire cue rillena, iese omoi jii. Iemei omoi diga cue illemona, jafaicina oiticue. ³³ Jusiñamui omoína uri itatajana jitaidicue.

16

Romamo itinomo Pablodi ie uaina orede

¹ Febe raillañaño omoi ðine jaite. Naiñañaña omoi uiñuana jitaidicue. Naiñañañodi creyente. Cencrea railla nairai iñañaño. Cristo ðibeimo maijiano, nainomo ite creyentiaína canocabide. ² Cristomo omoi duilla muidona, jiaie creyentiaína cai feiñoiacacabilla isoi, naiñañañaña raise feiño. Diga cominina naiñañaña canua jira, naiñañaña jitailla diese cano. Curna jiai canode.

³ Priscila ðine cue uaina oredicue. Naiñañaña ini Aquila ðine cue uaina jiai oredicue. Cristo Jesús facaina cue diga maijidiiaimaiai. ⁴ Cue facaina niadedi fioidaitiaimaiai. Ie jira iaimaiairi iobidicue. Diga nairaimo judúuaiñede creyentiai itimaci. Cuemona Cristo rafuena cacadimaci. Cue facaina iaimaiai niadedi fioidailla jira, iaimaiairi jiai iobidimaci.

⁵ Iaimaijai jofomo rollena bitino dine cue uaina oredicue. Epeneto dine cue uaina jiai oredicue. Cue isiruigamie. Asia railla eniruemo itinomona naimiedi Cristona nano innotimie.

⁶ María dine cue uaina oredicue. Omoina canollena, omoi motomo maijide.

⁷ Andrónico dine cue uaina oredicue. Junias dine cue uaina oredicue. Naie iaimaijaidi cue comini. Cárcelmo danomo navui iticai. Jesucristo oretaganodi iaimaiaina marena ñaitimaci. Naimiena nia cue innoñena facaise Cristona innotiaimai.

⁸ Amplias dine cue uaina oredicue. Cristomo naimie duilla jira, naimiedi cue isiruigamie. ⁹ Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie. ¹⁰ Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itino dine cue uaina oredicue. ¹¹ Herodión dine cue uaina oredicue. Naimiedi cue comini. Narciso cominimona dajerie innotimaci. Naimaci dine cue uaina oredicue. ¹² Trifena dine cue uaina oredicue. Trifosa dine cue uaina oredicue. Cai Nama facaina maijidiiañuai. Pérsida dine cue uaina oredicue. Cue isiruigañaiño. Cai Nama facaina eo maijide. ¹³ Rufo dine cue uaina oredicue. Cai Namana eo raise innote. Naimie ei dine cue uaina jiai oredicue. Naiñaiñodi cue ei isoide. ¹⁴ Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentiai dine cue uaina oredicue. ¹⁵ Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpas dine cue uaina oredicue. Nana naimaci illanomo ite creyentiai dine cue uaina oredicue.

¹⁶ Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

¹⁷ Cue amatiai, daje rafuena nia lloiticue. Omoi comeciai daje isoi lloitañedino diga nabairiño. Uai uaitacabidino diga nabairiño. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiño. ¹⁸ Cai Nama Jesucristo facaina maijinedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci. ¹⁹ Ailluena cominidi Cristona omoi inuana uiñotimaci. Ieri iobidicue. Marecinona finuana raise omoi uiñuana jitaicue. Marañedicinona omoi finuana jitañedicue. ²⁰ Jusiñamuidi omoina uri itatate. Naimie omoina canoite, Taifena anafefitallena. Cai Nama Jesucristo omoina duenaillesa.

²¹ Omoi dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

²² Terciodicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

²³ Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

²⁴ Erasto ie uaina orede. Naimiedi bie nairai ie ucube eenoraíma. Cuarto ie uaina orede. Naimiedi jiai creyente.

Jusiñamuimo iobillacinona jaca cai fecajasa

²⁵ Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede; ²⁶ iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini inollena, nana cominido bie rafuena llocana birui jaide. Jusiñamuidi jaca ite.

²⁷ Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablocue.

CORINTOMO ITE CRISTONA HNOTINOMO PABLO NANO ORETAGA RABE

Corintomo ite creyentiaimo Pablo cartana orede

¹⁻² Corinto railla nairaimo ite creyentiai, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue lollena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoina jai marebicaitate. Jusiñamui omoina fetode, naimie iena. Ua nana cai Nama Jesucristona sedadinodicaidi Jusiñamui iena. ³ Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaiai omoina uri jai itatatiamaiai. Iena omoi uiñocana mai omoi jai.

Cristo muidona Jusiñamuimona ailluena feiñoticaí

⁴ Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoina jai duenaite. Ie jira naimiemo omoi facaina iobillacinona jaca fecadicue. ⁵ Jusiñamui omoina duenaillamona, ie rafuena omoi lollena, naimiemona ailluena uaina feiñotomoi. Cristomo omoi duillamona, naga icaiño Cristo rafuena omoi jino lloia, omoina eo canode. Omoina naimiemo ite rafuena raise uiñotade. ⁶ Ie muidona Cristo rafuena raise innotomoi. Cristo rafuena cai jino llumona, naimiemo raise inofidomoi. ⁷ Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijiamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo iocire omoi ocurillanona, Jusiñamuimona ailluena rafuena feiñotomoi. ⁸ Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoina duere finoñeite. Naimie bia, naimacimo jeacino nia illa jira, naimiena inoñedinona duere finoite. ⁹ Jusiñamui ie lloga uaina jaca finoite. Naimie inogamie. Naimie Jitona omoi nabaillena omoina fetode. Naimie Jitodi cai Nama Jesucristo.

Naimaci comeciai daje isoi lloinédimaci

¹⁰ Cue amatiai, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciai daje isoi lloillana jitaidicue. Daje isoi omoi comeciai facajana jitaidicue. ¹¹ Cloé raillamie cominimona bie rafuena cue fidia jira, iese omoimo lloticue. “Omoi comeciai daje isoi inedomoi” naimie llote. ¹² Omoimona damierie raitomoi: “Dani Pablo llofuia dibecinodo jai jaidicaí”. Damierie raitomoi: “Dani Apolos raillamie llofuia dibecinodo jai jaidicaí”. Damierie raitomoi: “Dani Pedro llofuia dibecinodo jai jaidicaí”. Damierie raitomoi: “Dani Cristo llofuia dibecinodo jai jaidicaí” raitomoi. Nana iese itomoi. Iemona omoi comeciai daje isoi inedomoi. Cloé cominimona iese fididicue. ¹³ Ero, diga omoi Jilloitaraini inede. Omoi jeacinomona omoi jillobillena, dama Cristo illa. Omoi facaina cruzmo cuedi fioidañedicue. Cue dibeimo omoi illena cue bautizañegaomoi. ¹⁴ Omoina cue bautizañena jira, omoimo ite rafue cuemona comuiñena jira, iobidicue. Dama Crispona bautizadicue. Gayona jiaí bautizadicue. ¹⁵⁻¹⁶ Estéfnas jofomo ite cominina bautizadicue. Jiaie cominina cue bautizajana comeciñedicue. Ie muidona: “Pablo facaina bautizadicaí” llonidomoi. Daje isoi omoi comeciai lloinénia, cue muidonañede. ¹⁷ Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uiñoraíma isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uiñoraíma isoi omoimo llofueñedicue. Cristo fioidaillamona, omoi jeacinomona naimie omoina jillotate. Iena omoi feitañenana jitaidicue.

Cristo finoca rafuemona Jusiñamui uai siñonana uiñoticaí

¹⁸ Cristona iinoñedinomona cruzmo Cristo fiodailla rafuedi jamaifue. Naimacidi faificana jai jaidimaci. Jusiñamuimona naie rafue illa jira, caimona naie rafuedi siño. Naie uaidi diga comini comeciai meidorede. Caidi naie rafuena iinotinodicai. ¹⁹ Ero, Jusiñamui facaina lloraima micori Cristona iinoñedinona jaie cuete:

Jusiñamui llote: “Abina uiñoraini imaci uiñuacinona saitaiticue.

Abina baitadino imaci baitajacinona saitaiticue” llote.

Ie muidona naie isoide comini jilloñenana jai uiñotici.

²⁰ Naie isoide comini uiñuacinomona jaca jillonidicai. Abi uiñoraima uiñuacinodi Cristo fiodailla rafue baifemo faiñede. Moisés micori cuegafuena uiñoraima uiñuacinodi Cristo fiodailla rafue baifemo faiñede. Uaina uaitatimie birui ite uiñuacinodi Cristo fiodailla rafue baifemo faiñede. Jusiñamuidi naimiena uiñoñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñotici. ²¹ Ie jitaillacino diese Jusiñamui finua jira, naimaci abi uiñuacinomona naimiena iinoñedimaci. Ie jira naimie mare jitaillacinomona, naimiena iinotinona jai jillotate. Naimaci jeacinomona naimacina jai jillotate. Cristo rafuena cai llumona iinotimaci. Jusiñamuina iinoñedinodi naie rafuena: “Jamaifue” raitimaci.

²² Siño rafuena naimaci cioacana jira, judíuai railla cominidi iese raitimaci: “Siño rafuena Jusiñamui finoia, omoi lloga rafuena iinoitici” raitimaci. Grieguai railla comini dinena raitimaci: “Omoi lloga rafuena cai abina uiñuacino ie isoi itena, iena iinoitici” raitimaci; ²³ iadedi Cristo rafuena llocana jaidicai. Cruzmo naimie jai fiodaillana llotici. Ie jira judíuaidi cai lloga rafue muidona iciritimaci. Naiena oiacañenano iciritimaci. Damie naimaci illaimana jaillemo ocuridimaci. Naimaci ocurillamie fiodaillamo naimaci comeciaina facañedimaci. Cristo fiodailla jira, raitimaci: “Naimiedi cai ocuriñenamie” raitimaci. Judíuaiñedino dinena raitimaci: “Omoi lloga rafuedi jamaifue” raitimaci. Ailluena comini cai lloga rafuena jitaiñedimaci; ²⁴ iadedi Jusiñamui damerie judíuaina jai fetode. Dajerie judíuaiñedinona jiai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiai uiñotimaci. ²⁵ Jusiñamui Cristona orede, cai jeacino facaina naimie fiodaillena. Jusiñamuina iinoñedinomona Cristo finoca rafuedi jamaifue. Ebinidifue. Caimona Cristo finoca rafuedi Jusiñamui iinoñedino uiñuacino baifemo faite. ²⁶ Cue amatiai, Jusiñamui omoína navui fetode; iadedi ¿nie isoidomoi? Jamai bue isoidomoi. Omoi comeciaina iemo faca. Jusiñamuina iinoñedinomona abina uiñoñedomoi. Omoi creyentiai díbeimo eo abi uiñotino raise iñedimaci. Omoi creyentiai díbeimo illaicomini raise iñedimaci. Omoi creyentiai díbeimo ucuberedino raise iñedimaci. Jusiñamui ie isoidinona eo fetode; ²⁷ iadedi abina uiñoñedino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena. ²⁸ Jamai bue isoidinona fetode, jamai bue isoñedino baifemo faille. Jusiñamuimona jamai bue isoñedinodi jamai comini. ²⁹ Ie muidona jaca buna Jusiñamui uicomo abina iedoñena. ³⁰ Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñotici. Cristo fiodailla jira, Jusiñamui cai jeacinona feitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate. ³¹ Jusiñamui facaina lloraima micori iena jaie cuete: “Bu abina iedioacania, nana Cristo finoca rafue diga naimie abina iedua” cuete.

2

Pablodi cruzmo Cristo fiodailla rafuena llocabite

¹ Cue amatiai, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticedena, iese niade llofueñedicue. ² Daje rafuemo cue comecina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue. ³ Omoi motomo navui cue ia, meiruioicallamona jacinaoidicue. Jusiñamui facaina cue raise jino lloñeni raillano jaciruoidicue. ⁴ Comini abi uiñuacinodo omoimo llofueñedicue; iadedi omoi

jeacinomona omoi jilluamona, Jusiñamui Joreñodi omoına cue lloga rafue siñonana uiñotade. ⁵ Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñnoñedomoi; iadedi Jusiñamui omoına jillotaja jira, jai ñnotomoi.

Jusiñamui Joreñodo bie rafuena uiñoticaí

⁶ Comini abi uiñuacinodo llofuecabiñedicue; iadedi Jusiñamuimona ite abi uiñuacinodo llofueticue. Cristona raise ñnofidinomona abi uiñuacinodo llofueticue. Cristo facaina llorainidi cue isoi jiai llofuecabitimaci. Cominimo jai ite uiñuacinodo llofueñedicaí. Illacomini uiñogacinodo llofueñedicaí. Ico faifitimaci. Ico jiai uainicaitimaci. Ie jira naimaci uiñogacinodo llofueñedicaí; ⁷ iadedi Jusiñamuimona abi uiñuacinona cai feiñuamona, iedo llofueticaí. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico cai illena jitaide. Iena jaie cai uiñoñedicaí. Jusiñamui jaca buna iena jaie uiñotañede. ⁸ Birui ite illacomini Jusiñamuimo ite rafuena nia uiñoñeditimaci. Iena uiñotimaciden, cruzmo cai ebirede Namana meineñeditimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñeditimaci; iadedi Jusiñamui caina iena uiñotade.

⁹ Jusiñamui facaina lloraíma micori iena jaie cuega:

Jaca buna naimiena ñnotino facaina Jusiñamui finoca rafuena cioñede.

Jaca buna iena cacaiñede.

Jaca buna iemo comecina facañede

cuega. Jusiñamui rafuena uiñoñeditino naie rafuena jaca uiñoñeditimaci; iadedi naimiena isiruitino naie rafuena uiñotimaci. ¹⁰ Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo iticinona jiai uiñote.

¹¹ Jaca budi jaiimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote. ¹² Jusiñamuimona ie Joreña jai feiñoticaí. Jiaie cominimona naie Joreña feiñoñedicaí. Jusiñamui Joreñodi caina Jusiñamui caimo caidiñeno fecaca rafuena uiñotade. ¹³ Omoimo naie rafuena llofuecabiticaí. Cominimona fueoga uaido llofueñedicaí; iadedi Jusiñamui Joreño caimo llofuia uaido llofueticaí. Ie jira Jusiñamui Joreño ite cominimo naie rafuena llofuecabiticaí. ¹⁴ Jusiñamuina ñnoñeditimaci Jusiñamui Joreñomona iticinona feiñoñeditimaci. Naimacimona naie rafue jamaifue. Iena cacaiñeditimaci. Iena jiai uiñoñeditimaci. Dani Jusiñamui Joreño illa cominidi naiemo cacarefidimaci. ¹⁵ Nana Jusiñamui jitailla rafue diese cacadimaci. Jusiñamuina ñnoñeditimaci Jusiñamui Joreño illa comini illa rafuena jiai raise uiñoñeditimaci. ¹⁶ Jusiñamui facaina lloraíma micori iena jaie cuega: “Jaca buna Jusiñamui comecimo iticinona uiñoñede. Budi naimiena jiai llofuenide” cuega. Ero Cristo comecimo iticinona cai uiñua jira, Jusiñamuina ñnoñeditimaci caina raise uiñoñeditimaci. Caina jiai llofuenidimaci.

3

Danomo Jusiñamui díbeimo maijidimaci

¹ Cue amatiaí, Jusiñamui Joreño anamo itinona omoi raise itomoidena, omoına llofueñedicue. Omoi jitaillacinodo nia omoi jailla jira, omoına llofueticue. Cristo rafuedo janore jai jaidomoi. Jusiñamui uruiaína jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaína omoi jailla mei, Cristo rafuedo eo jaiñedomoi. ² Feinide rafuena navui llofueticue. Eo feirede rafuena omoimo llofueñedicue. Omoına iena nia llofueñedicue. Omoi uruiaí janore moonailla mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoi raise jaiñena jira, Jusiñamuimona nia moonaiñeditino isoidomoi. ³ Nia omoi jitaillacinodo jaidomoi. Jusiñamui Joreño anamo nia raise iñedomoi. Coninina abina uradoidomoi. Omoi comeciaí daje isoi lloñedomoi. Jusiñamuina ñnoñeditino isoi nia itomoi. Jamai ebe isoi nia itomoi. ⁴ Omoimona damerie: “Pablo llofuia díbecinodo jaidicaí” raitomoi. Jiaíno: “Apolos raillamie llofuia díbecinodo jaidicaí” raitomoi. Iese omoi raía, Jusiñamuina ñnoñeditino isoi itomoi. Ie jira iese raíeno.

⁵ Jamai bue isoidicue. Apolos jiai jamai bue isoide; iadedi Jusiñamui dibeimo coco maijiamona, Cristo rafue coco llofuiamona, iena ñnotomoi. Jusiñamui cocomo llua isoi, ie rafuena lloticoco. ⁶ Naie rafuena cue llofuiamona nano ñnotomoi. Ie mei Apolos iena dane llofue. Iese llofueuidicoco; iadedi dama Jusiñamui omoina naie rafuena ñnotacana jaide. ⁷ Ie muidona naiemona cai fueua. Jamai bue isoidicoco. Jusiñamui coco baifemo faite. Ie jira naimie omoina ñnocana jaitate. ⁸ Daje uaina Apolos diga maijidicue. Coco maijia diese Jusiñamuimona coco ibana feiñoticoco. ⁹ Jusiñamui facaina maijidicoco; iadedi naimiedi omoina ñnocana jaitate. Naimiedi omoi comeciaina marena itatacana jaitate. ¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoimo navui llofueticue. Cue llumona Cristona ñnotomoi. Birui jiaimie omoina naie rafuena jai llofue. Omoi comeciaino naie rafue raise itabillena, omoina llofue. Bu omoina llofueia, omoi comeci marena illacinomo naimie comeciina facajanona, omoina naimie llofuecabilla. ¹¹ Omoi jeacinomona omoi jilloillena, jaca daje rafue ite. Jiaie rafuedi ñede. Iena omoimo jai llofueticue. Naie rafuedi Jesucristona ñaite. ¹² Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciaino raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedi naimaci comeciaino raise itabiñede. ¹³ Jusiñamuidi nagamie ie llofuiacinona ico lloite. Jesucristo abido bia, Jusiñamui nie isoidicinodo naga naimie facaina maijidino llua lloite. Naimaci llogacinona eo facacite. ¹⁴ Ie mei Cristo rafuena raise atona llotinodi Jusiñamuimona ibana feiñoitimaci. ¹⁵ Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jiai faifitimaci; iadedi faifiñeitimaci. Jusiñamui diga jaca iitimaci; iadedi tainomo maijidimaci.

¹⁶ Jusiñamui ie illano omoi comeciaino illana uiñotomoi. Naimie Joreño omoimo illa jira, Jusiñamui ie illanodi omoi creyentia. ¹⁷ Cristo dibeimona omoi creyentia bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie dibeimona omoina itatatimiena duere finoite.

¹⁸ Bie rafuedo omoi raise jaillena, dani omoi abiaia jifueño. Creyenteñedino uiñuacinodo jaiño. Omoimona bu iedo jaiacania, naimiemo llono: “Naie isoide rafuedo o jaiño”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotinona omoi jaillena, creyenteñedino uiñuacinodo omoi jaiño. ¹⁹ Jusiñamuimona naimiena ñnoñedino uiñuacinodi jamai-fue. Jusiñamui facaina lloraia micori jaie cueda: “Jusiñamuidi comini abi uiñuacinona uiñuanona, naimacina jai emodofide. Naimacina jai duere finode”. ²⁰ Jiai cueda: “Jusiñamuidi abi uiñotino railla comini imaci comeciaino facajacino jamaifuena uiñote”. ²¹ Ie jira omoi llofuerainiri abi iedoño. Jusiñamuimona nana rafue omoimo jai illa jira, naimaci abi uiñuacinodo abina iedoño. ²² Marena omoi comeciaino illacino jitai raillano, Cristo omoi dine caia oretate. Cueno oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suite. Omoi jitai raillano, jairuido nana omoimo iite rafuedi suite. Nia omoi fioidañenia, Cristo omoina canoite. Omoi fioidaia, naimie dine jaitomoi. Naiemona marena omoi comeciaino illacino jitai raillano, ua nana rafue omoimo jai ite. ²³ Cristomo omoi jainaiailla jira, naimie anamo itomoi. Jusiñamuimo Cristo jainaiailla jira, naimie Jusiñamui jitailla rafuena jaca finocabide. Ie jira naimie jitaillacinona finocana omoi jai.

4

Cristo fetocano naimie dibeimo maijide

¹ Caimo omoi comeciaina faca. Cristo dibeimo maijidicai. Jusiñamui rafuena llocana jaidicai. Iena jaie uiñoñedicai; iadedi naimie caia uiñotaga rafuena birui llofueticai.

² Ero, naga patródi naimie dibeimo maijidino naimie lloga uaina ñnuana jitaide. Ie isoide. Jusiñamuidi ie facaina lloraini naimiena naimaci ñnuamona naimie rafuena raise llua

jitaide. ³ Cue uaina omoi uaitañenia, iena omoi uaitaia, jiaino iena uaitaia, iemo comecina facañedicue. ⁴ Cuemo nicino ia, iena uiñoñedicue; iadedi Cristomona cue comecimo jeacino n̄bai ite. Ia, naimie cuemo lloite. Iemona cuena duere finoite. ⁵ Ie jira: “O llucino mare” cuemo lloñoeno. “O llucino marañede” cuemo jiai lloñoeno. Cai Nama nia abido biñenia, iena cuemo omoi lloñoeno. Naimie bia, nana comini comeciaino ite rafuena uiñotaite. Naimaci comeciaino ite jitaillacinona uiñotaite. Iemona naimaci maijia dinori Jusiñamuimona iobillacinona feiñoitimaci. Naie facaise cuemo ite rafuena lloite. Ie jira nia cuemo lloñoeno.

⁶ Cue amatiai, naie rafuena omoi raise uiñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cuezafue llua isoi, omoi illana jitaidicue. Omoi llorainiri tainomo iobiñoeno. Omoi Cristo facaina llorainimona damie jiaie lloraima baifemo faiamo omoi comeciaina facañeno. ⁷ Nana omoi llofuerainidi daje isoidimaci. Jusiñamuimona nana naimacimo ite uaina feiñoitimaci. Dani naimaci comeciaino iena naimaci oñena jira, ie diga abina iedoñoeno.

⁸ “Nana Jusiñamuimona iticinona jai feiñoticaí. Jusiñamuimona nana cai jitaillacinona caimo jai ite. Jusiñamui sedajonomo illainina isoi jai iticaí” omoi comeciaina facadomoi; iadedi nia iese iñedomoi. Nainomo itomoidena, nainomo coco jiai illa jira, cuemona eo mare. Nainomo iticocodena, cuemona eo mare; iadedi jiaie rafuemo cue comecina jai facadicue. ⁹ Jusiñamuidi nana omoína cue baifemo faitatate raillanomo cue comecina facadicue. Cristo rafuena llorainidicaí; iadedi cue baifemo omoi faiamo cue comecina facadicue. Omoimona jamai bue isoidicaí. Nana comini duere cai illamo raise eruaidimaci. Jusiñamui jaienisaidi duere cai illamo jiai eruaidimaci. ¹⁰ Cristo rafuena cai llua muidona, omoimona ebe isoidicaí. “Cristo rafuena raise ñnuanona, iedo raise jaidicaí” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomoi. “Jiaie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi. ¹¹ Cai guille buedi jaca iñede. ñniroinidicaí. Jiaie comini caina duere finodimaci. Jofonidicaí. ¹² Cai ra ollena, cai onolli diga duere maijidicaí. Comini caina jeare ñaitimaci; iadedi ibana oñedicaí. Naimaci diga marena ñaiticaí. Caina duere finodimaci; iadedi uai oñeno ibana oñedicaí. ¹³ Cai joreña jeare ñaitimaci; iadedi cai dinena naimaci diga marena ñaiticaí. Naimacimona jamai bue isoidicaí. Iese caimo naimaci comeciai nia facadimaci; ia Cristo díbeimo ie rafuena nia llocana jaiacadicaí.

¹⁴ Bie carta cue cuiamona, omoína meirutaiacañedicue; ia omoína nia llofueiacadicue. Isiruiga uruiadomoi isoidomoi. Ie jira bie rafuena omoi raise uiñuana jitaidicue. ¹⁵ Omoína Cristo rafuena llofuellena, diga lloraini omoimo ite; iadedi cuemona Cristo rafuena omoi nano cacaja jira, omoi moo isoidicue. Cue uruiaina jai jaidomoi isoidomoi. ¹⁶ Ie jira omoimo cue llogacinodo mai omoi jai.

¹⁷ Iedo omoi jaillena, omoína canollena, omoi dine Timoteona jai oredicue. Naimiena isiruiticue. Naimiedi Cristo ie ñnogamie. Cuemona Cristo rafuena naimie cacajanona, iena ñnote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoína llofuede. ¹⁸ “Pablo caina jaciruilla jira, naimie cai dine biñeite” raillanomo omoi comeciaina facajamona, omoimona damierie jai abina biridomoi. ¹⁹ Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie isoide uai naie abina biridinomo illana uiñoiticue. Naimaci ñaiacinodo iena uiñoñeiticue; iadedi naimaci finoca rafuemono iena uiñoiticue. ²⁰ Ero, jamai ñaiamona, Jusiñamui anamo naimie jitailla isoi iñedicaí; iadedi naimie finoca rafuedo cai jaillamona, naimie jitailla isoi iticaí. ²¹ Omoi dine ico cue ria, ¿niese omoi diga ñaiticue? Cuemo llono. Cue lluana omoi ñnoñenia, omoimo riire lloiticue. Cue lluana omoi ñnoia, omoína cue isiruillamona, omoimo fecuise lloiticue. Ie jira cuemo llono.

5

Pablo eo jearede rafuena finodimiena riire llote

¹ Jiaie rafuena omoimo lloiticue. Eo jearede rafue omoi motomo jai illana jai fididicue. Jusiñamuina iñoñedino naie isoide rafuena finoñedimaci; iadedi omoimona damie ie eicañona ote, ie aina. ² Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunaiñedomoi? Omoi rocabillacomo naimie bia, naimie fo billana rairui. ³ Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue iñena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeticue; iadedi naie rafuena finodimiena cue ñaiana jai uiñoticue. ⁴ Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite. ⁵ Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico abido bia, naimiedi Cristo dibeimo dane raise illa jira, Cristo naimiena duere finoñeite.

⁶ Jearede rafue omoi motomo illa jira, ¿buena abina iedotomoi? Janorede siritate ra juilliruaimo faiamona, nana naie juilliruai siricana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa. ⁷ Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciáimo ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judíuai cominidi toica llaudaiai fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiñeno. ⁸ Cai facaina Cristo fiodailla jira, cai jeacinona fainonocaillanona, Jusiñamui jitailla isoi mai cai i. Jeacinona finocana cai jaiñelli. Unaicinodo mai cai jailli.

⁹ Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iñiaia diga itañaiñuai diga nabairiñellena lloticue. ¹⁰ Nibai iena raise cacaiñedomoi. Ie jira iena dane lloiticue. Cristona iñoñedinona ñaiñedicue. Naimaci aiñede riñoniai diga ia, naiñaiñuai iniñede iñiaia diga ia, naimaci rana nicidoia, rana naimaci fiia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganamo Jusiñamuina uiñoñedino illa jira, ¿ninomo niadedi iticai? ¹¹ “Cristona iñoticaia” raitinona ñaiticue. Naimaci aiñede riñoniai diga naimaci ia, naiñaiñuai iniñede iñiaia diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci fiicabia, naimaci diga nabairiñeno. Naie isoidino omoi jofuemo feiñoñeno. ¹²⁻¹³ Cristona iñoñedinona ñaiñedicue. Naimaci rafue cuemo duiñede; iadedi maraiñedinona naimaci finoia, Jusiñamui naimacina duere finoite; iadedi Cristona iñotino maraiñedinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

6

Cristona iñoñede juezmo jiaie creyentena llogidoño

¹ Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaia dine jaiñedomoi, naicinona siadollena? ¿Bue ñellena Cristona iñoñede juez dine naimiena meiruiñeno llogidotomoi? ²⁻³ Jesucristo abido bille mei, Cristona iñotinodicaia Cristona iñoñedinona duere sefuillena lloticaia. Taife comini duere sefuillicinona ico jiaia lloticaia. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi? ⁴ Nicino omoimo ia, ¿bue ñellena Cristona iñoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci. ⁵ Omoi meidallena, iena

omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena. ⁶ Iese finocabiñedomoi; iadedi nicino omoi creyentiaimo ia, Cristona inoñedimiemo jiaie creyentena llogidocabitomoi.

⁷ Jiaie creyentena omoi llogidoia, Cristo dibeimo raise inedomoi. Naicino raise omoi finoñenia, uai oñeno anamo ee. Naimiemona omoi duere sefuia, dama ite. ⁸ Iese inedomoi; iadedi dani conini jiaie creyentiaina duere finocabidomoi. Naimaci rana fiidomoi. Omoi amana duere finodomoi.

⁹ Jusiñamui sedajanomo naimiena inoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conio aifiedotino, ¹⁰ rana bainino fiicabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci. ¹¹ Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemona abina rairui

¹² Cristo dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuiñega rafue ite. Creyentia iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi. ¹³ Raitomoi: “Nie isoide guille cai guiacania, nie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. ¹⁴ Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

¹⁵ Cristomo jainaiaidicai. Iena uiñotomoi. Omoi ainiañede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. ¹⁶ Ie aiñede riño diga bu ia, ie ai illa isoi, jai dajena jaidiaimaiai. Ie jira Jusiñamui jiaie llote: “Riño diga iima illa jira, jai dajena jaidiaimaiai” llote. ¹⁷ Cai Nama Cristomo bu duia, dajena jai jaidiaimaiai. Jusiñamui Joreño iaimaiaimo illa jira, iaimaiai comeci daje isoi jai lloide.

¹⁸ Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie maraiñede rafue bu finoia, naimie abimo jearede rafue finoñede. ¹⁹ Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentia. Jusiñamuimo jai jainaiaidomoi. Ie muidona omoi jitaillacinodo jaiñeno. ²⁰ Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

7

Pablodi iima ie aina ua rafuena ñaite

¹ Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana jicanotomoi. Faidaima jaca dama iacania, cuemona mare. Faidaiño jaca daño iacania, cuemona jiai mare; ² iadedi jeacino omoi finoi raillano, nagamie ie aina otene, jiai mare. Nagañaiño ie inina otene, jiai mare. ³ Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina

caidiñena. ⁴ Naiñaiño abi dañõñede; iadedi dañõ ie ini abimo jiai duide. Naimie abi damañede; iadedi dama ie ai abimo jiai duide. ⁵ Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico comeci daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomo ramo fai raillano.

⁶ Dane lloiticue. Jeacinona omoi fñoi raillano, nagamie ie aina otena, mare. Nagañaiño ie inina otena, jiai mare. Iese omoimo lloticue; iadedi iese ocuiñedicue. ⁷ Ainidicue. Cue illa isoi omoi illana jitaidicue; iadedi daje isoñedicai. Jusiñamui caina itataja ñese iese iticai. Dajerie ainidimaci. Dajerie airedimaci. Dajerie ininidimaci. Dajerie iniredimaci.

⁸ Nia ainidinomo lloiticue. Nia ininidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare; ⁹ iadedi omoi ocuiñeniadedi, aina ono. Jiaie riño diga illemo o comecina facañellena, daje riñona ono, o aina. Jiaie iimamo o comecina facañellena, daje iimana ono, o inina.

¹⁰ Creyentiaimo nia lloiticue. Airedinomo lloiticue. Iniredinomo jiai lloiticue. Cue uaido lloñedicue; iadedi cai Nama jaie llote: “Riño ie inina sofeño. ¹¹ Iima ie aina sofeño” llote. Iese llote; iadedi ñie riño ie inina sofeia, jiaie iimana naiñaiño oñena. Iimana naiñaiño oiacania, ie ini diga dane abido illasa.

¹² Nia lloiticue. Cai Nama biena jaie lloñede; iadedi iena birui cue lloiticue. Omoi nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono. ¹³ Omoi nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiñoño llono. ¹⁴ Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iaimaiai uruiaia, jiaie creyente iaimaiai uruai isoi, omoi roracomo feiño. ¹⁵ Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aina creyenteñede ini sofeiacania: “Naimiema dotaño” naiñaiñoño llono. “Naimie jaillena rairuiño” naiñaiñoño llono. Sofeia mei, jai dajemo ñiñediiaimaiai. Jusiñamui naga creyente uri illana jitaide; ¹⁶ iadedi ie ini diga ie ai fiebia, ie ini creyentenamona, naiñaiño ñibai creyentena jaite. Ie ai diga ie ini fiebia, ie ai creyentenamona, naimie ñibai creyentena jaite.

¹⁷ Iena lloticue; iadedi Jusiñamuimona ie feiñoña uaido nagamie jailla. Creyentiaina omoi jailla facaiseconi, omoi maijjuilla ramo nia raise omoi maiji. Naga creyentiaia illanomo biena llofuecabiticue. ¹⁸ Nia creyentiaina omoi jaiñenia, judíuai isoi omoimona dajerie omoi abiaina detatatoimoi. Naie detatafuemo omoi comeciaina birui facañeno. Omoimona dajerie omoi abiaina nia detatañedomoi. Iemo omoi comeciaina birui facañeno; ¹⁹ iadedi Jusiñamui uaina omoi iñuamo omoi comeciaina birui faca. Jiaie rafue baifemo faite. ²⁰ Creyentiaina omoi jailla facaiseconi, omoi maijjuilla ramo nia raise omoi maiji. ²¹ Creyentiaina omoi jailla facaise omoimona dajerie patrón anamo itinodomo. Nia patrón anamo itino isoi omoi jai. Iemo omoi comeciaina jarire facañeno. Jaiñuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai. ²² Cristona omoi iñua facaise, patrón anamo omoimona damierie navui itomoi; iadedi Jusiñamui omoina fetode. Naimiema omoi iñuamona, omoi jeacino anamo jai iñedomoi. Patrón anamo omoimona damierie navui iñedomoi; iadedi Jusiñamui omoina fetode. Ie jira naimie anamo jai itomoi. ²³ Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie cominina jai jaidomoi. Ie jira comini jitaillacino anamo iñeno; iadedi Jusiñamui jitaillacino anamo i. ²⁴ Cue amatiaia, creyentiaina omoi jailla facaiseconi omoi maijjuilla

ramo nia raise omoi maiji. Jusiñamui omoina canuanona, jearede rana omoi maijiñenia, nie isoide rana omoi maijiia, Jusiñamuimona mare.

²⁵ Navui cuemo cartana oredomoi. Faidaiñuai illa rafuena uiñoiacadomoi. Cai Nama naie rafuena jaie lloñena jira, iena birui lloiticue. Naimie cuena duenaila jira, naimie uaina inoticue. Ie muidona comini inogamiedicue. ²⁶ Birui duere omoi sefuilla facaise illa jira, omoi illa isoi omoi i. ²⁷ Omoimona bu airenia, naiñaiñona dotañena. Bu ainia, dama ainide. Riñona oñena; ²⁸ iadedi o aina illena ininide riñona o otiodena, jeacinona finoñedio. Omoimona o inina illena ainide iimana o otiodena, jeacinona finoñedio; iadedi aina bu ua mei, inina bu ua mei, eo duere maijiite. Iese omoi duere sefuñellena, omoimo iena lloticue.

²⁹ Cue amatiai, biemo omoi comeciaina faca. Jesucristo abido dane billirui iairei ite. Naimie jitailla rafuena omoi raise finollena, omoi ainiaimo ite rafuemo omoi comeciaina facaja; iadedi Cristo rafuemo omoi comeciai eo facaja. ³⁰ Omoimona damierie sunaia, damierie caimare ia, iemo omoi comeciaina eo facañeno. Damierie raruaina ibaia, naieri eo iobiñeno. ³¹ Omoimona damierie bene ite rana ebiruitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

³² Omoi comeciai jarire iñenana jitaidicue. Nia ainidimie abi juarede, dama Cristo rafuena maijillena. Naimiena iobitaiacade; ³³ iadedi airedimie bene ite rafuemo ie comecina facade. Ie aina iobitaiacade. Naiñaiñomo ite rafuemo naimie comecina facade. Cristo rafuemo ie comecina jiai facade; ³⁴ iadedi mena rafuemo ie comecina eo facallemo abi juanide. Ininidiñaiño abi juarede, dañ Cristo rafuena maijillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

³⁵ Aina uana rairuiñedicue. Inina uana jiai rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaidicue. Dani Cristo rafuemo omoi comeciaina facajana jitaidicue.

³⁶ Ero, omoimona naiñaiño oiacaga iimamo ie moo, ie jisa caidiñeno fecaca. Naiñaiño jai moonaila jira, naiñaiño jitailla jira, naiñaiñona feca. Fecaia, ie moo jeacinona finoñede; ³⁷ iadedi inina naiñaiño oiacañenia, naimie comeci llumona, ie comecina eo facajamona, ie jisa fecaacaiñenia, jiai mare. ³⁸ Ie jisana fecaia, mare. Cristo rafuena naiñaiño eo maijillena, ie jisa fecañenia, jiai mare.

³⁹ Jiaie rafuena lloticue. Riño ie ini nia fioidañenia, naiñaiño naimiemo jaca duide. Ie ini fioidaille mei, jiaie iimana ie ini ifomo naiñaiño oiacania, mare; iadedi creyentidimiena naiñaiño ua. ⁴⁰ Naie feciñodi iimana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caimare iite.

8

Jusiñamuina eruaide jiraraimo llicisi fecaja rafue

¹ Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damierie naie isoide llicisi riana: “Maraiñede” raitimaci. Creyentiaimona Jusiñamuina eruaide jirarai jamai rana illa jira, damierie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie riia, jiaie creyentiaimo comecina facañede. Jiaie creyentiaina bu isiruia, naimacimo ie comecina facade. Cristo rafuedo jiaie creyentiai raise jaillana jitaide. ² “Eo abina uiñoticue” ie comecina bu facaia, nia eo raise abina uiñoñede; ³ iadedi Jusiñamuina ua cai isiruillamona, jiaie creyentiaina cai isiruia, jai abina uiñoticaí. Jusiñamui dinena caina jiai uiñotaacade.

⁴ ¿Niese Jusiñamuina eruaide jiraraimo fecaca llicisina ñaiticaí? “Jusiñamuina eruaide jirarai jaca cajeñenana uiñoticaí” raitomoi. “Jusiñamui jaca dajede. Iena uiñoticaí” raitomoi; ⁵ iadedi “Monamo diga sedalle ra ite” dajerie comini raitimaci. Jitomana

sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. ⁶ Iena sedacabidimaci; iadedi cai dani Jusiñamuina sedacabidicai. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

⁷ Jusiñamuina eruaide jiraraidi jamai rana nana creyentiai uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: “Naie jirarai sedadicaí” naimaci comeciaina facadimaci. Naie rafue naimaci raise uiñoña jira: “Jecinona finodicai” raitimaci. ⁸ Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai iñuamona caina feiñote. Buena cai riñenia, buena cai riia, jecinona finoñedicai. Naiemona marecinona jiai finoñedicai. ⁹ Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi riia, naimiemona jecinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo dibeimo raise jaiñeite. Abido danomo naimie dane jaite. ¹⁰ Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naiena jiai nia sedaiticue”. ¹¹ Omoi ama abido danomo jaia, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaite. ¹² Iese omoi finoia, omoi amana jecinona finotatomoi. Naimie comecina ocuiñoñañedomoi. Ie muidona Cristomo jecinona jiai finodomoi. ¹³ Cristomo jecino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina llorainidi naimaci jitailla rana jamai feiñua

¹ Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuenajaie fetua facaise cai Nama Jesúsna ciodicue. Creyentiaina omoi jailla jira, cai Nama facaina cue maijjiana uiñotomoi. ² Jiaie comini Jesucristo oretagamiedicuenanibai uiñoñedimaci; iadedi omoi iena uiñotomoi. Cristona omoi iñua jira, Jesucristo cuena oretajana uiñotomoi.

³ Cue llofuiacinona bu uaitaia, iese cue llofuiacinona riidoticue. ⁴ Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijñena motomona cuemo jamai omoi illa. ⁵ Cue ai cuemo itena, omoi dine naiñaño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatiaia macaria, omoi dine Pedro macaria, naimaci jitailla rana naimacimo jamai fecauidomoi. Ie jira, ¿niese cue jitailla rana cuemo jamai fecañeitomoi? ⁶ Jiaie llorainimo naimaci jitailla rana jamai fecacabidomoi; iadedi cue onolli diga cue maijjiana nibai nia jitaidomoi. Bernabé ie onolli diga naimie maijjiana nibai nia jitaidomoi. ⁷ Ero, soldadodi ie guille ibañede. Iena jamai feiñote. Naga illimo maijuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijja jira, cuena omoi nafuia, omoimo Cristo rafuena llocabiticue. ⁸ Jamai comini uaido naiena llofueñedicue; iadedi Moisés micori cugafuiaimona iena fueoticue. ⁹ Naimie micori jaie cuela: “Jusiñamui llore: ‘Jurareta trigo oni juillena saisiia, iemona ie guillesa, ie fuena maiñeno. Maiñenia, ie maijja fuemona guite’ llore”. Ie isoide. Omoi motomo cue maijja fuemona cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade. ¹⁰ Cristo rafuena cue llofuecabilla jira, cue llua fuemona cue jitailla rana jamai cue feiñua. Iemo ocuridicue. Ie isoide. Ie illimo bu maijja, naiemona riana ollena, nainomo maijide. Iemo ocuride. ¹¹ Omoi motomo Cristo rafuedo omoi raise jaillena, navui llofueticue. Ie jira cue jitailla raruia omoimona jamai cue ua. ¹² Omoimona raruiaia jiaie lloraini

feñocabilla jira, cuemona Cristo rafuena nano omoi cacaja jira, cue jamai jiai feiñua; iadedi omoimona raruiaina jicañedicue.

Cue jitailla raruiai cue ollena, cue onolli diga duere maijedicue. Ie jira nana cue jitailla raruiaina oñedicue. Cristo rafuena omoi cacaiacaiñeni raillano, omoimona raruiaina jicañedicue. Raruiaina cue jicaia, omoi comeciaina nibai facaitomoi: “Raruiai oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoimona raruiaina jicañedicue. ¹³ Ero, Jerusalémo judúuai comini Jusiñamuina sedauilla jofo ite. Nainomo naie comini toiniaina atiuidimaci, Jusiñamuimo fecallena. Moisés micori jaiie llua isoi, naimaci jeacino facaina toiniaina fajanona fecadimaci. Nainomo maijuuidino comini atica toiniaimona naimaci rillena, ibajanona ocabitimaci. Iena uiñotomoi. ¹⁴ Ie isoide. Cristo rafuena llorainidi naimaci rafuena innotinomona naimaci jitailla rana imaci ua. Cristo iena jai lote. ¹⁵ Omoimona raruiaina jaca jicañedicue. Raruiai birui cue ollena, bie cartana jiai cueñedicue. Dama cuemo ite ra diga iiticue. Omoimona iena feiñoticuedena, meiruioicaida feiñoticue. Omoimona cue feiñoñena jira, omoi facaina Cristo rafue cue llumona, abina iedoticue. Raruiai cuemo jamai omoi fecaia, ¿niese abina iedoiticue?

¹⁶ Jiaie lloraini rana feiñua isoi cue feiñoia, Cristo rafuena cue llumona abina iedoñeticue. Jusiñamui cuena oretaja jira, naie rafuena lloticue. Iena cue lloñenia, Jusiñamui cuena duere finoite. ¹⁷ Dama cue comeci jitaillamona Cristo rafuena cue lloiacania, Jusiñamuimona ibana feiñoiticue. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue. ¹⁸ Ie jira, ¿niese ibana feiñoiticue? Ibana nibai feiñoiticue; iadedi omoimo Cristo rafue cue lloia, cuemona mare. Omoimona cue jitailla rana cue oñenia, cuemona mare.

¹⁹ Omoimona raruiaina cue feiñoñena jira, omoi anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena cominina Cristo díbeimo cue itatallena. Iese jaiñedicuedena, eo janore comini Cristo díbeimo nibai jai itataticue. ²⁰ Judúuai comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo díbeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue. ²¹ Judúuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiai jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiai jaidicue. Cristo lloga uaido jiai jaidicue. Naimacina Cristo díbeimo itataiacadicue. ²² Naimaci diga cue nabairillena, Cristo rafuena nia raise inoñedino diga cue ia: “Omoi baifemo Cristo rafuena uiñoticue” raiñedicue. Naimacina iciacaiñedicue, naimacimo jeacinona cue finoi raillano. Naimacina cue isiruillamona, naimacina canoacadicue. Naimacina Cristo rafuena raise inuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibai inoitimaci”. ²³ Cristo rafuena ailluena comini inollena, iese jaidicue. Iena llocana jaidicue. Naimaci inua jira, iobidicue.

²⁴ Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena inocana mai cai jailli, ico Jusiñamui illanomo monamo ibana nana cai feiñollena. ²⁵ Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatcabite. Ibana feiñollena, iese finode. Ibana bu oia, dallu iobide. Ero, jeacinona cai finoi raillano, cai abiaina cai eenua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobiticaí. ²⁶ Riire aisiacadimie ebena aisiñede. Onolli diga mena iaimaiai jamai jifanoia, jafaicina jamai ducoiñediaimaiai; iadedi conimana ducoidiaimaiai. Ie isoide. Cristo rafuedo raise cue jiacania, jamai

ebena jaiñedicue; iadedi nana cue comecimona iedo jaidicue. ²⁷ Cue comecina raise sedadicue. Dama Cristo rafue anamo iacadicue. Dama iena ñnoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

10

*Jirara*ina sedañena rafue

¹ Cue amatiai, bie rafuena feitaño. Cai jaiagai micoriai finoca rafuemona fueoiticai. Egipto railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monailai ruica naimaci jaiacania, Jusiñamuidi naie monailai oni ñaijitate, safefodo nana naimaci ruica jaillena. ² Naie isoide rafue nana naimacimo suillanona, Moisés micori dibeimo raise duidimaci. Naimie anamo itabidimaci. ³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci. ⁴ Nainomo jinui jiai iñena jira, Jusiñamui llua jira, Moisés micori noficina butajamona, toide jinui nana jirodimaci. Naimaci nine macaria, Cristona cioiñedimaci; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide; ⁵ iadedi Jusiñamuina naimaci ñnoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fiodaitade.

⁶ Cai jaiagai finoca rafuemona cai fueua. Maraiñede jearede rafuena naimaci finua isoi ebruiño. Abimo omoi oño. ⁷ Jusiñamuiñedimiena sedaño. Cai jaiagaimona damerie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo guitimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oño. Jusiñamuiñedimiena omoi sedaño. ⁸ Naimaci jearede rafuena finodimaci. Naimacimona damerie naimaci aiñede riñoñiai diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oño. ⁹ Cai jaiagaimona damerie Jusiñamui Joreñoña ñaitimaci. Naimaci guisoiga radi Jusiñamuimona bite. Naiena ñiamona, Egiptomo ite guillemo comeciaina facadimaci. Ie muidona naimiena riicaitadimaci. Ie jira Jusiñamuidi jaioniaina naimacina ainitate. Iemona ailluena fiodaitimaci. Naimaci finoca rafue isoi abimo cai oño. Jusiñamuina riicaitaño. Cristona cai nia ñnoñena facai finoca rafuemo cai comeciaina facaño. ¹⁰ Cai jaiagaimona damerie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oño. Jusiñamui facaina lloraini joreñuaina cai ñaiño.

¹¹ Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai finoi raillanona. ¹² Naie isoide rafue omoimo suiñellena, omoi abiaina rairui. Omoi comeciaina nibai facadomo: “Cristona cai eo raise ñnua jira, iena finoñeiticai” comeciaina facadomo; iadedi omoi abiaina omoi rairuiñena, jecinona finoitomo. ¹³ Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi ñnogamie. Ie muidona omoi comeciaini ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi ñnoñellena, Jusiñamuidi omoina canoite.

¹⁴ Cue amatiai, Jusiñamui omoina canuamona, Jusiñamuiñedimie facaina finoca rafuemona oni i. ¹⁵ Abina uiñotomo. Ie jira omoimo cue lluacinona omoi cacaja mei, iemo omoi comeciaina omoi faca. ¹⁶ Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruamona, janore llomenicono guiticai. Jusiñamuimo iobillacinona nano fecadicai. Ie mei janore vino jirodicai. Iena cai jiruamona, Cristona cai nabailana uiñotocai. Cruzmo Cristo fiodailla jira, naimiena nabaidicai. Naie facaise llomenicono cai tairuñuamona, naimiena cai nabailana uiñotocai. Cristo fiodailla jira, iese iticai. ¹⁷ Diga creyentiaidicai; iadedi daje

llomenicomona jaca guiticaí. Daje llomenicomona cai guilla jira, dajena Cristomo cai duillana uiñoticaí.

¹⁸ Ero, judíuai railla comínimona cai fueua. Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. ¹⁹ Omoi illanomo Jusiñamuina ñnoñedinodi Jusiñamuina eruaide jiraraimo guillena fecacabidimaci. Cai creyentiaidicaimona naie guilledí jamai guille. Naie jiraraidí jamai ra. Cajeñede; ²⁰ iadedí Jusiñamuina ñnoñedinomona jamai rañede. Naimacimona nanoca ra. “Iemo rille cai fecajia, cai moona sedadicaí” raitimaci; iadedí naie ramo naimaci comeciaína facañedimaci; iadedí imaci moomo comecina facadimaci. Ero, Jusiñamuiñedimiemo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci díga omoi jaia, Taife díga jai nabairitomoí. Taife díga omoi nabairillana jitaiñedicue. Taifemo omoi duillana jitaiñedicue. ²¹ Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoí. Comini rafue díne omoi jaillamona, Taifena nabaidomoí. Cristo díga, Taife díga, daje facaina nabairinidomoí. Iese omoi finoia, maraiñede. ²² Iese omoi finoia, Jusiñamuina jai iciritaitomoí. Naimiena omoi iciia, ¿niese naimie riicaillafuemona jilloitomoí? Jaca jilloñeitomoí.

Jiaie creyentiaína canocana cai jailla

²³ Ero, Jusiñamui díbeimo omoi illa jira, ¿niese dani omoi jitaillacinodo jaiacadomoí? Díga Jusiñamui rairuiñega rafue ite. Creyentiaí iena finorede; iadedí dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo díbeimo itatañedicai. Iena cai finoia, cai amana Cristo rafuena ñnotacana jaiñeiticaí. Naimiena ramo faicana uitataticaí. ²⁴ Omoimona nagamie dama naimiemo ite rafuemo comecina facañena; iadedí naga jiaie creyentemo ite rafuemo ie comecina jiai facaja.

²⁵ Ero, ninena o llicisina omoi ibaia, Jusiñamuiñedimiemo naie llicisina fecajana jicanoñeno; iadedí jicanoñeno iena jaricitaiñeno rino. ²⁶ Iena David micori jaie cuega: “Jusiñamui bie eniruena finode. Nana rana finode. Cai guillena, cai guille rana nana comuitaga” cuega. Ie jira ¿niese fimaiticaí? Naimie mare finoca rana cai riia, jeacinona finoñedicai.

²⁷ Ero, naimie díga o guillena Cristona ñnoñedimiedi ona uaidoia, naimie díne o jaicania, naimie díne guisai. Nana omo ecaja guillena guiño. Jamai uainino guiño. “¿Ninena ibadio bie llicisina?” jicanoñeno. O comeci jarire finoñeno; ²⁸ iadedí Cristona raise ñnoñedimie nainomo jiai guitemo, omo lloia: “Bie llicisidí Jusiñamuiñedimiemo jai fecaca llicisí”, iena o riñeno. Iena o riia, Cristona raise ñnoñedimie comecina facaite: “Jeacinona finodio. Taifemo fecaca llicisina ritio. Creyentedimie iena riñede” comecina facaite. O isoi naie llicisimo naimie comecina facañede. O raitio: “Naie llicisidí jamai llicisí” raitio; iadedí naimie raite: “Naie llicisí Taife ie” raite. Ie jira naie creyentena o canollena, naiena riñeno. ²⁹ Naimie comecina facajacinodo cai jaiñenamona, nana Jusiñamui comuitaga guillena guiredicaí; iadedí Cristona nia raise ñnoñedimiemona nana guinidicaí; iadedí naimie comecina facajacinodo jaiñedicai. ³⁰ Cai guia, Jusiñamuimona naie guille comuitaja jira, Jusiñamuimo iobillacinona fecadicaí; iadedí cai guillamona damierie cai joreñona ñaiamona, iena guiñeiticaí. ³¹ Omoimo iena nia lloiticue. Nie isoide rana omoi guia, nie isoide rana omoi riia, nie isoide rana omoi jiroia, nie isoide rafuena omoi finoia, naieri Jusiñamuina iobita. ³² Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotinona jiai canocabi, naimaci abido danomo uaiñellena. ³³ Buena cue finoia, nana cominimo cue comecina facadicue. Ie jira nagarui cue jitaillacinodo jaiñedicue; iadedí Cristo rafuena naimaci ñnollena, nana cominina canocana jaidicue.

11

¹ Cristo lloga rafuedo jai jaidicue. Cue isoi omoi jai.

Roracomo riñoniai illa rafue

² Cuen a nia feitañedomoi. Cristo oretagano jai e llogacinona omoina llofueticue. Cue llofueuillacinodo nia jaidomoi. Ie jira omoi iobidicue; ³ iadedi jiaie rafuena nia lloiacadicue. Cristo ie Moo anamo ite. Naga iima Cristo anamo jiai ite. Nagamie ai ie ini anamo ite. Omoi afemo itino uaina omoi iñoñenia, maraiñede. ⁴ Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo iniroina bicuano jailla. Iese naiñaiño bicoñenia, ie ini anamo naiñaiño iñede isoi eruaide. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide. ⁵ Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaitade. ⁶ Nie riño ie ifogimo iniroi bicoñeno jaia, iima isoi eruaillena, ie ifogidi rijiruda gareca. Iemona naiñaiño meidailamona, ie ini anamo illamona, ie ifogimo iniroina bicuano naiñaiño jaite. ⁷ Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Iimana naimie finuamona, naimiena cai iobitajamona, Jusiñamui cai afemo illana uiñoticaí. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla. ⁸ Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide. ⁹ Naiñaiño anamo illana naimie comuiñede; iadedi naimie anamo illana naiñaiño comuide. Naimie uai inollena, naimiena canollena, naiñaiño comuide. ¹⁰ Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiño naimaci ciuanona, Jusiñamui jaienisaímona jiai mare. ¹¹ Naga riño ie ini anamo ite; iadedi Cristona cai inua jira, riño baifemo iimadi faiñede. Iima baifemo riño jiai faiñede; iadedi daimaii conimana iaímaiai canua. Cristo naga iimana, naga riño daje isoi feiñote. ¹² Naga comini Jusiñamui comuitaga. Nano facaiseconi Adán micorimona Eva micorina jai comuitate; iadedi birui naga iima riñomona comuide.

¹³ Biemo omoi comeciaina omoi faca: Omoi roracomo Jusiñamui diga nie riño ñaia, omoi einamaci finocabilla isoi, ie ifogina bicoñeno jaia, ¿niese omoi comeciadi raite? Cue comeci: “Maraiñede” raite. Ie ini anamo naiñaiño iñedena eruaide. ¹⁴ Nana omoi biesedena raicabitomoi: “Nie iima ie ifotirai eo areniadedi, cai cominimona maraiñeno cide; ¹⁵ iadedi nie riño ifotie eo arenia, mare” raicabitomoi. Naiñaiñuai ieri iobidimaci. Jusiñamui iena scotajamona, naiñaiño ifotie ie ifogina raise ibaide. ¹⁶ Iena jaca llofuecabiticue. Jiaie creyentiai illanomo cue isoi comeciaina lloidimaci. Omoimona bu cue llogacinona uaitaia, damamei ite.

Cristo fiodailla rafuena raise comeciñedimaci

¹⁷ Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena inocana jaiñedomoi; iadedi naiemona maraiñede rafue comuide. ¹⁸ Rollena omoi oficabia, omoi comeciaina daje isoi lloinana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñiacadicue. Omoi oficabia, nagamiai guillena aticabidomoi. Mare; iadedi danomo guiñedomoi. Omoimona damerie ucuberena jira, dueredino diga guiacaiñedomoi. Omoi guille caididomoi. ¹⁹ Omoi iese illana jitañedicue; iadedi daje isoi omoi comeciaina lloinamona, Jusiñamui dibeimo raise itinodi uiñoga. Omoimona damerie danomo omoi guillamona, Jusiñamuina omoi isiruillana uiñoticaí. ²⁰ Cristona sedallena omoi oficabia, guitomoi; iadedi vino jiruanona, llomenicono guillanona, cai Nama fiodailla rafuena raise comeciñedomoi. Maraiñede rafuena omoi finua jira, iena nia lloiticue. ²¹ Nagamiai guillena aticabidomoi. Dani coniniri raise guiñedomoi. Danirie omoi atica guillena guitomoi. Jainona guillena iñedomoi. Damerie omoimo ailluena guille ite. Damerie omoimo guille raise iñede. Jainona guillena omoi iñena

jira, damierie jaca aimetaitimaci; iadedi jiaino monidimaci. Damierie guilla motomo jiai jifaidimaci. Conini nabaiñedomoi. Ie jirari Cristo fiodailla rafuena raise comecinidomoi. ²² Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiaïnomo guille feacaaiñedomoi? Jiaie creyentiaina omoi isiruiñenamona, Jusiñamuina jiai isiruiñedomoi. Janore guille itinona duere finodomoi, naimacina omoi eacaaiñena jira. Iese omoi illa jira, omoiri iobiñedicue.

Cristo fiodailla rafuena llofuiacino

²³ Navui omoïna biena llofueticue; iadedi omoi raise iinoñena jira, iena dane llofueticue. Cai Nama iena cuemo jaielote. Cai Nama Jesús ie gaitatarui facaiseconi, ie llofueoicaigano diga ia, naimaci guia, llomeniconona llinote. ²⁴ Iena llinuanona, Jusiñamuimo iobillacinona fecade. Ie mei iena tairuanona raite: “Mai, biena guiño. Bie llomenicodi omoi guillamona, cue fiodaillana omoi comeci. Cue fiodaillamona omoi jeacinomona jilloitomoi. Biena omoi guillamona cuena comeci. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci. ²⁵ Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisemona cominina imaci jeacino facaina Jusiñamui duere finoñellena, toiniaina atiuidimaci, naimiemo fecallena”. Iemo ie comecina facajano, raite: “Cue fiodaillamona, dama cue diaillamona, Jusiñamuidi omoïmo jiaie rafuena birui lloite. Omoi jeacinona oni dotajana lloite. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raite. Ie mei jirodimaci. ²⁶ Naga icaiño Cristo facaina llomeniconona omoi guia, Cristo facaina vinona omoi jiroia, omoi jeacino facaina cai Nama fiodaillana uiñotomoi. Naimie nia abido dane bille dinori naiena comeci.

Cristo fiodailla rafuena raise comeciadicai

²⁷ Cristo fiodailla rafuena raise comeci. Naie llomeniconona Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie iinoñena jira, Cristomo jeacinona finode. ²⁸ Jeacino omoi comeciaino illamo omoi comeciaina faca. Jeacino omoi comeciaino ia, iena guiño. Iena jiroño. Jeacino omoi comeciaino iñenia, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro. ²⁹ Jeacino naimie comecimo nia illamona, iena guia, iena jiroia, maraiñede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiema duere finoite. ³⁰ Ie muidona omoïmona ailluena irareside. Ie jira omoïmona damierie fiodaite. ³¹ Cai comeciaina raise cai facajamona, jeacinona cai fainonocaia, Jusiñamui caina duere finoite. ³² Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiema iinoñedinona duere finoite. Naimaci diga cai duere sefuiñellena, birui caina duere finode.

³³ Cue amatiai, Cristo fiodailla rafuena omoi comecillena omoi ofia, daacaiño omoi guillesa, jiaïno riñedinona seda. ³⁴ Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñenia, Jusiñamui omoïna duere finoi raillano, jofomo guiño. Nana naie rafuena nia lloñedicue; iadedi omoi dine dane cue ia, iena lloiticue.

12

Cristo facaina raise maijillena, Jusiñamui Joreño naga creyentena canode

¹ Cue amatiai, jiaie rafuena cuemo jai jicanotomoi. Iena ja ñaiticue. Jusiñamuimona diga uaina feiñoticaï. Naimiemona naimie facaina maijia uaina feiñoticaï. Naimie facaina cai maijillena, jiaie creyentiaina cai canollena, naimiemona cai oga uaina ñaiticue. Iena omoi raise uiñuana jitaïdicue.

² Ero, Cristona nia omoi iinoñenia, Jusiñamuiñedimiede jiraraina sedauidomoi. Iedo jaietainodo jai-jaisoidomoi. Taife iedo omoïna jifueete. ³ Ie jira biena omoi raise uiñuana

jitaidicue. Jusiñamui Joreño uaido nie creyente ñaia, Jesús Joreñoña jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiñeno.

⁴ Jusiñamui Joreño caimo jai illa jira, Jusiñamui Joreñomona cai maijia uaina oticai. Naga creyente daje isoi oñedicaí. ⁵ Naga creyente Cristo facaina daje isoide uai diga maijiñedicaí; iadedi Cristo facaina nana maijidicaí. ⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena. ⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticai. ⁸ Damierie creyentemo Cristo rafue jino lolle uaina itatate. Damierie creyentemo Cristo rafue llofuelle uaina itatate. ⁹ Damierie creyentemo Jusiñamui siño rafue finuana ñnotaja uaina itatate. Damierie creyentemo duidinona jillotaja uaina itatate. ¹⁰ Damierie creyentemo siño rafuena finua uaina itatate. Damierie creyentemo jino lolle uaina itatate. Naimacimo Jusiñamuidi ie rafuena llocabite, jiaínomo jino lollena. Dajerie creyentemo uaina itatate, nie isoide uaido Cristo rafuena railla lloraíma lluaña uiñollena. Jusiñamui Joreño uaido nie lloraíma lloia, iena uiñote. Taife uaido nie lloraíma lloia, iena jiaí uiñote. Damierie creyentemo naimaci uiñoñega uaido ñaia uaina itatate. Damierie creyentemo naie uiñoñega uai oni dobaíñolle uaina itatate, comini iena raise uiñollena. Iena naimaci nia dobaíñoenia, iena jiaí raise uiñoñedimaci. ¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicaí

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicaí; iadedi dajena Cristomo duidicaí. ¹³ Dama Jusiñamui Joreñodi dajena Cristomo nana creyentiaidicaí; iadedi dajena Cristomo duidicaí. Dajerie judúuaidicaí; dajerie judúuaiñedicaí; dajerie patrón anamo iticai; dajerie patrón anamo iñedicaí. Diga nairaiaidicaí; iadedi dajena Jusiñamui Joreñoña nana feiñoticai.

¹⁴ Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicaí; iadedi Cristo facaina dajena maijidicaí. ¹⁵ Ero, cai abimona cai eilli ñibai facaite: “Onolli isoíñedicue. Onolli cue baífemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baífemo faíñede. Dafaconi ite. ¹⁶ Ero, cai jefo ñibai facaite: “Uisi isoíñedicue. Uisi cue baífemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baífemo faíñede. Ie isoide. Dajena Cristomo omoi duilla jira: “Jiaímie baífemo iticue” raiñeno. Jiaie creyentena abina uradoíñeno. ¹⁷ Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticaí? ¿Niese niadedi ra sorillana cacadicaí? Ie isoide. Dajena Cristomo omoi duilla jira, naga creyentena jitaidomoi, Cristomo dajena ñnocana omoi jaillena. Jiaie creyentena uaitañeno. ¹⁸ Jusiñamui cai abimo diga rana comuitate. Naimie jitailla isoi, cai abimo naga rana comuitate. ¹⁹ Cai abimo diga ra iñedena, ¿buedo cajeniticaí? ²⁰ Diga ra cai abimo ite; iadedi jaca dajede cai abi.

²¹ Rana cai cioillena, cai uisi ite; iadedi cai onolli iñedena, cai ciua rana llinonidicaí. Ra feitañellena, cai comeci ite; iadedi cai eilli iñedena, macarinidicaí. Ie isoide. Cristomo dajemo cai duilla jira, naga creyentena dajena ñnocana jaillana jitaidicaí. Jiaie creyentemona abina iedoñeno. ²² Naga cai abimo ite rana jitaidicaí, raise cai illena. Naga cai abimo ite ra jiaie ra baífemo iñede. Nana daje isoi itena, mare; ²³ iadedi dajerie ra ebire eruaillena, cai abi jifollena, ñiroina jitadicaí. Meiruiñellena, cai abi bainillena, ñiroina jiaí jitadicaí. ²⁴ Cai uiecomo meiredino iñena jira, iena jifoñedicaí. Ero, Jusiñamui cai abina finode. Dajerie ra jiaie ra baífemo iñede. ²⁵ Jusiñamuidi naga cai abimo ite ra dajena maijiana itatate. Dajena maijicana jaide. ²⁶ Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidicaí. Ie isoide. Cristomo

dajena duidicai. Jiaie creyente duere sefuia, naimiena cai canoia, Cristo dibeimo caimare marena iticai. Naimiena cai canoñenia, caimare marena iñedicai.

²⁷ Ero, caidi naimie cominina jira, Cristomo dajena nagasaiai duidicai. ²⁸ Ie jira Jusiñamuidi naimiena inotinomona damieriena nano fetuanona, Cristo naimacina oretate, ie rafuena lollena. Ie mei jiaionona fetode, naimacimo ie rafuena llua mei, jiaionomo ie rafuena jino lollena. Jiaionona fetode, ie rafuena llofuellena, cominina ie rafuena raise uiñotallena. Jiaino ie uaina itatate, naimie facaina naimaci maijillena, jiaie creyentiaina naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena. ²⁹ Ero, Jusiñamui nana omoina fetoñede, ie rafuena jino lollena. Damieriena fetode. Nana omoina fetoñede, ie rafuena llofuellena. Damieriena fetode. Nana omoina fetoñede, siño rafuena finollena. Damieriena fetode. ³⁰ Nana omoina fetoñede, duidinona jilloitallena. Damieriena fetode. Nana omoina fetoñede, omoi uiñoñega uaido ñaillena. Damieriena fetode. Nana omoina fetoñede, naie uiñoñega uai jino dobaiñollena. Damieriena fetode. ³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoimo illena, Jusiñamuimo jica; iadedi jiaie rafuena omoi ollena, omoimo lloiticue. Nana jiaie rafue baifemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uiñoñega uaido ñaia uaina cai ñaia, Jusiñamui jaienisaí isoi cai ñaia, cominina cai isiruiñenia, jamai ñaiafuena ñaiticai. ² Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia, nana Jusiñamuimo ite rafuena cai uiñoia, Jusiñamui siño rafuena finuana cai eo inoia, cominina cai isiruiñenia, Jusiñamuimona jamai bue isoidicai. ³ Jiaie cominina cai canollena nana caimo ite rana cai fecaia, Cristo rafuena cai lollena cai niadi fiodiacania, cominina cai isiruiñenia, jaca buena oñedicai. Jusiñamuina jaca iobitañedicai.

⁴ Cominina cai isiruia, naimaci diga raire iciriñedicai. Naimacina canocabidicai. Naimaciri abina uradoiñedicai. Abina birioicaiñedicai. ⁵ Cominina cai isiruia, abina iedoñedicai. Naimacimo cai comeciaina facacabidicai. Cai rana caidicabiñedicai. Naimaci diga iciricabiñedicai. Naimaci caina jeare finoia, ibana ocabiñedicai. ⁶ Cominina cai isiruia, naimaci jeare finoca rari iobicabiñedicai. Naimaci uanai mare finoca rari iobicabidicai. ⁷ Cominina cai isiruia, naimaci caina duere finoia, ibana ocabiñedicai. Cai joreña bu ñaia, caina taino lloia, iena inocabiñedicai. Cai marena illamo ocuridicai. Cai comeciaina ocuiñocana jaidicai.

⁸ Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite. ⁹ Nana Jusiñamui caina uiñotagacinona nia raise cacaiñedicai. Nana Jusiñamui rafuena nia raise jino lloñedicai; ¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiena raise uiñoiticai. Naimiemo ite rafuena jiaí raise uiñoiticai.

¹¹ Jiaie rafuedo iena llofueticue. Jaie nia cue uruenia, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fañonocaidicue. Eimie comecina facajacinodo birui jaidicue. Urue isoi Jusiñamui rafuena birui janore uiñoticaí; iadedi monamo cai ia, eimie isoi iena raise uiñoiticai. ¹² Ero, jacaie acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicai. Iena raise cacaiñedicai; iadedi Cristona ico cioiticai. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uñua isoi, jiaí raise uiñoiticue. ¹³ Ja muidomo lloiticue. Jesucristo

billanona, Jusiñamui Joreñomona caimo ite uaidi saite; iadedi Jusiñamui llogacinodo jai abina ñnoticaí. Naimie llogacino suillemo jai ocuridicaí. Jusiñamuina caí isiruillamona, jiaie cominina jiaí isiruiticaí. Naie isiruillacino jiaicino baifemo faite. Ie jira coninina isiruicana omoi jai.

14

Omoi uiñoñega uaido omoi ñaia rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido. ² Ero, omoi uiñoñega uaido ñaia uaina omoi ñaicabia, jaca buna omoína cacaiñena jira, cominina canollena ñañedomoi; iadedi Jusiñamuina iobitallena ñaitomoi. Omoi uiñoñega rafuena omoi comeciámona ñaitomoi. ³ Jusiñamui rafuena jino omoi lloia, cominina canodomoi. Naimacina Jusiñamuina ñnotadomoi. Naimie díbeimo raise itatatomoi. Naimaci comeciáina ocuriñotadomoi. ⁴ Nana creyentiáina canodomoi; iadedi naie uiñoñega uaido omoi ñaia, dani omoi comeciáina canodomoi.

⁵ Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiaí iena raise cacareillena, iena omoi oni dobaiñoia, cuemona jiaí mare. Ie mei naie ñaiámona, Jusiñamui rafuena naimaci cacajamona, creyentiáina canodomoi. ⁶ Cue amatiaí omoi díne cue jaiacanana uiñotomoi. Omoi díne cue ria, cue uiñoñega uaido cue ñaiticuedena, omoína canoñedicue; iadedi Jusiñamui cuemo jai lloga rafuena omoímo cue lloticuedena, omoína canodicue. Jusiñamui rafuena raise cue jai uiñua jira, omoína cue llofueticuedena, omoína jiaí canodicue.

⁷ Ero, quena jamai tainuaido bu fia, ie figana uiñoñedicaí. Guitarra bu jamai tainuaido taia, ie taillana uiñoñedicaí. ⁸ Ejércitomo trompetana jamai tainuaido fia, soldadauí maijillena raise uiñoñedimaci. ⁹ Ie isoide. Caí cacaiñena uaido omoi ñaia, omoi ñaiana uiñoñedicaí. Iese omoi ñaia, jamai tainona ñaite isoi cacadicaí. ¹⁰ Eo ailluena nairaiáí ite. Naga nairai ie uai ite dani naimaci ñaillena; ¹¹ iadedi nie nairai ie uaina cue uiñoñenia, naimacimona jiaie nairai imiána eruaidicue. Cuemona naimaci jiaie nairaina eruaidimaci. Conini díga ñaiana cacaiñedicaí. ¹² Ie isoide. Jusiñamui Joreñomona bite ñaia uaina omoi eo jitaillanona, díga uaina Jusiñamuimo jica, dani conini Cristo rafuena ñnocana omoi jaillena. Jusiñamui Joreñomona dani daje uaina nicidoñoeno; iadedi nana nicido.

¹³ Ie jira ie uiñoñega uaido bu ñaia, ie oni dobaiñua uaina naimiemo illena, jiaie creyentiaí iena cacaillena, Jusiñamuimo jicaja. ¹⁴ Jusiñamui díga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue. ¹⁵ Ie jira, ¿niese cue nibaille? Jusiñamui díga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui díga jamai cue uaido jiaí ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiaí roiticue. ¹⁶ Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omoína cacaiñedino: “Jee” raitimaci? ¹⁷ Iobillacinona Jusiñamuimo raise fecadomoi; iadedi omoína cacaiñedinona Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ñañeno. ¹⁸ Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; ¹⁹ iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona marañede.

²⁰ Cue amatiaí, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciáina facañedomoi. Omoi abina jai uiñuamona, jiaie uaimo omoi comeciáina faca. ²¹ Jusiñamui facaina lloraima micori jiaie cuega: “Jusiñamui llote: ‘Cue comini díne jiaie nairaina cue oretajamona, cue cominina cuena ñnotallena,

naie jiaie nairai uaido cue cominimo lloiticue; iadedi iena jitaiñeitimaci. Cuenajaca uiñoñeitimaci' llote". ²² Ie isoide. Uiñoñega uaido omoi ñaiamona, Cristona ñinoñedino iena raise cacaiñedimaci; iadedi Cristona ñinotino iena cacadimaci. Iemona fueotimaci. Jusiñamui rafuena omoi llofuiamona, Cristona ñinoñedino iena cacajamona, Cristona ñinoñedimaci; iadedi Cristona ñinotinona canodomoi. ²³ Danomo nana omoi ofia, omoi uiñoñega uaido nana omoi ñaia, Cristona ñinoñedino iena cacajanona, omoina; "Uairico" raitimaci; ²⁴ iadedi omoi ofia, Jusiñamui rafuena omoi jino lloia, iena Cristona ñinoñedimie cacajamona, naimiedi jeacino naimie comecimo illana uiñoite. Naie rafue naimiemo riire baite. ²⁵ Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina ñinoite. Ie muidona raite: "Uanai, Jusiñamui omoi motomo ite".

Roracomo omoi ia, raise marena omoi i

²⁶ Cue amatiai, rollena omoi oficabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo dibeimo creyentiaina raise itatallena, nana omoi finua rafuena raise fino. ²⁷ Uiñoñega uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñoite. ²⁸ Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. ²⁹ Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino billana uiñuanona llua. ³⁰ Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire lliicailla. Iemei jiaimie lloite. ³¹ Iese damierie nana lloitomoi, naie lluaamona Jusiñamui rafuena raise omoi uiñollena, omoi comeciai jiai ocuiñollena. ³² Naga llotimiedi ie uiñua diese lluaana uiñote. Ie jira jiaimie nia lloia, iena cacarei. Iemei jiaimie llua. ³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

³⁴⁻³⁵ Jiaie creyentiai illanuaimo isoi omoi roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jai llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, maraiñede, nainomo ite jino lloraima uaina naiñaiñuai raise cacaiñena jira.

³⁶ ¿Niese cue llucinodo jiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena llote. ³⁷ "Rafuena Jusiñamui cuemo llote" omoimona ie comecina bu facaia, "Jusiñamui Joreño ie ñaia uaina cuemo itatate" ie comecina bu facaia, "Cai Namamona ite uaina omoimo cueticue" naimiedi uiñote; ³⁸ iadedi naimie iese uiñoñenia, Jusiñamui Joreñomona naimie uai iñenana uiñoiticaia.

³⁹ Cue amatiai, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiai ñaia, iena rairuiño. ⁴⁰ Omoi ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amatiai, iena omoi feitañellena, bie rafuena dane lloiticue. Cristo ie mare rafuena omoina navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena ñinocana jaidomoi. ² Naiena omoi ñnuamona, Jusiñamui omoi jeacinomona omoina jillotate. Naiedo nia omoi jiaia, iena raise omoi ñnoia, jai jillobidomoi.

³ Nanoca rafuena omoína llofueticue. Jiaie creyentiaimona buena jai cacadicue. Jusiñamui facaina lloraini micoriai jai euegafuiai isoi cai jeacino facaina Cristodi fodaite. ⁴ Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriai jai llua isoi. ⁵ Ie mei Pedro naimiena ciode. Ie mei ie once llofueoicaigano naimiena ciodimaci. ⁶ Ie mei quinientos naimiena innotino naimiena daruido ciodimaci. Naimacimona damierie jai fiodaitimaci; iadedi ailluena nia fiodaiñedimaci. Cristo jilluana uinnotimaci. ⁷ Ie mei Jacobo naimiena ciode. Ie mei nana ie oretagano naimiena ciodimaci.

⁸ Ie mei naimiena jiai ciodicue. Ie jira fiodaillamona naimie jilluana uinnoticai. Ie doce llofueoicaigano fetua mei, diga años illanona, naimiena nia eue uinoñena facaise cuena fetode. Ie mei ie rafuena eue lollena, cuena oretate. ⁹ Ailluena creyentiaina jai eue duere finua jira, nana jiaie Cristo oretagano eue baifemo faitimaci. Jamai bue isodicue; iadedi Cristo cuena fetode. ¹⁰ Jusiñamui cuena duenailamona, Cristo oretagamiena jaidicue. Jusiñamui cuena jamai tainomo duenaiñede. Nana jiaie Cristo oretagano baifemo Cristo rafuena llofuecabiticue. Dama eue comecimona llofuecabiñedicue; iadedi Jusiñamui cuena canuamona, iese llofuecabiticue. ¹¹ Jiaie oretagano Cristo rafuena llofueia, iena eue llofueia, daje isoide rafuena llocana jaidicai. Naie rafuena omoi cacajamona, iena innotomoi.

Fiodaillamona nana creyentia ico jilloitimaci

¹² Fiodaillamona Jusiñamui Cristona jillotajana llofuecabiticai; iadedi omoimona dajerie raitomoi: “Fiodaillamona, nana comini imaci abiai diga ico jilloñeitimaci”. ¹³ Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede. ¹⁴ Cristo jilloñenia, Cristo rafuena jai tainona lloticai. Naie rafuena jiai tainona innotomoi. ¹⁵ Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiaina ico Jusiñamui jillotañenia, Cristona jiai niade jillotañede. Jusiñamui rafuena tainona jai llofueticai. ¹⁶ Fiodaillamona nana creyentia ico jilloñenia, Cristo jiai jai jilloñede. ¹⁷ Cristo nia jilloñenia, naimiena tainona innotomoi. Jusiñamui omoi jeacinona niadedi oni dotañede. ¹⁸ Cristona inuanona jai fiodaitinodi jiai jai faifidimaci. Jusiñamui illanomo jaca inñeitimaci; iadedi iraimo jaca iitimaci. ¹⁹ Nana cai ille dinori dani Cristo caina jilloitallemo cai ocuria; iadedi naimie jilloñenia, jai duere iticai. Jai tainomo ocuridicai.

²⁰ Ero, tainomo ocuriñedicai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fodaite creyentia jiai jilloitimaci. ²¹ Adán micori jeacinona finua jira, fodaite. Fiodaillamona jilloñede. Jeacino naimie finua jira, fodaicana jiai jaidicai; iadedi fiodaillamona Cristo jai jillua jira, fiodaillamona ico jiai jilloiticai. ²² Adán micorimona cai comuilla jira, nana fodaicana jaidicai; iadedi Cristomo cai duilla jira, jilloiticai, naimie diga jaca cai illena. ²³ Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloiticai. ²⁴⁻²⁵ Ie mei naimie dinena nana naimie dibeimo inñedinona anafefitaite. Nana naimie dibeimo inñede joreñuaina jiai anafefitaite. Illaimana Cristo illamona, nana naimie dibeimo inñedinona anafefitaite. “O uai cuemo o illamona, nana o jitailla rafuena jai fuidodicue” ie Moomo lloite. ²⁶ Nana naimie dibeimo inñedino naimie anamo jai illa mei, Cristo muidona naimie comini jai jilluamona dane fiodaiñeitimaci. ²⁷ Jusiñamuidi nana cominina Cristo anamo itataite. Ie muidona creyentiaidicai dane fiodaiñeiticai; iadedi Cristo anamo Jusiñamui inñeite. Cristona oretaja jira, Cristo anamo Jusiñamui inñede. ²⁸ Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiena jira, nana naimie finoca ra naimie anamo iite. Nana comini naimie anamo iitimaci.

²⁹ Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese innoñedomoi. Dajerie creyentia marena illamona, omoimona dajerie creyentiaina

jaidomoi. Naimaci jai fioidaitimaci; iadedi fioidaillamona ico jilluana innotimaci. Iena omoi inuanona, bautizagaomoi. ³⁰ Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jacirede ramona niadedi fioidaicabiticue? ³¹ Cue amatiai, cai Nama Jesucristomo omoi duilla jira, omoi iobidicue; iadedi nagarui niadedi fioidaicabiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci. ³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llumona jaca buena oñeiticue. Ie muidona fioidaillamona cai jaca jilloñeiticaidena, Cristo rafuena fainonocaida, ico raire jamai cai fioidailla jira, jamai ua jai jaicaillafuena cai jaiacaiticai. Ie ia iese inede. Cristo jai jillode.

³³ Ie jira omoi abiaina jifueño. “Jilloñeiticai” railla comini diga omoi nabairia, naimaci llogacinodo jiai jaitomoi. Ie muidona naimaci diga nabairiño. ³⁴ Ie jira raise abina uiñuanona, mai jai. Jecinona finocana jaiño. Omoimona dajerie Jusiñamuina raise uiñoñena jira: “Jusiñamuidi cominina jillotañeite” raitimaci. Omoi meidaillena, omoimo iese lloticue. Jusiñamui rafuedo raise mai omoi jai.

¿Niese creyentiai jilloitimaci?

³⁵ Omoimona damie nibai jicanoite: “¿Niese fioidaillamona creyentiaidicai jilloiticai? Naimaci abiai nibai jai rifaidimaci. ¿Nie isoide abiai diga dane iiticai?” ³⁶ Iese bu jicanoia, raise comecina facañede. O illimo buena o ria, janore sicua meinoconi, o riga radi jai abidi rifaide. ³⁷ Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaifo eruaide. O riga rana eruañede. ³⁸ Naga rira daje isoi eruañede. Jusiñamui jitailla isoi, jiaiforie eruaide. Ie isoide. Naga fioidaitimie jillua mei, Jusiñamui jitailla isoi, ie abina jiaiforie itataite. ³⁹ Diga isoide cai abiaina Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede. ⁴⁰ Jusiñamui dine ico cai ia, cai abiai iite, nainomo cai illena. Bene cai abiai jiai ite, bene cai illena. Monamo cai ia, ebireniticai. Bene cai ia, jiai ebire iticai; iadedi daje isoi ebire inedicai. ⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuai isoi lligaiñoñede. Naga ucuai daje isoi lligaiñoñede. Monamo cai ico illena, naimie jitailla diese cai abiai caimo iite. ⁴² Ie isoide. Fioidaillamona cai jillua mei, cai abiai jiaifo eruaite. Cai fioidaillamona cai abiai rifaide; iadedi cai jilluamona, cai abiai dane jai rifaiñeite. ⁴³ Cai fioidaillamona cai abiai jai ebinide; iadedi cai jilluamona, cai abiai ebirenite. Fioidaicana cai jailla jira, cai abiai birui raise mairiñede; iadedi ico cai jilluamona, cai abiai mairite. Nana Jusiñamui jitailla rafuena finorenitica. ⁴⁴ Cai fioidaia, come abiai isoi caimo birui ite; iadedi cai jilluamona monamo ico caimo cai abiai jiai iite. Enirue iena cai abiai birui caimo ite. Ie jira monamo cai jiaifo eruaite abiai caimo iite.

⁴⁵ Adán micori comuilla rafuena Moisés micori jaie cuela: “Jusiñamuidi nano comuidimie dofomo jafaicina firaiñuamona, naimie micori comena jaide” cuela. Naimiemona cai comuilla jira, fioidaiticai. Fioidaillamona Cristo jillua jira, ico cai jiai jilloille jira, caina jiaifo eruaite abiaina ico itataite. ⁴⁶ Eniruemo birui cai illa jira, caimo birui ite abiai diga iticai. Fioidaillamona ico cai jillua mei, monamo cai ia, jiaifo eruaite abiai diga iiticai. ⁴⁷ Adán micoridi enirue ie. Imuicimona Jusiñamuidi naimiena finode. Cristodi eniruemo billanona, imana jaide; iadedi Jusiñamui dinena monamona naimie bite. ⁴⁸ Imuicimona Adán micori finua jira, naimie fioidailla mei, dane imuicina jaide. Naimiemona cai comuilla jira, cai fioidaia, jiai imuicina jaiticai; iadedi Cristomo jiai duidicai. Cai jillua mei, naimie isoi ico iiticai. ⁴⁹ Adán micorimona cai comuilla jira, naimiena eruaidicai. Eniruemo Cristo jaie ia, naimie abi ite. Fioidaillamona naimie jillua mei, naimiemo jiaifo eruaite abi naimiemo ite. Cai jillua mei, Cristona eruaiticai.

⁵⁰ Cue amatiai, buena lloticue. Caimo jai ite abiai diga monamo Jusiñamui ie cominina sedajanomo ineiticai. Cai abiai rifailla jira, cai fioidailla facaise naie isoide abiai diga

nainomo jaca iñeiticai. ⁵¹ Ero, Jusiñamui cuena uiñotaga rafuena omoimo ja lloiticue. Iena navui jaca uiñoñedicai. Nana creyentiaidicai fioidaiñeiticai; iadedi Jusiñamui cai abiaina jiaifo meidotaite. ⁵² Omoi uisi jarire cuirorilla isoi, iena ua raire meidotaite. Ie trompeta fillanona, jai fiodaite creyentiaina Jusiñamuidi jillotajanona, naimaci abiaina meidotaite. Nia fioidaiñedinodicai cai abiaina jiai meidotaite. Dane fioidaiñeiticai. ⁵³ Cai abiai birui rifaiacade. Ie jira birui fiodaicana jaidicai. Jusiñamuidi cai abiaina ico meidoite. Ico monamo jiaifo abiai caimo ia, cai abiai rifaiñeite. Fioidaiñeiticai. ⁵⁴ Iese caimo suia, Jusiñamui facaina lloraima micori jai e cuega uai jiai suite. Cuega: “Nairuimona creyentiai jaca fioidaiñeitimaci”. ⁵⁵ Cai jaca illa jira, fiodaicana jaiñeiticai. Fiodaillana jaciruiñeiticai, dane cai fioidaiñeiticaina jira. ⁵⁶ Jeacino illa jira, birui fiodaicana jaidicai. Moisés micori jai e llogacino illa jira, iena cai raise finonina jira, jeacino caimo illana uiñotica; ⁵⁷ iadedi cai jeacino facaina cai Nama Jesucristo fiodailla jira, jeacino anamo jai iñedicai. Cai fiodailla mei, dane fioidaiñeiticai. Jusiñamui caina iemona jai jillotate. Ie muidona naimieri cai iobillasa.

⁵⁸ Cue amatiai, fiodaillamona nana creyentiai ico jillua jira, Cristo rafuena inocana jai. Naganomo iñeno; iadedi Cristo rafuena llocana omoi jai. Naimie jitailla rafuena finocana omoi jai. Naimie facaina omoi maijia, tainona maijiñedomoi. Naiemona diga mare rafue comuite. Iena jai uiñotomoi.

16

Jerusalémo itinomo ucubena oredimaci

¹ Jiaie rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue llua isoi, omoimo lloiticue. ² Naga domingo omoi ucubemona daje diese eneno oni eeno. Omoi maijia bailla diese ucubemona cue bille dinori iena eeno. Iese naga domingo omoi eenoñenia, ico cue bia, ¿niese dacaiño ofrendamo ailluena ucubena joneitomoi? ³ Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaiticue. Cartana jiai oretaiticue, omoi fetocano mareuidinona Jerusalémo itino uiñollena. ⁴ Jerusalémo cue comeci jiai jaiacania, cue diga jaitimaci.

Pablo jai macariacade

⁵ Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue. ⁶ Diga irui omoi diga nibai iiticue. Nana rollime facaise omoi diga nibai iiticue. Nibai daje amani fivui iiticue. Ie mei cuena omoi canollemona oni jaiticue. Omoi dinomona cue jaia, cue jaillinona nia uiñoñedicue. ⁷ Omoi dine birui nia jaiñeiticue. Omoi dine birui cue jaia, dallu omoi diga iiticue; iadedi jiairuido omoi dine cue jaia, cai Nama jitaia, omoi diga are iiticue. ⁸ Beno Efesomo nia iiticue. ⁹ Beno diga comini Cristo rafuena cacaacadimaci. Naimacimo iena llofueiacadicue. Diga comini cue llua uaitatimaci. Cue llua jitañedimaci Ie jira bene nia lloiacadicue. Pentecostés railla rafue fuille mei, jaiticue.

¹⁰ Omoi dine Timoteo ria, naimiena raise marena nafue. Cue isoi cai Nama facaina naimie maijicabide. ¹¹ Ie muidona naimie llucinona jamaiñeno. Omoimona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentiai diga naimie billemo ocuridicue.

¹² Apolona jicanotomoi. Jiaie creyentiai diga omoi dine naimie jaillana naimiemo lloticue; iadedi naimie comeci nia jaiacaiñede. Jiairuido abi juarenia, omoi dine jaite.

Fuiduacino

¹³ Jeacinomona abina rairui. Cristo rafuena inocana omoi jai. Eimie isoi omoi comeciaina ocuiño. ¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amatiai, Acaya railla eniruemo Estéfanadi, ie comini diga, nano creyentiaidimaci. Iena uiñotomoi. Naimaci jitailla jira, jiaie creyentiaina canocabidimaci.

¹⁶ Naie isoidino lloga uaina cacarei. Naga Cristo dibeimo maijidino uaina cacarei. Iedo

omoi jai. ¹⁷ Omoimona cue dine Estéfanos bite. Fortunato diga, Acaico diga naimie billa jira, iobidicue. Cue dine iñedomoi; iadedi naimaci billa jira, omoi isoi cuena canodimaci.

¹⁸ Naimaci billamona cue comeci caimataide. Omoi comeciai jiai caimataide. Naie isoidinomo: “Marena maijidomoi” omoi railla.

¹⁹ Diga creyentiai Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiai orediaimaiai. Iaimaiai jofomo dajerie creyentiai rocabitimaci. Cristomo naimaci duilla jira, omoina isiruillanona, nana naie creyentiai imaci uaina jiai oredimaci. ²⁰ Nana bene ite creyentiai imaci uaina oredimaci. Nana creyentiaina eo caimare uaido.

²¹ Omoimo cue uaina jiai oredicue. Cuena canollena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena iino. Pablodicue.

²² Omoimona Cristona bu isiruiñenia, Jusiñamui naimiena duere finollesa. Cai Nama abido dane billesa.

²³ Cai Nama Jesús omoina duenailasa. ²⁴ Jesucristomo cai duilla jira, omoina cue isiruillana omoi uiñuana jitaidicue. Mai. Macaibaite.

CORINTOMO ITE CRISTONA HNOTINOMO IE EMODOMO PABLO ORETAGA RABE

*Corintomo ite creyentia*imo Pablo cartana orede

¹ ¿Nigacino? ¿Nie isoidomoi? Pablodicue. Corintomo ite creyentiai, omoi dine bie carta oredicue. Nana Acaya railla eniruemo ite creyentiaimo bie carta jiai oredicue. Jusiñamui jitailla jira, ie rafuena cue jino lollena, Jesucristo oretagamiedicue. Cue diga Timoteo illa jira, naimie ie uaina omoi dine jiai orede. ² Cai Moo Jusiñamui, cai Nama Jesucristo diga, omoina duenaite. Iena uiñocana mai omoi jai. Iaimaiai omoina uri jai itatate. Iena omoi uiñocana mai omoi jai.

Pablo ie duere sefuilla rafuena cuete

³ Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade. ⁴ Nie isoide rafuemonona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiañona canoredicue. Nie isoide rafuemonona naimaci duere sefuia, nie isoide ramo naimaci jiria, Jusiñamui caina ocuiñotaja isoi, naimaci comeciaina ocuiñotaredicue. ⁵ Cristomo jai cue duilla jira, naimie isoi cue duere sefuia, naimie cue comecina ocuiñotade. Iemonona jiañona comecina ocuiñotajana raise uiñoticue. ⁶ Duere cue sefuillamona, omoina canoredicue. Jusiñamui jitaillacino omoi finocana jaillana jitaideicue. Cuenona naimie ocuiñotajamona, Cristona omoi fainonocaiñellena, cue isoi omoi duere sefuia, omoina ocuiñotaredicue. ⁷ Cue isoi omoi duere sefuia, cue isoi Cristo omoi comeciaina ocuiñotaite. Iena raise uiñoticue.

⁸ Cristomo cai duillamona, cue amataiai isoi itomoi. Asia railla eniruemo jai e duere sefuideicue. Iena omoi raise uiñollena, ie rafuena dane omoimo lloiacadicue. Eo duere cue sefuilla jira, cue comeci niadedi ocuiñoñedicue. Niadedi fiodaiticue. ⁹ “Naie facaise fiodaiticue” raillanomo cue comecina facadicue. Cue finoca rafuemonona dama jillonidicue; ia Jusiñamui uai siñona jira, naimie cuena jillotade. Fiodaitinona naimie jillotarede. Niadedi fiodaitinona jiai jillotarede. Naimiedi naimie cuena jillotajana cue iñuana jitaide. ¹⁰ Naie facaise eo duere sefuillamona cuena jillotade. Ico cue duere sefuia, iemonona dane cue jilloillena iñoticue. ¹¹ Iena cue facaina omoi jicabi. Jusiñamui fairiua meinomo, ailluena comini cue facaina Jusiñamuimo iobillacinona fecaitimaci. Cuenona Jusiñamui canua jira, iobillacinona fecaitimaci.

Pablo Corintomo navui jaiñede

¹² Cuenona gaiñedino cuena nibai jeare ñaitimaci; ia daje rafueri abina iedoticue. Cue comecimona iena uiñoticue. Cristona iñoñedinona marena finodicue. Omoina marena finodicue. Jusiñamui jitaillacino finocana jaidicue. Jusiñamuimona jeacinona finoñecana jaidicue. Cue comecina facajacinomona iese jaiñedicue; ia Jusiñamui cuena canuamona, iese jaidicue. ¹³ “Iese cuetio; iadedi o comecimo jiaie rafue ite diga caimo cuetio” raitomoi. Omoina jifueiacaiñedicue. Cue cueda cartaiaina jai facadomoi. Cue cueda rafue omoi raise cacajana jitaideicue. ¹⁴ Cuenona nia eo raise uiñoñedomoi; ia cuena uiñocana omoi jaillanona, cueri omoi iobillana jitaideicue. Cai Nama Jesús abido bia, omoiri cue iobilla isoi, cueri omoi iobillana jitaideicue. ¹⁵ Omoimo iese cue comecina facajamona, omoi dine navui jaiacaducue. Macedoniamona cue jaiacaducue, raise omoina cue iobitallena, omoi dine nano navui jaiacaducue. ¹⁶ Macedoniamona cue abido bia, omoi dine navui dane jaiacaducue. Judeamo cue diga jaillena, omoimona damierena omoi oretajana jitaideicue. Iese cue jaillemona navui comecina facadicue. ¹⁷ Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci. ¹⁸ Iese iñedicue. Jusiñamui uanaicinona jaca llua isoi, cue comeci naganomo iñede. Omoimo cue lloga uai finodicue. ¹⁹ Jusiñamui Jito

Jesucristo rafuena omoimo navui lloticue. Cristo ie llogacinona jaca meidoñede. Silvano iena jiai llofuede. Timoteo iena jiai llofuede. Nagarui daje isoide rafuena llofueticai. Jiiruido jiaie Cristo rafuena llofueñedicai. ²⁰ Nana Jusiñamui jai lloga uai Cristo finoca rafuemonu suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai. ²¹ Jusiñamui Cristo dibeimo caina jai itatate. Ie rafuena cai lloiena, caina jai fetode. ²² Ie cominina caina itatate. Iena cai uinollena, ie Joreño caimo jai itatate. ²³ Jusiñamuidi cue uanaicinona lluna uinote. Uanaicinona cue lloñenia, Jusiñamui cuena duere finuana jitaicue. Omoi finoca rafue jai cue uinuamona, omoimo cue riire lloi raillano, omoi dine navui dane jaiñedicue. ²⁴ Cristona jai omoi inuana uinoticue. Cristona inocana omoi jailla jira, omoi finolle rafuena lloñedicue; ia omoi iocire illana jitaicue.

2

¹ Omoi dine nia cue jaiñellemo comecina facadicue. Omoi dine navui cue ia, iocire coniniri inedicai. ² Omoina jai icidicue. Cueri omoi iobillana jitaicue; ia omoina cue dane icia, coniniri iocire ineticai. ³ Omoimo cartana navui oredicue. Omoi dine ite rafuena raise finollena, iena oredicue. Cuena iobitajana uinotomoi. Omoi dine ite rafuena omoi raise finoia, coniniri iocire iticai. “Cuena iobitaitomoi” raillanomo cue comecina facadicue. ⁴ Cue comeci eo sunaillamona, cue comeci eo eiamona, carta navui oredicue. Omoina icicaiñedicue; ia omoina cue eo isiruillana omoi uinuana jitaicue. Ie jira omoi dine ite rafuena raise fino.

Maraiñede rafuena finodimie rafuena feita

⁵ Maraiñede rafue navui damie finua jira, sunaiticai. Naimie muidona cue comecido duere jaide; ia daje isoi omoi comeciai jiai duere jaide. ⁶ Omoi nabei dine ite cominimona naimie jai duere sefuilla jira, dama iesede. Naimiena dane duere finoño; ⁷ ia naimie finoca rafuena mai feita. Iena dane linoño. Naimie comecina ocuino. Naimiena iese omoi canoñenia, omoimona duere sefuillamona, abido danomo jaite. ⁸ Ie jira: “Ona nia isiruiticai” naimiemo llono. Iena eo jitaicue. ⁹ Nana cue lluna omoi inuana cue facacillena, carta omoi dine navui cueticue. ¹⁰ Naimie finoca rafuena omoi feitaia, iena cue jiai feitaicue. Cristo rafuena omoi inocana jaillana cue jitailla jira, naimie rafuena feitaicue. Cristo cuena uinuamona, iena feitaicue. ¹¹ Taife ramo cai faiana uinoticai. Cristo rafuedo cai raise jaiñellena, naimie jitaillana uinoticai. Cristo dibeimona caina Taife itaño, omoi motomo itimie finoca rafuena feitaicai.

Troamo navui Pablo ia, uri inede

¹² Troamo navui jaidicue. Cristo rafuena cue lloiena jaidicue. Cai Nama comini comeciaina jetajamona, naimie dibeimo cue maijamona, ie rafuena lloticue. ¹³ Tito nainomo cue cioñena jira, uri inedicue. Naimiedi cue ama isoide. Ie jira nainomo ite creyentiana facaduanona, Macedoniamoi jaidicue.

Jusiñamuidi Cristo dibeimo inedinona anafeditaite

¹⁴ Jusiñamui fue eo mare. Cristo dibeimo inedinona naimie anafeditajanona, Cristo cominina cai illamona, naimie rafuena uicana jaidicai. Ie rafuena cai lloia, iena comini inoia, Jusiñamui naimicina jai caimare itatate. ¹⁵ Cristomo cai duillamona, ie rafuena cai lloia, Jusiñamuina iobitadicai. Cai llumona, damierie jillodimaci. Iena jitañenamona, damierie fafidimaci. ¹⁶ Iena cacajamona, damierie faficana jaidimaci. Jusiñamui illanomo jaca ineditimaci. Iena cacajamona, jaino Jusiñamui illanomo jaca itimaci. Jamai bue isoidicue; ia bie rafue llocana jaidicue. ¹⁷ Damierie Jusiñamui rafuena llumona, ucubena oiacadimaci. Omoimo comecina facañedicue; ia iese llofueñedicue. Omoimo cue comecina facajanona, bie rafue cue llumona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicinona jaca lloticue.

3

Cristo caimo lloga rafuedo birui jaidicai

¹ Omoi dine damierie llofueraini jaja, cartaiaina uicabitimaci. Naimaci cartaiaimo jiaïnodi: “Bie llofueraini mare” raillanona cuetimaci. Omoimona jiaïno cuega cartaiaina: “Bie comini mare” raillana jitaïnedicue. Cuemona jiaïno cuega cartaiaina: “Pablo mare” raillana jiaï jitaïnedomoi. ² Omoi marenana jai uiñoticue. Cue marenienana jai uiñotomoi. Carta isidomoi. Jusiñamui dibeïmo omoi comeciï meïduamona, cue comecimona omoïna raise uiñoticue. Omoi birui illamona, omoïna fidiïmona, nana comini omoïna raise uiñotimaci. Ie jira jiaïnodi: “Bie comini mare” raillana omoimona jitaïnedicue. ³ Cristo rafuena omoïmo lloticue; ia Cristo omoi comeciïna jai meïdotaja jira: “Omoi mare” raillanona naimie jai cuedadena, nana comini uiñotimaci. Tinta diga naimie cuedede. Jusiñamui Moïses micorïmo jaiïe lloga rafue jamai noficïmo cuega. Cai cajede Jusiñamui birui iese cuedede; ia naimie Joreño uaido omoi comeciïna birui meïdote. ⁴ Cristomo cue jai duïlla jira, Jusiñamuïna cue ñnuamona, omoïna iese lloticue. ⁵ Cue finoca rafuemonna iese lloñedicue; ia Jusiñamui uai cuemo illamona, iese omoïmo lloticue. ⁶ Jiaïe rafuedo birui cue jaïllena, Jusiñamui cuena fetode. Ie uai cuemo illamona, cuemo lloga rafuena llocabiticue. Moïses micorïmo lloga rafuena birui lloñedicue. Moïses micorïmo lloga rafue ñnuamona, Jusiñamui illanomo jaca buna itatañede. Jusiñamui Joreño llotataga rafuena birui llocabiticue. Iena cai ñnuamona, Jusiñamui Joreño Jusiñamui illanomo caina jaca itatate.

⁷ Moïses micorïmo lloga rafuedo jaïllamona, Jusiñamui dine buna jaca ñna. Noficïmo Jusiñamui cuega. Moïses micorïmo Jusiñamui llua mei, Jusiñamui uai ebirena jira, Moïses micorï uieco eo quenirecaïde. Jusiñamuïmona naimie abido bia, Israel comini Moïses micorï uiecomo eruainidimaci. Nagarui Jusiñamui diga naimie ñaiñenia, naimie micorï uieco ja muidomo queninide. ⁸ Jusiñamui Moïses micorïmo jaiïe lloga uai ebirede; ia Jusiñamui Joreño birui caïmo lloga uai baïfemo ebirede. ⁹ Moïses micorï rafuedo bu jaja, faïficana jaïde; ia naïe rafue ebirede. Birui ite rafuedo bu jaja, Jusiñamuïmona marebicaïde. Ie muidona birui ite rafue jaïe ite rafue baïfemo ua eo faïte. ¹⁰ Moïses micorï rafue jaïe ebirede; ia jiaïe rafue birui illa jira, Moïses micorï rafue jai birui ebinide. ¹¹ Birui ite rafue jaca saïñena jira, ua eo ebirede.

¹² Iena cai uiñuamona, bie rafuena marefodo jaciruiñeno lloticue. ¹³ ñniroi diga, Moïses micorï isoi cue uiecona ñbaïnedicue. Naimie micorï ie uieco ñbaïde, ja muidomo ie uieco quenirena feïoicaïllana comini cioïñellena; ia cue lloga rafuena marefodo llocabiticue. ¹⁴ Moïses micorï comini Jusiñamui rafuena jaca ñnoñedimaci. Naimaci comeciï jitaïñena jira, ñnoñedimaci. Moïses micorï rafuena birui judïuï comini facaïa, iena nia raise cacaiñedimaci. Dani Cristona ñnuamona, naimaci comeciï raise cacareitimaci. ¹⁵ Cristo rafuena birui naimaci ñnoñena muidona, Moïses micorï rafuedo nia jaidimaci. ¹⁶ Cai Nama dibeïmo bu jaja, naimie comeciï raise cacade. Moïses micorï rafuedo naimiedi cai jaiñenana raise uiñote. ¹⁷ Cai Nama Joreño lloticue. Cristo dibeïmo cai jaja, naimie Joreño caïmo jiaï ite. Cristona cai nabaïllamona, jeacïno anamo jai ñnedicai. Moïses micorï rafue anamo jai ñnedicai. ¹⁸ Cristomo jai cai duïlla jira, naimiena cai comeciïmona raise uiñua jira, ie ebirede uaina uiñoticaï. Acaranimo cai eruaiïllamona, cai abina ciodicai. Ie isoïde. Cai illamona jiaïe comini Cristona uiñotimaci. Cai Nama Joreño caina canuamona, naimie ebirena isoi cai illena, icana jaidicai.

4

¹ Jusiñamui cuena duenaïllamona, cue comecïna ocuiñocaida, Cristo rafuena llocana jaidicue. ² Meïrede rafuena llofueñedicue. Iena bainino llofueñedicue. Jïfuiïanona omoïna llofueñedicue. Omoïri iobitallena, Jusiñamui rafuena meïdoñedicue. Jusiñamui cuena ciuana cue uiñuamona, naimie rafuena uanaïcinona llofuecabiticue. Cue llofuiïana bu raise cacaiïa, uanaïcïno cue llofuecabillana uiñote. ³ Faïficana jaidïnodi cue mare lloga rafuena raise cacaiñedimaci. ⁴ Taïfe anamo naimaci illamona, naimie naimacïna cacarefitañede. Cristo uai ebirede. Jusiñamui isoi naimie ite. Taïfedi Cristo rafuena naimaci raise uiñuana jitaïñede. ⁵ Cue finoca rafuena llofueñedicue; ia Jesucristodi cai Namanana llofuecabiticue. Naimie dibeïmo cue maijïamona, omoïna canollena,

naimie rafuena llofuecabiticue. ⁶ Enirue finua facaise Jusiñamui llote: “Jitiredino nana eniruemo iñellena, useredino mai iite”. Naimiena cue nia uiñoñenia, jeacino anamo cue illamona, cue comeci jitiredinomo ite isoide. Naimiena cuena naimie jai uiñotaja jira, cue comeci useredinomo jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

Cai comeciai ocuiñocaida iñocana jaidicai

⁷ Enirue ie imuicimona comuidicue; ia Cristo ie mare ebirede rafue cuemo jai ite. Iemona cue lloga rafue cuemona iñenana uiñotomoi; ia ie uai siñonana illamona, Jusiñamui illana uiñotomoi. ⁸ Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemo suide rafuemo raise cacarefiñeno comecina ocuiñocana jaidicue. ⁹ Damierie cuena duere finodimaci; ia Jusiñamui cuena fainonocaiñeno cuena canode. ¹⁰ Eniruemo jaie Jesús ia, duere sefuillamona, ja muidomo fiodaite. Jesús isoi duere sefuicana cue jaia, naiemona niadedi nagarui fiodaiticue. Iemona cuena naimie jillotaja muidona, Jesús siño uaina uiñocana jaidicue. ¹¹ Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uiñotomoi. ¹² Naimie rafue cue llua muidona, cuena meineiacadimaci; ia bie rafuena omoi iñuamona, Jusiñamui illanomo jaca iitomoi. ¹³ Jusiñamui facaina lloraima jaie cueda: “Cue iñua jira, iena llofueticue”. Naimie isoi cue iñua jira, bie rafuena jiai llofuecabiticue. ¹⁴ Jesús fiodaillamona Jusiñamui naimie jaie jillotate. Iena cue uiñuamona, cai fiodaille mei, caina jiai jillotaite. Jesús omoi duilla jira, naimie illanomo danomo caina ico itataite. ¹⁵ Omoi facaina nana cue rafue finodicue. Cristo rafuena comini uiñollena, duere sefuidicue. Iemona Jusiñamui naimacina duenaillana uiñoitimaci. Jusiñamui dibeimo naimaci illamona, naimiemo iobillacinona fecacabitimaci. Ieri naimiena iobitaitimaci. ¹⁶ Ie jira iena sefuiruiñedicue. Cue mairici fuicana nagarui jaide; ia cue comeci nagarui iñocana ocuricana jaidicue. ¹⁷ Birui duere sefuidicue; ia iemo cue comecina eo facañedicue. Cristo rafue muidona birui duere cue sefui, Jusiñamui illanomo ico cue ia, nainomo ebire marena iiticue. Iemo cue comecina eo facadicue. ¹⁸ Cuemo birui suide rafuemo comecina eo facañedicue. Jusiñamui illanomo cue nia cioiñena rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga iocire jaca iiticue.

5

¹ Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo cai abi jaca rifaiñeite. ² Birui cue duere sefuillamona, Jusiñamui cuemo ico itatalle abina eo oiacadicue. ³ Cue fiodailla mei, Jusiñamui cue joreño jiaie isoide abina itataite. ⁴ Cue jiaie isoide abi cuemo illena, cue jamai fiodaiacaiñedicue; ia iena eo oiacadicue. Jusiñamui cuemo jiaie isoide itataiacade abina eo oiacadicue. Cue fiodaille abi ifomo jaca ille abina cuemo iite. ⁵ Jusiñamuidi ie Joreño caimo itatajamona, cai abiaia iese jiai itatajana uiñoticaí. ⁶ Iena cue uiñuamona, nie isoide rafue ia, iñocana jaca jaidicue. Nia cue fiodaiñenia, cai Nama illa ecimo nia iñedicue. ⁷ Naimiena birui cioiñedicue; ia naimiena iñocana jaidicue. ⁸ Iese jaidicue. Cue Nama diga cue illena, fiodaiacadicue; ⁹ iadedi nia cue fiodaiñenia, naimiena jaca iobitaiacadicue. Cue fiodaia, naimiena jiai jaca iobitaiacadicue. ¹⁰ Naimie llua jira, Cristo uicomo ico nana iiticaí. Cai bene finoca rafuena uiñotaite. Maraiñede rafuena cai bene finua diese, naimiemona ibana feiñoñeíticaí. Mare rafuena cai bene finua diese, naimiemona ibana feiñoiticaí. Ie muidona naimie jitaillacinona jaca finoacaducue.

Jusiñamui diga cai uri illafue

¹¹ Cue Nama uicomo ico cue illemona, iena cue jaciruillamona, naimie dibeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitaicue. ¹² “Cuedi maremiedicue” lloñedicue; ia cue abi facaina omoi riidollena, bie rafuena lloticue. Omoi motomo damierie llofueraini naimaci llofuiacino diga abina iedotimaci; ia naimaci comeciaino iticino diga abina iedoñedimaci.

¹³ “Naimiedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoñedicue. Omoïna llofuellena, omoï facaina maijdicue. ¹⁴ Nie isoidicuenta, Cristo cuena isiruillana cue uiñuamona, jaca llofueiacadicue. Nana comini facaina damie fodaillana jai ñnoticue. Naimaci jeacino ifomo naimie jai fodaite. ¹⁵ Nana cai facaina naimie fodaite. Fodaillamona Jusiñamui naimiena jai jilloitate. Naimiena nia cai ñnoñenia, dani cai comeciaino ite rafue diga iobidicai; ia naimiena jai cai ñnua mei, dani cai comeciainona naimiena cai iobitajana naimie jitaide. Ie jira cue illana jai uiñotomoi.

¹⁶ Damierie llofuerainidi jiaïnomo eruailamona, naimaci comeciaina facajamona: “Naimaci mare” raitimaci. Jiaïcaïño: “Naimaci marañede” raitimaci; iadedi Cristona cue ñnua facaisemona iese cominimo eruañedicue. Naimiena nia cue ñnoñenia, Cristona jaiie raise uiñoñedicue. “Naimiedi jamai ñima” raillamo comecina facadicue; ia iese naimiemo birui comecina facañedicue. ¹⁷ Cristona cai ñnua mei, naimiemo jai cai duillamona, cai comeciainu uaina meidoticaï. Jai jiaïe isoidicai. Jiaïe rafuedo jai jaidicai. Jaiie caïmo ite rafuedo jai jaiñedicai. ¹⁸ Jusiñamui cai comeciainu uaina meidotade. Cristo fodaillamona, Jusiñamui dibeïmo caina itatate. Iemona naimiena jai nabairedicai. Naimacimo ie rafuena lollena, cuena fetode, jiaïe cominina ie dibeïmo itatallena. ¹⁹ Cristo finoca rafue muidona, Jusiñamui dinena cominina nabaiacade. Naimaci jeacino facaina ibana jai oiacañede. Bie rafuena lollena, cuena jai fetode. ²⁰ Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoïmona naimiena bu nia ñnoñenia, Cristo facaina cue illa jira, Jusiñamuina omoï nabaiïllana, naimie diga uri i. ²¹ Cristo jeacino jaca finoñede; ia cai jeacino facaina, Jusiñamui jitaïlla jira, jeacino finodimie isoi jaiide. Naimiemo cai duillamona, Jusiñamui jitaïlla isoi, jai marebicaidicai.

6

¹ Bie rafuena nia lliacadicue. Jusiñamui facaina cai maijiamona, naimie dibeïmo cominina itataticai. Naimie caina duenaïllana uiñoticue. Iena omoï ñnocana jaïllana jitaïdicue. ² Jaiie Jusiñamui cuetatate: Cue jitaïlla facaise omoï jitaïllacinona jai cacadicue. Omoï jilloïllena, omoïna jai canodicue.

Ero, Jusiñamui birui omoïna cacaacade. Birui omoïna canuanona, omoïna jillotaïacade. Ie muidona naimiena ñnocana jai. ³ Bie rafuena omoï ñnoñellena, cue llofuiacinona omoï jamaiñellena, bu diga rafuena comuitaicañedicue. ⁴ Jusiñamui dibeïmo cue maijiamona, nie isoide rafuemona ramo cue jiria, cue illamona naimiedi: “Mare” cuena raïllana jitaïdicue. Eo duere sefuidicue. Diga icaiño damierie cuena duere finodimaci. Diga icaiño ramo jiridicue. ⁵ Damierie cuena fatimaci. Cárcelmo cuena jonetimaci. Naimaci illanuaimona cuena riire dotadimaci. Eo cue maijia jira, diga icaiño eo raise iniñedicue. Aime guisoidicue. ⁶ Jearede rafuena ebiruiñedicue. Cristo rafuena uiñocana jaidicue. Icirñedicue. Jiaïnona canocabidicue. Jusiñamui Joreño anamo iticue. Cominina raise isiruiticue. ⁷ Uanaicinona llocabiticue. Jusiñamui uai cuemo illamona, llofuecabiticue. Cue comecina riidollena, Taïfena emodofillena, Jusiñamui jitaïlla isoi, marecinona finocana jaidicue. ⁸ Damierie cuena marena jai ñaitimaci. Jiaïno cuena jeare nia ñaitimaci. Damierie cueri jai iobidimaci. Jiaïno cue joreña jai ñaitimaci. Damierie: “Caina jifuetio” cuena raitimaci; ia nia uanaicinona llocabiticue. ⁹ Damierie: “Jamai bue isoidio” cuena raitimaci; ia jiaïno cuena raise uiñuamona, naimaci dinena jamai bue isoïñedicue. Nagarui niadedi fiodaicabiticue; ia nia iticue. Duere sefuicana jaidicue; ia Jusiñamui cue comecina ocuiñotacana nia jaidicue. ¹⁰ Sunaiticue; ia iocire jaca iticue. Dueredicue; ia aïlluena comini comeciaina eo caïmaretadicue. Buenidicue; ia Jusiñamuïmona aïlluena marecinona feiñoticue. Iese jaca jaidicue. Cue illamona: “Naimiedi mare” cuena omoï raïllana jitaïdicue.

¹¹ Corintomo itino, cue nabaiñiai, cue comecimo ite rafuena marefodo jai lloticue. Cue comecimona omoï diga marena iacadicue. ¹² Cuemona omoïna raise isiruiticue; ia omoï

dinena nia cuena eo isiruiñedomoi. ¹³ Cue uruiyai omoi isoilla jira, omoi diga ñaiticue. Omoïna cue isiruilla isoi, cuena omoi isirui.

Jusiñamui cai comeciaino illanodicai

¹⁴ Creyentedimie mo jearede ramo faitatai raillano, daje isoide rafuedo iaïmaïai jaiñena jira, daje isoi rafuena iaïmaïai comeci lloïñena jira, creyente creyenteñedimie diga daje rana namatañena. Aina illena, creyentena iñediñaiñona creyentedimie oñena. Inina illena, creyentena iñedimiena creyentediñaiño oñena. Marecinodo jaiacadimiedi maraiñedicinodo jaiacadimie daje isoi diga nabairinide. Jusiñamuina uanaicinona uiñotimiedi useredinomo jai ite isoide. Jeacino anamo nia itimie jitiñedinomo nia ite isoide. Cristo rafuena naimie uiñoñede; ia Cristo rafuena omoi uiñuamona, useredinomo jai itomoi isoidomoi. ¹⁵ Cristodi Taife diga jaca nabairinide. Creyentemiedi creyenteñedimie diga daje isoi inide. Daje isoi comeciña facañede. ¹⁶ Creyenteñedimiedi Jusiñamuina sedañede; ia jiraraina sedade. Creyente comeciño Jusiñamui illamona, Jusiñamuina sedade. Nana creyentiaï comeciaino Jusiñamui ite. Iena jaie Jusiñamui llote:

Comini motomo iiticue.

Naimacina nabaiticue.

Naimaci Jusiñamuiniticue. Cue comininitimaci.

¹⁷ Ie muidona cuena iñoñedino diga daje rana namatañeno.

Naimaci jearede jetaca rafuena abimo oñeno.

Iemona omoïna raise feiñoiticue.

¹⁸ Omoi Moona iiticue. Cue uruiaina jaitomoi.

Siño jitudicue.

7

¹ Cue isiruiganodomoi. Bie llogacino Jusiñamui caimo jai llua jira, naga maraiñede rafuena fainonocaida, cai jailla. Naga cai comeciaina jearetade rafuena fainonocaida, mai cai jailla. Jusiñamuina cai jaciruillamona, nana naimie jitaillacinona finocana mai cai jailla.

Pablo cartamo cuezacino diese finodimaci

² Omoi comeciainomona cuena raise feiño. Buna jeare finoñedicue. Buna jifueñedicue.

³ Maraiñede rafuena jai omoi finuana lloñedicue. Omoïmo cue comeciña nagarui facadicue. Iena ailli lloticue. Nia cue ia, raise cue fiodaia, omoïna jaca uibiñocabiticue.

⁴ Cue llucacina omoi iñuana raise uiñotiticue. Omoïri iobidicue. Omoi diga jai uri iticue. Duere sefuidicue; ia iocire iticue.

⁵ Macedoniamoi navui cue jaidicue mo, cue comeci uri iñede. Cue dibeimo iñedinomona nagarui duere sefuillamona, cue comeci jarire ite. Cristo dibeimona creyentiaïna naimaci itatallemo cue comeci jarire ite. ⁶ Comeciaina ocuiñedinona Jusiñamui ocuiñotacabilla isoi, Tito billamona, Jusiñamui cue comeciña ocuiñotade.

⁷ Cue dine naimie ria, iocire iticue. Omoïmo ite rafue cue cacajamona, jiaï iocire iticue. Cuena omoi cioacanana llote. Cue comeci jarire illari sunaitomoi. Cuena riidoiacadomoi. Iena cue cacajanona, iocire iticue. ⁸ Carta omoi dine navui oredicue.

Iena omoi feiñua mei, sunaitomoi; ia iena cue oretajari birui sunaiñedicue. Navui ieri sunaiticue; ia iena omoi feiñua mei, iemona dallu omoi sunailla jira, jai iocire iticue. ⁹ Omoi sunaillana jitaïñedicue; ia iemona Jusiñamui dibeimo omoi comeci iuai omoi meidua jira, iocire iticue.

Cue cuezga carta muidona iciriñedomoi; ia Jusiñamui jitailla isoi sunaitomoi. ¹⁰ Jusiñamui jitailla isoi, ie jeacino facaina bu sunaillamona ie comeci iuai Jusiñamui dibeimo meidoïa, sunaiñede; ia bu jamai sunaillamona ie comeci iuai Jusiñamui dibeimo meidoñena, faifite. Jusiñamui diga jaca iñeite. ¹¹ Jusiñamui jitailla isoi omoi sunaillamona, omoi comeciaina raise finodomoi. Maraiñede rafue dibeimo iacaiñedomoi. Iena eo jitaïñedomoi. Jusiñamui duere sefuitallicino anamo iacaiñedomoi. Cuena dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, maraiñede rafuena finodimiena duere finodomoi.

Nana bie rafuena raise fuidodomoï. ¹² Carta navui omoï ðine cue oretaia, maraiñede rafuena finodimiemo cue comecina eo facañedicue. Naimiemona duere sefuidimiemo cue comecina eo facañedicue. Cuemo omoï comeciaina facajana omoï uifollena, navui cueticue. Jusiñamui iena uifote. ¹³ Ie jira cue comecina ocuifoticue. Tito jiaï iocire illa jira, dane iobidicue. Naimie comecina caimare omoï itataja jira, iobidicue. ¹⁴ Omoï ðine Tito nia jaiñenia, naimiemo omoïna lloticue. “Naimaci ona feifioitimaci. Naimaciri iobidicue” naimiemo navui lloticue. Iese naimiena omoï feifua jira, ieri meidaiñedicue. Omoïmo uanaicinona jaca lloticue. Naimiemo cue llua isoi jiaï suide. ¹⁵ Naimie llofuiaçino omoï ifinoiacana jira, naimie omoïna birui raise isiruite. Meiruoicaida, comeciã jarire illamona, naimiena feifnotomoï. ¹⁶ Omoïna raise uifoticue. Cristo ifinocana omoï jaillana raise ifinoticue. Omoïri iocire iticue.

8

Creyentiaï Jusiñamuimo ucubena fecaja rafue

¹ Cue amatiaï, omoïmo jiaïe rafuena lloiacadicue. Jusiñamui naimacina canuamona Macedoniammo ite creyentiaïna omoï uifuaana jitaïdicue. ² Eo duere sefuidimaci. Jiaï eo dueredimaci; ia iocire illamona, jiaïe creyentiaïmo ucubena caidifeno fecacabidimaci. ³ Naimacimmo ite ucube ðiese fecadimaci. Iena uifoticue. Naimaci jitaïlla jira, naie baifemo fecadimaci. Naimacimmo iese fecajana jaca lloñedicue. ⁴ Naimacimmo iese lloñedicue; ia iena naimaci eo feaacana jira, jiaïe creyentiaïna canollena, cuemo iena eo jicanotimaci. Ucube ðiga jiaïno creyentiaïna naimaci canuana cue lluaana eo jitaïdicue. ⁵ Cue comecina facaja isoi, fecañedicue. Ucubena fecadimaci; ia: “Cã Nama ðibeimmo majiacadicaï” jiaï llotimaci. Nie isoide rafuena naimaci finuana cue ocuillena, Jusiñamui jitaïlla isoi, jitaïdicue. ⁶ Omoï ðine Tito dane jaillena jitaïdicue. Omoï ðine naimie navui ia, ucube omoï uana naimie canode. Iemona janore tainedomoï. Jiaïe creyentiaïna omoï canuana raise fuiduana jitaïdicue. ⁷ Cristona ifinocana jaidomoï. Iena jiaïnommo llocabitomoï. Cristo rafuena raise uifnotomoï. Cristo jitaïllacinona eo finocana jaidomoï. Cuena jiaï isiruitomoï. Ie muidona omoï ucube ðiga, jiaïe creyentiaïna omoï raise canuana jiaï jitaïdicue. ⁸ Omoïna iese riire lloñedicue. Macedoniammo ite creyentiaïna eo canuana omoï uifuaamona, jiaï creyentiaïna omoï canoia, Cristona omoï isiruillana uifnoticaï. ⁹ Cã Nama Jesucristomona caï fueua. Naimie cana duenaillana uifnotomoï. Ie Moo ecimmo naimie nano illamona, naga ra naimiemo ite; ia eniruemo ie billamona, cana canollena, ifimana jaillanona, duere ite. Iemona Jusiñamui rafuena caï cacaja jira, duere ifnedicaï. ¹⁰ Ie jira omoïmo bie rafuena lloiacadicue. Navuidi año ucube eenuana tainedomoï. Iena finoacadomoï. Ie fuiduana jiaï jitaïdicue. ¹¹ Omoï jitaïllamona bie rafuena fuido. Omoïmo ite ucube ðiese feca. ¹² Ailluena ucubena omoïmo ifenia, dama iesede. Omoï jitaïlla jira, omoïmo ite ucube ðiese omoï fecaia, Jusiñamuimona mare; ¹³ ia omoï jitaïlla rana omoï ollena, omoï ucube ifneni raillano, omoï jitaïlla baifemo omoï fecajana lloñedicue. ¹⁴ Jiaïe creyentiaïmo ra birui raise ifena jira, naimacina omoï canuana jitaïdicue. Omoï ra ico ifenia, naimaci ðinena omoïna canuana jitaïdicue, nana omoïmo ðaje isoi omoï ra illena. ¹⁵ Moifis micori illa facaife ite cominimona caï fueua. Naimacina jiaïe iese cuela: “Jusiñamui oretaga guiga ramona ailluena guillena, nagarui damerie iraiuidimaci. Jiaïno janore guillena, iraiuidimaci; ia coniniri fecajamona, imaci jitaïlla ðiese nagarui nana guitimaci”. Ie muidona omoïmo ite ucubemona naimaci jitaïlla ra illena, jiaïe creyentiaïmo omoï fecajana jitaïdicue.

Pablo Titona ñaite

¹⁶ Omoï ðine Tito dane oretaiacadicue. Cue isoi naimie omoïmo comecina facade. Omoïna canoacade. Naimie comecina Jusiñamui iese itataja jira, Jusiñamui iobidicue. ¹⁷ Omoï ðine jaillena naimiemo lloticuemo, naimie ðinena: “Jee” raite. Naimiemo nia iese cue lloñenia, omoïna naimie eo canoiaçana jira, naimie omoï ðine jaillamo ie comecina facade. Omoï ðine raire jaite. ¹⁸ Naimie ðiga jiaïmie oretaiticue. Naga nairaimmo ite creyentiaïdi: “Cristo rafuena eo raise llofuecabite” naimiena raitimaci.

¹⁹ Cue diga jaillena, naimiena fetodimaci. Dueredinomo omoi ucubena cue uillena, cue diga naimie jaite. Iemona cai Namana iobitaiticai. Iemona nana creyentiaidi naimacina cue canuana uiñoitimaci. ²⁰ Omoi ucubena raise cue sedajana jitaidicue. Iemona: “Pablo cai ucube fiide” omoi lluaana jitañedicue. “Iena Pablo raise fecañede” omoi lluaana jitañedicue. ²¹ Iena raise marena sedaacaducue. Jusiñamui iena uiñote. Nana creyentiaí iena uiñuana jiaí jitaidicue. ²² Iaimaiaí diga jiaimiena jiaí oretaiticue. Naimie Cristona eo ñnocana jaillana raise uiñoticue. Omoi rafuena naimie fidiano, jiaie creyentiaina omoi canuana naimie ñnuanona, omoi ñne naimie eo jaiacade. ²³ Omoimo Titona bu jicanoia, naimacimo naimiena raise llono. Danomo Cristo dibeimo maijídico. Cue diga omoína canode. Jiaie iaimaiaina bu jicanoia: “Jiaie creyentiaí iaimaiaina fetuamona bitiaimaiaí” llono. Cristona iobitaiacadiiaimaiaí. ²⁴ Cueno omoi isiruillamona: “Omoi mare” omoína cue lluaamona, naimacina raise nafue. Nana cue jitailla rafuena omoi ñnuana naimaci uiñuana jitaidicue. Omoi ucubena eenuana raise fuiduana jitaidicue. Iena omoi ñnuamona, abido naimaci bia, naimacina oretaga creyentiaimo iena lloitimaci.

9

Jiaie creyentiaina canollena, omoi ucube olle rafue

¹ Bie rafuena omoi jai uiñua jira, iena dane lloñeticue. ² Ucubena omoi jai fecaacana uiñoticue. “Benomo Macedoniamite creyentiaimo omoiri iobidicue” llocabiticue. “Navuidi añomona fecaacadomoi” llocabiticue. “Acaya railla provinciamite creyentiaí fecaacadimaci” llocabiticue. Iese omoi illamona, bene ite creyentiaí jiaíno creyentiaina jiaí canoacadimaci. ³ Iese uiñoticue; ia omoína cue canollena Titona oretaiticue, cue jitaillacino omoi raise fuidollena. Ucubena dajena uana raire jitaidicue. ⁴ Omoi ñne Macedoniamite creyentiaí diga cue rillanona, omoi ucube dajena ña iñenia, iese omoína cue lluaconi meidaiticue. Omoídi jiaí meidaitomoi. ⁵ Ie muidona Tito idai jaillana jitaidicue. Ucube dajena uana omoi llua isoi, omoína canoite. Omoi ucube dajena uana lloiacañedicue; ia omoi comeciainomona jiaíno creyentiaina canuana omoi jitailla jira, iena jitaidicue. ⁶ Jiaie rafuedo iena lloiticue. Janore iduaina bu ria, janore llisillana oite. Ailluena iduaina bu ria, ailluena llisillana oite. Cue llua jira, omoi ucube dajena oia, eo caimare iñeitomoi; ia omoi comeciái jitaillamona omoi ucubena dajena oia, eo caimataitomoi. ⁷ Ucube dajena omoi oia, nagamie ie comecina facajamona fecaja. Naimie jitañenia fecañena. Naimie jitailla jira, naimie fecaja. Jiaimie omoína ñai raillano, “Cai ucubena fecaiticai” raiñeno; ia o jitaillamona iena feca. Comeciái iocire illamona omoi fecaia, Jusiñamuina iobitadomoi. Iena Jusiñamui jitaide. ⁸ Jusiñamui omoi jitailla baifemo omoimo fecarede. Nana omoi jitailla ra omoimo naimie illamona, jiaíno omoi fecaia, naimacina canorenitomoi. ⁹ Jusiñamui facaina lloraima micori iena jaie cuela: “Jusiñamuina ñnotimie dueredinona canocabide. Mare rafuena ñnocana jaide”. Ie omoi ñnollemo, Jusiñamui omoína canoite. ¹⁰⁻¹¹ Ero, illimo maijirainimo Jusiñamui iduaina itatate. Iena sicuamona, monaillamona, nainomo maijirainidi naiemona guicabite. Ie isoide. Omoimo Jusiñamui nana omoi jitailla rana jaca itataite. Iemona jiaie creyentiaina raise canorenitomoi. Omoi ucubena cai uia, iena jiaí creyentiaí feiñoia, Jusiñamuimo iobillacinona eo fecaitimaci. ¹² Ucubena omoi oretaiá, duerede creyentiaina canodomoi. Omoi muidona naimaci Jusiñamuimo iobillacinona jiaí fecadimaci. ¹³ Iemona Cristona omoi raise ñnuana uiñoitimaci. Ieri Jusiñamuimo iobillacinona fecaitimaci. Omoi iga ucube facaina iobillacinona Jusiñamuimo fecaitimaci. Naimacina canoitomoi. Iemona nana jiaie creyentiaina canoitomoi. ¹⁴ Omoi facaina Jusiñamuimo jiaitimaci. Omoína naimaci isiruillamona, Jusiñamui omoína eo canuana naimaci uiñuamona, omoi facaina jiaitimaci. ¹⁵ Jusiñamui caína eo canua jira, iobillacinona naimiemo cai fecallena, cai uai raise iñede. Uainicaidicai. Naimie eo mare. Naimiena cai iobillasa.

10

Cai Nama Pablona fetua jira, ie uai Pablomo ite

¹Jiaie rafuena lloiacadicue. Omoimona damierie llotimaci: “Cai dine Pablo ia, naimiedi caina jaciruite. Riire caimo naimie rafuena lloñede; ia cai dine naimie iñenia, riire caimo naimie rafuena llote” llotimaci. Ero, Cristo iciricabiñena isoi iacadie. Naimie isoi omoimo lloiacadicue. ²Riire omoimo lloiacaiñedicue. Omoimona damierie cuena raitimaci: “Pablodi Cristona iñoñedimie isoi icabite”. Naimaci iese nia lloia, omoi dine cue ria, naimacimo jaciruiñeno riire lloitie. ³Comena itie; ia comini diga cue rafue iñede. ⁴Taife dibeimo itino diga cue rafue illa jira, jamai cue uai diga naimacina llicaitaieiticue; ia Jusiñamui uai diga naimacina llicaitaitie. ⁵Cristo uai diga Jusiñamui dibeimo iñedino llucinocni uainicaitaticue. Abina iedotimaci; ia Jusiñamuina uiñoiacaiñedinona uainicaitaticue. Naimaci comeciaina facajacinona uainicaitaticue, naimacina Cristo rafuena cue iñotallena. ⁶Cristo anamo omoi raise ia, cue lloga uaina omoi raise iñocana jaia, omoimona raise iñoñedinona duere finoiticue. ⁷Cominimo jamai eruaillamona: “Naimaci mare” raitomoi. Jiaicaiño: “Naimaci maraiñedimaci” raitomoi; ia naimaci comeciaina uiñoñedomoi. Omoimona damie nibai comeciaina facade: “Cristomona cue uai illamona, Pablo baifemo faitie”. Cue dinena raitie: “Cristomona cue uai illamona, daje isoidicoco. Cue baifemo naimie faiñede”. ⁸Abina iedoñedicue; ia cue abi iedoia, ieri meidaiñedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacaiñedicue. ⁹Omoimo riire lloillena cue uai ite; ia cue carta diga omoina jacinaitaiacaiñedicue. Omoina canoiacadie. ¹⁰Omoimona damierie cuena raitimaci: “Cartana Pablo cueia, eo riire caimo llote; ia cai motomo naimie ia, ie uai riinide. Cristo rafue raise lluaana raise uiñoñede”. ¹¹Iese iñedicue. Omoi motomo cue ia, cartana cue cueia, daje isoi llofuecabitie. ¹²Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comeciaina facañedicue. ¹³Jusiñamui cue maijiana cuemo llote. Naimie llua baifemo jaiñeitie. Omoi dine ie rafue cue llofuellena, naimie jitaillanona, omoi dine navui jaidie. ¹⁴Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue. ¹⁵Jiaie llofueraini llofuiamona buena oiacañedicue. Cristo rafuena omoi iñocana jaillamona, omoi motomo cue illamona, Jusiñamui jitailla diese omoina canoacadie. ¹⁶Jiaie nairaia illanuaimo Cristo rafuena nia lloiacadicue; ia nainomo jiaie llofueraima llofuiamona buena oiacañedicue. ¹⁷Bu abina iedoiacania, cai Nama finua rafueri naimie abina iedua. ¹⁸Ie llofuiia diga bu abina iedoia, Jusiñamui naimie llofuiacinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

11

Pablodi Cristo oretaganona abi caitadinona llote

¹Abina cue raise uiñoñenia, cue diga iciriñeno. Cue llua nia cacarei. ²Omoimo Jusiñamui comeciaina facaja isoi, omoimo comeciaina facadicue. Cue muidona Cristo rafuena omoi cacaja jira, Cristona uiñotomoi. Ima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina feaacadicue. Omoimo jeacino iñena isoilla jira, omoina Cristomo feaacadicue. ³Jiaie rafuemo omoi comeciaina facacana omoi jaillamo jacinaitie. Jiaie jaiona eruaillamona, Taife Eva micorina jifute. Jiai llofueraini Cristo rafuedo omoi raise jaiñenana itatajamo jacinaitie. ⁴Diga llofueraini feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feiñotomoi. Ie jira Cristo dibeimona omoi jaillemo jacinaitie. ⁵“Cristo oretaganodicai” raitimaci; ia naimaci cue baifemo faimo cue comeciaina facañedicue. ⁶Naimaci isoi rafuena jino lluaana eo uiñoñedicue; ia Cristo rafuena eo raise uiñotie. Nana cue finoca rafuemonona omoina iena diga icaiño uiñotadicue. Uanaicinona omoina jaca llofuecabitie. ⁷Omoimo Jusiñamui rafuena navui cue lloia, omoina ibatañedicue.

Omoimona ucubena jicañedicue. Cue ucube ollena, dama jiaie rana maijdicue. Iese cue illa jira, damieriemona marañede rafuena finodicue; ia cuemona eo mare rafuena jai uiñotomoi. Iemona abina jai uiñotomoi. ⁸ Omoina cue canollena, jiaie creyentiamona ucubena feiñoticue. Omoi facaina naimacimona feiñoticue. ⁹ Rana cue jitaila facaise omoimona ucubena jicañedicue; ia Macedoniamona bite creyentiai cuena canodimaci. Omoimona navui ucubena cue oñena jira, birui cue oñena jira, cuemona ibana oñeitomoi. ¹⁰ Cristo cue illana uiñuamona, naimie uanaicinodo cue jaillamona, nana Acaya railla provinciamona iena jaca lloiticue. ¹¹ Omoina cue isiruilla jira, ucubena omoina jicañeiticue. Jusiñamui cue comecina raise uiñote. ¹² Abina iedeamona omoi motomo damierie: “Pablo isoi llofueticai” raitimaci. Ucubena omoimona feiñotimaci. Naimaci isoi iacaiñedicue. “Daje isoi maijdicai” naimaci raiñellena, ucubena omoimo jaca jicañeiticue. ¹³ Cristo oretaganona abi caitadinodimaci. Cristo dibeimo raise maijñedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretajanona itimacina jaidimaci. ¹⁴ Ieri rajicaiñedicue. Cominina jifuellena, Taifedi Jusiñamui jaienicina abi caitadimiena jaicabide. ¹⁵ Taife dibeimo itinodi Jusiñamui ie mare rafuena llofuerainina jaicabidimaci. “Cai lloga rafuedo omoi jiaia, Jusiñamuimona marebicaitomoi” llofuecabitimaci. Naimaci finolle rafue diese Jusiñamuimona duere sefuitimaci.

*Cristo oretagam*iena naimie illa jira, Pablo duere sefuide

¹⁶ “Pablo abina uiñoñedimie” raillamo omoi comeciaina facañeno; ia iese cuena omoi comeciaina facaia, cue llamo nia cacarei. Omoi motomo ite llofueraini abina iedua isoi, iacaiñedicue; ia janore cuemo iticino diga abina iedoticue. ¹⁷ Abina iedeamona cue lloia, cai Nama Cristo isoi lloñeiticue. Naimie cuemo llua jira, iena lloñeiticue; ia abina uiñoñedimie isoi lloiticue. ¹⁸ Omoi dine damierie llofueraini naimaci illa diga abina iedua isoi lloiticue. ¹⁹ Abina uiñoñedimaci; ia: “Abina eo raise uiñoticai” omoi llua-mona, naimaci llofuiacinona cacacabidomoi. ²⁰ Naimaci anamo omoina itataiacadimaci. Omoimo ucubena jicacabidimaci. Omoina ocuicabidimaci. Icirillamona, omoi uiecuaina bofedimaci. Iese omoina finocabidimaci; iadedi buena naimacimo finoñedomoi. Ibana oñedomoi. ²¹ Iese omoimo finoñedicue, omoina cue jaciruilla jira.

Cue illana omoimo ja lloiticue. Nibai abina raise uiñoñedicue; ia naie llofueraini isoi cue illa diga abina iedoticue. ²² Omoi motomo ite damierie llofuerainina ja lloiticue. Judíuai uaido ñaitimaci. Iena jiai ñaiticue. Judíuai nairai imaci. Daje isoidicue. Judíuai nairai imedicue. Abraham micori uruaidimaci. Jiai naimie micori uruedicue. ²³ “Cristo dibeimo maijdicai” raitimaci. Abina uiñoñedimie isoi lloticue; ia naimaci baifemo Cristo dibeimo maijdicue. Naimaci baifemo duere sefuidicue. Diga icaiño cárcelmo iticue. Diga icaiño fajamona duere sefuidicue. Diga icaiño niadedi fiodaicabiticue. ²⁴ Judíuai comini cinco digacaiño cuena fatimaci. Naga icaiño treinta y nueve digacaiño rao diga cuena jicuidimaci. ²⁵ Dacaiño amani radosi diga cuena fatimaci. Nofici diga cuena dacaiño fairinotimaci. Dacaiño amani bote diga namo anabaiticue. Darui naio monaillaimo botedo jamai fuiri baiticue. ²⁶ Eo jacirede illedo jaicabidicue. Fíriruidino eo illa jira, jaciruioicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaimo cue ia, diga icaiño duere sefuidicue. Naisodo cue macaria, duere sefuicabidicue. Monaillaido cue jiaia, duere sefuicabidicue. Cristo rafuena llorainina abi caitadinomona jiai duere sefuicabidicue. ²⁷ Cue ucube ollena, duere maijicabidicue. Diga icaiño raise iniñedicue. Diga icaiño aime guiticue. Rollimemona duere sefuicabidicue. Iniroininamona jiai duere sefuidicue. ²⁸ Diga jiaie rafuemona duere sefuicabidicue. Duenaillamona naga creyentiai illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue. ²⁹ Nie creyente Cristo rafuedo nia raise inoñenia, naimiemo cue comecina eo facadicue. Nie creyentena jiaimie jeacino finotaia, naimiemo cue comecina facadicue. ³⁰ Cue abina iedoiacania, jamai bue isoidimiedicuena lloiacadicue. ³¹ Cai Nama Jesús Moona Jusiñamui illanona, Jusiñamuimo jaca cai iobillasa. Naimiedi uanaicinona cue llua uiñote. ³² Cue illana nia lloiacadicue. Damascomo jiaie creyentena cue jailla

facaise cuena gaitatallena, Aretas railla illaima anamo ite gobernador di nairai llaiga nasena sedatate; ³³ iadedi llaigafo ecimo ite jofo a ite ventanamona cirigai isoide diga ana jaillanona, naiemona jillodicue.

12

Pablo nicairilla isoide rafuena ciode

¹ Abina iedoiacaiñedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. ²⁻³ Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicairilla isoi cue joreño, cue abi diga, uillana raise uiñoñedicue. Nibai dama cue joreña uite. Dama Jusiñamui iena uiñote. Naimie mare illanomo iticue. ⁴ Nainomo cue ñainina rafuena cacadicue. ⁵ Ie diga abina iedoñeiticue. Cue jamai bue isoidimie diga abina iedoiticue. ⁶ Uanaicinona cue llamona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitaiñedicue. ⁷ Naimie rafuena cuemo acataja jira, bie rafuena cue cacaja jira, ie diga eo abina cue iedoñellena, tagairede ra cuemo illa isoi Jusiñamui cuemo illamona, duere sefuidicue. Taife jaienici cuena duere finua isoi, duere sefuicabidicue. ⁸ Cuemona iena naimie oni oretallena, cai Namamo dacaiño amani jiidicue; ⁹ ia cuemo llote: “Ona jillotañeiticue; ia cue ona duenaillacinodo jaca ocuiñoitio. O abi eo mairiñenia, ona cue canuana raise uiñoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uiñoiticue. ¹⁰ Cristo muidona duere cue sefuia, cue comeciaina ocuiñoiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoia, cue comeciaina ocuiñoiticue. Cue duere sefuia, cue Nama cuena eo canode.

Pablo Corintomo ite creyentia imo comeciaina eo facade

¹¹ Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena riidoñedomoi; ia jiaino eo mare railla llofuerañina raise feiñotomoi. Jamai bue isoidicue; ia naimaci cue baifemo faiñedimaci. ¹² Omoi motomo siño rafuena cue finua jira, Jusiñamui cuena oretajana uiñotomoi. Cristo rafuena sefuiruiñeno omoi motomo iticue. ¹³ Cuemona duere sefuiñedomoi. Jiaie creyentiai omoi baifemo faiamo cue comeciaina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiai isoñedomoi. Iena omoi gaiñenia, iena feita. Cue diga iciriñeno.

¹⁴ Menacaiño navui omoi dine jaidicue. Omoi dine dane jaiacaducue. Omoimo ucubena jicañeiticue. Omoi rana jitaiñedicue; ia Cristo dibeimo omoi illana, naimiena omoi raise iinuana jitaidicue. Cue uruai isoidomoi. Rana eenoñedomoi, omoi mootiai iena; ia omoi mootiai rana eenotimaci, omoiena. Ie isoide. Cue uruai isoi omoi illamona, omoimona rana jitaiñedicue; ia omoimo rafuena iacaducue. ¹⁵ Nana cuemo ite ra omoimo fecaacaducue. Nana cue comecimo iticinona omoimo jiai iacaducue. Omoina eo isiruiticue; ia cuena janore isiruitomoi. ¹⁶ “Caimona ucubena jicañedio; ia jifuecana caimona otio” raicabitomoi. ¹⁷ Ero, omoi dine menamiena cue oretajamona, omoimona ¿nie isoide rana otiaimaiai? ¿Niese omoina jifuetiaimaiai? ¹⁸ Omoi dine Titona oretaticue. Jiaisie creyente imiena Tito diga oretaticue. ¿Niese Tito omoina jifujete? Omoimo coco comeciaina daje isoi facadicoco. Daje rafuedo jaca jaidicoco. Omoina jaca jifueñedicoco. ¿Niese omoi comeciaina raitomoi? ¹⁹ “Caimona ie abina riidote” cuemo nibai comeciaina facacabidomoi. Jusiñamui cuena uiñuamona, Cristomo cue duillamona, bie rafuena lloticue. Cue isiruiganodomoi. Cristo dibeimo omoi raise illena, naimiena raise omoi inollena, bie rafuena llocabiticue. ²⁰ Omoi dine cue ria, cue jitailla isoi omoi iñenamo jacinaiticue. Iese omoi ia, omoi diga cue illana jiai nibai gaiñeitomoi. Ieri cue comeci jarire ite. Nibai nia uaina uaitatomoi. Nibai nia abina iedotomoi. Nibai nia iciricabitomoi. Nibai nia omoi rana caidicabidomoi. Nibai nia jiaimona jeare

ñaicabito moi. Nibai nia jiaino joreña ñaicabito moi. Nibai nia abina uradoido moi. Nibai daje isoi comeciaina nia lloñedomo. Omoi iese illari cue comecidi jarire ite. ²¹ Omoi dine dane cue ria, omoi muidona Jusiñamui cuena meidaitajamo jacinaiticue. Cristo ðibeimo omoi raise iñenia, sunaiticue. Jearede rafuena omoi nia fainonocaiñenia, omoi aiñede riño diga illana omoi fainonocaiñenia, omoi iniñede iima diga illana omoi fainonocaiñenia, sunaiticue.

13

Iraicaiño Pablo naimacina llofuate

¹ Menacaiño omoi dine navui jaidicue. Omoi dine dane jaiticue. Coninimo omoi rafue ia, iena raise fino. Moisés micori jaie llote: “Mena iaimaia daje isoi lloillamona, daje amani daje isoi lloillamona, maraiñedicinona finodimiena duere finua”. ² Maraiñede rafue finodinomo navui riire lloticue. Nana omoimo riire lloticue. Omoi dine navui cue illa isoi, iena dane riire lloiacadicue. Omoi dine cue ria, naimaci comeciai iuai nia meidoñenia, naimacina duere finoiticue. ³ Iemona Cristo uai cuemo illana uiñotomo. Naimiena omoi iñuamona, naimie uai siñonana uiñotomo. Jamai uaido naimie omoina jillotañede; ia ie siño uaido omoina jai jillotate. ⁴ Jamai bue isodimie isoi cruzmo naimie fiodaite; ia fiodaillamona Jusiñamui uaido jillode. Cristomo cue duillamona, jamai bue isodimiena iticue; ia Jusiñamui uai cuemo illamona, omoimo ite rafuena raise finoiticue. ⁵ Cristona iñocana omoi raise jaillemo omoi comeciaina faca. Cristo jitaillacino omoi finollemo comeciaina faca. Cristomo omoi duillamona, Cristo omoi diga illana uiñotomo. Cristomo omoi duiñenia, naimie omoi diga nia iñede. ⁶ Cristo omoi diga illana omoi uiñuamona, Cristo uai cuemo illana jiai uiñotomo. ⁷ Maraiñedicino omoi finocana jaillana jitañedicue. Jusiñamuimo iena jiiiticue. Omoi comeciai iuai omoi meidoñenia, Cristo uai diga omoina duere finoacaiñedicue. Omoi comeciai iuai meiduana jitaidicue; ia Cristo uai diga omoina cue duere finoñenia, Cristo uai cuemo illana nibai uiñoñeitomo. ⁸ Cristomona cue uai illana omoi uiñollena, maraiñedicino omoi finuana jitañedicue. Mare rafuena omoi finocana jaillana jitaidicue. Iena finocana jiai jaiacadicue. ⁹ Cristo rafuena iñocana omoi raise jaia, iobidicue. Omoimo cue riire lloñenia, iobidicue. Cristo jitaillacino eo raise finocana omoi jaillena jicabidicue. ¹⁰ Birui bie rafuena cueticue. Omoi dine iñedicue; ia bie cartana omoi feiñua mei, omoi comeciaina raise finuana jitaidicue. Cai Namamona cue uaina feiñoticue. Iedo omoimo riire lloiacaiñedicue; iadedi iedo naimie ðibeimo omoi raise itataiacadicue. ¹¹ Cue amatiai, bie carta cuiana jai fuidoacaducue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiai comeciai daje isoi lloicana jai. Coniniri uri omoi i. Iemona Jusiñamui omoina isiruillana uiñotomo. Jusiñamui omoina uri itatajana uiñotomo. ¹² Nana creyentiaina eo caimare uaido. ¹³ Nana cue diga ite creyentiai imaci uaina oredimaci. ¹⁴ Cai Nama Jesucristo omoina jaca duenaite. Jusiñamui omoina jaca isiruillamona, coninina omoi isirui. Naimie Joreño omoimo illamona, coninina omoi nabai. Iese jitaidicue. Mai. Macaibaite. Pablocicue.

GALACIAMO ITE CRISTONA HNOTINOMO PABLO ORETAGA RABE

Uaiduacino

¹⁻² Galaciamo ite creyentiai, omoi dine bie carta oredicue. Pablodicue. ¿Nigacino? ¿Nie isoidomoi? Omoimo cue uai oredicue. Nana cue diga ite creyentiaidi imaci uaina jiai oredimaci. Jesucristo fetocamiedicue. Cai Moo Jusiñamui jiai fetocacue. Jesucristo fiodaillamona, Jusiñamuidi naimiena jillotate. Mare rafuena cue lollena, cuena orediamaiaia. Comini cuena oreñedimaci. Cue lloga uaina cominimona jiai oñedicue. ³ Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Omoina uri jai itatamaiaia. Iena omoi uiñocana mai omoi jai. ⁴ Cai Moo Jusiñamui jitailla isoi, birui ite marañedicinomona cai jilloillena, cai jeacino facaina Cristo fiodaite. ⁵ Cai Moona jaca cai iobillasa. Iena jitaidicue.

Pablo lloga rafuedi jaca dajede

⁶ Jusiñamuina raire omoi fainonocaillari rajicaidicue. Cristo dibeimo omoi illena, omoina Cristo duenaillamona, Jusiñamui omoina jai uaidote; iadedi omoi jeacinomona omoi jilloillena, jiaie rafuedo jai jaidomoi. ⁷ Jiaie mare rafue jaca iñede; iadedi Cristo rafuena jiaiforiedo llofuiamona dajerie omoi comeciaina uri itañedimaci. ⁸ Jesucristo rafuena omoimo jaie lloticaia. Jiaie rafuena lloticaidena, Jusiñamui riicaillafue anamo nia cai illasa. Jusiñamui jaienici jiaie rafuena llotena, Jusiñamui riicaillafue anamo jiai naimie illasa. ⁹ Omoimo jaie iese lloticue. Dane ja lloiticue. Cai llua isoi Cristo rafuena omoimo bu lloñenia, Jusiñamui riicaillafue anamo naimie illasa. ¹⁰ Comini cueri iobillana jitañedicue; iadedi Jusiñamui cueri iobillana jitaidicue. Comina iobitaiacadicuena, Cristo dibeimo nia maijñedicue.

*Ie oretagami*ena jaillena, Cristo Pablona fetua rafue

¹¹ Cue amatiaia, cue lloga rafuena omoi raise uiñuana jitaidicue. Omoi jeacinomona omoi jilluana jaie lloticue. Bie rafuena comini comeciaia facajacinomona oñedicue. ¹² Cominimona oñedicue. Bu jaca cuena iena llofueñede; iadedi Jesucristo cuena uiñotade. ¹³ Jesucristona nia cue iñoñenia, cue judíuai einamaci lloga rafuedo cue jaillana jai fididomoi. Cristona iñotinona jaie eo duere finodicue. Naimacina fuidoacaducue. ¹⁴ Cue einamaci jaie llua isoi, Jusiñamuina raise iñoticue. Naimaci llogacinuaido eo duere cue jailla jira, daje facai cue diga itino baifemo iñoticue; ¹⁵ iadedi nia cue jeicñenia, Jusiñamui cuena fetode, naimie iena. Cuena duenaillanona, cuena uaidote. ¹⁶ Omoi judíuañedomoimo naie Jito rafuena cue lollena, cuemo ie Jitona jaie baretate. Naie facaise cuemo jai suide rafuena bu diga ñañedicue; ¹⁷ ia Arabia railla eniruemo jaidicue. Nainomo comini iñena jira, cuemo jai suide rafuemo comecina facadicue. Jerusalémo Jesucristo nano oretagano dine jañedicue. Cuena Jesucristo nia oretañenia, naimacina orede, ie uai lollena. Arabia railla eniruemo cue illa mei, Damasco railla nairaimo abido jaidicue. ¹⁸ Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo quince digarui iticue. ¹⁹ Naie facaiseconi nana Jesucristo oretaganona cioñedicue. Pedrona ciodicue. Jacobona jiai ciodicue. Naimiedi cai Nama ie ama Jiainona cioñedicue. ²⁰ Omoimo nana cue ciegacínodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue. ²¹ Jerusalémo cue illa mei, Siria railla eniruemo jaidicue. Cilicia railla eniruemo jiai jaidicue. ²² Judeamo ite Cristona iñotinodi cuena nia cioñedimaci. ²³ Cuena iese fididimaci: “Navui caina duere finocabidimiedi Jesucristo rafuena jai llote. Jesucristona cai iñuana navui jitañede. Caina fuidoacade”. Jiaie cue finoca rafuena fidñedimaci. ²⁴ Ie fidiamona, cueri Jusiñamuimo iobillacinona jai fecadimaci.

2

Jerusalémo Pablo jailla rafue

¹ Catorce años illanona, Jerusalémo dane jaidicue. Bernabé cue diga jaide. Titona uiticue. ² Jusiñamui cuemo llua jira, nainomo ite creyentiaimo jaidicue. Judúuaiñedino Cristo rafuena jai ñinuana cue llollena, jaidicue. Cue llofuiana naimaci raise uiñollena, creyentiaí illaicominimo anado nano lloticue. Cue llofuiana: “Mare” naimaci raillana uiñoiacadicue. Tainona Cristo rafuena cue lloi raillanona uiñoiacadicue. Naimaci diga cue ñaia mei, cue llofuiana: “Mare” raitimaci. ³ Tito cue diga ite. Naimiedi judío nairai imieñede; iadedi naimaci abina detacabilla isoi, creyentiaí illaicomini dinena naimie abi detatajana lloñedimaci. ⁴ Creyentiaina abi caitadino billa jira, Tito abina detatajana siadoticaí. Naimacina cai uaidoñeno bitimaci. Moisés micori llogacinuai anamo cai iñenana naimaci uiñollena, bitimaci. Cristo Jesús cai ñinua jira, Moisés micori llogacinuaido jai jaiñedicai. Moisés micori llogacinuai anamo caina dane itatallena, iena uiñoiacadimaci. ⁵ Cai mare rafuena jiaiena jaca meidoñellena, naimaci ñaiana dallu cacareñedicai. Uanaicinona omoi uiñuana jitaídicaí. ⁶ Naie creyentiaí illaicomini omoimo llollena, cuemo jiaie rafuena lloñedimaci. Illaicominina raillanodimaci; iadedi cuemona jamai bue isoidimaci. Jusiñamui nana comini daje isoi feiñua jira, naimaci uai cue uai baifemo faiñede. ⁷⁻⁹ Cue llofuiana rairuiñedimaci; iadedi creyentiaí illaicomini cuena Bernabé diga marena feiñotimaci. “Daje isoi comeciaina facadicaí” raillamona, cue llofuiana: “Jai mare” raitimaci. Creyentiaí illaicominidi Jacobo, Pedro, Juan digamie. Judúuai dine Pedrona Jusiñamui oretaja isoi, cue llumona judúuaiñedino dine Jusiñamui cuena oretajana uiñotimaci. Pedro llumona Jusiñamuidi ailluena judúuaina creyentiaina itatate. Cue llumona, Jusiñamuidi ailluena judúuaiñedinona creyentiaina jiaí itatate. Iemona Jusiñamui uai cuemo illana jai uiñotimaci. Judúuaiñedinomo Jesucristo rafuena llocana nia coco jaillana jitaídicaí; iadedi judúuaimo Jesucristo rafue llocana nia jaidimaci. ¹⁰ Daje rafue cocomo llotimaci. “Duerede creyentiaina canocabi” llotimaci. Iena iocire finoacadicue.

Antioquíamo suide rafue

¹¹ Antioquíamo cue jailla mei, Pedro nainomo jiaí jaide. Nainomo Pedro bia, maraiñedifue naimie finua jira, naimie uiecomo naimiemo riire lloticue. ¹² Nainomo Pedro nano rilla mei, nana creyentiaí diga nainomo naimie guisoide. Judúuai creyentiaí diga, judúuaiñede creyentiaí diga, danomo guisoide. Iemei Jacobo dinena damierie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judúuaiñede creyentiaí diga Pedro jai guiñede. Ie ñinoga rafuedo naimie jai jaiñede. ¹³ Naimie iese illamona, judúuai creyentiaídi judúuaiñede creyentiaí diga jai jiaí guiñedimaci. Pedro illa isoi, Bernabé iedo jiaí jaide. ¹⁴ Naimaci iese illa jira, Jesucristo rafuedo raise jaiñedimaci. Uanaicinodo jaiñedimaci. Iena cue uiñua jira, nana comini uicomo Pedromo lloticue: “Judío nairai imiedo; iadedi o jeacinomona o jilloillena, cai einamaci llucacino birui jaiñedio. Ie jira, ¿bue ñellena judúuaiñedino cai einamaci llucacino jaillana jai jitaídi?”

Judúuaidi creyentiaina jailla mei, Moisés micori llogacinuaido jai jaiñedimaci

¹⁵ Nia lloticue: Judúuaiñedinodi Moisés micori lloga uaina jaie uiñoñedimaci. Caidi judúuaina jeicigacai. Ie muidona Moisés micori llogacinuai anamo jaie jeicigacai. ¹⁶ Iese iticaí; iadedi Moisés micori llogacinuaido jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona ñinuamona marebicaidicaí. Iena uiñoticaí. Ie jira Cristo Jesúsna ñnoticaí, cai marebicaillena. Cai marebicaillena, Moisés micori llogacinuaina ñnoñedicai. Moisés micori llogacinuaina ñnuamona, jaca buna marebificainide. ¹⁷ Jusiñamuiomona cai marebicaicallena, Cristona cai ñnuamona jeacino finorainiñedicai. “Cuena ñnuamona, marebicaitomoi” Cristo iese llofueuide. Naimie llua isoi cai marebicaiñenia, cai jeacinomona nia cai jilloñenia, Cristo muidona; iadedi iese iñedicai. ¹⁸ Moisés micori llogacinuai jai jamaiñocadicue. Ie jira naicinuai

dane abido cue oia, iena birui cue ñnoñena jira, jai jeacino finoraimedicue. ¹⁹ Iemona cue marebicaiñena jira, Moisés micori llogacinuai cuemo jai duiñede. Ie anamo jai iñedicue. Ie muidona Jusiñamui llogacinuaido jai jaidicue. Cristo anamo jai iticue. ²⁰ Naimie díbeimo jai iticue. Cristo cuemo ite. Cristo cuena namatade. Jusiñamui Jitona cue ñnocana jai jaidicue. Cuena isiruillamona, naimie jitaillamona, cueri fiodaite. ²¹ Jusiñamui caina duenaillana jamaiñedicue. Jusiñamui jitailla isoi, Moisés micori llogacinuaina cai ñnuamona marebicaidicaina, Cristo tainomo niade fiodaite.

3

Jesucristona ñnuamona judúuaidi Jusiñamui Joreña feiñotimaci

¹ Gálatas imaci, abina jai uññoñedomoi. Jiaño omoína birui jifuate. Omoimo Jesucristo cruzmo fiodailla rafuena jaie marefodo lloticue. Iena raise cacadomoi. ² Ie jira omoimo buena jicanoiacadicue: ¿Ñiese Jusiñamui Joreña jaie feiñotomoi? Moisés micori llogacinuaido jaillamona iena feiñoñedomoi. Jesucristo rafuena omoi cacajamona, ñnotomoi. Ie mei Jusiñamui Joreña feiñotomoi. ¿Ñiese birui abina uññoñedomoi? ³ Omoi marebicaillena, Jusiñamui Joreño omoimo jai ite; iadedi Moisés micori rafuena dane omoi jaiacanamona, omoi jiaie finolle rafuemona jai marebicaiacadomoi. ⁴ Jusiñamui Joreñomona díga marecinuaina feiñotomoi; iadedi iena jai jitaññedomoi. Iese omoi illana ñnoñedicue. ⁵ Dane jicanoiiticue: ¿Ñiese Jusiñamuidi ie Joreño omoimo fecade? ¿Ñiese siño rafuena omoiri finode? Moisés micori llogacinuaido omoi jaillamona ie Joreño omoimo fecañede. Moisés micori llogacinodo omoi jaillamona, siño rafuena omoiri finoñede; iadedi Jesucristo rafue omoi cacajamona, iena omoi ñnua jira, ie Joreña fecade. Iemona siño rafuena omoiri jiaí finode.

Abraham micori Jusiñamuina ñnua muidona marebicaide

⁶ Abraham micori ie rafuena lloiticue. Naimie micorimona fueoiticaí. Moisés micori naimiena cuete: “Abraham micori Jusiñamuina ñnua jira, Jusiñamuimona naimiedi marebicaide”. ⁷ Iena cai cacajamona, Abraham micori isoi cai ñnuamona, naimie ua cominina cai illana uññoticaí. ⁸ Jusiñamuidi judúuainedino ico marebicaillena jaie uññote. Naimiena ico naimaci ñnollena jaie jiaí uññote. Iena uññuamona, Jusiñamuidi ico suille rafuena Abraham micorimo jaie llote. Mare rafue naimiemo llote: “Nana cuena o isoi ñnotinona marebicaitaiticue” llote. ⁹ Abraham micoridi ñnote. Jusiñamui naimiena marebicaitate. Ie isoide. Nana Jusiñamuina ñnotinona marebicaitate; ¹⁰ iadedi nana Moisés micori llogacinuaido jaidino jai faidobidimaci. Moisés micori iena jaie cuela: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicaí. ¹¹ Buena uññoticaí. Moisés micori llogacinuaido jaillamona, Jusiñamuimona jaca buna marebicaiñede. Jusiñamui facaina lloraíma iena jaie cuete: “Jusiñamuina ñnuamona marebicaidimaci. Ie mei jaca iitimaci”. ¹² Moisés micori llogacinuai daje isoñede. Nana Moisés micori llogacinuaina finuamona comini marebicaide. Moisés micori iena jaie cuela: “Cue lloga uai finuamona, marebicaidimaci. Iemei jaca iitimaci”. Jusiñamuina ñnuana lloñede: ia ie lloga uai finollena cominimo llote. Nana ie lloga rafuena finuamona, cominidi marebicaidimaci.

¹³ Moisés micori llogacinuai anamo jaie cai illa jira, faidobidicaí; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuela: “Cruzmo cuinacamie Jusiñamuimona jai faidobide”. ¹⁴ Jusiñamuina naimie ñnua jira, Abraham micori jaie marebicaide. Jesucristo fiodailla muidona, naimiena judúuainedino ñnuamona, Abraham micori isoi marebicaidimaci. Jusiñamuidi ie Joreña caimo fecallena jaie llote. Ie muidona Jesucristona ñnuamona, Jusiñamui Joreña birui feiñoticaí.

Jusiñamui lloga rafue

¹⁵ Cue amatiaí, bie rafuemo comeciaina faca. Ñie isoide rafuena menamie finoacania, naie rafuena feitañellena, rabemo cuetiaímaiaí. Iaimaiaí mamecina nainomo cuia mei, jairuido damie naie rafuena jiaífo dama meidonide. ¹⁶ Ie isoide. Jusiñamuidi Abraham

micorimo ico suille rafuena jaie llote. Iena naimie llua jira, iena meidonide. Ie uruiaimo ico suille rafuena lloñede; ia daje uruemo ico suille rafuena llote. Cristona ñaite.

¹⁷ Biena lloiacadicue. Naimie jilloillena, Jusiñamuina naimie ñnuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jiaie rafuena llote; iadedi Abraham micorimo jaie lloga rafuena meidoñede.

¹⁸ Jusiñamui llua jira, Abraham micori jillode; iadedi Moisés micori llogacinuaido cai jaillamona, cai jilloiadedi, Abraham micori isoi jilloñedicai. ¹⁹ Iese itena, ¿bue ñellena Jusiñamui Moisés micorimo jiaie rafuena llote? Naiemona jeacinona cai uiñollena, iena llote. Naie rafue ite, Cristo eniruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena oñedicai. Jusiñamuidi ie jaienisaimo naie rafuena llote, Moisés micorimo iena llollena. Ie mei Moisés naie rafuena cominimo llote; ²⁰ iadedi Jusiñamuidi Abraham micorimo ie rafuena atona llote. Jaiimiemo iese lloñede, Abraham micorimo iena llollena.

²¹ Moisés micorimo Jusiñamui rafuena llote; ia naiemona Abraham micorimo llogacino nia saiñede. Cai jilloillena, cai jaca illena, Moisés micorimo Jusiñamuidi rafue finuana llotena, naie rafuena cai finuamona marebicaidicai; ²² iadedi Moisés micori cuegafuiaidi nana comini jeacino anamo illana llote. Moisés micori llogacinuaido jaillamona, jeacino anamona jilloñedicai. Jesucristona cai ñnuamona Jusiñamui llua isoi, jeacino anamona jillodicai. ²³ Jesucristona ñnuana nia cai uiñoñenia, Moisés micori llogacinuai anamo iticai. Jesucristo billamona, naimiena ñnuana uiñoticai. ²⁴ Moisés micori llogacinuaidi cai lletarafue. Cristo ñibeimo cai illena caina lletade. Cristona cai uiñuamona, naimiena cai ñnuamona, marebicaidicai. ²⁵ Naimiena ñnuana jai cai uiñuamona, naie lletarafuena jai oñedicai.

Abraham micori ua uruai

²⁶ Cristo Jesúna ñnuamona, nana omoi Jusiñamui cominidomoi. ²⁷ Cristo ñibeimo omoi illamona, bautizagaomoi. Iemona naimie Moodi jiai omoi Moo. ²⁸ Jusiñamuimona dajena itomoi. Naimiedi nana cominina feiñote. Judúuaina omoi illamona, omoína feiñote. Judúuaiñedinona omoi illamona, omoína feiñote. Mullaiaína omoi illamona, omoína feiñote. Mullaiaíñedinodomoidena, omoína feiñote. Hiñiaína omoi illamona, omoína feiñote. Riñoniaína omoi illamona, omoína feiñote. Jesucristona omoi ñnuua jira, jaca damacidomoi. ²⁹ Cristomo omoi jai duiadedi, Abraham micori cominidomoi. Ie jira Jusiñamui Abraham micorimo lloga rafuemo jiai jainaiaidomoi.

4

Jusiñamui uruiaína jaidicai

¹ Moisés micori llogacinona dane lloiticue. Jiaie rafuedo iena lloiticue. Riaí uruaií moo fiodailla mei, ie moo raruiaidi nano doforamiemo fiebide. Naie nano doforamie uruenia, naimie mamecido naimiemo jiiide. Naimiemo nia raise jiiñede. Naimiedi nia jamai ite isoide. Naimie ie jofomo mullaiaí isoi ite. ² Naimie moo llua ñnori jiaíno anamo naimie ite. Ie moo raruiái jiaíno anamo jiaí ite. Naimie jai eimiena illemona naimie moo raruiaidi naimiemo raise jai duite. ³ Jaie daje isoidicai. Uruiaí isoidicai. Cai jaiagai llogacinuai anamo iticai; ⁴⁻⁵ iadedi ie jitailliruimo Jusiñamuidi ie Jitona orede, naicinomona caina jilloitallena. Jusiñamui uruiaína cai jaillena, ie Jitodi naicino anamo riñomona jeiciga. ⁶ Naimie uruiaidicaina jira, Jusiñamuidi ie Jito Joreño cai comeciaino orede. Naimiena cai feiñuanona, naimiedi caina Jusiñamuina: “Cai Moo” raitatate. ⁷ Ie jirari jiaíno anamo jai iñedomoi; iadedi Jusiñamui uruiaidomoi. Jusiñamui uruiaidomoi jira, nana naimie lloga rafue omoimo jai duide.

Moisés micori llogacinuai anamo omoi jaia, danomo abido jaidomoi

⁸ Jaie Jusiñamuina nia omoi uiñoñenia, ua jusiñamuillaiñede ra anamo itomoi. Naie isoide rana sedauidomoi. ⁹ Jusiñamuina jai uiñotomoi. Naimie omoína jai uiñote. ¿Bue ñellena omoína marebicaitañede rafuedo dane jaiacadomoi? Omoína jilloitañede rafue anamo dane iacadomoi. ¹⁰ Judúuai comini rafuena finocabillaruimo jiai finocabidomoi.

Iemona: “Marebicaiticai” raillanona iese finocabidomoi. ¹¹ Cue lloga uai omoi finoñena jira, omoimo tainona jai lloticue. Nibai jai tainomo maijidicue.

Pablo naimaci diga illana uibiñote

¹² Cue amatiai, omoi dine nano cue jaia, Moisés micori llogacino anamo iñedomoi. Naie llogacino anamo jaie iticue; ia birui ie anamo iñedicue. Birui cue illa isoi omoi illana jiai jitaidicue. Omoi dine cue nano ia, cuena raise feiñotomoi. ¹³ Cristo rafuena omoimo nano cue llua facaiseconi duidicue. Iena uiñotomoi. ¹⁴ Cue duico omoimona jacire eruaide; iadedi cuena jearuiñedomoi. Jusiñamui jaienici omoi dine billa isoi, cuena feiñotomoi. Jesucristo omoi dine billa isoi, cuena jiai feiñotomoi. ¹⁵ Jaie caimare iticai. ¿Niese birui cue diga caimare iñedomoi? Cuena omoi canoitena, cuemo fecallena, omoi uisi jaie jino juiconoiacadomoi. ¹⁶ Omoimo jicanoiacadicue: ¿Unaicinuai omoimo cue llua jira, omoi enoillamiena jai jaidicue? ¹⁷ Moisés micori llogacinuaido jaidino omoina eo nabairitimaci; iadedi mare rafuena finoacaiñedimaci. Naimaci diga omoi nabairillena, cue diga omoi nabairillana jai jitaiñedimaci. ¹⁸ Mare comeciainona cuena omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiai mare. ¹⁹ Cue uruai, Cristo omoi comeciaina raise namataja dinori, omoi cue comeci eo duere dane llicidaite. ²⁰ Omoi diga ja iacadicue, omoi diga atona raise ñaillena. Omoimona are cue illa jira, dane raise cai nabairillena, omoimo cue llua raise uiñoñedicue.

Jesucristo rafue Moisés micori llogacinuai baifemo faite

²¹ Moisés micori llogacinuai anamo iacadino, omoimo daje rafuena jicanoiacadicue: ¿Moisés micori cufuina raise cacadomoi? ²² Moisés micori jaie cuga: “Abraham micorimo mena jito ite. Daje jito ie mullañomona comuide. Jiaie jito ie mullaiañediñaiñomona comuide. Naiñaiñodi ie nanoca ai. ²³ Abraham micori jitailla jira, ie mullaño jitona comuitate; iadedi ie mullaiañediñaiño jito comuide, Jusiñamui llua jira”. ²⁴⁻²⁵ Naie rafuemona cai fueolle. Ie iañuaidi mena jai lloga rafue isoidiañuai. Abraham micori mullaño mameci Agar micori. Naiñaiñodi Sinaí railla anedumona lloga rafue isoide. Arabia railla enruemo Sinaimona Jusiñamuidi Moisés micorimo rafuena llote. Naiñaiño mullañona jira, ie urue mullaimana jeiciga. Ie nama anamo jaca ite. Ie isoide. Moisés micorimo llogacinuaido jaidinodi naie rafue anamo itimaci. Jerusalémo itino Moisés micori llogacinuai anamo jai nia illa jira, Agar micori Jerusalén railla nairai isoide. ²⁶ Jiañaiñodi jiaie lloga rafue isoide. Naiñaiño Abraham micori ai. Naiñaiñodi Sara micori. Naiñaiñodi monamo ite Jerusalén isoide, naiñaiño mullañoñena jira. Nainomo jainaaidicai, Moisés micori llogacinuai anamo jai cai iñena jira. ²⁷ Isaías micori iena jaie cuete:

Oñiño, mai iobi.

Urue nia jocoñediñaiño, ado iobi.

ñirediñaiño baifemo eo uruiairenitio.

Iemona Moisés micori llogacino anamo iñedinomona Cristona iñotinona ailluena jaillana uiñoticai.

²⁸ Cue amatiai, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruiaina jaidicai. ²⁹ Ero, mullaño jitudi mullaiañediñaiño jitona jaie duere finouide. Daje isoi Moisés micori llogacinuai anamo itinodi Jusiñamui Joreño anamo itinona birui duere finocabidimaci. ³⁰ ¿Niese cai nibaille? Moisés micori Sara micori llua jaie cuete: “ ‘Mullañona, naiñaiño jito diga, oni dota. Ie moo fiodailla mei, mullaño jito ie moo raruaina feiñoñeite. Dama mullaiañediñaiñede jito ie moo raruaina feiñoite’ llote”. ³¹ Ie jira mullaño urue isoiñedicai Moisés micori llogacinuai anamo jai cai iñena jira, mullaiañediñaiño urue isoidicai.

¹ Moisés micori llogacinuai anamona Cristodi caina jai jillotate. Ie jira omoi comeциаina ocuiño. Jaie omoi illa isoi, dane jaiñeno. Omoi marebicaitañede rafue anamo jaie itomoi. Ie jira Moisés micori llogacinuai anamo iñeno. Iemona marebicaiñeitomoi. ² Jeacinomona omoi jillobillena, Moisés micori llogacinodo omoi jaiacanamona, omoi abiaina omoi detataia, Cristo rafuena jai jitaiñedomoi. ³ Dane lloiticue: Jeacinomona omoi jillobillena, naga abina detatagamie nana Moisés micori llogacinuaina iñua. Nana iena iñoñenia, naimie jilloñeite. ⁴ Moisés micori llogacinuaina iñuamona omoi marebicaiacania, Cristo rafuena jai duiñedomoi. Jusiñamui caina duenailamona, Cristona jaie cai dine orede. Moisés micori llogacinodo omoi jaiacania, Cristo rafuena jai jitaiñedomoi. ⁵ Moisés llogacinuaina iñuamona marebicaiñedicai; iadedi Jesucristona cai iñuamona, Jusiñamui Joreño caina canuamona, cai marebicaillemo iocire ocuiridicai. ⁶ Abina detatajamona, cai jeacinomona jilloñedicai. Abina cai detatañenamona, jiai jilloñedicai. Dama Cristona cai iñuamona jillobidicai. Naimiena cai iñua jira, nana cominina isiruicana jaidicai. ⁷ Cristo rafuedo navui marena jaidomoi; ia damierie uanaicinona omoi iñuana jai jitaiñedimaci. ⁸ Jusiñamuimona naimaci uaina oñedimaci. Jusiñamui omoina navui uaidote, naimie dibeimo omoi illena.

⁹ Jiai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damie jiaie rafuedo jaia, diga cominina jifuerede, naimie jailla dibeido jaillena. ¹⁰ Jiaie rafuedo omoi jaiñellemo cue comecina jai facadicue. Cai Nama cue iñua jira, cue lloga uaido omoi jaillimo cue comecina jai facadicue. Omoi comeциаina naganomo itatatimiena uiñoñedicue; iadedi Jusiñamui naimiena duere finoite.

¹¹ Cue amatiai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fiodailla rafuena jai cue lloñena jira. ¹² Omoi comeциаi naganomo itatatinodi raitimaci: “Janore jisa abina detatajamona, cai jeacinomona jillobidicai”. Iese itena, Jusiñamuina uiñoñedino finua isoi, namiena naimaci abiai diana jiai jitaicue.

¹³ Moisés llogacinuai anamona Jusiñamui omoina jai jillobitade; iadedi maraiñede rafuena omoi finollena jillobiñedomoi. Omoi jillobilla jira, naimacina omoi isiruilla jira, jiaie cominina cano. ¹⁴ Moisés micori iena jaie llote: “O abi o isiruilla isoi, o ecimo itinona isirui”. Iena omoi finoa, nana Moisés micori llogacinuaina jai finodomoi. ¹⁵ Iese omoi finoñenia, conima diga omoi riire iciria, jaca danomo iñeitomoi.

Jiaie cominina omoi isiruilla rafue

¹⁶ Omoimo nia lloiticue. Jusiñamui Joreño omoi comeциаimo namatajano omoi i. Omoi comeциаimo ite maraiñedicinodo omoi jaiñeno. ¹⁷ Cai comeциаimo ite maraiñedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; ¹⁸ iadedi Jusiñamui Joreño anamo omoi raise ia, naimie lluaña omoi raise iñoia, Moisés micori llogacinona jai jitaiñedomoi. ¹⁹ Ero, maraiñede comeциаimo iticinodo omoi jaia, bie isoidicinona finocabidomoi: aiñede riño diga illacina, iniñede iima diga illacino, jeare ñaiacino, diga eo jearede rafuena finuacino, ²⁰ jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino, ²¹ dama abina uradoillano, rana bairuacino, comena meiniacino, jifailacino, aifuerillacino, ie isoidicino. Omoimo jaie lloticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajano jainaiñeite. ²² Jusiñamui Joreño omoi comeциаimo namataia, bie isoidicinona finocabidomoi: nana comini isiruillacino, comeci caimare illacino, uri illacino, raire iciriraininacino, duenailacino, jiaie cominina canuacino, ie lloga uaina finuacino, ²³ uai oñenacino, abina eenuacino. Moisés micori llogacinuai bie isoidicinona ñaiñede. ²⁴ Cristo Jesúsimo jainaiidindodi naimaci maraiñede comeциаi jitaillacino anamo iñedimaci. ²⁵ Jusiñamui Joreño caimo illa jira, naimie cai comeциаina namatajacinodo cai jaillesa. ²⁶ Iemona abina cai biriñellesa. Abina jiai cai iedoñellesa.

6

Jiaie llofuiacino

¹ Cue amatiai, omoimona damie ebena jamai jeacinona finoia, dane Jusiñamui díbeimo naimie raise illena, naimiemo fecuise iciñeno lloño. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino fino raillano, nagamiiai abi rairuillesa. ² Bu duere sefuia, bu Taife ramo faia, coninina cano. Iese omoi canoia, Cristo llogacinuaina jai ñnotomoi. ³ “Cue mo iese suiñeite. Dama abina sedadicue. Jamai bue isoñedicue” comecina facadimie dama abina jifueite. Naimie jamai bue isoide. ⁴ Maraiñeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jiaimiemo ite maijia rafuedi naimiemo duiñede. ⁵ Naimie finoca rafuemonaga nagamie jeacinona finoia, dama naimie muidona. ⁶ Naga Jesucristo rafuena fueotimiedi ie llofuegamiemo mare ra fecalle. ⁷ Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamui ibana feiñoite. ⁸ Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faifiñeite. ⁹ Jusiñamui Joreño jitaillacinona finuana sefuiruiñeno. Cai comeciiai cai ocuiñoia, Jusiñamui jitailla facaiseconi ibana feiñoiticaí. ¹⁰ Ie jira nana cominina canocabi. Nana creyentiaina ua eo canocabi.

Facaduacino

¹¹ Ero, jerie cuiano omoimo bie facaimo cueticue. ¹² Jiaie cominimona iobillacinona omoi abiaina detatajana jitaicino feiñoiacana jira, omoi abiaina detatajana jitaicimaci. Cristo rafue lloticaínadedi: “Cristo rafuena uiñoñedinodi niade duere caina finodimaci” raillanomo comeciaina facajamona, iese jitaicimaci. ¹³ Omoi abiaina detatajana jitaicidinodi Moisés micori llogacinodo raise jaiñedicimaci. Nana iena ñnoñedicimaci. Omoi abina iedoiacana jira, omoi abiaina detatajana jitaicimaci; ¹⁴ iadedi Jusiñamuidi jiaie rafueri abina cue ieduanana jitañede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaiañedicue. Naie rafue anamo jai ñedicue. ¹⁵ Abina diamona cai jeacinomona jilloñedicai. Abina deñenanomona jaca jilloñedicai; iadedi Jusiñamui Joreño caina comonori comuitajamona jillobidicai. ¹⁶ Jusiñamuidi nana bie llucinodo jaidino uri itatatesa. Naimie naimacina duenaillasa. Jusiñamui cominidi ua jaca iese illasa.

¹⁷ Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellañona jai oticue.

¹⁸ Cue amatiai, cai Nama Jesucristo omoína duenaillasa. Mai. Pablocue.

EFESOMO ITE CRISTONA HNOTINOMO PABLO ORETAGA RABE

*Efesomo ite creyentia*imo Pablo cartana orede

¹ Efeso railla nairaimo ite creyentiai, Pablodicue. Bie carta omoi dine oredicue. Ie rafue lollena, Jusiñamui jitailla jira, Jesucristo oretagamiedicue. Naimiemo omoi jai jainaiailla jira, Jesucristona hnocana jai jaidomoi. ² Cai Moo Jusiñamui, cai Nama Jesucristo diga, omoina duenaicabillana uiñocana mai omoi jai. Iaimaiai omoi comeciaina uri itatajacabillana uiñocana mai omoi jai.

Cristomo jai cai jainaiailla jira, Jusiñamui marena itatajacinona feiñoticaí

³ Cristomo cai jainaiailla jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiailla jira, cai comeciai marena itatajacinona Jusiñamuimona jai feiñoticaí. ⁴ Iena ja lloiticue. Enirue nia iñenia, Jusiñamui nana naimiena hnotinona jaie fetode. Cai facaina Cristo ico fiodaillena naimie uiñuamona, caina jaie fetode. Naimiemono cai marebicaillena, jeacinona cai finoñellena, caina fetode. ⁵ Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fiodaillamona Jusiñamui uruiaina jaidicaí. ⁶ Naimie caina fetuamona, naimie caina duenaillana jai uiñoticaí. Iemono naimiedi eo mareuidimiena jai jai uiñoticaí. Ie isiruiga Jitomo cai jainaiaillamona iena uiñoticaí. Naimiemo buena cai finoñenia, caina duenaite. Naimiena cai iobitallena, caina fetode. ⁷⁻⁸ Caina eo duenaillanona, ie Jito fiodailla jira, Jusiñamuidi jeacino anamona caina jai jillotate. Cai jeacino oni dotajamona, ibana jiai oñeite. ⁹ Naimiena cai raise hñollena, caina abina jai uiñotade. Jusiñamui caina naimie nana caina birui jilloitaiacanana jai uiñotade. Cai cominidi iena jaie uiñoñedimaci; iadedi Jusiñamui jitailla diese Cristo finoca rafuedo caina iena jai uiñotade. ¹⁰ Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. “Cristo cai Nama” raitimaci.

¹¹ Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uiñuanona, caina jaie fetode. Ie muidona naimie cominina jai jaidicaí. ¹² Naimie caina fetuanona Cristona jaie hnoticaí. Naimie diga ico jaca cai illemono birui ocuiridicaí. Naimiena cai iobitallena caina fetode. “Naimie fue eo mare” cai raillena caina fetode. ¹³ Cristona jai birui hnotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uiñotomoi. ¹⁴ Jusiñamui Joreño caimo jaca illa jira, Jusiñamui diga ico cai jaca illena uiñoticaí. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raillamona, naimiena iobitaiticaí. Naimiemo cai jainaiailla jira, naimiemono nana cai comeciai marena itatajacinona feiñoticaí.

Naimaci facaina Pablo jiiide

¹⁵ Cai Nama Jesúsna omoi hñuana jai fididicue. Nana jiaie creyentiaina omoi isiruillana jiai fididicue. ¹⁶ Ie jirari Jusiñamuimo cue jiiia, omoina feitañedicue. Omoi facaina naimiemo iobillacinona jaca fecadicue. ¹⁷ Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jiiianona, omoi facaina jicanoticue. Naimie Joreño uaido naimie rafue raise uiñocana omoi jaillena jicanoticue. Naimiena raise uiñocana omoi jaillena jicanoticue. Iese omoi facaina jicanocabiticue. ¹⁸ Naimie dibeimo omoina naimie jai uaidua jira, naimie diga ico jaca omoi illemona, iena omoi raise uiñuana jitaidicue. Naimie cominina omoi jai jailla jira, naimie illanomo ico eo marena iocire iitomoi. Iena omoi raise uiñuana jitaidicue. ¹⁹ Naimie uai ua eo siñonana

omoi uiñuana jitaídícue. Naimiēna cai ĩnuua muidona, ie uaido naimie caina canorede. Iena omoi raise uiñuana jitaídícue. ²⁰ Fiodaillamona Cristona ie uaido Jusiñamui jai jillotaja jira, naimie uai siñonana uiñotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate. ²¹ Ie jira Cristo nana Jusiñamui jaiēnisaí afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaímaiaí isoide joreñuaí afemo naimie ite. Birui iese ite. Ico iese nia iite. ²² Jusiñamuidi naga ra Cristo anamo ua jai itatate. Cristona nana creyentiaí imaci illaimana jiaí ua jai itatate. ²³ Cristomo daajena nana cai creyentiaídicaí duidicaí. Naimie anamo cai illanona, naimie nana caina ocuicabide. Ie jira marena cai illena naimie jitailla isoi, naimie nana caina birui canocabide.

2

Jusiñamui caina isiruilla jira, cai jeacínomona jai jillobidicaí

¹ Jusiñamuina jaie omoi nia ĩnoñenia, naimiemo omoi duiñena jira, naimiemona fiodaitino isoidomoi. Jeacino anamo omoi illa jira, naimiemona fiodaitino isoidomoi. Jeacino finocana jaidomoi. Maraiñedínona finocana jaidomoi. ² Jeacínona ebiruitomoi Jusiñamui díbeimo iñedíno rafuedo jaidomoi. Taife díbeido jai jaisoidomoi. Jusiñamuina oiacaíñedíno Taife jitailla rafuedo jaisoidímaci. ³ Naimaci isoi jaie nana iticaí. Cai comeciáimo ite jearede jitaillacínona finodicaí. Iedo jai jaisoidicaí. Ie jira Jusiñamui riicaíllafue anamo jaie iticaí. Iese jaie nana iticaí. ⁴⁻⁵ Jeacínona jaie cai finua jira, jeacino anamo iticaí. Jusiñamuina ĩnoñedicaí; iadedi Jusiñamui caina eo duenaillanona, caina eo isiruillamona, naimie díga ico jaca cai illena, naimie díbeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticaí. ⁶ Cristona jillotaja mei, Jusiñamui ie ecimo naimiēna dane itatate. Cristomo cai jai jainaiaílla jira, Jusiñamui nainomo caina jiaí jainaiaítate. ⁷ Cristo finoca rafuemona caina iese jai itatate. Caina iese jai itatajamona, nana cominídi Jusiñamui caina eo duenaillana uiñoitímaci. ⁸ Naimie caina duenaillanona, caina jai jillotate. Jaca buena cai finuamona jillobiñedicaí; iadedi naimie jitailla jira, naimie caina jai jillotate. ⁹ Cai jilloillena jaca buena cai finoñena jira, abina iedoñedicaí. ¹⁰ Jesucristomo cai jainaiaíllamona, ie comínina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciáina marena itatate.

Cristomo jai cai duilla jira, jiaie nairaiaí díga birui uri iticaí

¹¹ Omoi jaie isoillana uiñotomoi. Iena comecítomoi. Jusiñamuina jaie uiñoñedomoi. Judíuaíñedínona omoi jeiciñena jira, cai judíuaí comini isoi abiaína detatañedomoi. Ie jira cai comínimona maraiñedomoi. ¹² Omoi jeacínomona Cristo omoína jilloitaiacanana naie facaiseconi uiñoñedomoi. Cai judíuaí nairaímo jainaiaíñedomoi. Ie muidona Jusiñamui cai judíuaí comínimo jaie lloga rafuena uiñoñedomoi. Jusiñamuina nabaiillana uiñoñedomoi. Jusiñamui díga omoi ico jaca illena uiñoñedomoi. Jusiñamuina omoi uiñoñena jira, naimiēna sedañedomoi. ¹³ Naimie díbeimo jaie jaiñedomoi; iadedi Jesucristomo birui duidomoi. Jusiñamui jaie ĩnoñedomoi; iadedi Cristo jai fiodailla jira, naimiēna birui ĩnotomoi. Naimiēna omoi jai ĩnuamona, cai díga naimie díbeimo jai itomoi. ¹⁴ Naimie omoi comeciáí jai uri itatate. Cai comeciáí jiaí jai uri itatate. Cai judíuaímona omoína jaie jearuiticaí. Iese jaie iticaí; iadedi Cristo muidona daní conínina nana birui nabaidicaí. ¹⁵ Cristo fiodaillamona Moisés micori jaie llogacino anamo jai iñedicaí. Naie llogacino daní cai judíuaímo duilla jira, Jusiñamui díbeimo jaie iñedomoi; iadedi Cristo finoca rafue muidona, birui daajena jaidicaí. Omoína jaie cai gaiñena jira, omoína jaie nabaiñedicaí; iadedi Cristomo daajena cai duilla jira, birui nabairedicaí. ¹⁶ Cruzmo Cristo fiodailla jira, Jusiñamui díbeimo cai illamona, mena nairaímona caina daje nairaína jai itatate. Ie jira daje nairaína uri iticaí. ¹⁷ Cristo jaie billanona, mare rafuena llote. Omoi judíuaíñedínomo, cai judíuaímo, comeciáí uri illana llote. Nana caina jilloitaiacanana llote. ¹⁸ Naimie muidona Jusiñamuina jai nabairedicaí. Jusiñamui

Joreño caina canuamona, naimie diga birui nabairedicai. ¹⁹ Jusiñamui cominina omoi jai illa jira, nana naimiena inotino diga Jusiñamuimo daajena duidomoi. Caimona birui jiaie cominiñedomoi. ²⁰⁻²² Jofo isoidicai. Jofona cai finoacania, naie ibiri nano finodicai. Ie mei diga rana cai atiamona, iena niticai. Ie isoide. Diga jiaie isoide cominiaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai cacadicai. Jusiñamui Joreño caina canuanona iena inoticai. Iena cai inuamona, naimie jitailla isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciaino jai ite.

3

Judúuaiñedinomo Pablo Cristo rafuena llofue

¹ Jesucristo rafuena omoi judúuaiñedinomo cue llofueuilla jira, cárcelmo iticue. ² Omoína naimie duenailanona, omoína llofuellena, Jusiñamui cuena oretate. Iena jai uinotomoi. ³ Jusiñamui cuemo jaie uinõnega rafuena jai llote. Naie rafuena janore como jai cueticue. ⁴ Bie carta omoi facaia, Cristona jaie uinõnega rafuena cue jai uinuana uinõitomoi. ⁵ Jusiñamuidi cominimo iena jaie raise uinõtañede; iadedi ie Joreñodo Cristo facaina llorainina iena birui jai uinõtade. ⁶ Iena lloiticue. Judúuaiñedomoi; iadedi Jusiñamui cuemo jaie llote: “Judúuaiñedino Cristona inuanona, omoi judúuai isoi jilloitimaci” llote. Omoi facaina Cristodi fiodaite. Naimiena omoi inoia, omoína ie uruina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi inuamona, naimie jai llua isoi, Jusiñamui diga ico jaca itomoi. Jusiñamui cuena iena jaie uinõtade. ⁷ Jusiñamui jitailla jira, cuena naimie duenailanona, naimie uai cuemo illamona, naie mare rafuena llofuecabiticue. ⁸ Creyentena nia cue jaiñena facaiseconi, creyentaina jaie cue duere finouilla jira, jamai bue isoidicue. Nana jiaie creyentiai cue baifemo faitimaci; iadedi Jusiñamui cuena duenailanona, ie rafuena cue lollena, cuena oretate. Cristo caina eo raise marena canocabillana llofuecabiticue. ⁹ Naie jaie uinõnega rafuena nana comini birui uinõllena, cuena oretate. Jusiñamui naga rana finode; iadedi naimie jitailla jira, naie jaie uinõnega rafuena jaca buna jaie raise uinõtañede. Nana comini iena birui raise uinõllena, cuena oretate. ¹⁰ Judúuaiñedino judúuai diga creyentaina jaillamona, Jusiñamui jaienisaí naimie uai siñonana uinõitimaci. “Naimie fue eo mare” raitimaci. ¹¹ Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitailla rafuedi suide. ¹² Cristona cai inua jira, Jusiñamui diga jaciruiñeno birui jai ñairedicai. Naimie caina cacajana jiai uinõtici. ¹³ Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoi comeciái sefuiruisiñeno; iadedi Cristo rafue omoimo cue lluanona cue duere sefuia, iobicana omoi jai.

Cristo caina eo isiruite

¹⁴ Cai Moo Jusiñamui caina eo canocabillanomo cue comecina facaia, naimiemo jiidicue. ¹⁵ Naimiedi nana creyentiai imaci Moona jira, naimiemo jiidicue. ¹⁶ Naimiemo cue jianona, omoi facaina jiidicue. Naimiemo eo ebirede siño iticino illamona, ie Joreñodo naimie omoi comeciaina raise ocuinõtallena jicanoticue. ¹⁷ Cristona omoi inuamona, naimie omoi comeciaina raise namatallena jicanoticue. Jusiñamuina omoi isiruicana jaillana jiidicue. Jiaie cominina omoi isiruicana jaillana jiai jiidicue. ¹⁸⁻¹⁹ Cristo caina jaca eo isiruillana, nana jiaie creyentiai diga jaca eo isiruillana, omoi eo raise uinuana jiidicue. Naimie caina eo isiruisoillacino cai comeciái facajacino baifemo uailla jira, naimie caina eo isiruisoillacinona jaca raise uinõnedicai; iadedi iena janore cai uinuamona, Jusiñamui omoi comeciaina namatallena jiidicue. Iese omoi facaina jicabidicue.

²⁰ Ie jira Jusiñamuimo iobillacino cai fecajasa. Ie uaido cai comeciái marena icana jaitate. Naimiemo cai jicajacino baifemo naimie fecarede. Cai comeciái facajacino baifemo

naimie jiaí finorede. ²¹ Ie muidona naimiemo iobillacinona nana cai creyentiaidicaí fecacabillasa. Jesucristo finoca rafue muidona iobillacinona jiaí cai fecacabillasa. Mai.

4

Jusiñamui Joreño jai caímo illa jira, cai comeci daje isoi lloide

¹ Cárcelmo nia cue illamona, omoímo rafuena nia lloiticue. Cristo rafuena cue llofuia jira, cárcelmo iticue. Creyentiaína omoí jai jailla jira, Cristo jitailla isoi omoí i. Jusiñamui omoína jai fetode naimie jitailla rafuena omoí finollena. ² Ie muidona abina jaca iedoñeno. Raire iciriñeno. Jiaímie ona duere finoia, ibana oñeno; iadedi uai oñeno naimiema jaca isirui. ³ Jusiñamui Joreño omoímo illamona, omoí comeciái daje isoi lloicana jai. Daje isoi omoí comeciái lloillamona, omoí jitaillamona dani uri omoí i. ⁴ Iena nia lloiticue. Cristona cai inuamona, daajena naimiemo jainaiaidicaí. Jusiñamui Joreño nana caímo illamona, dani omoí comeciái lloicana omoí jai. Jusiñamui caína jai fetode. Ie muidona naimie diga jaca cai illena, naimie isoi cai illemo ocuridicaí. ⁵ Jaca dajede Nama sedacabidicaí. Caína jilloitallena, da naimiema inoticaí. Dama naimie facaina bautizaganodicaí. ⁶ Cai Moo Jusiñamui jaca dajede. Jaca dajede Jusiñamuina nana cai creyentiaidicaí sedadicaí. Naimie anamo nana iticaí. Naimie jitaillacinona cai finollena, caína canocabide. Caína canollena, naimie Joreño caímo jaca ite.

⁷ Naimie jitailla diese, caína fetuanona, naimie facaina cai maijillena, ie uai caímo fecade. Jiaie creyentiaína naimiemo inotacana jaillena, ie uai caímo fecade. ⁸ Iena cai raise uiñollena, David micori jiaie ciegafuemonona fueoiticaí. Naimie cueba: “Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade”. Cristona ñaite. Iemona Cristo cai maijiacino caímo illana uiñoticaí. ⁹ Biemo omoí comeciaina faca. Monamo abido naimie jailla jira, monamona eniruemo Cristo nano billana uiñoticaí. ¹⁰ Eniruemo bite; iadedi monamo abido jaide. Nana cominina birui sedade. Naimie baifemo jaca buna iñede. ¹¹ Ie jira caímo ie uai jai fecajanona, caímona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino lloillena, ie uaina fecade. Ie rafuena nia inoñedinomo lloillena, damieriemo ie uaina fecade. Creyentiaína ie rafuena llofuellena, damieriemo ie uaina fecade. ¹² Iese ie uaina fecade, naimie facaina raise cai maijillena, nana jiaie creyentiaína cai canollena, ie mei Cristo rafuena daajena inocana jaiticaí. ¹³ Iena cai inuamona, Jusiñamui Jitona raise uiñocana jaiticaí. Cai comecidi daje isoi lloicana jaiticaí. Naimie jitaillacinodo raise jaiticaí. Naimie marena icana illa isoi jaiticaí. ¹⁴ Cai uruíaí facaise cai comeciái naganomo ite. Naie facaise nie isoide rafuena cai cacajia, iena raire inoticaí. Cristo inocana cai jaillamona, uruíaí isoi cai iacañena. Damierie naga llofueraíma uaido jaidimaci. Damierie llofueraínidi Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena; ¹⁵ iadedi jiaie cominina cai isiruillamona, uanaicínodo cai jailla. Cristo isoi icana cai jaillamona, abina uiñoiticaí. Cristodi cai illaimana jira, caína ocuide. ¹⁶ Naga creyente naimiemo jainaiaide. Aillosiedicaí; iadedi daajena naimiemo jainaiaidicaí. Daajena naimiemo cai jainaiailamona, naimie jitaillacino cai finoia, naimiema inocana jaiticaí. Iemona dani coninina isiruicana jaiticaí. Daajena naimiemo cai jainaiaila jira, cai comeciái daje isoi lloicana cai jailla.

Cristomo jai caí duilla jira, naimie rafuedo birui jaidicaí

¹⁷ Omoímo nia lloiticue. Cai Namamo cue duilla jira, biena lloiticue. Jusiñamuina inoñedino isoi dane omoí iñeno. Jiaie naimaci isoi itomoí. Naimaci comeciáidi tainomo jai jaide isoide. Cacaraíacaiñedimaci. ¹⁸ Jusiñamui rafuena uiñoñedimaci. Iena ca-caíñedimaci. Abina naimaci uiñoñena jira, Jusiñamui díbeimo illana jaca uiñoñedimaci. Uanaicínona uiñoiacaiñedimaci. ¹⁹ Jearede rafuena naimaci finoia, meiruñedimaci. Naimaci comeciái oiicana rafuedo jai jaidimaci. Naga jearede isoide rafuena eo finocana jaidimaci; ²⁰ iadedi Cristo rafuena omoí cacajamona, naimiema omoí raise uiñuamona, naimaci isoi omoí illena fueoñedomoí. Cristo rafuena omoí cacajamona, jiaíena illena

jai fueotomoi. ²¹ Naimiena cacajanona iena ñnotomoi. Naimiena cue llofuiamona, naimiena Cristo facaina lloraini llofuiamona, danomo omoi roracomo omoi ofia, Cristo uanaicinona cacadomoi. ²² Biena omoina llofuecabiticue. Cristona jaie nia omoi ñnoñena isoi, omoi jaiñeno. Omoi comeciaino jaie iticinodo jaiñeno. Naga jearede rafue omoi comeciaino oiacanamona faificana jaie jaidomoi. Iedo birui jaiñeno; ²³ iadedi Cristo ñibeimo omoi jai illanona, naimiemo omoi comeciaino facajano, Jusiñamui omoina canuamona, omoi comeciaino iuallaina meidocana jai. ²⁴ Cristo rafuena birui ñnotomoi. Naimie jitaillacinodo omoi mai jai. Jusiñamuidi jeacino finocana omoi jaiñenana jitaide. Naimie marena isoi, marena icana omoi jaillana jitaide. ²⁵ Ie jira tainona lloñeno. Cristomo daajena jai jainaiaila jira, coninimo uanaicinona jaca omoi llono. Jiañona omoi jifueñeno. ²⁶ Maraiñedicinona bu finoia, naimiemo riire llono; iadedi iese o lloia, naimiena jeare ñaiñeno. Jiaimie ona icia, naimiena jeare ñaiñeno. Naimie ñiga o rafue ia, naie rafue nairuido marena fino, ²⁷ Taife ramo o fai raillano. Bu ñiga o nicino ia, iena raire marena o finoñena, ibana oiacanitio. Naie raire o feitañena jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido lloñoño. ²⁸ Naimiemo ra illena, fiamona omoimona navui bu ia, creyentena naimie jai jailla jira, naimie dane fiiñena; iadedi ra naimie jitaia, naimie maijiite. Ie maijiamona ie ra ollena, ucubena feiñoite. Ie mei dueredinona naimie jai canoite. ²⁹ Jeare ñaiñeno; iadedi ñe isoide rafue ia, marecinona ñaino. Ie mei naiemona jiaie cominina canoitomoi, Jusiñamui ñibeimo naimaci raise illena. ³⁰ Jusiñamuimo omoi jai jainaiaila jira, jeacinona finoñoño. Jeacino omoi finoia, Jusiñamui Joreñodi sunaite. Naimiena sunaitañoño. Naimie caimo illamona, caina jillotajana uiñoticaia. Cristo dane abido billemona, naimie ñine cai jaca illena, caina jai jillotate. ³¹ Jiaie cominina icineno. Icirineno. Uaina uaitañoño. Jiaie cominina jeare ñaiñeno. Naimacina duere jeare finoñoño; ³² iadedi coninina canua. Jiaie cominina duenai. Jiaimie ñiga omoi nicino ia, naimie finoca rafuena faitajanona, naimie ñiga marena ñaino. Naie rafuena dane abido lloñoño. Cristo finoca rafue muidona, Jusiñamui omoi jeacinona jai faitaja isoi, jiaimie ñiga omoi rafue ia, naifuena omoi feita.

5

Jusiñamui cominina jai cai illamona, naimie jitaillacinona finoiticaia

¹ Jusiñamui isiruiga uruiadomoi. Naimie marecinona finua isoi, omoi fino. ² Cristo caina isiruilla isoi, coninina isiruicana omoi jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade. ³ Jusiñamui cominidomoi. Omoi aiñede riño ñiga ineno. Omoi iniñede iima ñiga ineno. Rana nicidoñoño. Jearede rafue finuamo omoi comeciaina facañeno. ⁴ Jearede rafuedo jaiñeno. Jamai ebena ñaiñeno. Meiredicinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobil-lacinona fecacana omoi jai. ⁵ Ie aiñede riño ñiga icabitimiedi Jusiñamui illanomo ñiñede. Cristo ie cominina sedajanomo ñiñede. Ie iniñede iima ñiga icabitiñaiñodi Cristo ie cominina sedajanomo jai ñiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo ñiñede. Cue lloga rafuena jai raise cacadomoi. ⁶ “Creyente naie isoide rafuena finorede” bu lloia, naimie omoina jifueiacade. Naimie iese lluaña ñnoñoño. Jusiñamui naie jeacinona finocana jaidinona duere finoite. ⁷ Ie jira naimaci jearede finoca rafuedo jaiñeno. Naimacina nabaiñeno. ⁸ Jusiñamuina jaie omoi uiñoñena jira, jitreñinomo itomoi isidomoi; iadedi cai Namamo omoi duillamona, uanaicinona ñnocana omoi jai. ⁹ Jusiñamuina omoi jai uiñoia, jeacinona omoi fainonocaia, Jusiñamui jitaillacinona finocana jaitomoi. Uanaicinona llocana jaitomoi. ¹⁰ Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai. ¹¹ Jitreñinomo nia itino finoca rafuedo omoi jaiñeno. Naimaci finoca rafuemona marecinodi jaca comuiñede. Naimacimo: “Maraiñede” llono. ¹² Iena cue meidaila

jira, naimaci jearede bainino finoca rafuena ñaiacaiñedicue. ¹³ Marecinona omoi jaca finuamona, jiaie comini naimaci finoca rafue eo maraiñenana raise uiñotimaci. ¹⁴ Cai ofia, naiena rocabiticai:

Mai casi. Inñeno.

Jai fioidaitino isoidomoi;

iadedi omoi comeciaina Cristo jai lligaiñoite.

¹⁵ Ie jirari omoi marena illena, abina rairuicana omoi jai. Jusiñamuina inoñedino ebena jaicabidimaci. Naimaci isoi jaiño. ¹⁶ Diga maraiñede rafue birui comuicabilla jira, cominina Cristo dibeimo raise omoi itatajallena, nagarui Cristo jitaillacinona finocana omoi jai. ¹⁷ Ie jira ebe isoi jaiño; iadedi Cristo jitaillacinona uiñocana omoi jai. ¹⁸ Iocire omoi iacania, naiemona diga maraiñede rafue comuilla jira, jifaiño; iadedi omoi comeciaina naimie namatallena, Jusiñamui Joreño anamo raise omoi mai i. Iemei naiemona diga mare rafue comuite. Iocire jiai iitomoi. ¹⁹ Danomo omoi ofia, nana omoi comeciaimona diga isoide ruana iocire ro-rona. Omoi ruamona jiaie creyentiai comeciaina ocuiñota. Cai Namamo omoi ruamona, omoi fillamona, omoi taillamona, naimiena iobitaitomoi. ²⁰ Cai Nama Jesucristomo omoi duillamona, nie isoide rafue omoimo ia, cai Moo Jusiñamuimo iobillacinona jaca feca.

Cristomo jai cai duilla jira, cai comini diga marena iacadica

²¹ Cristo anamo omoi illa jira, jiaie creyente baifemo omoi faiacinomo omoi comeciaina facaño; iadedi coninina nagamiaina cano.

²²⁻²³ Inirediñaiñuai, omoimo rafuena lloiacadicue. Cai Nama Cristomo omoi jainaiaila jira, naimie jitailla jira, omoi iniñiai anamo raise omoi i. Naimaci uaina raise ino. Cristo nana creyentiai afemo illamona, naimacina naimie sedaja isoi, naga ini ie ai afemo illamona naiñaiñona sedaja. Cristodi nana creyentiai imaci jeacinomona jillotajamona, naimie anamo itimaci. ²⁴ Cristo anamo nana creyentiai illa isoi, naiñaiñuai iniñiai uaina jaca inua. ²⁵ Airedino, omoimo jiai lloiticue. Nana creyentiaina Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaina omoi isirui. ²⁶ Nana creyentiai marena illena naimie fiodaite. Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai inuamona, cai jeacinomona jai jillobidicai. ²⁷ Fiodaite, nana cai creyentiai comeciai marena illena. Cai comeciai jeaninana jitaide. Cristo abido bille facaisemo, Jusiñamui jitailla isoi cai marenana jitaide. ²⁸ Naimie abi naimie isiruilla isoi, naga ini ie aina isiruilla. Iaimaijai daajena jira, ie aina isiruitimiedi ie abina jiai isiruite. ²⁹ Jaca bu ie abina enoñede; iadedi ie abina sedade. ³⁰ Naimiemo nana cai creyentiai duilla jira, Cristo caina isiruillamona, caina sedade. Ie isoi nagamie ie aina isiruilla. ³¹ Bie jai lloga uaimona iena uiñotica. Moisés micori Jusiñamui llua jaie cuela: “Ie aina ollena, iima ie moona, ie ei diga fainonocaita. Iemei dajena iitaiamaia”. ³² Naie llofiacinomona jiai rafuena fueoitica. Cristona ñaiticue. Creyentiaina ñaiticue. Naimiemo cai duillamona, daajena iticai. ³³ Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitaño inua.

6

¹ Uruiai, omoimo rafuena lloiacadicue. Cai Nama jitailla jira, omoi eiñiai uaina ino. Omoi mootiai uaina jiai ino. Jusiñamuimona marenana jira, iaimaijai uaina ino. ²⁻³ Moisés micori Jusiñamui lloga uaina jaie cuela: “O moo uai ino. O ei uai ino. Marena o illena, raire o fioidañellena, iaimaiaina o isiruillamona, iaimaijai uaina ino” cuela. Jusiñamui diga lletarafuena llote; iadedi bie nanoca rafuena llote. ⁴ Mootiai, omoimo lloiticue. Omoi uruiaina jamai icineno; iadedi naimacina cai Namana naimaci uiñollena llofue. Naimaci inoiacaiñenia, abina naimaci uiñollena, naimacina isiruillamona, naimacina duere fino.

⁵ Patrón anamo itino, omoimo lloiticue. Omoi patrones ocuica uaina ino. Omoi maijana naimaci ocuica, naimacina iobitallena, jaciruoicaida raise maiji. Omoi comeciaimona naimaci jitailla rana maiji. Cristo iedena, naimaci ocuica uaina ino.

⁶ Omoïmo naimaci eruaia, naimacina iobitallena, marena maiji; iadedi omoïmo naimaci eruaiñenia, naimacina iobitallena, nia marena maiji. Naimacina iobitallena maiji; iadedi Cristomo omoi duilla jira, Jusiñamui jitailla jira, omoi comeciai maiji raillamona, marena omoi maiji. ⁷ Patrón facaina maijiacinomo dani comecina facañeno; iadedi iocire maiji, cai Nama facaina omoi maijidomoidena. ⁸ Biena uiñoticaï: Marena bu maijiia, cai Nama Cristomona ibana ico feiñoite. Patrón anamo itino iena feiñoitimaci. Patrón anamo iñedino iena jiai feiñoitimaci. ⁹ Patrones, omoïmo lloiticue. Omoi Nama Cristo monamona omoïmo eruailla jira, Cristo monamona naimacimo jiai eruailla jira, omoi anamo itinona marena fino. Naimacina riire ocuiñeno. Naimacina jeare finoñeno. Cristo nana naimie cominimo daje isoi comecina lloide. Ie jira omoi anamo itinona marena fino.

Cristomo jai cai duilla jira, naimie cai comeciaina ocuiñotaite

¹⁰ Ie muidona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuiñotacana omoi jai. ¹¹⁻¹² Ero, Taife caina ramo jifueoicaida faite. Caina anafefitaiacade. Naimie isoidino caina jiai anafefitaiacadimaci. Naimacidi aillosie. Naimaci anamo nana Jusiñamuina iñoñedino jai itimaci. Jitiredinomo naimaci illanona, Jusiñamui dibeimo iñedimaci. Beno eniruemo itimaci. Jusiñamui illanomo duiñedimaci. Cominina ñaiñedicue. Taifena, Janabana, Dofina, jananiaina, Dusisiñona ñaiticue. Naimaci isoide joreñuaina ñaiticue. Cai dibeimo iñedimaci. Naimacimona abina omoi rairui. ¹³ Jobaime illa facaiseconi, soldaduai imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Ifogi icona jitadimaci. Lloebina llinotimaci. Ie isoide. ¹⁴ Cristomo omoi comeciai facajanona, uanaicinona jaca llono. Jusiñamui jitailla isoi, marecinona finocana omoi jai. ¹⁵ Cristo rafuemona omoi comeciai uri itatajamona, iena meiruiñeno llocana uiño. ¹⁶ Taifemona nana jearede rafuedi comuide. Naimiedi ramo faiacana jai jaide. Cristona omoi iñnuamona, Taife ramo faiacinona jamai. ¹⁷ Jusiñamui caina jai jilloitajana jai uiñotomoi. Iena omoi uiñuamona, Taife ramo faiacinona iñoñeno. Taifena anafenollena, Jusiñamui Joreño Jusiñamui uaimona fueo. ¹⁸ Jusiñamui Joreño omoïna canuamona, Jusiñamui diga ñaicabi. Taife ramo omoïmo faia, iena omoi iñoñellena, Jusiñamui omoïna canoite. Iese abina omoi rairuia, Taifena anafefitaitomoi. Taife ramo faiacino naimaci iñoñellena, nana jiaie creyentiai facaina jiai jñicabi. ¹⁹ Cue facaina jiai omoi jñi. Marefodo nana Cristo ie rafuena cue lluaana omoi jñi. Cristo nana cominina jilloitaiacanana nia lloiacadicue. ²⁰ Naie rafue cue llollena, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluaana mai omoi jñi.

²¹⁻²² Tíquico omoi dine oretaiticue. Naimiedi cue isiruiga ama. Naimiedi iñnogamie. Cristo rafue facaina cuena canocabide. Omoïmo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciai ocuiñoitomoi. ²³ Cai Moo Jusiñamui, cai Nama Jesucristo diga, omoïna uri itatajamona, Cristona jai omoi iñnuamona, coniniri uri icana jaillana jitaidicue. Iaimaiai omoïna isiruillamona, iaimaiaina omoi iñnuamona, nana jiaie creyentiaina isiruicana omoi jai. ²⁴ Cai Nama Jesucristona omoi eo isiruilla jira, Jusiñamuidi omoïna duenailasa. Mai. Pablodicue.

FILIPOMO ITE CRISTONA HNOTINOMO PABLO ORETAGA RABE

Uaiduacino

¹⁻² Filipomo ite creyentiai, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeimo maijicabidicoco. Omoimo coco uaina oredicoco. Omoi creyentiai illaicominimo coco uaina ua oredicoco. ¿Nigacino? ¿Nie isoidomoi? Cai Moo Jusiñamui, cai Nama Jesucristo diga, omoina jai duenaite. Iena uiñocana mai omoi jai. Iaimaia omoina uri jai itatate. Iena omoi uiñocana mai omoi jai.

Jusiñamuimo iobillacino fecade

³ Naga icaiño omoina cue comecia, Cristo rafuedo omoi jailla jira, Jusiñamuimo iobillacinona fecadicue. ⁴ Naga icaiño Jusiñamui diga cue ñaia, omoi facaina caimare jiidicue, ⁵ Jesucristo rafuena cue llua cuena omoi canua jira. Nano bie rafuena omoi cacajamona, cuena canodomo. Cuena nia canodomo. ⁶ Jusiñamuidi omoi comeciaina jaiie marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiruimo Jusiñamui bie rafuena fuidoite. Iese fuidollemo ocuridicue. ⁷ Omoimo iese cue comecina cue facajia, omoina cue isiruilla jira, cuemona mare. Cárcelmo cue illamona, Jesucristo rafuena cue riiduano, Jesucristo rafuedi unaicino cue llua, Jusiñamui cuena canocabide. Iemona naimie caina duenaillana jai uiñotica. ⁸ Cuena omoina Cristo Jesús isiruitajamona, nana omoina isiruiticue. Jusiñamuidi unaicinona cue llua uiñote. ⁹ Jiaie cominina eo isi-isiruicana omoi jaillena, Jusiñamuina raise omoi uiñollena, nie isoide rafue omoimo ia, abina raise omoi uiñollena, Jusiñamuimo jicabidicue. ¹⁰ Iese omoina jitaicue. Mare rafuedo omoi jaiacanana jitaicue. Jiairuido Cristo abido biite. Ie jira omoi comeciai jeanillena jitaicue, Jusiñamui jitailla isoi omoi comeciai marena illena. ¹¹ Jusiñamui jitailla isoi omoi illamona, mare rafuena jaca omoi finuana jitaicue. Jesucristona omoi inuamona, naimie omoina iena finotarede. Iese omoi finocana omoi jaia, Jusiñamuina eo iobitaitomoi.

Cárcelmo Pablo illamona, diga comini Jesucristo rafuena cacadimaci

¹² Cue amatiai, bie rafuena omoi uiñuana jitaicue. Cárcelmo cue illamona, diga comini Jesucristo rafuena cacadimaci. ¹³ Cai illaima jofomo itino cacadimaci. Nana bene itino jiai cacadimaci. Jesucristo rafuena cue llua jira, cárcelmo iticue. Iena jai uiñotimaci. ¹⁴ Cárcelmo iticue; ia jaciruiñeno Cristo rafuena nia lloticue. Iemona diga creyentiai naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

¹⁵ Cuena uradoillamona, cue afemo iacanamona, damierie Cristo rafuena llofuetimaci. Jiaie llofuerañi marecinona finuacanamona llofuetimaci. ¹⁶ Cuena naimaci isiruilla jira, llofuetimaci. Cristo rafuena cue riiduamona, cárcelmo cue illana uiñotimaci. ¹⁷ Cue afemo iacadino mare comeciainona llofueñedimaci. Iemona cuena duere finoacadimaci. ¹⁸ Iese itimaci; iadedi uradoillamona naimaci llofua, marecinona finuacanamona naimaci llofua, cuemona damamei iesede. Cristo rafuena llocana jaidimaci. Iena jai iobidicue. Nia iobiticue. ¹⁹ Cueri Jusiñamuimo omoi jiano, Jesucristo Joreño cuena canuano, nana cuemo ite rafuemona jilloiticue. Iena cue uiñuamona, nia iobiticue. Jesucristo Joreño ie Moo diga daje. ²⁰ Cue finolle rafuemona cue meiruiñellena eo jitaicue. Jaiie cue finocabilla isoi, Cristona marefodo birui iobitaiacadicue. Cue nia fioidañenia, naimiena iobitaiacadicue. Cue fioidaillemona naimiena jiai iobitaiacadicue. Iemona jiaie creyentiaidi Jusiñamuimo iobillacinona fecaitimaci. ²¹ Nia cue fioidañenia, Cristo rafuena nia lloticue. Mare; iadedi cue fioidaia, naimie dine cue illena jiai eo mare. ²² Nia cue fioidañenia, diga cominimo Cristo rafuena nia lloticue. Ie jira nie isoide cue

illana cue começi niese rainide. ²³ Nia raise uiñoñedicue. Jiaicaiño fioidaiacaiñedicue. Jiaicaiño fioidaiacaducue. Cue começi Cristo ñine jaiacade. Nainomo cue illena cuemona eo mare; ²⁴ iadedi omoina cue canollena, nia fioidaiacaiñedicue. Cue nia fioidaiñenia, omoina nia canoacaducue. ²⁵ Cue começina jai facajano, raite: “Nia fioidaiñeiticue. Omoï ñiga nia cue illana uiñoticue”. Cristona omoï ñinotacana omoï jaillana jitaïdicue. Omoï ñinuamona, caimare omoï illana jiai jitaïdicue. ²⁶ Iemei omoï ñine dane cue illa jira, cueri Cristomo iobillacinona eo fecaitomoi.

²⁷ Cue fioidaia, cue fioidaiñenia, Cristo ie mare rafuedo omoï jai. Omoïna cue cioia, omoïna cue cioiñenia, mare rafuena omoï finuana fidiacaducue. Cristo rafuena ñinocana omoï jaillana, omoï começiai daje isoi lloillana, Cristo rafuena omoï riïduana fidiacaducue. ²⁸ Omoï ñibeimo ñinedinona omoï jaciruiñenana fidiacaducue. Iese omoï ia, Jusiñamuidi omoï ñibeimo ñinedino faifillana uiñotaite; iadedi naimiedi omoïna omoï jilluana uiñotaite. Naimie ñiga omoï jaca illena, omoïna jai jillotate. ²⁹ Jusiñamui Cristona omoï ñinollena omoïna fetode; iadedi Cristori omoï ñuere sefuillena omoïna jiai fetode. ³⁰ Omoï nairaïmo cue nano illa facaise Cristona ñinoñedinomona ñuere sefuiducue. Iena ciïdomoi. Cárcelmo birui cue illamona, naimacimona iese nia birui ñuere sefuiducue. Iena birui fidïdomoi. Naimacimona cue isoi birui jiai ñuere sefuidomoi.

2

Jiaie creyentiai ñiga raise omoï illacino

¹ Jiaie creyentiai ñiga omoï marena illena, dajerie rafuena lloiacaducue. Cristomo omoï ñuilla jira, coninina omoï começiai ocuiñotajamona, Cristo omoïna isiruillana omoï uiñuamona, Jusiñamui Joreño nana omoïna nabaitajamona, coninina omoï começiai eo ñuenaillacino illamona, ² cue começina caimare itata. Omoï começiai daje isoi lloillamona, coninina omoï isiruillamona, daje uaido omoï começiai lloillamona, cue começina caimare itata. ³ Jaca buena finoñeno, jiaimie afemo jamai omoï illena. Abina iednamona buena finoñeno. Abina iedoñeno jiaimacimo começiaïna faca: “Naimaci cue baifemo faite”. ⁴ Omoï abimo ite rafuemo omoï começiaïna faca; iadedi jiaimaci abimo ite rafuemo começiaïna jiai faca. ⁵ Cristo Jesús illa isoi omoï illa. Ie rafuemo começina janore facade; iadedi naimacina canollena, jiaie cominimo ite rafuemo naimie começina eo facade. ⁶ Naimiedi jaca Jusiñamui; iadedi naimiedi Jusiñamui ñiga ñanomo jaca illana jitaïñede. Naimie começina iemo facañede; ⁷ iadedi iena fainonocaida, ie Moo ocuica rafuena finollena, ñimana naimie jaide. ⁸ Jamai bue isoidimienaa jaide; iadedi ie Moo uaina ñinote. Ie Moo jitaïlla jira, fioidaite. Maraiñede rafue finodimie isoi, cruzmo fioidaite. ⁹ Ie jira, naimienaa iobitallena, Jusiñamui naimie ecimo naimienaa abido ote. Nana jiaie mameci baifemo faite mameçina jitaïde. ¹⁰ Jesúna nana comini sedallena, naimiemo iobillacinona naimaci fecallena, Jusiñamui naimienaa iese iobitate. Jusiñamui jaienisai naimiemo iobillacinona fecaitimaci. Nana comini naimiemo iena fecaitimaci. Fioidaitino jillobillamona, naimiemo jiai fecaitimaci. ¹¹ Nana lloïtimaci: “Jesucristodi caï Nama”. Iese naimaci llua jira, caï Moo Jusiñamuina iobitaitimaci.

Maraiñedino começiaïna lligaiñotomoi

¹² Cue isiruiga amatiaïdomoi. Ie Moona Jesucristo ñinua jira, cue llua nia ñinocana omoï jai. Jiaie omoï ñiga cue ia, Cristo rafuena raise ñinotomoi. Birui omoï ñiga ñineducue; iadedi Jusiñamuina omoï ñinua jira, naimie jitaïlla rafuena jaciruiocaida, finocana omoï jai. ¹³ Ie jitaïlla rafuena omoï finollena, Jusiñamui omoï começiaïna birui marena itatate. Naimie omoïna iena finotaiacade. Naimie mare jitaïllacinomona, omoïna iena finotaite. ¹⁴ Nana omoï finolle rafuemo abi jafueoicaiñeno fino. Uai uaitañeno fino, ¹⁵ jiaie comini omoïri ñai raillanona, Jusiñamui uruiaina omoï illa jira, omoï começiai jeanidemona marena omoï i. Maraiñede comini motomo itomoi. Naimaci começiai jearede. Naimaci começiaïna lligaiñotomoi, naimacimo ite jacinona uiñotallena. ¹⁶ Jesucristo rafuena llocana uitomoi. Iena naimaci ñinuamona, bie rafue Jusiñamui ñine cominina jaca itatate. Cristo ñane billirui omoïri cue iobiacana jira, omoï ñine: “Tainona jiaie

lloticue” cue raillano, Jesucristo rafuena llocana nia omoi jai. ¹⁷ Jusiñamuina omoi ñnua jira, naimiemo ailluena ucubena caidiño fecadomoi. Ie baifemona cue fiodaillana Jusiñamui jiai jitaia, iobiticue. Omoi diga jiai caimataiticue. ¹⁸ Ie muidona caimare iitomoi. Cue diga caimataitomoi.

Pablo Timoteona orede

¹⁹ Cai Nama Jesús jitaia, omoi dine Timoteona raire oretaiacadícue. Cue dine abido naimie bia, omoi rafuena cue fidiano jiai iobiticue. ²⁰ Cue dine jiaino naimie isoi ñede. Dama naimie omoi ite rafuemo comechina facade. ²¹ Jiaino dani naimacimo ite rafuemo comechina facadimaci. Jesucristo rafuemo comechina facañedimaci. ²² Timoteodi mareuidimiena uiñotomoi. Cue jito isoide diga, Cristo rafuena lloticoco. ²³ Cárcelmo cue illa rafuedi nia fuiñede. Iena cue uiñollemona, naimie omoi dine raire oretaiacadícue. ²⁴ Cárcelmona cue jino jaillena cai Nama jitaia, omoi dine jiai raire jaiacadícue.

Pablo Epafroditona abido orede

²⁵ Epafroditodi cue ama isoide. Danomo Cristo rafuena lloticoco. Danomo Cristo rafuena riidoticoco. Naimiena oredomoi, cuena canollena. Naimiena omoi dine abido oretaiacadícue, ²⁶ omoi dine naimie illemo naimie comechina facaja jira. Naimie navui duillana omoi fidia jira, naimie uri ñede. ²⁷ Navui niadedi fiodaicanamona jillode, Jusiñamui naimiena duenailla jira. Naimie fiodaillamona, eo cue duere sefuiñellena, Jusiñamui cuena jiai duenaite. ²⁸ Ie jira Epafroditona eo raire oretaiacadícue, naimiena omoi cianona omoi iobillena. Iemei jiai uri iiticue. ²⁹ Cai Nama mamecido naimiena eo caimare feiño. Jiaie naimie isoidinona omoi dine ia, naimacina iobita. ³⁰ Cristo facaina navui naimie llofuiamona, omoi facaina cuena canollena, niadedi fiodaite. Omoi facaina naimie cuena canuano, cue dine omoi ñena jira, cue muidona niadedi naimie abina faifitate.

3

Moisés micori llogacinuaido jaidinomona abina rairui

¹ Cue amataiai, omoimo nia lloticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite. ² Jearede rafue finode cominimona abina rairui. Jiconiai isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeciai nia raise finoñedimaci. ³ Cai abiaina detatajamona, cai comeciai raise finobiñede. Cai comeciai raise finuamona, Jusiñamui Joreñodi caina Jusiñamuina raise sedatate. Cristo Jesúri iobidicai. Cai jillobillena, cai abiaina detatañedicai. ⁴ Buena cai finuamona cai illamona jillobidicaidena, cue jilluana raise uiñoticue. Cue cominimona jamai bue isoñedicue. ⁵ Iena ja ñaiticue. Cue jeiciamona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judíuai imacina jira, cue uruenamona judíuai uaido ñaiticue. Fariseo cue imiena jira, Moisés micori llogacinuaido fañonocaiño iedo eo jaidicue. ⁶ Iena eo cue jitailla jira, Cristona ñnotinona duere finodicue. Nana Moisés micori llogacinuaido eo raise jaidicue. Iena raise finodicue. ⁷ Iese jaie iticue. Cue comeci iena: “Mare” raite; iadedi Cristona jai cue ñnua jira, birui nana bie rafuedi cuemona ieñedicinuai. Naie isoide rafue cuemo illamona, cue jeacinomona jilloñedicue. ⁸ Dane lloticue: Cue Nama Cristo Jesúsna cue uiñoiacana jira, jiaie rafue cuemona ieñedicino. Naimiena cue uiñuacinodi nana jiaie rafue baifemo faite. Jeacuai isoi jai marañena jira, naimie muidona cue jaie illacinona jai sofecaidicue. Iena sofeticue, Cristo díbeimo raise cue illena, ⁹ naimiemo raise cue duillena. Moisés micori llogacinuaido cue jillamona marebicaiñedicue; iadedi Cristona cue ñnuamona marebicaidicue. Cristona cue ñnua muidona, Jusiñamui cuena jai marebicaitate. ¹⁰ Cristona raise uiñoiacadícue. Naimie fiodaite; ia iemona jillode. Naiemona cue comeci marena illena, naimiena jillotate uaina uiñoiacadícue. Naimie rafuena cue llamona, naimie isoi duere sefuiticue. Iemona ñibai fiodaíticue. ¹¹ Cue fiodaille mei, fiodaillamona naimie isoi cue jilloillemo ocuridicue. Ie jira naimiena uiñocana jaiacadícue.

Pablo jitaillacino

¹² Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jaie uaidote. ¹³ Cue amatiai, iena nia iñedicue; iadedi jaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue. ¹⁴ Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena. ¹⁵ Caimona Cristo rafuena raise abina uiñocaidino, bie rafue diga cai comečiai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite; ¹⁶ iadedi caimo jai ite uiñuacinodo mai cai jailli.

Pablo illa isoi cai illa

¹⁷ Cue amatiai, Cristona cue iinua isoi, naimie rafuedo cue jailla isoi, nana omoi jiai jai. Cai illa isoidinomo omoi eruai, naimaci isoi omoi illena. ¹⁸ Jaie omoimo llouidicue. Cue sunaillamona dane lloiticue. Ailluena comini Cristo fiodailla rafuena birui jitañedimaci. ¹⁹ Ja muidomo faifitimaci. Naimaci Jusiñamuidi imaci guille, dani guille ramo naimaci comečiai facaja jira. Jearede rafue finuamona, meiruiñeno naie rafueri iobidimaci. Naimaci ecimo ite ramo comečiaiina facadimaci. Naimaci isoi cai iñena. ²⁰ Monamo ite Jusiñamuimo cai jainaiaila jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima. ²¹ Naimie bia, cai fiodaille abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

4

¹ Ie jira Cristo rafuena iñocana nia omoi jai. Cue amatiai, omoina isiruiticue. Omoina cioacadicue. Omoiri iobidicue. Cue llumona Cristona jaie iñotomoi. Ie rafuedo omoi jailla jira, iobidicue. ² Evodia raillañaiñomo rafuena lloiacadicue. Síntique raillañaiñomo jiai lloiacadicue. Cai Namamo iaiñuai duilla jira, iaiñuai começi daje isoi lloillana jitaidicue. Coniño diga icirillana jitañedicue. ³ Cue mare nabai, omo jicanoticue, iaiñuaina canollena, coniño diga iaiñuai dane mareña ñaillena. Cristo rafuena cue diga llotiaiañuai. Clemente diga llotiaiañuai. Cue diga llofueuidino diga llotiaiañuai. Monamo ite rabenicomo nana naimaci mamečiai jai cueda. Jusiñamui diga monamo jaca iite comini mamečiai diese cueda.

Iobillacino, uri illacino diga

⁴ Cai Namamo omoi duilla jira, jaca iobi. Dane lloiticue: Iobi. ⁵ Omoi riininana nana comini uiñuana jitaidicue. Cai Nama dane abido billirui iairei ite. ⁶ Ie jira buemo omoi comečiaiina facajanona, jaca llicidaiñeno. Naga omoi jitaillacino Jusiñamuimo llono. Naimiemo jica. Naimiemo omoi jiiia, naimiemo iobillacinona jiai feca. ⁷ Iemei Jusiñamui omoi comečiaiina uri itataite. Omoi comečiai facajacino baifemo omoina uri itataite. Cristo Jesúsna omoi iñuano, omoi comečiaiina eenoite. ⁸ Cue amatiai, ie muidomo daje rafuena nia lloiticue. Uanaicinomo comečiaiina faca. Iñogafuemo comečiaiina faca. Mare rafuemo comečiaiina faca. Ebirede jeanide rafuemo comečiaiina faca. Iobillafuemo comečiaiina faca. Bie isoide mare rafue ia, iemo comečiaiina faca. Nana bie isoide rafuemo comečiaiina faca. ⁹ Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi ciua rafuedo omoi jai. Iemei omoi comečiaiina uri itatajanona, Jusiñamui omoi diga iite.

Filipomo ite comini Pablona eo canodimaci

¹⁰ Cai Namari iobidicue, diga irui illamona dane cuena omoi começi jira. ¹¹ Cuemo comečiaiina facadomoi; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uiñoticue. ¹² Duere cue illana uiñoticue. Duenino cue illana jiai uiñoticue. Nie isoi cue ia, uri cue illana jai uiñoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue. ¹³ Nie isoide rafue

cuemo ia, Cristo cue comecina ocuiñotaja jira, naga rafuena finocana jaiticue. ¹⁴ Cue duere sefuillamo cuena omoi duenaillamona, cuena omoi canua jira, cuemona mare. ¹⁵ Omoimo Cristo rafuena nano cue llumona, cuena canodomoí. Macedoniamona cue jailla mei, jiaie creyentiai cuena canoñedimaci. Dani omoi cuena canodomoí. Iena uiñotomoí. ¹⁶ Tesalónicamo nia cue ia, diga icaiño ucube cuemo oredomoí; ¹⁷ iadedi omoi ucubena nicidoñedicue; iadedi cuena omoi canuamona, Jusiñamuimona ibana omoi feiñuana jitaidicue. ¹⁸ Nana cue jitaille rana jai feiñoticue. Ailluena cuemo ite. Epafroditomona cuemo omoi oretaga rana feiñoticue. Jusiñamuimo fecadomoí isoide. Jusiñamui dibeimo cue maijia jira, mare rana finodomoí. Ie jira Jusiñamui iena gaide, caimare soride rana cai gaia isoi. Naimie iena jiai feiñote. ¹⁹ Naimiemo ailluena ite ramona cue Jusiñamui nana omoi jitaille rana fecaite, Cristo Jesúmo cai duilla jira. ²⁰ Cai Moo Jusiñamuimo iobillacino jaca cai fecacabillasa. Iena jitaidicue.

Fuiduacino

²¹ Cristo Jesús mamecido cue facaina nana creyentiaimo cue uaina llono. Cue diga amatiai imaci uaina jiai oredimaci. ²² Nana benomo ite creyentiai imaci uaina oredimaci. Cai illaíma César jofomo maijidino imaci uaina ua oredimaci. ²³ Cai Nama Jesucristo omoi comeciaina jaca caimare itatajana jitaidicue. Mai. Pablodicue.

COLOSAMO ITE CRISTONA HNOTINOMO PABLO ORETAGA RABE

*Colosamo ite creyentia*imo Pablo carta orede

¹⁻² Colosas railla nairaimo ite creyentiai, Pablocue. ¿Nie isoidomoi? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue llolena, Jesucristo oretagamiedicue. Naimiemo jai duidomoi. Naimiena raise inocana jaidomoi.

Naimaci facaina Pablo jiide

³ Cai Nama Jesucristo Moodi Jusiñamui. Omoi facaina Jusiñamuimo coco jiaa, naimiemo iobillacinona jaca fecadicoco. ⁴ Jesucristona nia omoi inuana coco fidia jira, nana creyentiaia nia omoi isiruillana coco fidia jira, iobillacinona jaca fecadicoco. ⁵ Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino. ⁶ Diga illanomo, diga comini iena jiai jai cacadimaci. Iena inuamona Cristo dibeimo naimaci comeciai jai meidoga. Iena inuamona marecinodo jai jaidimaci. Ie isoidomoi. Jusiñamui omoia duenaillana jai uinotomoi. Uanaicinona omoi raise uinuamona, iedo jaidomoi. Ie marecinona finocana jaidomoi. ⁷ Epafras llumona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana maijide. Omoi motomo cai inena jira, Cristo dibeimo cai facaina naimie raise maijiuide. ⁸ Naimiemono omoimo ite rafuena fididicoco. Jusiñamui Joreño omoia canuamona, jiaie creyentiaia omoi isiruillana fididicoco.

⁹ Ie jirari omoi facaina jaca jidicoco. Omoi rafuena coco fidiamona, Jusiñamuimo omoi finolle rafuena omoi eo raise uinollena jidicoco. Nana naimiemo ite abi uinuacinona omoi eo raise uinuana jitaidicoco. ¹⁰ Cai Nama: "Mare" omoia raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uinocana jaillana jitaidicoco. ¹¹ Nie isoide ramo omoi jiria, nana naimie siño ebirede uaido naimiedi omoi comeciaia ocuinotajana jitaidicoco. Iocire omoi illana jitaidicoco. ¹² Caina ie cominina naimie jai itataja jira, nana ie comini diga naimie illanomo ico jaca iticai. Ie muidona naimiemo iobillacinona omoi fecacabillasa. ¹³ Jeacino anamo navui cai illa jira, jitreidinomo iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate. ¹⁴ Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai feitate. Naiena ico abido linoite.

Cristo muidona Jusiñamui riicaillifue anamo inedicai

¹⁵ Jusiñamuina cionidicai; iadedi Cristomona naimiena uinoticai. Jaca bue nia inenia, Crsito nano jaca ite. ¹⁶ Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioinena rana finode. Cominina finode. Ie jaienisaia finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode. ¹⁷ Nano dofoconi Cristo jaca ite. Naimie uaido naga ra marena icana jaide. ¹⁸ Naimiedi nana creyentiai imaci illaia. Fiodaitinomona naimie nano jillodimiena jira, cai fiodaia, ico jiai jilloiticai. Naimiedi naga ra baifemo faite. Naimiedi nana comini baifemo jiai faite. ¹⁹ Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite. ²⁰ Cristo finoca rafue muidona, Jusiñamuidi nana cominina naimie dibeimo itataiacade. Ua nana naimie dibeimo inedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai inoia, Jusiñamui riicaillifue anamo jai inedicai. ²¹ Jusiñamui dibeimo navui inedomoi. Naimiena nabaillana jitainedomoi. Omoi comeciaimona naimiena enoidomoi. Marainedicinona finuidomoi; ²² iadedi cruzmo naimie abi illanona, nainomo Cristo fiodailla jira, naimiedi naimie dibeimo omoia itatate. Jusiñamuimona mareuidinona omoi illena, omoimo nicino inellena,

Jusiñamui dine ico omoi ia, naimie ðibeimo omoïna jai itatate. ²³ Naimiena raise ðnocana omoi jaia, danomo abido omoi jaiñenia, iese iitomoï. Cristo rafuena navui cacadomoï. Ie jira Cristo dine omoi illemo ocuridomoï. Diga comini naie rafuena jai cacadimaci. Naie rafuena llocana jaidicue.

Pablo Cristo rafuena llofuecabite

²⁴ Omoïmo Cristo rafue cue llua muidona, duere sefuidicue; iadedi iocire nia iticue. Omoi creyentiai facaina Cristo isoi duere sefuidicue. ²⁵ Jusiñamui cuena oretaja jira, naimie rafuena ailluena cominimo eo raise cue lllollena, omoi creyentiai facaina llofueticue. ²⁶ Cai jaiagai bie rafuena uiñoñedimaci; iadedi Jusiñamuina ðnotinodi iena birui uiñotimaci. ²⁷ Jusiñamui naimacina iena uiñotade. Naie rafuedi eo ebirede. Judíuaiñedinodomoï; iadedi bie rafue omoïmo jai duide. Omoi comeciäimo Cristo illana jai uiñoticaï. Ie jira naimie ebirede illanomo ico omoi jaca illemo ocuridomoï. ²⁸ Cristo rafuena llofueticaï. Nana cominimo Cristo ðibeimo naimaci iacanana lloticaï. Cristona naimaci eo raise ðnollena, Cristo isoi naimaci marebicaillena, naimaci abi uiñuana lloticaï. ²⁹ Ie jira bie rafuena llofuecabiticue. Nana Cristo cuemo iga uaido eo llofuecabiticue.

2

¹ Omoïmo eo comecina facadicue. Iena omoi uiñuana jitaïdicue. Laodicea railla nairäimo jiai eo comecina facadicue. Diga comini cuena nia cioiñedimaci. Naimacimo jiai eo comecina facadicue. ² Omoi comeciäina ocuiñotallena, iese omoïmo comecina facadicue. Dani omoi isiruillamona, ni Jusiñamui rafuena omoi eo raise marena uiñollena, omoïmo comecina facadicue. Naie rafuedi Cristona llote. ³ Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide. ⁴ Naimaci ñaiamona omoïna bu jifuei raillanona, biena omoïmo lloticue. ⁵ Omoi dine iñedicue; iadedi cue comecidi omoi dine ite. Omoïmo cue comecina facadicue. Danomo omoi marena illa jira, Cristona omoi raise ðnocana omoi jailla jira, iobidicue. ⁶ Cai Nama Jesucristona omoi ðnuamona, naimie lloga rafue finocana omoi jai. ⁷ Naimie ðibeimo raise icana omoi jai. Naimiena ðnocana omoi jai. Omoi lloraini omoïna llofuia isoi, naimiena ðnocana omoi jai. Jusiñamuimo iobillacino eo fecacana omoi jai.

Cristona cai ðnuano, cai illa rafue

⁸ Jiaie comini naimaci jamai comeciäi facajacinomona omoi jifuei raillanona, abina omoi rairui. Uanaiñedinomomo comeciäina jamai facadimaci. Naimaci einamacimona iena otimaci. Naie rafuedo omoi jaillana jitaïdicue. Cristo rafuedo omoi jaillana jitaïñedimaci.

⁹ Ero, Cristomo nana Jusiñamui uai ite. Eniruemo billanona, Cristo iimana jaide. Naimiemona Jusiñamuina uiñoticaï. ¹⁰ Cristomo omoi jainaiäilla jira, naimiemona nana omoi jitaillacinona oitomoï. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite. ¹¹ Cristomo omoi duilla jira, omoi comeciäimo ite jeacino anamona omoïna naimie jillotate. Omoi abiaïna detatajamona naimie iena finoñede; iadedi omoi comeciäimo ite jearede iuai meidua-mona jillobidomoï. Naimie iena finode. ¹² Naimie ðibeimo cai illamona, jai bautizagacai. Naimie ðibeimo cai illamona, cai jeacino anamo jai iñedicaï. Cristo fiodaite; iadedi fiodaillamona Jusiñamui naimiena jillotate. Jusiñamuina omoi ðnua jira, jeacino anamo jai iñedomoï. Naie anamona Jusiñamui omoïna jiai jillotate. ¹³ Jeacino anamo jaie omoi illamona, naimiemona fiodaitino isoidomoï. Omoi maraiñede jitaillacino anamo jaie itomoï. Cristomo omoi jai duillamona, omoi jeacinona oni dotajamona, naie anamona Jusiñamui omoïna jai jillotate. Cristo ðibeimo omoïna itatate. ¹⁴ Moisés micori jaie llogacinona jaie cai ðnoñena jira, Jusiñamui riicaillifue anamo iticaï; iadedi cruzmo Cristo fiodailla jira, naie llogacino anamo jai iñedicaï. Ie muidona Jusiñamui caïmo ðbana oñeite. ¹⁵ Cruzmo Cristo fiodailla facaiseconi Taïfedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baïfemo uaillana uiñoticaï.

Cristomo ite rafuedo omoi jai

¹⁶ Cristo rafuedo omoi jailla jira, omoi guiga rana bu fimaia, naimaci ñaiamo cacarefiñeno. Judíuai einamací rafue dine omoi jaiñenia: “Omoi mareiñedomoi” bu raia, naimaci ñaiamo cacarefiñeno. ¹⁷ Naie isoide rafuedo jaie jaidicai; iadedi iedo birui jaiñedicai. Cristo rafuedo birui jaidicai. ¹⁸ Dajerie llofueraini jiaie rafuedo jaidimaci. “Abina iedoñeno” raitimaci. “Jusiñamui jaienisaína seda” raitimaci. Nicairillacinodo jaidimaci. Naimaci isoi omoi jaiñenia: “Maraiñedomoi” omoína naimaci raia, naimaci ñaiamo cacarefiñeno. Naimaci illa isoi iñeno. Naimaci lluacino anamo iñeno. Naimaci lluacinodo omoi jaia, omoi jitaillanomo Cristo dine riñeitomoi. Naimaci comeciái jearena jira, jamai buena uiñoñenano abina iedotimaci. ¹⁹ Cristo rafuedo jaiñedimaci. Cristomo cai duilla jira, naimie caina ocuicabide. Naimiemona cai illena Jusiñamui jitailla isoi, fueoticaí. Jusiñamui jitailla isoi, naimie díbeimo cai raise illena, naimiena cai raise inollena, naimiemona fueoticaí. Cristomo cai duilla jira, dani coninina nabaidicai. ²⁰ Cristo fiodaillamona, jiaie rafue anamo jai iñedicai. Naimiena inoñedino rafue anamo jai iñedicai; iadedi naie rafuedo nia jaidomoi. Damierie llofuerainidi diga rana fimaidimaci. ²¹ “Biena jetañeno. Biena guiñeno” raitimaci. ²² Ero, naie fimaica guille ra ite, cai guillena. Iena cai guilla mei, jai buena iñede. Naimaci fimaiduacino cominimona otimaci. Jusiñamuimona oñedimaci. ²³ Naie fimaiduacinodi eo abi uiñuacino isoide. Naiedo bu jaia: “Jusiñamuina eo raise sedadicaí” raitimaci. “Abi iedoñedicai. Cai abina isiruiñedicai” raitimaci; iadedi naie isoide lluacinodo bu jaia, naimie comecimo ite jeacinomona jilloñede. Naimiedi jeacino finocana nia jaide.

3

¹ Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite. ² Cristomo ite rafuemo omoi comeciaina facacana jai. Bene ite maraiñede rafuemo omoi comeciaina facañeno. ³ Bene ite maraiñede rafue anamo jai iñedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoína naimie canoite. ⁴ Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

Omoi comeciáimo ite jeacinona fainonocai

⁵ Cristomo omoi jai duilla jira, omoi comeciáimo ite jeacinona fainonocai. Omoi aiñede riño diga iñeno. Omoi iniñede iima diga iñeno. Jeare finoca rafuemo omoi comeciaina facañeno. Omoi maraiñede jitaillacinodo omoi jaiñeno. Rana nicidoñeno. Rana omoi nicidoia, Jusiñamuina raise sedañedomoi; iadedi naimie ifomo rana sedadomoi. ⁶ Naie isoidicinona comini finua jira, naimiena naimaci inoñena jira, Jusiñamuidi naimacina duere finoite. ⁷ Naie isoide rafuedo jaie jaidomoi. ⁸ Nana bie isoide rafuedo jaiñeno. Iciríñeno. Omoi ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno. ⁹ Tainona lloñeno. Omoi comeciáimo ite jeacino anamo jaie itomoi. Naicino anamo omoi jai iñena jira, naicinodo jaiñeno; ¹⁰ iadedi jiaie rafuedo birui jaidomoi. Bie rafue omoi comeciaina marena itatate. Omoi comeciáimo bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate. ¹¹ Cristo rafuedo birui omoi jailla jira, Jusiñamuimona nana creyentiaidomoidi daje isoidomoi. Dajerie judíuai itinodomoi. Dajerie judíuaiñedinodomoi. Dajerie judíuai isoi abina detatatinodomoi. Dajerie abina detatañedinodomoi. Dajerie abina uiñotinodomoi. Dajerie abina uiñoñedinodomoi. Dajerie patrón anamo itinodomoi. Dajerie patrón anamo iñedinodomoi. Cominimona iese itomoi; iadedi Jusiñamuimona daje isoidomoi. Cristo díbeimo omoi illa jira, jai amatiaina eruaidomoi. Cristomo omoi duillacino jiaie rafue baífemo faite. ¹² Jusiñamui omoína fetode. Omoi comeciaina maretate. Omoína isiruite. Ie jira jiaie cominina duenai. Jiaie cominina cano. Abi iedoñeno. Abi biriñeno. Iciríñeno. ¹³ Dani omoi

ibana oñeno; iadedi bu diga omoi icirillafue ia, naiena raise fino. Iena raise finuanona, abido ietañeno. Iena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita. ¹⁴ Coninina omoi isiruicana jai. Isiruillacino nana jiaie llucino baifemo faite. Coninina omoi isiruia, danomo marena iitomo. ¹⁵ Jusiñamui omoina fetua jira, Cristomo daajena jai duidomo. Cristo omoi comeciaina uri itatajamona, nana comini diga uri i. Omoi comeciai uri illamona, Jusiñamuimo iobillacinona feca. ¹⁶ Cristo rafuena omoi eo ñnuana jitaídícue. Naie rafuena coninimo omoi llofue. Iena raise uiñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciainona iocire rono. David micori cuega salmos omoi roia, Jusiñamui Joreño omoina birui cuetataga ruana omoi roia, omoi comeciainona iocire rono. ¹⁷ Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jiai feca.

Coniniri creyentiai illa rafue

¹⁸ ñirediñaiñuai, omoimo rafuena lloiacadícue. Cai Namamo omoi jainaiaila jira, naimie jitailla jira, omoi iniñiai anamo raise omoi i. Naimaci uaina raise ñno.

¹⁹ Airedino, omoimo jiai lloiacadícue. Omoi ainiaina isirui. Naiñaiñuai diga iciricabiñeno. Naiñaiñuaimo riire lloñeno.

²⁰ Uruiai, omoimo rafuena lloiacadícue. Nana omoi mootiai uaina ñno. Nana omoi eiñiai uaina ñno. Iena omoi ñnoia, cai Nama eo iobite.

²¹ Mootiai, omoi uruiaina jamai icíñeno. Naimacina omoi jamai icia, comecina facaitimaci: “¿Ñiese cai mootiai uaina raise ñnoiticaí? Iena eo sefuiruiticaí”. Ie muidona omoi uaina raise ñnoñeitimaci.

²² Patrones anamo itino, nana omoi patrones ocuica uaina ñno. Omoimo naimaci eruaiñenia, omoi patrones facaina raise maiji. Cai Namana omoi ñnuua jira, cai Namana raise omoi iobitaiacana jira, omoi patrones facaina raise maiji. ²³ Buena omoi maijia, omoi comeciainona maiji. Dani comini facaina maijiñedomo; iadedi cai Nama facaina maijedomo. Ie jira raise maiji. ²⁴ Naimie jai llua isoi, cai Namamona ibana ico feiñoitomo. Cai Nama Cristo facaina omoi maijedomo; ²⁵ iadedi Jusiñamui raise maijiñedinona duere finoite. Jusiñamuimona naga maijidiemie ie maijia diese feiñoite.

4

¹ Patrones, omoimo lloiticue. Naimaci omoi anamo illa jira, omoi diga maijedinona raise iba. Naimacina jifueñeno. Omoi Nama monamo illamona, omoimo eruaide. Naimie anamo omoi illa jira, omoi anamo itinona marena raise fino.

² Jusiñamui diga ñaicana jai; iadedi omoi comeciaina facajanona omoi jii. Naimiemo iobillacinona feca. ³ Cristo rafuena llocana cue jailla jira, cárcelmo birui iticue; iadedi naie rafue nia lloiacadícue. Jusiñamui nana comini Cristo díbeimo jai jitaillana lloiacadícue. Ie jira cai facaina omoi jii. Jusiñamuidi comini comeciaina jetajana omoi jii. Naimaci comeciaina Jusiñamui jetajamona, naimacimo naie rafuena lloiacadícue.

⁴ Naimaci iena raise cacaillena, naie rafuena raise lloiacadícue. ⁵ Creyentiañedino motomo omoi ia, marena omoi i. Naimacimo Cristo rafuena llono. ⁶ Bu diga omoi ñaia, caimare ñaino. Nie isoide Cristo rafuena omoimo bu jicanoia, raise marena fairio.

Damierie ie uaina orede

⁷ Tíquicodi nana cuemo ite rafuena omoimo lloite. Naimiena isiruiticaí. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide. ⁸ Cai illana omoi uiñollena, omoi dine naimiena oredícue. Omoi comeciaina ocuiñotaite. ⁹ Naimie diga Onésimo jiai oredícue. Naimiedi creyente. Cristo rafuedo raise jaide. Naimiena jiai isiruiticaí. Naimiedi omoi comini imie. Nana bene jai suide rafuena omoimo lloitiiaimaiai. ¹⁰ Cárcelmo Aristarco cue diga ite. Omoimo ie uaina orede. Marcos ie uai jiai orede. Naimiedi Bernabé ama. Omoimo naimiena navui lloticue. Omoi dine naimie ria, naimiena feiño. ¹¹ Jesús ie uai jiai orede. Naimie mameci

jiaicidi Justo. Judíuaimona dani naimaci cuena canode. “Naimaci jeacinona naimaci fainonocaillamona, Jusiñamui ie dibeimo cominina jai jitaide” naimaci llumona, cue comequina ocuiñotadimaci. ¹² Epafraſ ie uaina jiai orede. Naimie omoi comini imie. Jesucristo dibeimo naimie maijide. Jusiñamui diga naimie ñaia, omoi facaina jaca duere jiacabide. Jusiñamui rafuedo raise omoi jaillena, ie omoimo raise itabillena, Jusiñamui jitaillacinona omoi raise finollena, omoi facaina jiacabide. ¹³ Omoi facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. ¹⁴ Cai médico Lucas ie uaina jiai orede. Naimiena isiruiticai. Demas ie uaina jiai orede. ¹⁵ Laodiceamo ite creyentiaimo cue uaina cue oretajana llono. Ninfasmo cue uaina cue oretajana llono. Naiñaiño jofomo oficabide creyentiaimo cue uaina cue oretajana llono. ¹⁶ Bie cartana omoi facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoi jiai faca. ¹⁷ Arquipomo llono: “Cai Nama fetocamedio. Naimie rafuena llocana raise o jai” llono. ¹⁸ Cue uaina omoimo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoi jii. Jusiñamui omoina duenaioillasa. Mai. Cue ciega rafue jai fuite. Pablodicue.

TESALÓNICAMO ITE CRISTONA HNOTINOMO PABLO NANO ORETAGA RABE

Uaiduacino

¹ Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uiñocana omoi jaillana jitaídicaí. Iaimaiai omoi uri itatajana omoi uiñocana jaillana jiai jitaídicaí.

Tesalónicamo ite creyentiai Jusiñamui uaina raise innotimaci

² Jusiñamuimo cai jiiia, naimiemo omoi facaina iobillana jaca fecacabidicaí. Omoi facaina jicabidicaí. ³ Cai Moo Jusiñamuimo cai jiiia, omoína comeciticaí. Jusiñamuina innotomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoína comeciticaí. ⁴ Omoína naimie isiruillamona, Jusiñamui omoína fetuana uiñoticaí. ⁵ Jamaí cai uaido Cristo rafuena omoína llofueñedicaí; ia siño uaido iena llofueticaí. Jusiñamui Joreño uaido iena llofueticaí. Naie rafuena inuanona llofueticaí. Omoi diga cai jaie ia, nie isoi cai illana raise uiñotomoi. ⁶ Cai illa isoi ificaidomoi. Cai Nama illa isoi ificaidomoi. Iemona duere sefuidomoi; ia Jusiñamui Joreño omoína iocire itatajamona, Jusiñamui uaina iocire feiñotomoi. ⁷ Ie jira nana Macedoniamomo ite creyentiai omoimona fueotimaci. Nana Acayamo ite creyentiai omoimona jiai fueotimaci. ⁸ Omoimona Macedoniamomo ite comini cai Nama uaina fididimaci. Acayamo ite comini jiai fididimaci. Ailluena nairaiaí Jusiñamuina omoi inuana jai fididimaci. Ie jira naimacimo Cristo rafuena omoi inuana jai lloñedicaí. ⁹⁻¹⁰ Omoi dine nano cai ria, caimare caina feiñotomoi. Cristo rafuena omoi cacajamona, jiraraina sedajana fainonocaida, cajede nanoca Jusiñamuina jai sedadomoi. Jusiñamui Jito abido billemo birui jiai ocuridomoi. Iese jiaie creyentiai omoína birui ñaicabitimaci. Cristo fiodaillamona Jusiñamui naimiena jaie jillotate. Naimiena cai inuamona, Cristo Jusiñamui riicaillifuemona caina jai jillobitade.

2

Pablo Tesalónicamo llofua rafue

¹ Cue nabaiñiai, omoi diga jaie cai ia, tainomo jaiñedicaí. ² Omoi dine cai nia riñenia, Filipomomo iticaí. Nainomomo itinodi caina jeare finodimaci. Iena jai uiñotomoi. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoína llofueticaí. Ailluena comini iena jitañedimaci; ia iena llofueticaí. ³ Uanañedicinona jaca llofueñedicaí. Jearedicinona jaca llofueñedicaí. Jifuerillacinona jaca llofueñedicaí; ⁴ iadedi Jusiñamui uiñoganodicaí. Ie jira caina naimie oretajamona, ie rafuena llofueticaí. Cominina iobitallena llofueñedicaí; iadedi Jusiñamuina iobitallena llofueticaí, Jusiñamui cai comecina raise uiñua jira. ⁵ Cai llofuiacino diga omoína bifueñedicaí. Omoimona ucube ollena, iese llofueñedicaí. ⁶ Cominimona iobillacinona jitañedicaí. Omoimona jitañedicaí. Jiainomona jiai jitañedicaí; iadedi Cristo oretaganona cai illa jira, cai jitaia, omoimona iobillacinona jicaredicaí. ⁷ Uruaiaina raise sedaraiño isoi, fecuise omoína llofueticaí. ⁸ Jusiñamui rafuena omoi raise uiñollena, omoína cai eo isiruillamona, niadedi omoi facaina fiodaicadicaí. ⁹ Omoi motomomo cai ucube ollena, jiaie rana maijiuidicaí. Omoína cai duere finoñellena, nagarui iese maijiuidicaí. Iena raise uiñotomoi. Iese Jusiñamui rafuena omoína llofueticaí.

¹⁰ Omoi motomomo cai illana raise uiñotomoi. Jusiñamui jitailla isoi, nainomomo iticaí. Maraiñede rafuena finoñedicaí. Mare rafuedo jaca jaidicaí. Iena uiñotomoi. Jusiñamui iena jiai uiñote. ¹¹ Omoi uruai omoi llofua isoi, omoína llofueticaí. Omoimo diga icaíño Jusiñamui rafuena llofueticaí. ¹² Jusiñamui jitaillacinona omoi finollena, iena

llofueuidicai. Monamo ie cominina sedajanomo omoi jaca illena, naimie omoina jai fetode. Nainomo ie siño uai anamo jaca itomoi.

¹³ Jusiñamuimo cai jiiia, omoi facaina iobillacinona fecacabidicai. Jusiñamui rafuena caimona omoi jaie cacajamona, iena raise feiñotomoi. Cominimona cai oga rafue isoi feiñoñedomoi; ia Jusiñamuimona cai oga rafuena feiñotomoi. Cai lloga rafue omoi comeciai iuai meidocana jaide. Ie jira Jusiñamuimo iobillacinona fecacabidicai. ¹⁴ Judeamo ite creyentiai isoi duere sefuidomoi. Omoi cominimona duere sefuidomoi. Naimaci judúuai cominimona duere sefuidimaci. ¹⁵ Judúuai comini cai Nama Jesúna jaie meinetimaci. Jusiñamui facaina lloraini micoriaina jiai jaie meinetimaci. Caina jiai birui duere finodimaci. Jusiñamuina iobitañedimaci. Jusiñamui rafue díbeimo jiai iñedimaci. ¹⁶ Judúuaiñedinomo Cristo rafuena cai lluana jitaiñedimaci. Jusiñamui judúuaiñedinona jillotajana jitaiñedimaci. Iese jeacino finocana nia jaidimaci; ia ja muidomo Jusiñamui riicaillifue anamo jai itimaci.

Tesalónica comini dine Pablo abido jaiacade

¹⁷ Omoimona cai billa mei, nigarui illanona, omoina dane cioacadicaí. Omoina cioiñedicai; iadedi omoimo comecina facadicaí. Omoi dine eo jaiacadicaí. ¹⁸ Ua eo jaiacadicue. Diga icaiño jaiacadicaí; ia Taife cai jaillana jitaiñede. ¹⁹⁻²⁰ Caina omoi jaca iobitaja jira, omoina cioacadicaí. Jesús abido bia, naie facaise omoiri eo iobiticaí. Iemo ocuridicaí. Caina iocire itataitomoi. Omoi muidona iobiticaí.

3

¹ Cai comeci jarire illamona, Atenas railla nairaimo fiebidicoco; ² iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise iñotallena, omoi comeciaina ocuiñotallena, naimiena oretaticoco. ³ Duere sefuillamona bu bie uai sefuiruillana jitaiñedicai. Creyentena cai illamona, jaca duere cai sefuillana uiñotomoi. ⁴ Omoi motomo jaie cai ia, iena llofueticaí. Omoi birui duere sefuillamona cai lluana raise uiñotomoi. ⁵ Cue comeci jarire illamona, Cristona omoi iñuana raise uiñoiacadicue. Omoina Taife ramo faicabillamona, tainomo cai maijiana jacinaiticaí. Ie jira Timoteona oredicoco. ⁶ Omoimona Timoteo jai abido billamona, omoie mare rafuena cocomo llote. Cristona iñocana jaidomoi naimie llote. Coninina isiruitomoi. Cocona caimare comecitomoi. Omoina coco cioacana isoi, cocona dane cioacadomoi naimie llote. ⁷ Birui duere sefuidicaí; iadedi omoie rafuena cai cacajano, cai comeci marena ite. ⁸ Cristo rafuena iñocana omoi jaillana jai cai uiñuamona, cai comeci marena ite. ⁹ Omoiri eo caimare jai iticaí. Ie jira Jusiñamuimo iobillacinona eo fecaacadicaí. ¹⁰ Omoina dane cai cioillena, naimiemo nagarui jiidicaí. Naimiena nia omoi raise iñoñenia, omoina naimiena raise iñotaacadicaí. Ie jira omoina cioacadicaí. ¹¹ Iese omoi facaina, cai Moo Jusiñamuimo, cai Nama Jesúmo jicabidicaí. Omoi dine caina naimie oretajana jiidicaí. ¹² Cai Nama coninina isiruitacana omoi jaillana jitaídicaí. Caina omoi isiruilla isoi, nana jainona omoi isiruillana jiidicaí. ¹³ Omoi comeciai ocuiñollena, omoi comeciai Jusiñamui jitailla isoi, marena illena jiidicaí. Nana ie comini diga cai Nama Jesús abido bia, Jusiñamui dine omoi ia, omoi comeciai marena illena jitaídicaí. Iese omoi facaina jicabidicaí.

4

Naimaci marena illena llofueete

¹ Jiaie rafuena lloiacadicue. Cai Nama Jesúmo omoi jai duilla jira, Jusiñamui jitailla isoi omoi illana jitaídicaí. Iese birui itomoi; ia nagarui iese omoi illana jitaídicaí. Ie jira cai llua isoi, omoi jai. ² Cai Nama Jesús jitailla jira, navui iena llofueticaí. ³ Jusiñamui jitailla isoi omoi marena illena, omoi aiñede riño diga iñeno. ⁴ Nagamiiai riñona ie aina otena, mare; ia maraiñede rafuena finoñeno. Nagamiiai dajena daje riño uana Jusiñamui jitaide. Dañaiño diga iaimaiiai jionaillena jiai jitaide. ⁵ Naimiena iñoñedino isoi, omoi ai uana jitaiñede. Naiñaiñuai abina jamai cioillena riñona otimaci. ⁶ Jiaie creyentemo

jeacinona finoñoeno. Naimie aina jamai aifiedoñoeno. Naie isoide rafuena bu finoia, cai Nama naimiena duere finoite. Iena navui omoimo lloticue.

⁷ Jearede rafuena cai finollena, Jusiñamuidi caina fetoñede; iadedi mare rafuena cai finollena caina fetode. ⁸ Bie llofuiacino nie creyente ñnoñenia, cue llofuiacinona jamaide; ia Jusiñamui Joreño naimiemo illamona, Jusiñamui llofuiacinona jiai jamaide. ⁹ Jiaie creyentiaina omoi isiruillana omoimo eo lloñeiticue. Jusiñamui omoina coninina isiruillana jai uiñotade. ¹⁰ Nana Macedoniamite creyentiaina jai isiruitomoi; iade nia isiruicana omoi jai. ¹¹ Uri omoi i. Dani omoimo ite rafuena omoi uiuicai. Jiainomona ucubena jicañoeno; ia omoi ucube ollena, omoi onolli diga rairuioicañoeno omoi maiji. ¹² Ie mei omoi jitailla ra iite. Iemona Cristona ñnoñedino omoina jiai mameriñeitimaci.

Jesucristo dane abido billena llote

¹³ Omoi raise uiñollena, daje rafuena lloticue. Omoi creyentiainomona dajerie jai fioidaitimaci. Jesúna ñnoñedinomona bu fiodaia, fiodaillamona jilluamo naimaci ocuir-ñena jira, sunaitimaci; iadedi naimaci sunailla isoi, omoi illana jitañeiticue. Fiodaillamona jilluamo jai ocuiridomoi. ¹⁴ Jesús fiodaillamona naimie jilluana ñnoticai. Ie jira Jesús abido billa facaise, jai fiodaite creyentiaina Jusiñamui jilloitajana jiai jai ñnoticai. ¹⁵ Cai Nama llofui isoi, bie rafuena lloticue. Jesús abido bia, jai fiodaite creyentiai, nia fiodañede creyentiai diga, daacaiño naimie ñne a jaiticai. ¹⁶ Cai Nama Jesús abido bia, Jusiñamui ñnena naimie billanona, caina jidaite. Ie jaienici caina uaidoite. Jusiñamui ie trompeta daacaiño jiai fiite. Jai fioidaitino nano jilloitimaci. ¹⁷ Iemei nia fioidañedinodi como jilloñino diga uillie motomo naimiemo dafaifillena, Jesús caina uite. Iemei naimie diga jaca iiticai. ¹⁸ Bie llofuiacino diga conini comeciaina omoi ocuiño.

5

¹ Bie rafue suilliruina uiñoñedicai. Bie rafuena omoi jai uiñua jira, iena dane eo cueñeiticue. ² Cai Nama abido billana jai uiñotomoi. Fiñredimie naiona ebena billa isoi, naimie abido biite. ³ “Uri iticai. Marena iticai” Cristona ñnoñedino raia, naie facaise naimacimo duere sefuillifue suite. Urue riño jigicomo casilla isoi, ebena suite. Naiemona jilloñeitimaci. ⁴ Naie facaise suia, Cristo billena omoi jai uiñuamona, fiñredimie naiona ebena billa isoi, jacinaiñeitomoi. Cristona ñnoñedino isoi, ñnedomoi. ⁵ Uanaicinona omoi jai uiñuamona, Cristo ie cominina jai jaidomoi. Jeacino anamo omoi jai ñnena jira, Cristona ñnoñedino ñbeimo jai ñuñnedomoi. ⁶ Ie jira abina sedacana omoi jai. Abina rairuioicaida omoi jai. Jiñaidino isoi ebena omoi jaiñeno. ⁷ Cristona ñnoñedino abina sedacana jaiñedimaci. Rairuioicaida ebena jaidimaci. ⁸ Cristo ie cominina jai cai illa jira, ebena cai jaiñena. Imaci abina riidollena, soldaduai jogobe icodi ite. Imaci ifogi icodi jiai ite. Ie isoide. Cai comeciaina eenollena, Cristona ñnocana mai cai jailli. Jiaño isiruicana mai cai jailli. Jusiñamui ñne ico cai illemo ocuiricana mai cai jailli. ⁹ Caina duere finollena, Jusiñamui caina fetoñede; iadedi cai Nama Jesucristo finoca rafue muidona, duere finollemona cai jilloillena, caina fetode. ¹⁰ Cristo cai facaina jai fiodaite. Ie jira birui cai fiodaia, naimie bille facaise nia fioidañedinona cai ie, naimie diga jaca iiticai. ¹¹ Ie jira coninina ocuiñotacana omoi jai. Cristo ñbeimo coninina itatacana omoi jai. Iese birui jaidomoi; ia nia iese omoi jai.

Omoi creyentiaina llofueraini uaina ñno

¹² Cue amatiai, jiaie rafuena lloticue. Omoi creyentiaina llofueraini uaina ñno. Cristo jitailla jira, omoi afemo itimaci. Cristo ñbeimo omoina raise itatallena, omoi facaina llofuetimaci. ¹³ Omoina naimaci canua jira, naimacina isiruillanona, naimaci uaina raise omoi ñno. Coniniri uri omoi i. ¹⁴ Omoi motomona maijiacaiñedinona imaci maijillesa ocui. Duere sefuillamona jai comecina ocuiñonidinona comecina ocuiñota. Raise ñnollena, Cristona nia raise ñnoñedinona jiai cano. Fecuisse naimacina ui-uillanona, naimacina cano. ¹⁵ Omoina jiaimie duere finoia, ñbana oñoeno; iadedi naimiemo mare rafuena fino. Nana cominimo mare rafuena fino. ¹⁶ Nie isoide rafue omoimo ia, caimare omoi i. ¹⁷ Jusiñamuimo nagarui jii-jii. ¹⁸ Nie isoide rafue omoimo ia, Jsuiñemui jitailla

jira, naimiemo iobillacinona feca. Jesucristomona Jusiñamui jitaillacinona jai uiñoticai.
¹⁹Jusiñamui Joreñona jamaiñeno. ²⁰Jusiñamui Joreño uaido lloraini llofuiana jamaiñeno;
²¹iadedi Jusiñamui Joreño uaido naimaci llofuiana facaci. Mare rafuedo jaca omoi jai.
²²Nana maraiñede rafuemonona eneno oni omoi i. Naie isoide rafuena omoi abimo omoi oñeno.
²³Ie jira Jusiñamuimo omoi facaina jiiiticue. Naimie omoina jai uri itatate.
Naimie omoina nagarui marena itatacana jaillana jitaidicue. Iese omoi jaia, cai Nama Jesucristo dane abido bille facaise, naimie jitailla isoi, omoi comeciai marena iite.
²⁴Jusiñamuidi inogamiena jira, iese omoina finoite.
²⁵Cue amatiai, Jusiñamuimo cai facaina omoi jiiicabi. ²⁶Cue facaido nana creyentiaina caimare uaido.
²⁷Cai Namamo cai duilla jira, naimie jitailla jira, bie cartana nana creyentiai uicomo faca.
²⁸Cai Nama Jesucristo omoina duenaillasa. Mai. Pablodicue.

TESALÓNICAMO ITE CRISTONA HNOTINOMO PABLO IE EMODOMO ORETAGA RABE

Uaiduacino

¹⁻² Tesalónicamo ite creyentiai, omoimo cartana cueticue. Pablodicue. ¿Nigacino? ¿Nie isoidomoi? Silvano cue diga ite. Timoteo cue diga jiai ite. Iaimaiai uaina orediaimaiai. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiai omoi duenaillana uiñocana omoi jaillana jitaidicai. Iaimaiai omoi uri itatajana omoi uiñocana jaillana jiai jitaidicai.

Cristo dane abido bia, naimiena iñoñedinona duere finoite

³ Jusiñamuimo cai jiaa, omoi facaina naimiemo iobillacinona fecacabidicai. Cristona iñocana raise jaidomoi. Coniniri isiruicana raise jaidomoi. ⁴ Ie jira marena omoi illana jiaie creyentiai illanomo llocana uiticai. Duere sefuidomoi; iadedi danomo abido jaiñedomoi. Cristona iñocana jaidomoi. Iena llocana uiticai. ⁵ Jiainomona birui duere sefuidomoi; ia iñocana jaidomoi. Iemona Jusiñamui omoi facaina illana uiñotica. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

⁶ Jusiñamui omoina duere finodinona ico duere finoite. Omoi facaina ibana oite. Iese naimie finoia, naimiemono mare. ⁷ Cai Nama Jesús abido bia, duere sefuillamona jilloitica. Monamona ie siño jaienisa diga biite. Irai boua isoi ana biitimaci. ⁸ Jusiñamuina iñoñedinona diese duere finoitimaci. Cai Nama Jesús rafuena naimaci iñoñena jira, naimacina duere finoitimaci. ⁹ Iñoñena jira, jaca faifitimaci. Jaca llegi cacaitimaci. Jusiñamui illanomo jaca iñeitimaci. Ie ebirede uaina uiñoñeitimaci. ¹⁰ Cristo bille facaise naimiemo iobillacinona fecaiticai. Naimieri nana naimiena iñotino rajicaitimaci. Omoimo cai lloga rafuena omoi jai iñua jira, iese iitomoi.

¹¹ Ie jira omoi facaina jicabidicai. Naimie jitailla isoi, omoina naimie marena itatajana jiidicai. Omoina naimie fetuamona, ie uaido mare rafuena finocana omoi jaillana jiidicai. Ie uaido naimiena iñocana omoi jaillana jiidicai. ¹² Iese omoi jaillemona, naimie abido bille facaise naimiena iobitaitomoi. Omoiri naimie jiai iobite. Jusiñamui, cai Nama Jesucristo diga, caina duenaillamona iese iitica.

2

Jesucristo abido bille rafue

¹ Cai Nama Jesucristo abido billena lloiacadicue. Naimiemo ico cai dafaifillena jiai lloiacadicue. ² “Cai Nama jai abido bite” raillana omoi cacaia, raire jarire iñeno. Rucaicueriñeno. “Jusiñamui Joreño iena cuemo jai llote” damie raia, iena iñoñeno. Nie lloraima iena lloia, iena iñoñeno. “Pablomona cue feiñoga carta iena llote” damie raia, iena iñoñeno. ³ Naie isoide rafue diga omoina jiaino jifueiacania, iena iñoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; ⁴ iadedi nano jiaie rafuena finoite. Taife dinena naimie billanona, jirarai baifemo iacanite. Jerusalémo Jusiñamui jofomo illanona, “Jusiñamuidicue” raite. ⁵ Omoi dine navui cue ia, bie rafuena omoimo lloticue. ⁶ Jusiñamui Joreño naimie nia billena rairuillana jai uiñotomoi. Jusiñamui jitaillirui facaise naimie biite. ⁷ Taife maraiñede rafuena birui bainino finotate. Jusiñamui Joreño naimiena maraiñede rafuena birui marefodo finuana rairuide. Jusiñamui Joreño naimie rairuiñena mei, ⁸ Taife dinena maraiñedimie biite; ia cai Nama Jesús abido ebire bia, firaiñuamona naimiena meineite. ⁹ Cai Nama Jesús nia abido biñena, comini jifuellena, Taife uaido bie maraiñedimiedi diga siño rafuena finoite. ¹⁰ Cominina eo maraiñedicinodo jifueite. Naie comini ico faifitimaci. Jusiñamui ie uanaicinona naimaci iñoñena jira, jilloiacaiñeitimaci. ¹¹ Ie jira Jusiñamui naimacina tainocinona iñotaite.

¹² Jusiñamui ie uanaicinona naimaci ñinoñena jira, maraiñede rafuena naimaci ebiruilla jira, Jusiñamui naimacina duere finoite.

Jusiñamui omoïna jai fetode

¹³ Jusiñamuina ñinoñedino isoi Jusiñamui omoïna duere finoñeite. Naimie omoïna jai fetua jira, naimiemo iobillacinona jaca fecacabidicai. Omoï jilloillena, nano dofoconi omoïna fetode. Ie Joreño uaido naimie jitaillacinona omoï finollena, naimie uanaicinona omoï ñinuamona, omoïna fetode. ¹⁴ Ie rafuena cai llumona, Jusiñamui omoïna jai jillotate. Iemona cai Nama Jesucristo ebirede illanomo jaca iitomoï. ¹⁵ Ie jira, Cristona ñinocana omoï jai. Cai llogacinodo omoï jai. Iena caïmona jai cacadomoï. Cai cartamona iena jiaï cacadomoï. ¹⁶ Omoï facaina cai Nama Jesucristomo, cai Moo Jusiñamuimo, jicabidicai. Naimie caïna isiruite. Cai comeciaina jaca ocuiñotade. Caïna duenaillamona naimie lloga rafue suillemo raise ocuiridicai. ¹⁷ Naimie omoï comeciaina nia ocuiñotallena jiidicai. Nie isoide rafuena omoï finoïa, naie rafue omoï marena finollena jiidicai. Buena omoï ñaïa, omoï marena ñaïllena jiaï jiidicai.

3

Cai facaina omoï jiaïna jitaïdicai

¹ Daje rafue nia lloiacadicue. Cai facaina omoï jiaïna jitaïdicai. Cai Nama rafue llocana jaïllana jitaïdicai. Omoï ñinua isoi, jiaïno ñinuana jiaï jitaïdicai. ² Maraiñedinomona cai jillobillena, omoï jiaïna jitaïdicai. Aïlluena comini Cristona ñinoñedimaci; ³ ia cai Nama jaca ñinogamie. Omoï comeciaina ocuiñotaite. Maraiñedicinomona omoïna eenoite. ⁴ Cristomo cai duïlla jira, cai llogacinona omoï jai ñinuana jai uïñoticaï. Iena nia ñinoïtomoi. ⁵ Cai Nama Jesús omoïna Jusiñamui omoïna isiruïllana uïñotajana jitaïdicue. Cristo duere sefuide; iadedi ie Moo jitaïlla rafuena sefuiruiñeno finocana jaide. Iese Jusiñamuimo omoï facaina jiiiticue.

Maijjuïllasa

⁶ Cai Nama Jesucristo jitaïlla jira, jiaïe rafuena nia lloiticue. Jiaïe croyente maijiacaiñenia, naimie diga eo nabairiñeno. Iena navui omoïmo lloiticue; ia damierie iese ia, naimaci diga eo nabairiñeno. ⁷ Caïmona fueo. Navui omoï motomo iticai; ia cai ucube ollena, jaca maijidicai. ⁸ Guillena ibaïeno guiñedicai; ia nagarui eo maijidicai, omoïna duere cai finoñellena. ⁹ Cristo facaina cai maijia jira, omoïmona ra jamai cai jicallena, caïmo uai ite; iadedi caïmona omoï fueollena iese jicañedicai. Omoï ra ollena, omoï maijiana jitaïdicai. ¹⁰ Navui omoï motomo cai illa facaise lloticai: “Bu maijiacaiñenia, guiñena”. ¹¹ Omoï motomo damierie jai maijiñenana jai fididicai. Maijiñeno jai itimaci. ¹² Cai Nama Jesucristomo cai duïlla jira, naie isoidinomo maijillena lloticai. Uainino maijiamona ucube naimaci uana jitaïdicai. ¹³ Cue amatiaï, nie isoide mare rafuena finollena sefuiruiñeno. ¹⁴ Cue jai cuega cartamo ite rafuena bu ñinoñenia, nana croyentiaïna naimiena uïñota. Naimie meidaïllena, naimie diga nabairiñeno. ¹⁵ Naimiena enoïñeno; ia croyentena naimie nia illamona, naimiena fecuise llofue.

Fuiduacino

¹⁶ Cai Nama omoï jaca uri itatajana jitaïdicai. Naimie omoï diga jaca iite. ¹⁷ Cuenanollena, naimiemo cue llua isoi, jiaïmie bie carta cuega; iadedi cue mameci buone dama cueticue. Nana cartamo iese cue mamecïna cueticue. Pablodicue. ¹⁸ Cai Nama Jesucristo nana omoïna duenaïllasa. Mai. Macaïbaite.

TIMOTEOMO PABLO NANO ORETAGA RABE

Pablo Timoteona uaiduacino

¹⁻² Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús oretagamiedicue. Ie rafue lollena, naimie cuena orede Naimiena cue cioillena, naimie isoi cue illena, naimie abido billemo ocuridicue. Jusiñamui cuena jiai orede. Naimiedi cai Jilloitaraima. Cue llofuiacinomona Cristona o raise ñnua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiamaiaia. Iena uiñocana mai o jai.

Cristo rafuena tainona llofueraini llofuiacinodo jaiñeno

³⁻⁴ Macedoniamoo jaie jaidicue, Efesomoo o fiebicaillena omo lloticue. Nainomoo dajerie Cristo rafuena raise llofueñedimaci; iadedi jiaiforie llofuetimaci. Diga ñgaiaia faca-facacimaci. Imaci usumatiai mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai ñnuamona, marena iticai. Iena llofueñedimaci. Ie jira naimaci uaina llicaita. ⁵ Jusiñamuina comini isiruillena, jiaie cominina jiai naimaci isiruillena, Jusiñamui uaina llofueticai. Naimaci comeciai jeaninana jitaidicai. Jusiñamuina raise naimaci ñnuana jiai jitaidicai. Ie jira Jusiñamui rafuena llofuecabiticai. ⁶ Dajerie llofueraini iese llofueñedimaci; iadedi jamai ñaitimaci. ⁷ Moisés micori jaie llogacinuaido llofueiacadimaci; iadedi iena llofuiana uiñoñedimaci. Naie llogacinuaina ua uiñoñedimaci.

⁸ Iena raise llofuegana, Jusiñamuina uiñoñedinona naimiena uiñotallena, mare. Iena uiñoticaia. ⁹⁻¹⁰ Moisés micori llogacinuaidi mareuidinomo jainaiñede. Jiañomoo jainaiaide: Jusiñamui uaina ñnoñedinomo lloga uaina ñnorainidinomo, Jusiñamuina jitañedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aiñede riño diga itinomo, iniñede iima diga itañaiñuaimo, daje isoide iima diga conini aifuedotinomo, comena fiidinomo, taino llorainimo, taino lluaana jifueridinomo, uana rafue facaisena iñedinomo. Nana Cristo rafue facaina iñedinomo Moisés micori llogacinuai ua jainaiide; ¹¹ ia naie rafue cuemo jai jainaiñede. Ie mare rafuena cue lollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

Jusiñamui caina duenaila jira, Pablodi iobide

¹² Cuena fetua jira, cai Nama Cristo Jesuri iobidicue. Naimiena cue ñnollena, naimie cuena uiñuamona, cuena fetode, naimie rafue cue lollena. Iena lollena, cue comecina jiai ocuiñotade. ¹³ Jaie naimiena jeare ñaiticue. Naimiena ñnotinona jiai duere finodicue. Abina cue uiñoñena jira, naie facaiseconi naimiena nia cue ñnoñena jira cuena duenailamona, naimie cuena fetode. ¹⁴ Cuena eo duenaite. Iemona naimiena ñnoticue. Naimiena jiai isiruiticue.

¹⁵ Bie lluaadi mare cue uiñuamona, nana comini biena ñnuana jitaidicue. Marañedinona naimaci jeacinomona jilloitallena, eniruemo Jesucristo bite. Ero, nanoca jeacinona finoraimadicue; ¹⁶ iadedi Jesucristo cuena duenaite. Naimiena cue ñnuamoo jaie fecuise ocuride. Nana jeacinona finorainimo fecuise ocuride, naimiena ñnollena. Naimiena cai ñnuamona, Jusiñamui diga jaca iticai. Cuena duenaila jira, biruimona naimiena ñnoitnodi naimie naimacina duenailana uiñoitimaci. ¹⁷ Jusiñamuidi nanocamie. Jaca fioidañeite. Naimiena cionidicai. Naimie damiede. Jiaiena iñede. Naimiena jaca iobicabillasa. Iena jitaidicue.

¹⁸ Ero, Timoteo, cue jito, omo rafue lloiacadicue. Nano o llofueraimana jaiacana facaise ailluena Cristo rafuena llofuerainidi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena. ¹⁹ Cristona ñnocana o jai. O comecina marena finocana o jai. Dajerie naimaci comeciai iuaimo comeciaina facañedimaci. Ie jira Cristona jai ñnoñedimaci. ²⁰ Iese

ite Himeneo. Alejandro jiai jai daje isoide. Jai iinoñediaimaiai. Ie mei iaimaiaina Taife anamo jai itabicaítaticue, duere sefuillena. Iaimaiai fueollena, Jusiñamuina jeare ñaiñellena, iese itabicaítaticue.

2

Nana comini facaina jiiiticaí

¹ Diga rafue omo lloiticue; iadedi daje rafue motomo ite. Nanoca rafue. Iena omo lloiticue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca. ² Uri cai illena, Jusiñamuina raise cai sedallena, Jusiñamui jitailla rafuena cai finollena, illaicomini facaina cai jii. ³ Iese cai jiiia, Jusiñamuimona mare. Naimiedi cai Jilloitaraíma. ⁴ Naimiedi nana comini naimaci jeacinomona jilluana jitaide. Uanaicinona naimaci uiñuana jiai jitaide. ⁵ Nana nairaiai imaci Jusiñamuidi jaca dajede. Comini diga Jusiñamui facaisena ñairaíma jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaíma jaca dajede. Naimiedi Cristo Jesús. Naimie imanana, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. ⁶ Cai jeacinomona cai eneno illena, Jesucristo nana cai facaina jai fiodaite. Naimie jitailla facaiseconi Jusiñamuidi cominina bie rafuena jai uiñotade. ⁷ Bie rafue cue lollena, Jusiñamui cuena fetode. Judíuaiñedinomo cue lollena, bie rafue naimaci iñollena, uanaicinona naimaci uiñollena, cuena orede. Tainona lloñedicue.

⁸ Ie jira naga roracomo ite iñiaí, cai comini onolliaí a ñuitacabilla isoi, comeciáimo jeacino iñenanomona, Jusiñamuimo jiiana jitaídícue. Naimaci comeciáimo icirillacino iñedemo, Jusiñamuimo jii. Naimaci comeciáimo uaitajacino iñedemo, Jusiñamuimo jii. ⁹⁻¹⁰ Riñoniaímo jiai lloiticue. Roracomo omoi jaia, abi ieduoamo comeciáina facañenamona, omoi ifotiena fino. Jamai ebinai raillano, abi ieduoamona abina finora jitañeno. Jamai ebinai raillano, abi ieduoamona eo raífide iniroina jitañeno; iadedi mare rafuena omoi finuamona, ebinaitomoi. “Jusiñamuina iñoticaí” omoi raillanona, naimie jitailla isoi, marena omoi finolle. ¹¹ Rollena comini ofia, ñaiñenanomona, uaitañenamona omoi fueo. ¹² Omoi ofia, omoi iñiaína llofuiana jitaíñedicue. Nainomo omoi ñaiñena. fiñiaí omoi anamo illana jitaíñedicue. Iese omoi riñoniaímo lloiacadícue. ¹³ Jusiñamui Adán micorina nano finua jira, iese llotícue. Adán micori finua mei, Eva micorina jiai finode. ¹⁴ Taifedi Adán micorina jifueñede; iadedi Eva micorina jifuefe. Ie mei naie riño jeacina finode. ¹⁵ Iemona jilloite; iadedi uruiaí jococana jaite. Riñoniaídi Jusiñamuina iñoia, jiaíe cominina isiruaí, Jusiñamui jitailla rafuena finoia, ie abina enoia, jilloitímaci.

3

Creyentiaína sedaraini illa rafue

¹ Bicinodi uanaicino. Creyentiaína llofueraímana bu jaiacania, naimie comecimo mare jitaillacino ite. ² Bie isoide llofueraímana jaiacadimiena jitaídícue. Naga comini naimie mare raillamie. Dañaiñona airedimie. Abi eenotimie. Ebena iñedimie. iñogamie. Jiaíe comini naimie jofomo riadedi, raise nafuecabitimie. Jusiñamui uaina raise llofuecabitimie. ³ Jifairuiñedimie. Fuirirainidimie. Raire icirirainidimie. Ucubena nicidoñedimie. ⁴ Naimie cominina raise sedadimie. Naimie anamo naimaci illanona, naimie uruiaí ie uaina raise iñotadimie. Ie isoidimie llofueraímana jaillana jitaídícue. ⁵ Iese naimie iñenia, ie anamo itinona naimie raise sedañenia, ¿niese jiaíe creyentiaína raise sedaite? ⁶ Como creyentena jaidimiena creyentiaína llofueraímana fetoñeno, naie diga naimie abi iedoi raillano. Abi ieduoamona, Taife isoi jeacino finoite. ⁷ Llofueraímana jaiacadimiena creyenteñedino: “Mare” raiñenia, naimiena fetoñeno. Iese naimiena raiñenia, naimie joreña jeare ñaitímaci. Iemei Taife ramo jiai faite, naimie abido danomo uallena. Ie muidona naimie uaina jaca cacarefiñeitímaci.

Diáconuaí illa rafue

⁸ Diáconuai creyentiai llofueraini isoi marena illa. Inouiganona illa. Jifairaiēna. Ucubena nicidoñena. ⁹ Naimacidi Cristona cai inua rafuena jeanide comeciáimona inua. ¹⁰ Bu omoi fetoacania, naimacina nano facaci. Roracomo jiaie rana nano maijita. Iena raise finoia, diáconuaina jaite. ¹¹ Diáconuai ainiai jiai inogañaiñuaina illa. Jiaie comini joreña ñaiñena. Jirorainina. Naga rafuena marena raise finua. ¹² Nana diáconuai aidi dañaiñoriede. Diáconuai uruai naimaci uaina raise inua. Diáconuai imaci anamo itinona raise sedajana uiñua. ¹³ Diáconuai marena maijia, comini naimacimo iobillacinona fecaitimaci. Cristo Jesúna inuano, naimiena marefodo jiai lloitimaci.

Jusiñamuina inotino

¹⁴ Timoteo, raire o dine jaiacaducue; iadedi uicodo bie rafuena omo cueticue. ¹⁵ Are cue riñenia, dani omoi creyentiai diese ofia, Jusiñamui ie cominina marena omoi illana omoi uiñollena, omo cueticue. Cajede Jusiñamuina jai sedadicaí. Uanaicinona riidoticaí. ¹⁶ Jusiñamui caina Cristona jai uiñotagafuedi jiaie rafue baifemo faite. Iena cai uiñuanona, raiticaí:
Eniruemo Cristodi imana jai bairede.
Jusiñamui Joreñodi caina naimie uai siñonana uiñotade.
Jusiñamui jaienisai naimiena jiai ciodimaci.
Jiaie nairaiimo naimiena lloticaí.
Iena cacajamona, ailluena cominidi diga nairaimona naimiena birui inotimaci.
Monamo naimie abido jai jaide.

4

Jiainodi jiaiforie rafuena lloitimaci

¹ Jusiñamui Joreño caimo raise lloite: “Jesucristo nia abido biñena facaiseconi damierie creyentiai Cristona fainonocaitimaci. Taife dibeimo ite lloraini llwana cacarefillamona, Janabamona ite llucacino jaitimaci. Taifemona ite llucacino jaitimaci”. ² Naie llorainidi: “Uanaicinona lloticaí” raitimaci; iadedi taino llocabiitimaci. Naimaci comeciai jai tainomo iite. ³ Hima riño ie aina ollena rairuitimaci. Riño ima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiai uanaicinona uiñuanona, iobillanona guillena, naimiedi naga rana finode. ⁴ Nana Jusiñamui comuitaga guille radi mare. Iobillano iena cai feiñuanona, guiticaí. ⁵ Jusiñamui llua jira, Jusiñamuimo cai jiaia, nana guille radi jai mare. Iemona marañede rafue jaca caimo comuiñeite.

Jesucristo rafuedo raise inocana jai

⁶ Timoteo, cue llwana creyentiaimo o lloia, Jesucristo dibeimo raise maijidio. Cristo uaina inocana o jailla jira, mare llogacino o jailla jira, raise maijidio. ⁷ Jamai rafuemo, jamai iñgaiaimo o comecina facañeno; iadedi Jusiñamui jitailla rafuena finocana o jai. ⁸ Mairillena o abi llarocaiadedi, mare; iadedi Jusiñamui rafuena o facajia, eo mare. Abi llarocaja baifemo Jusiñamui uaidi eo faite. Jusiñamui rafuedi o comecina birui ocuiñotaite. Jusiñamui dine jiairuido o jaillena, o comecina marena jiai raise finotaite. ⁹ Bie llucacino uanaicino. Ie jira iena cai inua. ¹⁰ Cai jillobillena, cajede Jusiñamuimo ocuridicaí. Ie jira duere sefuillano maijidicaí. Jeacinomona Jusiñamuidi nana cominina jillobitacade. Naimiena inotinona jai jillotate.

¹¹ Nana creyentiaimo cue llwana raise llofue. ¹² Naimacina o llofueia, coniruena nia o illamona: “O afemo iticaí” naimaci raiadedi, damamai iese raitimaci. Mare illacino o jai. Ie mei iese raiñeitimaci. Marena o ñaiamona, marena o illamona, jiaie cominina o isiruillamona, Jusiñamuina o inuamona, o jeanide rafuena o finoñenamona, naimacidi fueoitimaci. ¹³ O dine nia cue riñenia, creyentiai ofia, Jusiñamuina ciegafuiaina ado faca. Iena llono. Iena llofue. ¹⁴ Creyentiaina llofueraini navui ofidemo, Jusiñamuimona o baitajacinona o feiñollena, naimaci onolliai o ifogimo jonetimaci onolliai o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fainonocañeno. ¹⁵ Iena eo uiuicaí, nana comini Cristona inocana o jaillana

uiñollena. ¹⁶ O comecina raise eeno. Marena raise llofue. Cristo uaina ñnocana o jai. Iese o jaia, jeacino finuamona jilloitio. Iese ona cacadino jiai jilloitimaci.

5

Timoteo afemo itino diga ie illa rafue

¹⁻² Eimiaina illamona, o afemo itinona riire llofueño; iadedi o moomo o llua isoi, naimacina fecuise llofue. O anafemo itinona o amatiaino o llua isoi, llofue. O afemo itinañuaina o eimo o llua isoi, llofue. O anafemo itinañuaina o miriñotaino o llua isoi, llofue. Naiñaiñuaino jeare comecina facañeno. ³ Naiñaiñuaina canollena, feciñuai comini ñenia, naiñaiñuaina cano. ⁴ Feciñomo uruai ia, naimaci naiñaiñona canua, naiñaiño naimacimo duilla jira. Einamacina illamona, iemona naiñaiñodi ibana oite. Iese itena, Jusiñamuimona mare. ⁵ Feciñomo uruai ñenia, da Jusiñamuimo naiñaiño ocuiride, naimie naiñaiñona canollena. Jusiñamuimo nagarui jicabite. Bie isoide feciñuaina cano; ⁶ iadedi Jusiñamuimo duiñede rana ebiruiga feciñona canoño. Jusiñamui anamo naiñaiño jai raise ñenamona, Jusiñamuimona naiñaiñodi jai fioiditinañoi isoide. Fioidite cominina jaca canoñedicaí. ⁷ Ie jira creyentaino buena llono, feciñuaina jeare bu ñai raillanona.

⁸ Ie cominina canoñedimie Cristo uaina jai fainonocade. Naimiedi Cristona ñnoñedimie baifemo eo jearedimie. ⁹ Creyentaina sedarainina canolle feciñuai mamecaina o joneia, iese jone: Jai jionaidinañuiai diese mameci jone. Dajede ñniredinañuiai mamecina jone. ¹⁰ Mare rafue naiñaiñuai finocabilla jira, jiaie cominidi naiñaiñuaidi mareñaiñuai raillañaiñuai. Ie uruai raise sedadinañuiai. Cominina nafuecabitinañuiai. Jiai creyentaina abina iedoño canocabidinañuiai. Duidinona canocabidinañuiai. Diese mare rafuena finocabidinañuiai mameci jone. ¹¹ Feciñuai diese mameci o joneia, nia jionaiñede feciñuai mamecaina joneño. Naiñaiñuai nano llotimaci: “Inina dane oñeiticaí. Da Cristona sedaiticaí” llotimaci. Ie mei uri ñnenanomona, ñmana niciduamona, ñnina jitaitimaci. Ie jira naiñaiñuai mameci joneño. ¹² Naiñaiñuai navui llucinona jai fainonocaila jira, jiaie comini naiñaiñuai joreñuaina ñaitimaci. ¹³ Naiñaiñuai diga jofomo macariruillamona, rairaiñedimaci. Eo ñaillaredimaci. Naiñaiñuai ñaiñenacinuaido ñaitimaci. ¹⁴ Nia jionaiñede itinañuiai iese ñnellena, naiñaiñuai ñnina dane uana jitaidicue. Ie mei uruaiñenitimaci. Naiñaiñuai jofona sedaitimaci. Ie mei budi naiñaiñuaina jeare ñaiñeite. ¹⁵ Cristona dajerie fainonocada, Taife ñibeimo jai jaidimaci. ¹⁶ Creyente cominimona feciño iade, da naimie naiñaiñona canua. Jiaie creyentaino naiñaiñona canolle rana jicañena. Ie muidona cominide feciñuaina canorenitimaci.

¹⁷ Creyentaina llofueraini marena maijia, raise ñbauiga. Naimaci lloia, naimaci jiai llofueia, eo raise ñbauiga. ¹⁸ Moisés micori jaie cufaguaia iena llote: “Trigo oni juillena jurareta saisia, ie fuenai mañeno, ie guillena”. Guillamona ñbana jai ote. Cristo jaie llote: “Maijidiñmiedi ñbauiga”. ¹⁹ Creyentiai llofueraimana damie llogidoia, iena cacareñeno. Mena comini, ñbai daje amani comini iese naimiena llogidoia, iemo cacarei. ²⁰ Creyentiai llofuerainimona bu jeacinona finocabia, nana creyentiai uicomo naimiemo riire llono, jiaie creyentiai daje isoi ñnellena. ²¹ Dacinodo naga jeacino finoraimamo llono. Nagamiemo riidoño llono. Fecuise damiemo lloño, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiai cioidimaci. Ie jira dacinodo llono. ²² Jeacino naimiemo ia, naimie jeacino facaisena o ñnellena, creyentiai llofueraimana jaillena, buna raire fetoño. Jeacinomona oni eneno o i. ²³ Eo o duia, da jinuína jiroño. O duicabilla jira, janore vino jiro, o jebe manollena. ²⁴ Jeacino dajerie finoa, iena uiñoticaí, juez isoi Jusiñamui iena ña lloñenia. Jeacino jaiño finoa, iena uiñoñedicaí; iadedi jaiñuido Jusiñamui lloia, iena uiñoiticaí. ²⁵ Ie isoide. Mare rafue bu finoa, iena uiñoticaí; iadedi birui iena cai uiñoñenia, jicarena finoñena jira, jaiñuido iena uiñoiticaí.

6

¹ Jusiñamuina ñnote maijirainidi naimaci patrones eo ñnua. Ie mei Jusiñamuina ññoñedino Jusiñamuina jeare ñaiñeitimaci. Cai llofuiacinona jamaiñeitimaci.

² Jesucristona naimaci patrones ññoia, maijiraini naimaci uaina jiai ñnua. Naimaci comeciai facañena: “Patrón creyentena illa jira, dani conima cai isiruilla jira, raise maijiñeiticai”; ia: “Raise maijiiticai” comeciaina facaja.

Uanañedicinona llucino

³⁻⁴ Cai llogacinodi uanaicino. Cai Nama Jesucristona lloticai. Bie llogacinomona naimie jitaille isoi cai illanona, raise uiñoticai. Jiaicinado bu llofueia, abi iedote. Abi uiñoñede. Uai eo uaitaiacade. Ie meinoconi comini abina uradoidimaci. Daajena comeciaina lloñnedimaci. Jiaie comini joreña ñaitimaci. Cai ññaena bitimaci. ⁵ Uai uaitatimaci, naimaci comeciai marañeno illa jira. Uanaicinona jai uiñoñedimaci. “Cristo uai llumona, ailluena ucubena oiticai” raillanomo comeciaina facadimaci. “Iemona caimare iiticai” raillanomo comeciaina facadimaci. ⁶ Ie iadedi iese iñede. Cristona eo raise cai ñnuamona, caimo diese ite ra diga caimare iticai.

⁷ Cai jeicia, jaca buenidicai. Cai fiodailla mei, cai rana uiñeiticai. Cai radi benomo fiebicaite. ⁸ Ie jirari, cai guille ia, cai iniroi ia, caimare bene cai illa. ⁹ Eo ucuberedinona jaiacadinona Taife eo ramo faite. Taife uaina ñnuanona ucube ollena, ucuberedinona jaiacadinodi diga marañede rafuena finodimaci. Ja muidomo imaci abi faifitimaci.

¹⁰ Ucubena ebiruillanona, ucuberedinona jaiacadinona naga jeacinona finocabidimaci. Ucube ollena, dajerie Cristona jai fainonocaidimaci. Ie muidona eo duere sefuidimaci.

Jusiñamui uaina ñnocana jai

¹¹ Ero, Timoteo, odi Jusiñamui fetocamiedio. Nana cue como lloga rafuemona oni eneno o i. Mare rafuedo o jai. Jusiñamui jitaille rafuena finocana o jai. Jesucristona ñnocana o jai. Jiaie cominina isirui. Mare rafue ñbeimo o comecina jone. Riicinado cominina llofueñeno. ¹² Jeacino ñbeimo o iñellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca illena. Navui diga cominimo Jesucristona o ñnuana marefodo llotio. ¹³ Ie isoide Jesucristo. Poncio Pilato ñne jaie naimie itemo, marefodo: “Imiedicue” llote. Jusiñamuidi nana rana cajetade. Naimie caina jaca ciode. Jesucristo caina jiai jaca ciode. Ie jira uanaicinona omo lloticue.

¹⁴ Cai Nama Jesucristo ña abido biñenia, nana omo cue llogacinuai ñno. Jearede rafuena ññoñeno, jiaie comini ñaie llogacinuaina uaitañellena. ¹⁵ Naimie jitailirui Jusiñamuidi eniruemo Jesucristona dane oretaita. Jusiñamuidi maremie. Nanocamie. Cai nanoca cai moto illaïma. Cai nanoca Nama. ¹⁶ Da jaca naimie fiodañeite. Eo isire lligaiñote ra ñnomo naimie ite. Nainomo jaca bu iairei rinide. Bu naimiena jaca cionide. Naimiedi jaca siñonasa. Naimiemo iobillacinona jaca cai fecacabillasa. Iena jitaïdicue.

¹⁷ Eo ucuberedinomo llono: “Abina iedoñeno. Ucubedi fuirede. Ie jira ucubena uamo ocuirñeno; iadedi Jusiñamuimo ocuiri”. Cai comeciai jaisillena, naimiedi caimo rana eo raise fecacabide. ¹⁸ Ucuberedinomo jiai llono: “Omoï ucube diga mare rafuena fino. Jiaie cominimo ucubena caidiñeno fecajana cano”. ¹⁹ Ie muidona iese naimaci ññoia, monamo naimaci isiruiga rana iite, jiaïruido iena. Iese naimaci jai, jaca itatajacinona marena raise ua uiñoitimaci.

Fuiduacino

²⁰ Timoteo, cue omo llogacinona fañeno raise uuiicai. Jamai rafuemo cacarefiñeno. “Uanaicinona eo uiñoticai” dajerie raitimaci; iadedi uiñoñedimaci. Naimaci ññaïna cacarefiñeno. ²¹ Dajerie iena cacajano, Cristona ña uiñoñedimaci. Jusiñamui ona duenaïllasa. Jaca ñnori omo rafuena lloticue. Mai. Pablodicue.

TIMOTEOMO PABLO IE EMODOMO ORETAGA RABE

Uaiduacino

¹⁻² Timoteo, carta omo dane cueticue. ¿Nigacino? ¿Nie isoidio? Pablodicue. Jusiñamui cuena jitailla jira, Cristo Jesús oretagamiedicue. Cominimo jaca itatajacinona llorena, cuena oretate. Cristo Jesús cai ñinuamona, naimie diga jaca ititicaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uñocana mai o jai. Ona jai uri itatatiamaiaí. Iena uñocana mai o jai.

Jusiñamuimo iobillacinona fecade

³ Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jiaí, o facaisena iobillacinona fecadicue. ⁴ Cue comeci caimareficaillena, ona eo cioacadicue. Navui cue o facadoia, o eiana comeciticue. ⁵ Cristo Jesús o ñinuana dane jiaí comeciticue. O usuño Loidadi ñnote. O ei Eunicedi jiaí ñnote. Ie mei ñnotio. Naimiena o ñinuana jai uñoticue.

⁶ Ie jira o comecina dane ocuiño, Jusiñamui uai o llofuellena. Cue onolli o ifogimo navui joneticue, ona fetollena, naimie uaina o llorena. Jusiñamuimona o baitajacinona naie facaiseconi feiñotio. ⁷ Jusiñamuidi cominina o jaciruillana jitañede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade. ⁸ Ie jira cai Nama rafuena o llua meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefua, rairuioicañeno i. Jusiñamui o comecina ocuiñotaite. ⁹ Naimie isoi cai marena illena, caina fetuano, jeacinomona caina jillotate. Cai finoca rafue muidona caina jillotañede; iadedi naimie jitailla jira, caina jillotate. Enirue nia finoñena facaiseconi caina jaie duenaite. Cristo Jesús caina iena jai uñotade. ¹⁰ Cai Jilloitaraimadi Cristo Jesús. Caimo Jesús jai bairia jira, Jusiñamui caina duenaillana jai uñoticaí. Fiodaillamona naimie jai jillode. Iemona jiaí jilloiticaí. Naimie mare rafuemona naimie caina Jusiñamui ñibeimo jaca illacinona jai uñotade. ¹¹ Bie rafuena llorena, cuena fetode. Cuena oretaja jira, biena llofueticue. ¹² Ie jira duere sefuidicue; iadedi cue illana meiruiñedicue. Cue ñnogamiena cue uñua jira, naimie bille ñinori naimiedi nana cuemo naimie jai iga rafuena cue llofuellena, cuena raise eenoite. ¹³ Cue llua isoi o i. Uanaicinona lloticue. Cristo Jesús ñnocana o jai. Jiaie cominina isiruicana o jai, Cristo Jesús o jainaiaílla jira. ¹⁴ Jusiñamui Joreño caimo illa jira, omo naimie lloga uanaicinona fainonocañeno uuiucaí. Uanaicinona o fainonocañellena, naimie ona canoite.

¹⁵ Diga Asiamo ite cominidi cuena fainonocaidimaci. Naimacimona Figelo cuena fainonocaide. Hermógenes cuena jiaí fainonocaide. ¹⁶ Onesíforo daje isoiñede. Diga icañño naimie cue comecina ocuiñotade. Cuena meiruiñede. Cai Namadi Onesíforo jofomo itino duenaillasa. ¹⁷ Romamo Onesíforo navui ria, cuena isire jenuano, cuena baite. ¹⁸ Efesomo jaie cue ia, naimie cuena jiaí canode. Iena raise uñotio. Cai Nama ico abido bia, cai Namamona naimie iba feiñuana jitaídicue.

2

O maijia rafuena raise fuido

¹ Cuena fainonocaidino isoi ñeno; iadedi cue jito, Cristo Jesús ona canuano, Cristo ñibeimo o comecina ocuiñocana jai. ² Diga cominimo cue llua navui cacadio. O uaina ñnotinomo cue llua llono, iena jiaie cominina naimaci llofuellena. ³ Cristo Jesús rafue muidona duere o sefua, rairuioicañeno i. Cai Nama rafuena o riiduamona, naimie soldado isoidio. ⁴ Ie illaíma uai naimie ñinoiacania, soldadodi soldadoñede rafuena maijiaicañena. Ie illaíma iobitallena, ie illaíma ocuica rafuena finoacanite. Ie isoide. Da Cristo Jesús rafuena o fino, naimiena iobitallena. ⁵ Reglamientos llua isoi naimie raise jifanoñenia, jifanoraimadi bué isoide rana cioñede. Ie isoide. Ibaña o feiñollena

monamo o jaia, Cristo Jesús lludo raise o jai. ⁶ Illimo duere maijiraímadí maijia jira, naiemona naie guiledí oga. Ie isoide. Duere o maiji, ibana feñollena. ⁷ Cue llamo o começina facacabi. Cai Nama ona canoite, iena uiñollena.

⁸ Jesucristo fiodaillamona jillode. Iena começi. Naimie usumadi David micori. Jesucristona cue llua jira, ⁹ maraiñedimie isoi cárcolmo duere jai sefuidicue; iadedí Jesucristo rafue nia llocana jaide. ¹⁰ Ie jira Jusiñamui fetocano facaina duere sefuidicue, Cristo Jesúna naimaci ñnuamona naimaci jilloillena, monamo naimaci jaca illena. ¹¹ Bie llucacínodi uanaicino:

Naimie díbeimo cai jaillamona, naimie díga jaca iitícaí.

¹² Naimie muidona cai duere sefua, naimie díga iitícaí, ie comínina naimie sedalle facaiseconi.

Naimiena cai janoia, naimie caína jiaí janoite.

¹³ Naimie raise cai ñnoñena, naimie uai meidoñena muidona, naimiedí nia ñnogamie.

Timoteo illa rafue

¹⁴ O comínimo buena dane llono, iena começillena. Jusiñamui facaina naimacimo llono: Uaina jamai uaitañeno, mare rafuena naicinomona comuiñena jira, naicinona cacadino começiaina maretañena jira. ¹⁵ Marena maiji, Jusiñamui ori iobillena. O meiruiñellena, naimie o maijia jibua, marena maiji. Uanaicino o uiñuamona, naimie uaina marena raise llofue. ¹⁶ Jamai ñaña cacarefiñeno. Comini jamai ñainoicaia, Jusiñamui jitailla rafuena finocana jaiñedimaci. ¹⁷ Díga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiaí jaide. ¹⁸ Uanaicinona fainonocaidiaímaiaí. Coco ñnua isoi, llofueñediaímaiaí. “Cai fiodaia, cai abi ico jilloñeite” llofuetiaímaiaí. “Cristona cai ñnua facaise jai jillodícaí. Cai fiodaia, cai joreño jaca iite” llofuetiaímaiaí; iadedí cai abi ico jillollena ñnoñediaímaiaí. ¹⁹ Ie ia Jusiñamui comini jaca ñnocana jaidimaci. Ie comínimo Moisés micori jaie llamona, iaímaiaí finoca rafuena jiaí ñaite: “Jusiñamuidí ie comínina uiñote. ‘Jusiñamuina ñnoticue’ raitimiedí maraiñede rafuemona eneno illasa” llote. Ie jira iaímaiaímona eneno o i.

²⁰ Ero, ucuberedimie jofomo díga guillirue joneuilla ra jai ite. Eo jitairede rana jai ite. Janore jitairede rana jiaí jai ite. ²¹ Ie isoide. Jusiñamui díbeimo itinomona naga isoide comini ite; iadedí jeacinomona eneno bu ia, Jusiñamui naimiena fetote, ie eo jitaill rafuena finollena. Jusiñamui díbeimo raise maijíte. ²² Ie jira conirueni começiaí jitailla maraiñede rafuemona eneno o i. Marena i, Jusiñamui jitailla isoi. Jesucristona ñnocana jai. Nana comínina isirui. Uri i. Mare começiámona nana cai Namana sedadino díga iese i. ²³ Jamai ebena rafuemo ñeno. Naiemona icirillacínodi comuide. Iena uiñotio. ²⁴ Jusiñamui facaina llofueraímadí raire iciríñena. Nana comínina nabairilla. Marena fecuise llofuega. Rícaíñena. ²⁵ Naimie uaina jitaíñedinona fecuise llofuega. Ie mei Jusiñamui naimaci começiaí iuaina nibai meidotaite, uanaicino díbeina uiñollena. ²⁶ Ie mei abi uiñuanona, Taife anamona jilloitímaci. Taifedí naimacína ie anamo jai itatate.

3

Jusiñamui díbeimo ñnedinomona abina rairui

¹ Bie llucacínomo começina raise faca. Jesucristo abido bille facaise iaírei ia, creyentena illena eo sefuirenite. ² Naie facaiseconi comini daní imaci abina isiruitímaci. Ucubena ollena eo nicidoitímaci. Abina iedoitímaci. Abina biriitímaci. Jusiñamuina eo jeare ñaitímaci. Naimaci moo uaina, naimaci ei uaina ñnoñeitímaci. Jiaie comínimo iobillacínona jaca fecañeitímaci. Jusiñamuina jaca jitaíñeitímaci. ³ Jiaie comínina duenaíñeitímaci. Começiaina jaiaírenitímaci. Jiaie comini joreñona eo jeare ñaitímaci. Naimaci começiaina eenoñeitímaci. Ebe isoi naga rana duere finoitímaci. Mare rafuena jitaíñeitímaci. ⁴ Naimaci nabaiñaína janoñeitímaci. Jiaie comínimo começiaina facañeitímaci. Eo abina iedoitímaci. Naimaci começiaí jitailla rafuena finoacanitímaci. Jusiñamui rafuena isiruiñeitímaci. ⁵ “Jusiñamuina sedadícaí” raitímaci; iadedí Jusiñamui uaina jamaitímaci. Bie isoide comini díga nabairíñeno. ⁶ Naimacimona dajerie jiaie

jofuemo macaritimaci, naie jofuemo ite riñoniaina jifuianona llofuellena. Diga jearede rafuena finuano, naie riñoniai ebena itimaci. Naimaci comeciai iuaillai raire meidocana uitimaci. ⁷ Naga lloraima llamo naiñaiñuai cacareidimaci; iadedi uanaicinona jaca uiñoñedimaci. ⁸ Naimaci comeciai eo maraiñede. Jusiñamui uaina iñoñedimaci. Jannes, Mambres diga, Moisés micori lloga uai jaie uaitatíaimaiai. Ie isoi bie comini uanaicinona birui jiai jitaiñedimaci. ⁹ Nana comini naimaci rafue jamai ebe isoi finoca rafue uiñuamona, Jannes iaimaiai Mambres rafue jaie fuilla isoi, naimaci rafue raire fuite.

Timoteo uanaicinona iñuanona jailla

¹⁰ Timoteo, cuena uiñotio. Cue llofuiana uiñotio. Cue illana uiñotio. Cue jitailla rafuena uiñotio. Cristona cue iñuana uiñotio. Iciríño fecuise lloticue. Cominina isiruiticue. Duere cue sefui, cue comecina ocuiñoticue. Iena uiñotio. ¹¹ Antioquíamo, Iconiomo, Listramo cuena duere finodimaci. Duere sefuidicue; iadedi nana naiemona cue Nama cuena jillobitade. ¹² Jusiñamui jitailla rafuena finuano, Cristo Jesús uaido jaidinodi duere sefuitimaci. ¹³ Ie facaiseconi maraiñedinodi maraiñede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci; ¹⁴ iadedi cue llofui uaido iñocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie iñotio. ¹⁵ O uruenamona Jusiñamuina mare ciegafuiaina cacadio. Naie ciegafuiiai cai jilluana caimo llote. Cristo Jesúna cai iñuamona, jillobidicai. Iena caimo jai llote. ¹⁶ Comini nana naie ciegafuiaina cuetimaci; iadedi Jusiñamui jitailla isoi, naga cuetimie cuete. Ie jira nana naie ciegafuiiai Jusiñamuimona ite. Cominimona iñede. Ie jira naie ciegafuiaimona uanaicinona uiñoticai. Cai maraiñedicinona caimo llote. Cai comeciai marena illena, Jusiñamui jitailla isoi, caimo llote. ¹⁷ Iese llote, naimiemo cai duillamona, nana Jusiñamui rafuena cai raise uiñollena. Raise uiñuamona, Jusiñamui rafuena raise llofuereniticai. Naga Jusiñamui jitailla rafuena jiai raise finoreniticai.

4

¹ Jiáiruido Cristo Jesúsdi illaimana eniruemo abido biite. Illaima isoi ie cominina sedajite. Naimiena iñoñenamona nia cajedinona duere finoite. Jai fioidaitinona jillotajanona, naimiena iñoñenamona, naimacina duere finoite. Jusiñamuidi birui caina jaca ciode. Cristo Jesús birui caina jaca ciode. Iena cue uiñuamona, bie uai omo lloiticue. ² Naimiena iñoñedinona Cristo duere finoñellena, naimie rafuena naimacimo jaca llono. Comini o dafaifia, comini ofia, comini o dine ria, naimacimo iena lloitiosa. Naimaci jitaia, llono. Jitaiñenia, jiai llono. Jeacinona bu finoia, naimacimo llono. Marena naimaci illena, naimacimo llono. Fecuise jaca llofue. ³ Jiáiruido dajerie uanaicinona jitaiñeitimaci. Jiaifuena jitaitimaci. Naimacimo dani naimaci cacaacana rafuena llollena, diga llofuerainina jenoitimaci. ⁴ Uanaicinona fainonocaida, iñgaiiai icinuaido facajitimaci. ⁵ Timoteo, o comecina eeno. Duere o sefui, rairuioicaiñeno i. Jesucristo rafuena llocana o jai. O llofuiacinona marena fuido.

⁶ Jai iairei ite cue meinellirui. ⁷ Cai Nama rafuena llocana cue jaillano, iena marena jai riidoticue. Cue illa dinori jai fuiacade. Cai Namana fainonocaiñedicue. ⁸ Cai Namamona marena cue illa jira, monamo ibana feiñoiticue. Iemo jai ocuridicue. Iena cai Nama cuejena eenote. Naimie abido billiruimo iena feiñoiticue. Caína raise uiñuamona, dama cuemo fecañeite; iadedi nana naimie abido billena jitaidinomo ibana jiai fecaite.

Pablo damierena ñaia rafue

⁹ Timoteo, raire cue dine bi. ¹⁰ Biniemo ite rafuena Demasdi eo ebiruilla jira, Tesalónicamo naimie jaillano, cuena fainonocaide. Galaciamo Crescentedi jai jaide. Dalmaciamo Tito jai jaide. ¹¹ Dama Lucas cue diga ite. Marcos o diga ati. Cuena canollena, naimiena jitaidicue. ¹² Efesomo Tíquicono oredicue. ¹³ O bia, cue fiebide iniroina ati. Troasmo Carpio jofomo fiebide. Cue libros ati, cue rabiai diga. ¹⁴ Alejandro raillamie navui cuena jeare finode. Naimiedi lloemona rana finoraima. Cai Nama naimiemo iba oite. ¹⁵ Naimiemona o abi rairui. Naimie cue lluna eo jitaiñede. Iena uaitate.

¹⁶ Illaicomini dine cue rafue nano cue riidoia, jaca buna cue facaina riidoñede. Nana cuena fainonocaidimaci. Jusiñamuidi naimacimo iba uana jitaiñedicue. ¹⁷ Cai Nama cue facaina ite. Cue comecina ocuiñotade, nana judúuaiñedinomo naimie uai raise cue llollena. Naimie muidona cue fiodaisaillanomona jillobidicue. ¹⁸ Cai Nama naga maraiñede rafuemona cuena eenoite, monamo ie cominina sedajanomo cue raise rillena. Iobillacino naimiemo jaca fecacabillasa. Iena jitaidicue.

Fuiduacino

¹⁹ Diga cominimo cue uai oredicue: Priscamo, Aquilamo, Onesíforo jofomo itinomo. ²⁰ Corintomo Erasto fiebide. Miletomo Trófimo duide fainonocaidicue. ²¹ Rollime nia iñenia, cue dine bi. Diga comini omo naimaci uai oredimaci: Eubulo, Pudente, Lino, Claudia, ua nana creyentiai.

²² Cai Nama o comeci ocuiñotajasa. Naimie nana omoina duenaillasa. Mai. Pablodicue.

TITOMO PABLO ORETAGA RABE

Uaiduacino

¹ Tito, omo cartana oretaiacadicue. ¿Nigacino? ¿Nie isoidio? Pablodicue. Naimie cominina cue illamona, naimie jitailla rafuena cue finuamona, Jusiñamui anamo llofuecabiticue. Ie rafuena llofuellena, Jesucristo ie oretagamiedicue. Jusiñamui fetocanona ñnotallena, naimacina uanaicinona uiñotallena, Jusiñamuina naimaci raise sedallena, cuena oretate. ² Naimie diga jaca cai illemo cai ocuirilla jira, Jusiñamuina sedadicaí. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede. ³ Iemei naimie jitaillarui caina ie rafuena jai uiñotade. Naie rafuena cue llollena, naimie cuena oretate. Naimiedi cai Jilloitaraima. ⁴ Tito, bie carta omo cueticue. Cue isoi o ñnua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaí ona jai duenaitiaimaiaí. Iena uiñocana mai o jai. Ona uri jai itatatiiaimaiaí. Iena uiñocana mai o jai.

Creyentiaína sedaraini illacinuai

⁵ Nainomo ite rafue o fuidollena, Creta railla uiasimo ona fainonocadicue. Creyentiaína sedallena, naga nairai illanomo llofuerainina o fetuana navui omo lloticue. ⁶ Creyentiaína llofuerainina o fetoia, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruai creyentiaína itimie. Nana comini naimie uruai mare raillamie. Naimie uruai ie uaina ñnotimie. ⁷ Jusiñamui facaina naimie maijia jira, creyentiaí sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena. ⁸ Ie jofomo cominina raise feñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua. ⁹ Naie uai raise llofuiamona comini comeciaina ocuiñotallena, naimie uaina uaitatinona llicaitallena, cai llofui isoi uanaicinona ñnocana naimie jailla.

¹⁰ Ie isoidinona feto, ailluena comini Cristo rafuena raise ñnoñena jira. Tainocinuaina ñaicabitimaci. Cominina jifuecabitimaci. Judúuai creyentiaímona diga comini iese itimaci. ¹¹ Ie jira naimacina llicaita. Naimacidi diga cominina uri itatañedimaci. Uanañedicinona llofuetimaci, ucube bifuiano ollena. ¹² Naimacimona comini rafuena lloraima navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillaredimaci. Rairaiñedimaci” raite. ¹³ Naimiedi uanaicinona llote. Ie jira creyentiaímo riire llono, naimaci Jusiñamui uaina raise ñnollesa. ¹⁴ Judúuai ñgáiaína naimaci ñnoñellena, comini lletarafuena naimaci ñnoñellena, naimacimo riire llono. Damierie uanaicinona jitaiñedimaci. ¹⁵ Ero, mareuidinomona naga ra mare. Jusiñamuina ñnoñedinomona naga ra jearede. Naimaci comeciadi jai jearena jira, jeagerie comeciaina facacabidimaci. ¹⁶ “Jusiñamuina uiñoticaí” raitimaci; iadedi Jusiñamuina uiñoñedimaci. Naimaci finoca rafuemona iena uiñoticaí. Jusiñamui naimacina eo gañede. Buena ñnoñedimaci. Ie jira mare rafuena finuana uiñoñedimaci.

2

Creyentiaí marena illena, uanaicinona llofue

¹ Tito, Jusiñamuina ñnoñedino isoi iñeno. Odi uanaicino llofue, naimaci marena raise illana uiñollena. ² Uaicimaiaína llofue. Canamacina jiaí llofue: Jifaiñeno. ñnogamiena jai. Uairico isoi iñeno. Jusiñamui uaina raise ñno. Omoi ecimo itinona isirui. Duere omoi sefua, omoi comeciaina ocuiño. ³ Uaicinuaina llofue. Cañaiñuaina iese jiaí llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeñaiñuái mare rafuedo jaitimaci. ⁴ Naiñaiñuái ñina isiruillena, naiñaiñuái uruiaina jiaí isiruillena, ⁵ uairico isoi iñellena, jearede rafuena finoñellena, jofomo raise maijillena, cominina duenaillena, naiñaiñuái ñniñiaí uaina ñnollesa, jiaie comini Jusiñamui uaina jamaiñellena, naie cañaiñuaimona fueoitimaci.

⁶ Einamacimo llono. Coniruenimo jiai llono: Ieñede ramo omoi comeciaina facañeno. Uairico isoi iñeno. ⁷ Tito, naga rafue o finua diese, mare rafuedo o jai. O llofua, uanaicinona llono. Jamai ebe isoi llofueño. ⁸ Marena llofue. Marena o llofua, ¿niese comini o uai uaitaitimaci? Uaitañeitimaci. Iemei o díbeimo iñedino meidaitimaci, caimo jearede rafue iñenia. Ie jira cairi ñañeitimaci. ⁹ Patrón anamo itinomo iese llono: Omoi patrón uaina iino. Naimie jitailla rafuena raise fino. Naimie uaina oñeno. ¹⁰ Rana fiiñeno. Naimie raruiái raise seda. Iese naimaci ia, naimaci raise maijiia, naimaci patrón: “Jusiñamui uai mare” raite. Jusiñamuidi cai Jilloitaraíma.

¹¹ Jusiñamui caina duenaillana jai cai uiñua jira, naicinona llofue. Naimiedi nana cominina jillotaiacade. ¹² Naimie uai caimo llote: “Cue díbeimo iñede rafuena eneno fainonocai. Maraiñede rafuena jitaíño. Uairico isoi iñeno. Omoi ecimo itinomo, jiaie cominimo taino lloño. Naimaci rana fiiñeno. Jusiñamui uaina iñocana jai”. Iese cai illana Jusiñamui birui jitaide. ¹³ Jiai caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiai cai Jilloitaraíma”. ¹⁴ Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. ¹⁵ Naie rafuena llofue. Maraiñede rafue comini finoia, naimacimo llono. Illaíma uai isoi llono. Cominidi o uaina jamaiñellena, raise llofue.

3

Creventiaí illacinuai

¹ “Omoi illaicomini uai anamo i” creventiaímo dane llono. Omoi illaicomini llucinona iino. Mare maijille ia, iena raise fino. ² Jiaie cominina jeare ñañeno. Fuiñeno. Fecuisse uiuicai. Nana comini diga marena ñaino. ³ Jaie cai jiai ebe isoidicai. Jusiñamuina iñoñedicai. Taife caina jifuate. Dani cai comeciái jitaillacino railla isoi finouidicai. Diga ie jearede rafuena finouidicai. Jiaie cominina jeare finouidicai. Marairainidicai. Abina uradoisoidicai. Cominidi caina enoisoidimaci. Coninina jiai enoisoidicai. ⁴ Ie ia Jusiñamuidi maremienana jai fididicai. Naimie caina isiruillana jiai fididicai. ⁵ Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie díbeimo cai comeciaina dobaíñoticaí. Jusiñamui Joreño cai comeciaina marena finode. ⁶ Ie Joreño caimo raise fecade, Jesucristo finua muidona. Jesucristo cai Jilloitaraíma. ⁷ Ie jira naimiemona marebicaidicai. Caina duenaillamona, marebicaidicai. Caina ie cominina itatate. Iemona naimie diga jaca illemo ocuridicai.

⁸ Tito, cue llucinodi uanaicino. Jusiñamuina iñotino marena maijillena, cue llucinona llo-llocai. Cue llucino mare. Ie jira nana cominidi iena cacacabillasa. ⁹ Ebena ñañeno. Omoi usumatiaí mameciaina jamai sia-siadoño. Moisés micori llogacinuaina uaitañeno. Naicino diga buena oñedicai, Jusiñamui jitaillacinona cai finollena. ¹⁰ Roracomo comini comeci jiaifocaitatimie ia, naimiemo llono: “Iena finoño”. Dacaiño o llumona naimie iñoñenia, dane llono. Ie mei iñoñenia, naimie diga omoi ñañeno. Naimie diga omoi nabairiño. ¹¹ Uanaicínodo naimie jai jaiacaiñede. Jeacinona jai finode. Naimie iena jai uiñote.

Fuiduacino

¹² Artemas o dine cue oretaia, Tíquico o dine cue oretaia, Nicópolis railla nairaímo are sedaño raire bi. Nainomo rollime facaiseconi cue comeci illana jitaide. ¹³ Zenas railla abogado Apolos iaímaiaí diga cano, iaímaiaí oni jaiacana jira. Iaímaiaí jitaile rana fecá. ¹⁴ Dueredino ia, naimacina canollena, creventiaímo: “Marena maiji” jiai llono. Naimaci jamai iñellena, iese llono.

¹⁵ Cue diga itino naimaci uaina omo oredimaci. Jesucristona cai iñua jira, caina isiruitinomo cue uaina llono. Jusiñamui nana omoína duenaillana uiñocana omoi jaillana jitaídicue. Mai. Pablodícue.

FILEMÓMO PABLO ORETAGA RABE

Filemómo Pablodi carta orede

¹ Filemón, bie carta o dine oredicue. ¿Nie isoidio? Pablodicue. Jesucristo rafue cue lluamona, cárcelmo iticue. O dine cue uai oredicue. Timoteo cue diga ite. Ie uai jiai orede. Cai Moo Jusiñamuimo jai cai jainaiaila jira, naimiedi coco ama. Coco diga Cristo facaina o maijia jira, ona isiruiticoco. ² Coco uaina Apiamo jiai oredicoco. Cristo díbeimo naiñaiño illamona, naiñaiñodi coco miriño. Coco uaina Arquipomo jiai oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiai oredicoco. ³ Cai Moo Jusiñamui, cai Nama Jesucristo diga, omoína jai duenaite. Iena mai uiñocana omoï jai. Iaimaiaï omoína uri jai itatate. Iena omoï uiñocana mai omoï jai.

Filemón Cristona ñinocana jaide

⁴ Jusiñamui diga cue ñaia, o facaina cue jiia, naimiemo iobillacinona fecadicue. Mare rafuena o finuana cue fidia jira, naimiemo iobillacinona fecadicue. ⁵ Cai Nama Jesúna ñinocana o jaillana fididicue. Nana creyentiaina o isiruillana jiai fididicue. ⁶ Cristo díbeimo cai illa muidona, naimiemono diga marecinona feiñoticaï. Cristona o ñnuamona, jiaie creyentiaina o nabaia, omona naie marecinona uiñoitimaci. Naga mare ra uiñocana naimaci jaillana jitaidicue. ⁷ Cue ama, creyentiaina o isiruilla jira, iobidicue. O muidona creyentiaï comeciï caimare uri illa jira, cue comeci iocire ite.

Onésimo facaina Pablo ñaite

⁸ Cue comeci iocire ite; iadedi daje rafuena o diga ñaiacadicue. Cristo uai cuemo illamona ñaiñeiticue; ⁹ iadedi conima coco isiruilla jira, o diga ñaiticue. Jai uaicimadicue. Jesucristo rafuena cue llua muidona, cárcelmona jai ñaiticue. ¹⁰ Onésimo facaina ñaiacadicue. Cárcelmo cue illa facaiseconi, cue muidona Cristona naimie ñnua jira, naimie cue jitona jaide. ¹¹ Omo naimiedi marañede rafue navui finode. O mullaïma naimie illanona, raise maijiñede. Bene aiamona, Cristona naimie ñnote. Cueno birui eo canode; iadedi birui o diga raise iacade. ¹² O dine naimiena abido oretaiticue. Dama naimiena oretañeiticue; iadedi naimiena cue eo isiruillamona cue comeciña jiai oretaiticue. ¹³ O facaina naimie cuena birui canode. Cue diga naimie fiebillana jitaidicue; ¹⁴ iadedi: “Jee” o nia raiñena jira, iese finoñeiticue. Iena omo jicañeiticue. Omo cue jicanuamona buena o finuana jitaiñedicue; iadedi dama o comeci jitailla jira, mare rafuena o finuana jitaidicue. ¹⁵⁻¹⁶ O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruiticue. O dine naimie jaca abido illena, o ñnena janorena facaise cue dine navui bite. Naimiedi o mullaïma; ia naimiedi jiai birui o ama. Naimiena isiruillanona feiño. ¹⁷ O nabaina iticuena cuena o feiñua isoi, naimiena feiño. ¹⁸ Naimie marañede rafuena omo navui finode. Omo naimie nia debia, cue facaina jone. ¹⁹ Iena ibaiticue. Bie carta dama cue cuiamona, naimie debiana cue ibajana uiñotio. Omo eo lloñeiticue; iadedi cue muidona Cristona o ñnua jira, ailluena cuemo debedio. ²⁰ Cue ama, coco Nama Cristomo coco jainaiaila jira, cue jitailla rafuena fino. Ie mei cue comeci uri iite. ²¹ Cue jitailla rafue o finollena uiñoticue. Cue jitailla rafue baifemo o finollena uiñoticue. ²² Jiaie rafuena lloiacadicue. O jofomo daje cuarto cuejena fino. Cue facaina o jiia, Jusiñamui jitaia, o dine jaiticue.

Damierie imaci uaina jiai orede

²³ Omo Epafraſ ie uaina orede. Jesucristo rafue llua muidona, cárcelmo cue diga naimie ite. ²⁴ Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide. ²⁵ Cai Nama Jesucristo nana omoï creyentiaï comeciaina ocuiñotajamona omoína duenaillasa. Mai. Macaibaite. Pablodicue.

HEBREOS COMINIMO ORETAGA RABE

Jesucristo rafuena jai cai cacajamona, Jusiñamuiña jai uiñoticaí

¹ Jusiñamuidi caina ie rafuena jai uiñotade. Iena omoimo ja lloiticue. Cai jaiagai micoriaimo Jusiñamuidi ie rafuena llote. Naimacimo ie rafuena lollena, jiaicaiño ie jaienisaina orede. Jiaicaiño nicai anado Jusiñamui ie rafuena llote. Iena lollena, jiaicaiño ie facaina lloraini micoriaina orede; ² iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uiñoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jiai finode. Jusiñamuidi nana ra, nana comini diga ie Jito anamo ico illena jai llote. ³ Ie Jito uaido nana naie rana finocana uite. Naimie muidona Jusiñamui marena ebirenana uiñoticaí. Jusiñamui marena naimie illa isoi, naimiemona Jusiñamuina uiñoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

Jusiñamui Jito Jusiñamui jaienisai baifemo faite

⁴ Jusiñamui Jitona naimie illamona, naimie illano Jusiñamui jaienisai illano baifemo faite. Ie illanomona naimie Jusiñamui jaienisai baifemo faiana uiñoticaí. ⁵ Jusiñamuidi: “Cue Jitodio” Cristomo llote; iadedi ie jaienisaimo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisai ie Jito baifemo fañena jira, ie jaienisaimo iena jaca lloñede. ⁶ Ie dajede Jito eniruemo oretaja facaiseconi Jusiñamui llote:

Nana cue jaienisai naimiemo iobillacinona fecaja;

⁷ iadedi jiaie rafuedo ie jaienisaina ñaite:

Cue ocuilla rafuena naimaci finollena, cue ocuilla diese naimacina oretacabiticue.

⁸ Ie Jitona ñañanona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

⁹ Mare rafue finuana jitaidio.

Maraiñedicinona finuana jitaiñedio.

Ie jira ona caimare jai itataticue.

Monamo o abido billanona, cue jaienisai baifemo ona caimare itataticue

raite. ¹⁰ Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie finodio.

Mona jiai finodio.

¹¹ Bie eniruedi mona diga ico fuite.

ñiroi fuilla isoi, iñeite;

iadedi odi jaca iitio.

¹² Eniruena mona diga meidotaitio;

iadedi odi jaca daje isoitio.

Jaca iitio

raite. ¹³ Ie Jitomo buena llote; ia ie jaienisaimona damiemo iese lloñede. Ie Jitomo llote:

Illaimana o illamona, cue nabei ñine ana raí.

Nana o ñibeimo iñedinona o anamo itataticue.

¹⁴ Ie jaienisaimo iena lloñede; iadedi naimacina oretacabite, ie Jitona ñnotinona canolena. Ie jira nana naiemona, ie Jito ie jaienisai baifemo faiana uiñoticaí.

2

Jusiñamui caina jillotaja rafuena cai jamaiñena

¹ Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai ñnuasa. ²⁻³ Ero,

Jusiñamui ie jaienisaia jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise iñoñenia, Jusiñamui naimiena eo duere finode. Jusiñamui jaienisaia lloga rafue mare; iadedi Cristo birui lloga rafue jaienisaia jaie lloga rafue baifemo faia jira, Cristo rafuena cai iñoñenia, Jusiñamui caina duere finollemona ua jilloñeiticaia. Ero, naimie cai jeacinomona caina jillotaiafade. Naie rafuena cai jamaia, iena cai iñoñenia, naimie caina duere finollemona ua jilloñeiticaia. Cai Nama Cristo naie rafuena jaie llote. Naimiena cacadinodi caimo iena jai llotimaci. Cristo rafuedi uanaicinona llotimaci. ⁴ Jusiñamui uai diga jiaifriede siño rafuena naimaci finuamona, Cristo rafuedi uanaicinona uiñoticaia. Naimie jitailla diese naga creyentemo Jusiñamuidi ie uaina itatate. Naga creyentemo naie uai illamona, Cristo rafuedi uanaicinona uiñoticaia. Ie jira naie rafuena cai iñuasa.

Cai isoi illena, Jesucristo iimana jaide

⁵ Jusiñamuidi ie jaienisaia oretauide, ie jitailla rafuena naimaci finollena; iadedi naimaci anamo comini ico illena jaca lloñede. Cristo anamo comini ico illena llote.

⁶ Jusiñamuimo David micori iena jaie llote:

Cai jamaia bue isoidicaia; iadedi caimo comequina facadio.

Jamaia cominidicaia; iadedi caina canodio.

⁷ Caina cominina o finua jira, o jaienisaia isoi iñedicaia.

Fiodaiñedimaci; iadedi nana enirue rana o finuanona, Adán micori anamo iena jaie o itataja jira, caina eo iobitadio.

⁸ Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micori jaie finua jira. ⁹ Jesús dane lloiticue. Naimiena uiñoticaia. Eniruemo naimie jaie billamona, Jusiñamui ecimona naimie billa jira, Jusiñamui jaienisaia illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiena Jusiñamui abido itatajamona, Jusiñamui naimiena iobitade. ¹⁰ Jusiñamui nana rana finode. Nana cominina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui cominina jaidicaia. Naimie illanomo ico iiticaia. Naimie jitailla jira, ie Jito duere sefuillanona fiodaite. Duere sefuillana ie Jito jai uiñuamona, naimiena iñotinodicaia jai raise canorede. ¹¹ Naimie fiodaillamona marebicaidicaia. Naimie dibeimo jai cai illa jira, daajena mooredicaia. Ie jira naimiedi: “Cue cominidomoi” caina meiruiñeno llote. ¹² Jusiñamui facaina lloraini micoriaia llogacinomona naie rafue uanaicinona uiñoticaia. Jesús ie ico finolle rafuena jaie llotimaci:

Ie cominimo ie Moo rafuena lloite.

Ie comini diga naimie ofia, daajena Jusiñamuimo roitimaci

jaie llotimaci. ¹³ Jesús dane ñaitimaci:

Ie comini diga naimiedi Jusiñamuina iñocana jaite.

Jusiñamui cominina damerie jailla jira, naimacidi jiaia naimie comini ñaitimaci. Naimaci ñaia isoi, Jusiñamui cominina birui jaidicaia. ¹⁴ Jusiñamuina iñotinodi cominina jira, cai isoi naimie illena, Jesús dane comena jaide. Cai fiodailla isoi, naimie jiaia fiodaite. Taife uaina cai iñoia, jeacino finodicaia. Iemona fiodaicana jaidicaia. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui dibeimo iñenanomona jai jillodicaia. ¹⁵ Jesús nia fiodaiñenia, nana cai illa dinori fiodaillana jaciruicana jaidicaia. Jesús jai fiodailla jira, caina jaciruillacino anamona jillobitade.

¹⁶ Jeacino anamo naimaci iñena jira, Jusiñamui jaienisaimo ie comequina facañede; iadedi Abraham micori isoi iñotinomo naimie comequina facade. Naimacina naimie jilloitallena, naimiedi comena jaide. ¹⁷ Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife

faiamona, naimie fueollena, naimiena orede. Cai illana raise uifnote. Iemona caina dueruite. Jusiñamui jitaillacino finuana raise uifnote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oni dotajana Jusiñamuimo jicanote. ¹⁸ Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie inoñena jira, caina canorede. Taife uaina cai finoñellena, cai comeciaina ocuifnotade.

3

Jesús Moisés micori baifemo faite

¹ Cue amatiai, jeacino anamo omoi jai inena jira, ie dibeimo omoina Jesús jai fetua jira, naimie siño jirona jira, naimiemo omoi comeciaina faca. Naimiena ja ñaiticue. Ie rafuena llollena, Jusiñamui naimiena orede. Naimie lloga rafuena jai cai inuamona, naimiedi Jusiñamui diga cai facaina nanoca ñairaima. ² Ie Moo cominina naimie raise sedajanona, naimiedi ie Moo uaina inuanona, iena finode. Nana Israel cominina naimie sedajanona, Moisés micori Jusiñamui uaina inuanona, iena finode. ³ Jusiñamuimona Jesúdi Moisés micori baifemo faite. Moisés micori mare; iadedi naimie caina jillotañede. Jesús caina jillotaja jira, Moisés micori baifemo Jesúdi Jusiñamui iobide. Cai jillua jira, Jusiñamui cominina jaidicai. ⁴ Buena cai finuamona, naimie cominina jaiñedicai; iadedi naimie caina ie cominina dama itatarede. ⁵ Naimie facaina maijiano, Jusiñamui llua isoi, Moisés micoridi nana hebreos cominina raise sedade. Ie cominimo Moisés micori Jusiñamui naimiemo lloga uaina raise llote. Naimiemono Jusiñamui ico lolle uaidi uanaicinona uifnoticai. ⁶ Jusiñamui facaina maijianona, Moisés micori ie cominina sedade; iadedi Cristodi Jusiñamui Jirona jira, naimie ie cominina sedade. Naimiena cai inocana jaia, naimiemo caimare cai ocuria, Jusiñamui ua cominidicai.

Jusiñamuimona abido cai jaiñellena, bie rafuemono cai fueua

⁷ Jusiñamui Joreño caimo birui lloia, iena cacarei. Ero, Jusiñamui jaie llua cuetatate: ⁸ Omoi jaiagai isoi ineno.

Jofue inenanomo omoi jaiagai ia, cue uaina inoñedimaci.

⁹ “Naimie uaina raise uifnoticai” raillanona, cuena facacabitimaci.

Cuarenta años cue siño finoca rana ciodimaci; iadedi jaca inoñedimaci.

¹⁰ Naimacimo lloticue: “Omoi diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacañedomoi”.

¹¹ Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

¹² Cue amatiai, cai jaiagai rafuena cai uifnuamona, cai fueua. Uanai Jusiñamuimona abido omoi jaiñellena, naimie jai lloga rafuena omoi inocana jai. Omoimona bu raise inoiacaiñenia, naimiemo llono. ¹³ Jusiñamui rafuena omoi raise inollena, nagarui conini omoi comeciaina ocuifnota. Omoimona jeacinona ebiruiñellemona, jeacino anamo omoi inellesa, birui Jusiñamui rafuena raise ino. Jeacino anamo omoi dane jaia, Jusiñamui rafuena inoñeitomoi. Iemona naimie ricailafue anamo dane iitomoi.

¹⁴ Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille dinori naimiena cai nano inua isoi, cai inocana jaia, marena caimare iiticai. ¹⁵ Ie jira naimiena ino. Bie jaie cuega:

Jusiñamui lloga uaina birui cacarei.

Jofue inenanomo cai jaiagai ia, Jusiñamui uaina inoñedimaci

cuega. Naimaci isoi ineno.

¹⁶ Egiptomona Moisés micori anado jaidimaci. Diga icaiño Jusiñamui uaina cacadimaci; iadedi iena raise inoñedimaci. ¹⁷⁻¹⁸ Cuarenta años jofue inenanomo itimaci; iadedi naimiena naimaci inoñena jira, Jusiñamui naimaci diga icirite. Naimiena inoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue inenanomo naimacimo Jusiñamui jai lloga eniruemo jaiñeno

fiodaitimaci. ¹⁹Jusiñamui uaina naimaci ñinoñena jira, naie Canaán railla eniruemo jaca jaiñedimaci. Naimaci comeciai jaca uri illana uiñoñedimaci.

4

¹Jusiñamui ðibeimo raise cai illamona, Jusiñamui cai comeciai birui uri illana jitaide. Naimie lloga uai nia saiñede. Caimona damierie iese ñnellesa, cai jaiagai isoi cai ñnellena, abina rairuicana mai cai jailla. ²Jusiñamuidi comini comeciai uri illana jitaide. Cai jaiagaimo iena llore. Diga icaiño naie mare rafuena cacadimaci; iadedi iena naimaci ñinoñena jira, iemona buena oñedimaci. ³Jusiñamuidi cai comeciai uri illana birui caimo jai llore. Cristo ie mare rafuena jai cacadicaí. Naimie uaina cai ñnua jira, cai comeciai jai uri ite. Cai jaiagai comeciai uri ññede. Moisés micori cuiamona iena uiñoticaí. Cuega:

Naimaci diga Jusiñamui icirilla jira, naimacimo lloga eniruemo jaiñedimaci

Comeciai uri illana jaca uiñoñedimaci

cuega. Jusiñamuidi nana comini comeciai uri illana jitaide. Eniruena naimie finocamo, comini comeciai uri illana jitaide. ⁴⁻⁹Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemona nana naimie finoca ra mare.

Naimie comeci caimare uri illamona, siete iruimo jafaici ote

cuega. Jusiñamuidi nana comini comeciai uri illana nia jitaide. Moisés micori facaise cai jaiagai comeciai uri illana jitaide; iadedi naimiena naimaci ñinoñena jira, naimaci comeciai jaca uri ññede. Moisés micori fiodailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci ñinoñena jira, naimaci comeciai jaca uri ññede. Josué micori illa facaisemona diga años illanona, David micori comeciai uri illana jiai llore:

Naimie uaina birui omoi cacaia, iena ñno

llore. Naiemona Jusiñamui cai comeciai uri illana jitaillana uiñoticaí. Naimiena ñnotinodicaimo naie rafue jai duide. ¹⁰Jusiñamuina cai ñnuamona, cai comeciai jai uri ite. Cai comeciai uri illana, jiaie rafuedo jaiñedicaí. Naimiena cai ñnuamona, naimie illanomo ico iiticaí. Nana naimie finoca rafuena naimie fuidua mei, nainomo uri iiticaí.

¹¹Cai jaiagai ñnoñedimaci. Cai faifiñellena, naimaci isoi cai jaiñena; iadedi Jusiñamui uaina ñnocana mai cai jailli. Jusiñamuina cai ñnuamona, naimiedi cai comeciai uri itatate. ¹²Naimiena cai ñnoñenia, naimie iena uiñote. Naimie jaca ite. Naimie siño. Ie jira naimie lloga uai jaca saiñede. Jaca siño. Cai comeciaino riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinuaina riire bairetate. ¹³Jusiñamuimona buna reirinide. Jusiñamui nana caina ciode. Nana cai finoca rafuena uiñote. Nana cai comeciaino iticinona uiñote. Ie jira naimie uaina ñnocana mai cai jailli

Jesúdi cai facaina Jusiñamui diga nanoca ñairaima

¹⁴Jesúdi naie uaina cai ñnuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena ñnocana jaiticaí. ¹⁵Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie ñnoñede. Iemona Taife ramo faiacinona ñnoñenana naimie uiñua jira, jeacinona oñede. Caina canorede. “Naimacina cano” ie Moomo llocabite. ¹⁶Cai facaina ie Moo abimo naimie illa jira, cai comeciaina naimie ocuiñotaiacana jira, Jusiñamuina jaciruiñeno naimiemo cai jia. Naimie caina duenaillamona, cai jeacinona feitaite. Cai comeciaina jiai ocuiñotaite.

5

¹Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticaí. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina

fecauidimaci. Cominina Jusiñamui feiñollena, imaci ñairaima Jusiñamui diga ñaite. ² Nana comini isoi naimiedi jeacino finuamona, comini facaina Jusiñamui diga ñairaima ñaiana raise uiñote. Jusiñamui dibeimo raise jaiñedinona fecuise canorede. ³ Comini facaina toiniaina fecauide; iadedi naimiemo jeacino illa jira, naimie facaina toiniaina jiai fecauide.

⁴ Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uiñoticaí. ⁵ Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie ciegafuiaimona iena uiñoticaí. David micori Jusiñamui lluaña jaie cueda:

Cue Jitodio. Jai o Moodicue

cueda. ⁶ Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

⁷ Enruemo Cristo ia, imana naimie jailla jira, duere sefuide. Naimie fiodaiacana iairei ia, Jusiñamuimo eo jiiide. Naimie fiodaiñena Jusiñamui jillotarede; iadedi Jusiñamuimo ado llore: “Cueda llegi cacaitaño; iadedi cue comeci jitailla isoi finoño. O comeci jitailla isoi fino” llore. Jusiñamui uaina naimie raise inua jira, Jusiñamui naimie jiiiana cacajano fairiote. ⁸ Naimiedi Jusiñamui Jito; iadedi Jusiñamui naimiena llegi cacatate. Iemona Jusiñamuina inocana jaca jaillana naimie uiñote. ⁹ Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena inotinona jillotaite. ¹⁰ Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saiñena jira, naimie ifomo illena, jiaimiena jaca fetone. Ie isoi Jesús uai jaca saiñede.

Cristo dibeimona abido danomo jaiño

¹¹ Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeciai iena raise jitaiñena jira, omoimo iena raise llonidicue.

¹² Cristo rafuena are omoi cacaja jira, iedo omoi raise jaidomoidena, llofuerainina jaidomoi; iadedi iedo nia raise omoi jaiñena jira, jiaimie omoina llofuiiana nia jitaidomoi. Cristo dibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena inocana nia raise jaiñedomoi. Eo janorede janosa monoi ijina jitaicabide. Einamací isoi guillena nia jitaiñede. Janosa isoidomoi. Creyentena bu como jiaia, Cristo rafuedo nia eo jaiñede. Iena eo uiñoñede. Monoi ijina jitaide isoide. Janosa monoi iji jirua mei, jiaie guille guillamona moonaitaite. Cristo rafuena are cacadomoi; iadedi janosa isoi nia itomoi. Nia moonaiñedomoi isoidomoi.

¹³ Janosa monoi ijina nia jitailla jira, naimie nia moonaiñenana uiñoticaí. Naimie nia abina uiñoñede. Jusiñamui jitailla isoi marecinona finuana nia uiñoñede. ¹⁴ Guilledí moonaitimie ie. Ie isoide. Cristo rafuedo raise jaidimiedi Cristo rafuena uiñocana jaide. Iemona marecinona finollena, llofuiiana uiñote. Maraiñedinona finoñellena, llofuiiana jiai uiñote.

6

¹ Diga icaiño bie rafuena jai cacadomoi. Cristona nano cai cacaja rafuena raise cai inuamona, jiaie Cristo rafuena raise uiñocana mai cai jailla. Cai nano cacaja rafuena cai fueoiacana siadocabiñelli. Cristo dibeimo caina itatañede rafuedo navui jaidicaí; iadedi cai comeciai iuai birui jai meidoticaí. Cristo dibeimo itatate rafuedo birui jaidicaí. Jusiñamuina inuamona, naimie dibeimo jaidicaí. ² Cristo dibeimo bautizajana jai uiñoticaí. Llofueraimana jaillena fetuana jai uiñoticaí. Creyentiaina naimaci sedallena, naimacimo cai onolli jonianona, Jusiñamuimo cai jiiiana, naimaci fetuana jai uiñoticaí. Nana creyentiai fiodaillamona jilluana jai inoticaí. Jusiñamuidi naimiena inoñedinona ico jaca duere finollena jai inoticaí. ³ Naie isoide rafue mare; iadedi iena cai raise inuamona, Jusiñamui jitailla jira, naimie caina canuamona, jiaie Cristo rafuena fueocana

mai cai jailli. ⁴ Uanaicinona omoi comeciai uiñuamona, Cristona omoi ñnuamona, Jusiñamui Joreño omoimo illamona, ⁵ Jusiñamui uaina mare omoi uiñuamona, Cristo uai siñonana omoi uiñuamona, abido danomo omoi jaiñellena, abina rairuicana omoi jai. ⁶ Cristo ðibeimona omoimona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitaiñena jira, Cristo fiodaillana jai jitaiñede. Cristona jeare jai finode. Cristo finoca rafuena jamaide. Cristona naimie jitaiñenia, ¿niese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. ⁷ Ero, iena jiaie rafuedo lloiticue. Jusiñamui noci deitacabilla jira, enirue naimie riatacabilla jira, iemo riana sicuanona, iena ie nama raitia, naiemona ie llisillana naimie uamona, Jusiñamui iobide; ⁸ iadedi naie eniruemona riana sicoñenia, maraiñede. Monaigi cuirao diga naiemona dama sicoia, maraiñede. Jusiñamui nainomo noci deitate; iadedi naiemona llisillana onide. Naie enirue caimanide. Maraiñede. Ie nama iobiñena jira, iena fañonocaide. Naie enirue isoidomoi. Jusiñamuimona mare rafuena cacadomoi. Iena ñnocana omoi jaia, naimie omoina iobitaite. Iena omoi jitaiñenia, naimiemona duere sefuitomoi.

Jusiñamui llua jira, cai comeciai ocuiñocana jaidicai

⁹ Cue isiruigaomoi, abi rairuillicinona omoimo lloticai; iadedi cai llofuiacino omoimo ðuiñenamo cai comeciaina facañedicai. Cristona ñnocana omoi jaillamo cai comecina facadica. ¹⁰ Jusiñamui omoina raise uiñote. Naimiena omoi isiruillamona, jiaie creyentiaina omoi isiruillamona, naimacina navui canodomoi. Naimacina nia canodomoi. Ie jira naimiemona duere sefuiñeitomoi. ¹¹ Omoi comeciimona jiaie creyentiaina omoi canua isoi, Cristo rafuedo nana omoi ille ðinori ñnocana omoi iocire jaillana jitaicai. Naimie diga ico jaca omoi ille jira, iese omoi jaillana jitaicai. ¹² Cristo rafuedo omoi jaillamona omoi sefuiruiñenana jitaicai. Jusiñamui lloga uaina ñnocana jaidino isoi, omoi jaillana jitaicai. Naimiena naimaci ñnuamona, naimie lloga uai fecuise naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jiai oitomoi.

¹³ Ero, Jusiñamuidi Abraham micorimo lloga uaina uiñotomoi. Naimiedi Jusiñamuina jira, uanaicinona lloite. Tainona lloñede. ¹⁴ Abraham micorimo lloite: “Ona jaca canoiticue. O diga jaca iiticue. Cue llua jira, o jito comuite. O uruiaina eo jebuitaiticue” lloite. ¹⁵ Abraham micori naimie lloga uaina ñnote. Iena suillemo fecuise ocuiride. Ie jito Isaac micori, Jusiñamui llua isoi, comuide. ¹⁶ Uanaicino cai llocabillana jiaie comini uiñollena, Jusiñamui mamecina lliñoticai. “Jusiñamui caina ciode” lloticai. “Uanaicinona cai lloñenia, Jusiñamui caina duere finoite” lloticai. Ie jira cai lloga uaina buna uaitañede. ¹⁷ Ie isoide. Jusiñamuidi ie finolle rafuena caimo jai lloite. Naimie lloga uai meidonillana cai uiñuana naimie jitaide. ¹⁸ Naimiedi Jusiñamuina jira, ie uai naimie jai llua jira, naimie tainona llonillana uiñoticai. Ie jira naimie lloga uai naimie finuana uiñoticai. Naimiena cai ñnuamona, naimie anamo cai illa jira, caina naimie eenua jira, cai comeciai ocuiñocana jaidicai. Naimie illanomo ico cai jaca illemo ocuiridicai. ¹⁹ Naie rafuena Jusiñamui llua jira, cai comeciai ocuiñocana jaidicai. Ie lloga uaina naimie finollemo ñnoticai. Monamo Jusiñamui illanomo ico cai illena eo raise uiñoticai. Nainomo fiebillena, barco ie lloelluna illemo dotaja isoi, cai comeciai naganomo iñellena, Jesús caina eenote. ²⁰ Jesús nainomo jai illa jira, naimie muidona nainomo jiai iiticai. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai saiñena isoi, Jesús cai facaina ñaia uai jaca saiñeite.

7

Melquisedec micori illa isoi, Jusiñamui diga ñairaimana Jesús jaide

¹ Iena omoi raise uibiñollena, Melquisedec micori rafuena omoimo lloiticue. Naimie micoridi Salem railla nairai ie illaima. Naimiedi comini facaina cai Moo Jusiñamui diga ñairaima. Cinco illaimana Abraham micori anafetitaja mei, ie jofomo Abraham micori abido billano, naisomo naimie dine Melquisedec micori bite. Abraham

micorimo marecinona Melquisedec llote: “Birui Jusiñamui ona canode. Naimie ona jaca canollena uiñoticue” llote. ² Jusiñamui ñairaimana Melquisedec illa jira, naimiemo Abraham micori dajerie rana fecade. Naie cinco illaimana anafetitajanona, naimaci rana bairuanona, nana naie ramona, ñai uaimona ie décima facaina rana Melquisedecmo fecade. Melquisedec micoridi Salem railla nairai illaima. Melquisedec mameci oni dobaiñuamona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. ³ Naimie moona, naimie eina, naimie cominina uiñoñedicaí. Naimie jeiciaruina uiñoñedicaí. Naimie fiodaillaruina uiñoñedicaí; iadedi Jusiñamui Jito isoi Jusiñamuimona naimie feiñoga uai saiñena jira, comini facaina Jusiñamui ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

⁴ Ero, cai cominimona Abraham micori cai jaiagai baifemo faite; iadedi Melquisedec micori Abraham micori baifemo faite. Ie jira naimiemo ie décima facaina rana fecade. ⁵ Moisés micorimona Abraham micori uruai Jusiñamui lloga uaina cacadimaci. Naimacimo Jusiñamui ie sedaja jofo finuana llote. Nainomo maijidinomo nainomo maijiana llote. Abraham micori uruiaimona Leví railla nairaina fetode. Nainomo maijidino comini facaina Jusiñamui ñairaimana Leví railla nairaina fetode. Nainomo maijidino comini facaina Jusiñamui ñairaimana Leví railla nairaina fetode. Nainomo maijidino comini facaina Jusiñamui ñairaimana Leví railla nairaina fetode. Nainomo maijidino comini facaina Jusiñamui ñairaimana Leví railla nairaina fetode. ⁶ Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Leví railla nairai imieñede. Naisomo Abraham micori dine Melquisedec micori billanona, Abraham micorimo marecinona llote: “Jusiñamui ona jaca canoite. O ñairaimana jaca iite” llote. ⁷ Melquisedec micori Abraham micori baifemo faia jira, naie marecinona naimiemo llote. ⁸ Ero, Melquisedec micorimo Abraham micori rana fecade; iadedi Melquisedec micori fiodaillaruina uiñoñedicaí. Naimie uai saiñena jira, jiaimie naimie ifomo jaca iñede. Comini facaina Jusiñamui ñairaimana naimaci ramona décima facaina cai judíuai cominidi fecauidimaci; ia naie ñairaini fiodaicana jaillana uiñoticaí. Naimaci uai sailla jira, jiaimo naimaci ifomo meidoudimaci. ⁹⁻¹⁰ Leví micoridi Abraham jito. Leví micorimona Leví railla nairai comuide. Naimacidi Jusiñamui ñairaimana Leví railla nairaina jaidimaci. Cominimona décima facaina rana feiñoudimaci. Leví micori nia comuiñenia, Melquisedec micorimo Abraham micori décima facaina rana fecajamona, Abraham micori Leví ie usumana jira, Melquisedec micoridi Leví nairai baifemo faiana uiñoticaí. Melquisedec micoridi Jusiñamui ñairaimana baifemo faiana uiñoticaí. Melquisedec isoi Cristo illa jira, Cristodi Leví baifemo faiana uiñoticaí. Cristodi nana naie ñairaini baifemo faiana jiaí uiñoticaí.

¹¹ Jusiñamui ñairaini finouilla rafuedo Jusiñamui jitailla isoi marebicaiñedicaí. Naimaci finouilla rafuedo cai jillobidicaídena, jiaie rafuena jitaíñedicaí. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiema orede. Caina jillobitallena, naimiema orede, jiaie rafuedo cai jillobiñena jira. Jusiñamui Moisés micorimo jaie llua isoi, comini facaina nano ñairaimadi Aarón micori. Naimiedi Leví railla nairai imie. Naimie jitoniamona comini facaina ñairainina itimaci. Iena uiñotomoi. Aarón jitoniamona Cristo iñede. Aarón maijia rafuemo Cristo duiñede; iadedi Melquisedec rafuemo duide. ¹² Comini facaina ñairainina jaillana jai meidua jira, Jusiñamuidi naimaci rafuena jiaí meidote. ¹³ Iena lloiticue. Aarondi Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duiñede. ¹⁴ Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micori jaie jaca lloñede.

¹⁵ Cristo billa jira, Moisés micori lloga rafue meiduana uiñoticaí. Melquisedec micori illa isoi, comini facaina ñairaimana Cristo jaca iite. ¹⁶ Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide. ¹⁷ Jusiñamui lloga uaimona iena uiñoticaí. David micori naimiema jaie cueda; Melquisedec micori illa isoi, odi comini facaina ñairaimana jaca iitio

cuega. ¹⁸ Comini facaina ñairaimana jaillena Moisés micori jaie cuega. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci. ¹⁹ Naiedo jaillamona, Jusiñamui jitailla isoi marebicaiñedicaí. Iedo birui jaiñedicaí. Jiaie rafuemo birui ocuridicaí. Cristo finoca rafue muidona, Jusiñamuina cai nabaillamona, Jusiñamui diga birui ñairedicaí.

²⁰ Jusiñamui llua jira, Cristo cai facaina ñairaimana jaide. ²¹ Leví micori jitonaiidi imaci jeiciamona, comini facaina ñairainina jaidimaci. Naga icaiño Jusiñamuidi naimacina ñairainina jaillana fetoñede; iadedi ie lloga uaina jira, Cristo cai facaina ñairaimana jaide. David micori Jusiñamui llua jaie cuega:

Cue jai llua jira, cue llua finoitique.

Cristomo llotique: “Comini facaina ñairaimana jaca iitio”

cuega. ²² Jesús ñairaimana jaca illa jira, naimie jailla rafue Moisés micori lloga rafue baifemo uaide. ²³ Moisés micori lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaitino ifomo meidollena. ²⁴ Naimie jaca illa jira, Cristo ñairaimana jaca iite. Naimie ifomo jaca buna meidoñeite. ²⁵ Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui díbeimo iacadinona, naimaci jeacinomona, ua jaca jillotarede. ²⁶ Caina canollena, naimie isoide nanoca ñairaimana jitaídicaí. Ie Moo isoi naimiedi mareuidimie. Naimiemo jeacino jaca iñede. Jeacino finouidino díbeimo naimie iñede. Jusiñamuidi ie ecimo naimiena itatate. Ie jira naimie caina canorede. ²⁷ Jusiñamuimo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiai finodimaci. Cristo naimaci isoiñede. Naimie jitailla jira, comini jeacino facaina naimie fiodailla jira, comini facaina dacaiño fiodaite. Naimaci jeacino facaina naimie dane fiodaíñeite. ²⁸ Moisés micori facai ñairainidi jeacinona finocana jaidimaci. Fiodaicana jiai jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

8

Cristo muidona jiaie rafue birui ite

¹ Cristomo ite rafuena llotique. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. ² Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñaiuidimaci; ia birui Jusiñamui finoca illanomo Cristo illamona, cai facaina ñaicabite. ³ Moisés micori naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiodaite. ⁴ Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. ⁵ Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñoticaí. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaie niacania, Jusiñamui naimiena llofuate: “Monamo itique; ia cue jofu eniruemo jiai finoitomoi. Sinaí railla anedu navui o ia, ona llofuetique. Ona cue llofuia isoi, cue jofona fino” llofuate. ⁶ Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comeciai marena itatate. Ie jira, bie rafue jiaie rafue baifemo faite. ⁷ Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

⁸ Moisés micori lloga uaina cai jaiagai iinoñena jira, Jusiñamui jai llote: Naie cominimo jiaie rafuena ico jiairuido lloiticue.

⁹ Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canuanona, naimacina atidicue; iadedi Moisés micorimo cue lloga rafuedo jaiñedimaci.

Ie jira naimacina fainonocaidicue.

¹⁰ Naimacimo jiaie rafuena ico jiairuido lloiticue.

Iena naimaci uiñuamona, cuena raise iñoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

¹¹ Nana naimaci cuena uiñoitimaci.

Ie jira naimacimo: “Cai Namana omoi iino” buna niese lloñeite.

Jamai bue isoidinomona cuena iñoitimaci.

Jamai bue isoiñedinomona cuena jiai iñoitimaci.

¹² Naimacina cue duenaillamona, naimaci jeacinona jaca feitaiticue

llote. ¹³ Jiaie rafuena Jusiñamui jai llumona, Moisés micorimo lloga rafue jai saillana uiñoticaí. Moisés micori lloga rafue caimo jai duiñede. Cristomona jiaie rafuena birui jai cacadicaí.

9

Hebreos comini Jusiñamui jofona eniruemo jaie nitimaci. Monamo Cristo birui illanona, Jusiñamui ecimo naimie ite

¹ Jusiñamuidi Moisés micorimo diga rafuena jaie llote. Naie rafuemona cai fueollena, iena lloiticue. Naimiena sedajana llote. Naimie sedalle jofu finuana jiai llote. ² Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofu jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparín isoide ra ite. Siete diga naie boadi ite. Mesa jiai ite. Nainomo doce llomenico joide. ³ Mena cuartos illena iniroina sebiñoga. Naie baifemo iticuartodi Jusiñamui illano. ⁴ Naie iniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruai de guille. Aarón micori jiguída nainomo jiai ite. Jusiñamui uaido naie jiguída dacaiño llisilla jira, nainomo ite. Jusiñamui cueda nofici ibici jiai ite. ⁵ Cajón emodo ibaillabicidi ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruai de. Naie motomo Jusiñamui quenirena baireuide. Naie rafuena raise omoi jai uiñua jira, iena omoimo are lloñeiticue.

⁶ Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci. ⁷ Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabicimo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenaillamona, Jusiñamui naimaci jeacino facaina ibana oñede. ⁸ Jusiñamui Joreño caína llofuiamona, biena birui uiñoticaí. Naie jofu nia ia, jamai comini fo jainina jira, Jusiñamui diga, cominidi atona nabairinidimaci. ⁹ Bie rafuena birui nia finodimaci. Moisés micori lloga uaido bu jaia, ie jeacino facaina faga toiniaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci. ¹⁰ Jusiñamuina naimaci raise sedallena, Moisés micoridi diga guille fimaide. Jiruana jiai fimaide. Naimaci abiaína finollena jiai llote. Nie isoide guille, nie isoide jirulle, niese naimaci abiaí finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

¹¹ Moisés micori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicai. Cai comeciai raise jai finobide. ¹² Naimie fiodailla mei, dane jilluanona, Jusiñamui dine monamo naimie abide jaide. Toiniai diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi dacaiño naimie fiodaillamona, naimie diruedo cai jeacino facaina caina jillotate. ¹³ Maraiñede rafuena finoia, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jaie llua isoi, toiniais diailla mei, jobaide toiniais ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede. ¹⁴ Toiniaina fañeno Jusiñamuina birui sedadicaí. Cristo fiodaillacana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitade. ¹⁵ Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina innotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toiniaina Jusiñamuimo jaie fecauidimaci; iadedi Cristo jai fiodailla jira, naimiena bu innoia, naimie jeacino facaina Jusiñamui birui ibana oñeite. Nana Jusiñamuina innotinodi naimie jai llua isoi, naimie diga jaca iitimaci.

¹⁶⁻¹⁸ Jusiñamui jofo jaie finua mei, Moisés micorimo Jusiñamui llote: “Cue lloga rafuena raise finodomoi. Bie jofomo cuena sedallena, faga toiniais dirue diga bie jofona llereca. Nana naiemo ite rana jiai llereca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicai. ¹⁹ Ie cominimo nana naimiemo Jusiñamui lloga rafuena Moisés micori llua mei, faga jurareta dirue diga, faga chivo dirue diga, nana naie lloga rafue ciegabiaina llerede. Cominina jiai llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede. ²⁰⁻²¹ Jusiñamui jofona dirue diga llerede. Nana nainomo ite rana jiai llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”. ²² Moisés micorimo Jusiñamui llua isoi, raise finobillena, nana rana dirue diga llerede. Toiniais fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

Cristo fiodailla jira, Jusiñamui cai jeacinona oni dotade

²³ Jusiñamuidi Moisés micorimo toiniaina fajana jaie llote. Naie llua finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toiniais baifemo faia jira, monamo cai jaca illena, jeacinona oni dotallena, Cristo fiodaite. ²⁴ Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. ²⁵ Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toiniaina fajanona, ie diruena uite. ²⁶ Cristo iese itena, nano facaisemona diga icaiño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai inellena fiodaite. ²⁷ Nana dacaiño fiodaiticai. Iena uiñoticai. Fiodailla mei, Jusiñamui uicomo iiticai. Naimiena cai innoia, caina feiñoite. Naimiena innoñedinona duere finoite. ²⁸ Dacaiño Cristo jai fiodaillana uiñoticai. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritinona monamo Jusiñamui illanomo uite.

10

¹ Moisés micori facaise naie ñairainidi Jusiñamuimo fecallena, toiniaina fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micori lloga uaimona jeacino cai finuana uiñoticaí. Jusiñamui cai jeacino oni dotajana uiñoticaí. Jusiñamui jaca mareuidimiena uiñoticaí. Jusiñamuina nabaillena janore uiñoticaí. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicaí. ² Naie faga toiniaí Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toiniaina dane fecañedimaci; iadedi naimacimo jeacino jaca illa jira, faga toiniaina fecauidimaci. ³ Naiena fecauillamona, jeacinona finocana naimaci nia jaillana uiñotimaci. ⁴ Toiniaí dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona feitate. ⁵ Eniruemo jaie billanona, Jusiñamuimo iena Cristo llote:

Jeacino facaina toiniaí fajana jai jitañedio.

Ie jira eniruemo comena jaillena, comini jeacino facaina cue fiodaillena, cuena oredio.

⁶ Jeacino facaina ailluena faga toiniaina jai jitañedio.

⁷ Iena cue uiñuamona, eniruemo cue billanona, o jitailla rafuena finoiticue.

O facaina lloraini micoriaí iena jaie cuetimaci

llote. ⁸ Cristo llwana dane ñaiticue. Cristodi Jusiñamui Moisés micorimo llogacinona ñaite. Jusiñamui jaie llua isoi, naimiemo cominidi jeacino facaina faga toiniaina jaie fecauidimaci. Iena Jusiñamui birui jai jitañede. ⁹ Cristodi: “Jusiñamui jitailla rafuena finuaibiticue” lluamona, Moisés micorimo llogacino jai saillana uiñoticaí. Jiaie rafue birui illana jiaí uiñoticaí. ¹⁰ Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicaí. Jai marebicaidicaí.

¹¹ Nana Moisés micori llogacinodo jaide ñairainidi nagarui comini jeacino facaina faga toiniaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede; ¹² iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaimana jira, Jesús Jusiñamui ecimo abido jaide. ¹³ Nana naimie díbeimo iñedinona naimie emodofillemo naimie birui ocurirde. ¹⁴ Dacaiño Cristo fiodaillamona, naimiena cai iñuamona, Jusiñamuimona jaca marebicaidicaí. ¹⁵ Jusiñamui facaina lloraima micori ciegafuemona Jusiñamui Joreño caina iena uiñotade. Naimie facaina lloraima micori Jusiñamui llwana jaie iese cueda:

¹⁶ Hebreos cominimo jiaie rafue ico jiairuido lloiticue.

Cue rafuena naimaci uiñuamona, cuena raise iñoitimaci.

¹⁷ Jiaí cueda:

Naimaci jeacino jaca feitaíticue.

¹⁸ Cristo jai fiodailla jira, jeacinona Jusiñamui jai feitaja jira, faga toiniaina naimiemo fecajana dane jai jitañede.

Jusiñamuina cai nabailli

¹⁹ Cue amatiaí, Jesús fiodailla jira, Jusiñamuina jaciruiñeno birui nabairedicaí. Naimie cai Moo jai illanona, naimie díga meiruiñeno jaciruiñeno birui jiaí ñairedicaí. ²⁰ Moisés micori facaise nanoca ñairaima fo iticuartomo jaillena, sebiñoga iniroi oni díbeimo jaidimaci. Iese Jusiñamui illanomo ridimaci. Jamai comini nainomo jainidimaci; iadedi Cristo jai fiodailla jira, Jusiñamuina atona birui nana nabairedicaí. Naimie díga birui atona nana ñairedicaí. ²¹ Cristona jai cai iñua jira, cai facaina nanoca ñairaimana naimie illa jira, ²² cai mare comeciámona Jusiñamui díga birui cai ñailli. Naimiena eo cai iñuamona, cai comeciaí jeanillamona, naimie díbeimo cai bautizajamona, naimiena mai cai nabailli. ²³ Cristo caina jillwana iñoticaí Monamo naimie díga cai illemo ocuridicaí. Jusiñamui iñogamiena jira, naie rafuena iñocana mai cai jailli. ²⁴ Jiaie creyentiaimo cai comeciaina cai facaja. Conini cai isiruitacana cai jailli. Coninimo cai mare rafue finocana cai jailli. ²⁵ Rollena omoimona damierie oficabiñedimaci. Naimaci isoi omoi iñeno;

iadedi Jusiñamuina sedallena oficabi. Abido omoi danomo jaiñellena, conini comeciaina ocuiñotallena, oficabi. Jesucristo abido billirui iaiei illa jira, naimiena raise ñnollena, conini omoi comeciai ocuiñocana mai omoi jai.

²⁶ Cristo finoca rafuena bu uñua mei, iena naimie ñnoñenia, jeacinona naimie finocana jailla jira, Jusiñamui naimie jeacinona feitañeite. Cristo fiodaillana bu jamaia, Jusiñamui ie jeacinona feitañeite; ²⁷ iadedi Jusiñamuidi naimiena duere finoite. Eo jacirede rafue anamo iite. Iraimo Jusiñamui nana naimie ñbeimo ññedinona duere finoite. ²⁸ Moisés micori jaie cuela: “Jusiñamui llote: ‘Menaimie naimiena daje isoi lloillamona, Moisés micori llogacinona jamaidimiena dueruiñeno meinea’ ”. ²⁹ Iese duere sefuillana jaie llote; iadedi birui ite lloga rafue bu jitañenia, bai duere sefuite. Jusiñamui Jitona bu jitañenia, Jusiñamui birui lloga uaina bu jitañenia, Cristo fiodaillana bu jamaia, Jusiñamui Joreña jeare bu ñaia, Jusiñamuimona naimie eo duere sefuite. Cristo fiodaillamona, Jusiñamui naimiena ñnotimiena marebicaitarede. Jusiñamui Joreño naimiena duenaite; iadedi iena naimie jai jamaitaia, iena naimie jai jitañenia, Jusiñamui naimiena bai duere finoite. ³⁰ Ero, Jusiñamui jaie llote: “Maraiñedinona bu finoa, ñbana oitice. Cuen a ñnoñedinona duere finoitice” llote. ³¹ Jusiñamui duere finollicino anamo bu ia, eo jacirede rafue anamo jai ite. Naie duere finollicino anamo omoi ñnellena, Jusiñamui lloga rafuena jamaiñeno.

³² Creyentiaina nano omoi jaillamo dane comeciaina faca. Creyentiainedinomona eo duere sefuidomoi; iadedi Cristona ñnocana jaidomoi. ³³ Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci. ³⁴ Cárcelmo jonetinona duenaillamona, naimacina canocabidomoi. Cristomo omoi duilla jira, creyentiainedinomoi omoi rana bairodimaci; iadedi omoi comeciai ña iocire itomoi. Omoi ramo omoi comeciaina eo facañedomoi; iadedi Cristomo jai omoi duilla jira, naimie omoi comeciaina jaca marebicaitaja jira, iemo omoi comeciaina facajamona, iocire itomoi. ³⁵ Jusiñamuimona ñba ñco omoi feñua jira, Cristona ña ñnocana omoi jai. ³⁶ Jusiñamui jitaillacino omoi finollena, monamo jaca omoi illena, ñe isoide ramo omoi jiria, Jusiñamuina ña ñnocana omoi jai. ³⁷ Jusiñamui buena llua jira, iese suite:

Cristo abido billirui iaiei illa jira, naimiena ñnocana omoi jai.

³⁸ Naimie ña abido biñenia, omoina cue jai marebicaitaja jira, cuena ñnocana mai omoi jailli;

iadedi cuena jitañedinori iobiñedicue.

³⁹ Naie isoidino jillobiñeitimaci. Naimaci isoi ññedicaí. Jusiñamuina ñnocana cai jaillamona, jaca jillobidicaí. Ie jira naimiena ñnocana mai cai jailli.

11

Jusiñamuina ñnocana jaidicaí

¹ Jusiñamuina cioññedicaí; iadedi naimie illana ñnoticaí. Naimie lloga uaina ñnocana jaidicaí. Naimie lloga uai suillena ñnoticaí. Ie lloga uai suillemo ocuiridicaí.

² Cai jaiagaimona damierie iese ñnocana jailla jira, Jusiñamuimona marebicaidimaci.

³ Jusiñamui finoca rana birui cidicaí; iadedi jaie nano dofoconi jaca buena ññede. Naie facaiseconi dama ie uaido Jusiñamuidi enruena finode. Mona finode. Nana rana finode. Nana rana comuitate. Iena ñnoticaí.

⁴ Cai jaiagai rafuena ja lloiticue, naiemona cai fueollena. Abel micori Jusiñamuina jaie ñnuamona, naimiemo faga toica llaudana fecade. Ie feñuamona, Jusiñamui naimieri iobide. Jusiñamuina ie ama Caín raise ñnoñena jira, naimie fecaca rari iobiñede. Iena feñnoñede. Abel micori Jusiñamuina ñnua jira, Jusiñamuimona naimie marebicaide. Abel micori jaie fiodaite; iadedi Jusiñamuina cai raise ñnollena, naimiemona ña fueoiticaí.

⁵ Enoc Jusiñamuina jaie ñnote. Naimiedi Jusiñamuina eo iobitate. Moisés micori cuegafuaimona iena uñnoticaí. Jusiñamuina ñnuamona, Jusiñamuina eo iobitaja jira, naimie fiodaiñede; iadedi fiodaiñeno monamo Jusiñamui naimiena naimiena uite. ⁶ Jusiñamuina

cai ñnoñenia, naimiena iobitañedicaí. Jusiñamuina cai nabaiacania, naimiena cai raise sedaacania, naimie illana ñnoticaí. Naimiena cai nabaiacania, cai jitai raillano, caina canollena ñnoiticaí.

⁷ Noé micori Jusiñamuina jaie jiai ñnote. Jusiñamui ico suille rafuena naimiemo llote. Enirue buillena llote. Iena ñnuanona, Noé micori aillue balsa emodomo jofona finode. Enirue buillamona ie comini diga jilloiacana jira, Jusiñamui llua isoi, balsana finode. Jusiñamui llua Noé micori ñnua jira, jillode. Noé micori Jusiñamui llua ñnote; iadedi naimie facaise ite comini ñnoñena jira, Jusiñamui riicaillafue anamo itimaci. Jusiñamuina naimie ñnua jira, Jusiñamui uruena naimie jailla jira, Jusiñamuimona Noé micori marebicaide.

⁸ Abraham micori Jusiñamuina jaie jiai ñnote. Ie moo eniruemonona naimie jaianillena Jusiñamui naimiemo llote. Are ite eniruemo naimie jaianillena llote. “Jiaie enirue omo iiticue” Jusiñamui llote. Abraham micori ñnote; iadedi ie jaillinona uiñoñede. ⁹ Jusiñamui lloga eniruemo Jusiñamuina ñnocana jaide. Naie eniruemo ride; iadedi naie enirue naimiemo nia raise duiñede. Chivo itiraímona niga iniroimona sebiñoga jofomo naimie jaca ite. Ie jito, Isaac micori, naie isoide jofomo jiai ite. Isaac micori jito, Jacob micori, naie isoide jofomo jiai ite. Jusiñamuidi nana naimacimo daje isoide rafuena llote: “Bie enirue omoimo iiticue” llote. ¹⁰ Abraham micori mare jofona finoñede, naie eniruemo naimie jaca iacaiñena jira; iadedi Jusiñamui diga monamo jaca illemo naimie ocuiride. Monamo Jusiñamui mare finolle illanomo ocuiride.

¹¹ Abraham micori aidi Sara micori. Jusiñamuina Sara micori ñnua jira, Jusiñamui naiñaiño abina maíritate. Naiñaiño eo jionaide; iadedi uruesite. Naiñaiñomo Jusiñamui llua isoi, naiñaiño uruesillana ñnote. ¹² Abraham micori jiai eo jionaide; iadedi jitona comuitate. Naimie jitomona naimie nairai eo jebuide. Facadonide ucuai isoi jebuidimaci. Facadonide conillie isoi jebuidimaci. Ailluena ucuai illa jira, naimaci facadonidicaí. Ailluena conillie illa jira, iena facadonidicaí. Ie isoide. Eo ailluena Abraham micori uruiai illa jira, naimacina facadonidicaí.

¹³ Abraham micori, Isaac micori, Jacob micori Jusiñamuina ñnocana jaidimaci. Nana naimacimo Jusiñamui lloga uaina suiñedemo fiodaitimaci. Nia fiodaiñenia, Jusiñamui llogacinona cacadimaci. Iena ñnotimaci. Ie jira bie eniruemo naimaci jaca illemo comecina facañedimaci; ¹⁴ iadedi monamo jaca illemo comeciaina facadimaci. ¹⁵ Naimaci jaie billa eniruemo comeciaina naimaci facadena, nainomo abido jaidimaci; ¹⁶ iadedi jiaie illanomo comeciaina facadimaci. Jusiñamuina nabaillemo, monamo Jusiñamui diga jaca illemo comeciaina facadimaci. Naimiena naimaci ñnua jira: “Jusiñamuidi cai Moo” naimaci raia, Jusiñamui naimaciri meidaiñede. Ie jira monamo Jusiñamui naimaci illinona jai finode.

¹⁷⁻¹⁸ Jusiñamuina Abraham micori ñnua jira, ie jitona comuitate. Jusiñamui Abraham micorimo llote: “O jito Isaacmona o nairai eo jebuite” llote. Iemei Jusiñamui Abraham micorina facacite. Abraham micori naimiena ñnuana raise uiñollena, facacite. “O jitona fano” Abraham micorimo llote. Abraham micori Jusiñamuina ñnuanona, ie jito faiacade. ¹⁹ Ie jito fiodaillemona, Abraham micoridi Jusiñamui naimiena jilloitallena ñnote. Isaac micori fiodaiñede; iadedi fajamona jillode.

²⁰ Isaac micori Jusiñamuina jiai ñnote. Naimie fiodaiacania, Jusiñamui ie llogacino finollena ñnuamona, mena ie urue iaimaiamo ie uaina fecade. Llote: “Jusiñamui llua isoi, jebuicana jaitomico”. ²¹ Jacob micori Jusiñamuina jiai ñnote. Naimie fiodaiacania, Jusiñamuimo jianona, ie jiguidamo juita naidaidemo, José micori ie mena urue iaimaiamo marecinona llote. Jusiñamui ie llogacino finollena ñnuanona, llote: “Jusiñamui llua isoi, jebuicana jaitomico. Naimie omicono canoite” llote. ²² José micori fiodaiacania, ie cominimo llote: “Jusiñamui omoína canuano, Egiptomona ico jairuido omoi jailla ñnoticue. Omoi jaia, cue illaiciaina omoi diga uiño. Canaán railla eniruemo omoi ria, nainomo cue illaiciaina raíno”.

²³ Moisés micori moo, ie ei diga Jusiñamuina jiai ñnotiiaimaiai. Hebreos comini jebuiñellena, naie facaiseconi Egipto illaïma nana hebreos iisaiïana meiniana llote. Iaimaiai jito jeicia mei, iaimaiai uruena daje amani fivui reidiïaimaiai. Jusiñamuina ñnuanona, naimie maresana eruaila jira, jaciruiñeno naimiena jofomo fo reide. Illaïma llumona Jusiñamui naimiena jillotajana ñnotiiaimaiai. Ie jira Faraón jisa anamo comuide. Faraón di Egipto nairai illaïma. ²⁴ Moisés micori Jusiñamuina ñnote. Naimie eimienamona, naimiedi Faraón jisa ie jitona mamecïreacaiñede; ²⁵ iadedi naimiedi Jusiñamui naimiena ie cominina Egiptomona jillotajana ñnote. Jusiñamui naimie fetua jira, ie comini ðibeimo naimie iacade. Ie comini ðiga duere sefuiacade. Jusiñamuina ñnoñedino ðiga ie comeci jamai iobitaiacaiñede. ²⁶ Faraón jisa anamo naimie comuilla jira, naimiemo eo aillue rana ite; iadedi Egiptomo ite ebirede ramo ie comecina eo facañede. Jusiñamuimona ñba naimie ico feiñoiacana jira, Jusiñamui Jito billemo ie comecina facajano, duere sefuide. ²⁷ Ie jira Egiptomona Moisés micori Faraóna jaciruiñeno oni jaide. Jusiñamui naimiena eenuana ñnote. Jusiñamuina cioiñede; iadedi Jusiñamui illana naimie ñnua jira, ñnocana jaide.

²⁸ Jusiñamui ie cominina jillotajana Moisés micori ñnua jira, Jusiñamui llua isoi, pascua railla rafuena finode. Ie cominimo toïca llauda fallena llote. Ie ðirue nase fuemo jidellena llote. Naie naio Jusiñamui jaïenici nana nano doforanina meinesiñellena, Jusiñamui llua finodimaci. ²⁹ Egiptomona naimaci billa mei, jaïrede railla monaillai ruica ðine jaïllena, Jusiñamuina ñnotimaci. Jusiñamui Moisés micorimo llua naimaci ñnuamona, jinui motodo saferedifodo ruica jaïdimaci; iadedi Egipto soldaduïa daje isoi ruica jaïcadimacimo, nana corobaitimaci.

³⁰ Canaán railla enïruemo hebreos comini rilla mei, Jericó railla nairai ðine ridimaci. Jusiñamuina ñnuanona, Jusiñamui llua isoi finodimaci. Siete ðigarui Jericó ecimo naimaci macarilla mei, Jusiñamui llua isoi, naie llaïgafo ana bijïde. Naie nairaina emodofidimaci. ³¹ Naie facaiseconi Jericómo Rahab micori fioidañede. Naiñaiñodi callirediñaiño. Nana Jericó comini Jusiñamuina ñnoñena jira, fioidaitimaci; iadedi jofue iñenanomo, ña Canaámo hebreos comini riñena facaise, Jusiñamui finoca rafuena naiñaiño fidiano, naiñaiño Jusiñamuina ñnote. Mena hebreos comini iaimaïana naiñaiño feiñua jira, Jericó nairaina emodofilla facaise naiñaiñoña meineñedimaci.

³² Diga jaïe comini Jusiñamuina ñnocana jaïdimaci; iadedi nana naimaci finoca rafuena cue cuellena, abi juanide. Naimacimona damierie mameciïana jamai cueitïcue: Gedeón micori, Barac micori, Sansón micori, Jetté micori, David micori, Samuel micori Jusiñamui facaina jaïe llorainina jiai eo cueñeitïcue. ³³ Jusiñamui naimacina canuamona, ñnotimaci. Ie jira damierie naimaci bacauaina emodofidimaci. Illaïma isoi jiaïno naimaci cominina raise marena sedadimaci. Jusiñamui llogacino suïllana cioidimaci. Leones naimacina riïacanamona damierie jillode. ³⁴ Iraïmo usillamona damierie jillodimaci. Lloebi ðiga meiniamona damierie jillodimaci. Jiaïno jamai bue isoidino; iadedi jamai bue isoiñedinona jaïdimaci. Jobaïme raise finuamona, jiaïno imaci bacauai soldaduïana judaisitade. ³⁵ Dañaiñorie riñoniaïmona uruïai fioidaïlla mei, fioidaïllamona Jusiñamui damieriena jillotate. Illaïcominimona jiaïno duere fioidaitimaci. Jusiñamuina faïnonocaiacaiñena jira, naimacina meinetimaci. Naimaci fioidaïcancia, monamo Jusiñamui ðiga ico jaca illena naimaci ñnua jira, Jusiñamuina faïnonocaiñeno fioidaitimaci. ³⁶ Jiaïno duere sefuidimaci. Naimaciri jaïsitimaci. Naimacina jeare ñaitimaci. Rao ðiga naimacina duere fatimaci. Damieriena maïanona, cárcelmo jonetimaci. ³⁷ Damierie nofici ðiga fairïnuamona, meinetimaci. Damierie ramo faitimaci. Meinellena, naimacina serrucho ðiga denaisite. Damierie lloebi ðiga meinetimaci. Jiaïno buenidimaci. Naimaci ñiroi jamai igoi ie. Dueredimaci. Naimaci ñiroi raise iñede. Aïme guisoidimaci. Jiaïe cominimona duere sefuisoidimaci. ³⁸ Jiaïe cominimona jamai bue isoidimaci; iadedi Jusiñamuimona jamai bue isoiñedimaci. Damierie jofonidimaci. Ie jira jamai jaï jaïcoidimaci. Jofue iñenanomo jaïdimaci. Enïruemo jamai biïta inïuidimaci. ³⁹ Jusiñamuina ñnocana jaïdimaci. Naimaci finoca rafuemona Jusiñamui comini naimaci

illana uiñoticaí. Jusiñamuina ñnotimaci; iadedi nana naimacimo Jusiñamui lloga rafue naimaci illa facaise suiñede. ⁴⁰Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodaillena Cristona jai orede. Ie cominina birui cai jiai jaillena, Cristona jai orede. Ie jira cai ðiga danomo monamo Jusiñamuina nabaitimaci. Nana naimie lloga rafue jaca suite.

12

Jesús ñnoca rafuemo cai comeciaina cai facalli

¹ Cai jaiagai Jusiñamuina ñnocana jaillana uiñoticaí. Ie jira caidi naimaci isoi, Jusiñamuina ñnocana birui mai cai jailli. Marena riire cai aisiacania, ailluena rana abiñedicaí. Ie isoide. Jeacinona cai finoñellena, naimiena raise cai ñnollena, jeacino finuacinona mai cai ñanonocailli. Nie isoide rafue caimo ia, Jusiñamui jitaillacinona ñnocana mai duere cai jailli. ²Jesús ñnoca rafuemo cai comeciaina cai facalli. Cai jeacino facaina naimie fiodailla jira, cai comeciaina naimie ocuiñotajanona, Jesúna ñnoticaí. Cruzmo marañedimie isoi fiodaite. Fiodaillamona jilluana naimie uiñuamona, naimie fiodaite. Ie Moo ecimo dane illena naimie uiñuamona, iocire fiodaite. Illaimana naimie illamona, ie Moo ecimo birui ite. Jesúmo cai comeciaina facajamona, caimare mai cai jailli. ³Jusiñamui ðibeimo ññedinomona Jesús eo duere sefuide. Ie isoi cai duere sefuia, Jesúmo cai comeciaina facajamona, cai comeciaina ocuiñotacana mai cai jailli. ⁴Jusiñamui ðibeimo ññedinomona duere sefuillamona, Jesús isoi duere nia sefuñedomoi. Omoína nia meineñedimaci. ⁵Duere omoi sefuia, bie jaiie ciegafuiaína feitaño. Naimie cominina omoi illamona, Jusiñamui llote:

Cue uruiaí, omoína cue duere finoia, cuena nia ñno.

Duere sefuillamona, cuena ñanonocaiño.

⁶Omoína cue isiruillamona, omoína duere ñnodicue.

Cue ðibeimo omoína raise itatallena, omoína duere ñnodicue.

Nana cue cominina cue llofuecabillamona, naimacina duere ñnodicue

llote. ⁷Naimie jitaillacinona cai ñnollena, caina duere ñnode. Ie uruiaína cai illamona, caina duere ñnode. Ero, nana ie uruiaína isiruillamona, naimaci ie jitaillacinona ñnollena, naga eniruemo ite moo ie uruiaína duere ñnocabide. Ie isoide Jusiñamui. Ie jitaillacinona cai ñnollena, caina duere ñnocabide. ⁸Caina ñnotallena, Jusiñamui caina duere finoñenia, naimie comiññedicaí. Naimiedi nana ie cominina duere ñnocabide.

⁹Cai eniruemo ite cai mootiaí caina duere finoia, naimaci uaina ñnoticaí. Ie isoide. Cai Moo Jusiñamui caina isiruillamona, caina duere finoia, naimie uaina cai ñnua. Naimiena cai ñnuamona, monamo naimie ðiga ico jaca iiticaí. ¹⁰Naimaci comeciái lla isoi, cai eniruemo ite mootiaí dallu caina duere ñnode. Cai Moo Jusiñamui caina llofuellena, caina duere ñnode. Naimie illa isoi, mare rafue ðibeimo caina itataiacade.

¹¹Jusiñamuimona duere cai sefuia, iena gaiñedicaí. Iena jitañedicaí; iadedi naiemona cai fueoia, jeacinona dane cai finoñellena, naimie jitailla isoi marecinona ñnocana jaiticaí.

Jusiñamui rafuena cai cacaía, iena cai aruiruiñena

¹²Nie isoide ramo caimo jiria: “Jusiñamui caina ñbai canoñede” raiticaí. Iemona naimiena ñanonocaiacadicaí; ia iemo cai comeciaina cai facañena. Jusiñamui rafuena cai sefuiruia, duere cai sefuia, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise ñnuamona, cai comeciái ocuiñocana mai cai jailli. ¹³Jiaie rafuedo cai jaiñena; iadedi Cristo rafuedo raise ñnocana mai cai jailli. Iese cai jaia, Cristo rafuedo naimaci jiai raise jaillena, jiaie creyentiaina canoñicaí. ¹⁴Nana comini ðiga uri omoi i. Jusiñamui jitailla isoi, marecinona fino. Iese bu iñenia, Jusiñamui jitailla isoi bu marebicaiñenia, Jusiñamui illanomo jaca iñeite. ¹⁵Jusiñamui caina duenaillamona, nana cominina jillotaiacade. Omoimona buna Jusiñamui duenaillacinona ñanonocaillana jitañedicue. Omoimo iese suia, iemona conini gaiñenacino comuirede. Iena jitañedicue. Omoi comeciái daje isoi lloillana jitañidicue. ¹⁶Jearede rafuena jaca finoño. Esaú micori jaiie ñnoca rafuena uiñotomoi. Jusiñamui ie moo Isaac micorimo mare rafuena suillena llote. Esaú nano doforamiena

illamona, ie moo fiódaille mei, Jusiñamui jai lloga rafue ie moo uai díga, ie moo ra díga, naimie feiñoiacade. Naimie moo nai fiódaiñena facaise dacaiño Esaú aimetalla jira, ie amamona guillena jicade. Iemei naie guille ifomo ie moomona feiñolle uaina ie amamo fecade. Naie facaise dama ie jitailla ramo comecina facade. ¹⁷ Ie amamo ie uaina fecaja mei, ie comeci iuai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoi jamaiñeno.

¹⁸ Moisés micori facaise cai hebreos cominimo Jusiñamui ie rafuena jaie llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiai jitibicaide. Nainomo aifi eo ite. Eo boriuide. Eo gurude. ¹⁹⁻²⁰ Trompeta ficirenana cacadimaci. Iena ciuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toñiai nainomo macaria, nofici díga fairinuamona, naimiena omoi meine” llote. Jusiñamui llua cacajamona, eo jaciruitimaci. Moisés micorimo: “Jusiñamui caimo nia llua jai jitañedicaí” llotimaci. ²¹ Eo jacirede ra illa jira, nana comini díga Moisés jiai jaciruite. ²² Sinaí anedumona lloga rafuedo birui jaiñedicaí; iadedi jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sión railla anedumo Jerusalémo Jusiñamui jofomo naimiena nabaillena jaiñedicaí. Monamo Jusiñamui ite; iadedi birui naimiena atona nabairedicaí. Cai fiódaia, naimie dine jaiticaí, naimie díga jaca cai illena. Nainomo ie jaienisai naimiemo iobillacinona fecacabidimaci. ²³ Ailluena comini díga, Cristona birui iñoticaí. Nana caina Jusiñamui fetuanona, cai mameciaí monamo ite rabenicomo jai cueda. Jusiñamui nana comini comeciaina uiñote. Naimiena iñotinomona ailluena jai fiódaitimaci; ia naimie ecimo naimaci joreñuai jiai jai itimaci. ²⁴ Jesús fiódalla jira, Jusiñamuina nabairedicaí. Naimie fiódalla jira, caimo jiaie rafue birui ite. Naie rafuena cai iñuamona, cai comeci jai marena iticaí. Jiai cai jeacinona oni dotade. Iena jiai jai feitate. Abel micori jaie fiódaia, naiemona Jusiñamui buna ie jeacinona feitañede; iadedi Jusiñamui Abel micori meinetimiemo ibana ote.

²⁵ Ero, Jusiñamui rafuena omoi cacaia, iena jamaiñeno. Iena aruiruiñeno. Moisés micori facaiseconi naie comini Jusiñamui lloga rafuena cacadimaci. Jiaíno iena jitañedimaci. Iena iñoñedimaci. Ie jira Jusiñamui naimacina duere finode. Cristomona jiaie rafue birui cacadicaí. Bie rafuedi Moisés lloga rafue baifemo faite. Jusiñamui duere finollcinomona buna jillobinide. Cai duere sefuiñellena, Cristo rafuena cai iñua. ²⁶ Moisés micorimo ie rafue llua facaise, Jusiñamui naie eniruena niraídotade. Jusiñamui jairuido jiai llote: “Eniruena dane niraídotaiticue. Ucuaina, fivuina, jitoma díga, jiai niraídotaiticue” llote. ²⁷ Naimie lloga uaimona enirue fuillena uiñoticaí. Monamo ite ra fuillena jiai uiñoticaí. Nana naie rana naimie fuidoite; iadedi naimiena cai iñua jira, naimie caina fuidoñeite. Ico cai illinona jai finode. Iena naimie fuidoñeite. ²⁸ Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai iñuamona, naimiena cai raise sedajamona, naimiena cai iobitaja. ²⁹ Naimiena iñoñedinona Jusiñamui eo duere finolle jira, naimiena jaciruillanona naimiena cai iñua.

13

Jusiñamuina cai iobitaja

¹ Dani conini jiaie creyentiaína isiruicana omoi jai. ² Abraham micori Jusiñamui jaienisaina uiñoñoeno jaie nafuete. Jiaie illanomona jiaie creyentiaí bia, naimaci inillino iñena jira, naimacina nafue. Jusiñamuimona ibana feiñoitomoi. ³ Cristo rafue muidona damerie creyentiaí cárcelmo itimaci. Nainomo omoi jiai itomoidena, naimacina feitañoeno. Naimacina isiruillamona cano. Damerie creyentiaí duere sefua, naimacina jiai cano. Jairuido naimaci isoi nibai duere sefuitomoi. ⁴ Airedimie jiaie riño díga illemo ie comecina facañena. Inirediñaiño jiaie iima díga illemo ie comecina facañena.

Ie aiñede riño diga bu ia, ie iniñede iima diga bu ia, maraiñede. Iena finoñoeno. Iena bu finoia, ie jeacino Jusiñamuimo lloñenia, Jusiñamui naimiena duere finoite. Naiñaiñoña jiai duere finoite. ⁵ Ailluena ucube ollena, iemo niciñoeno. Omoimo ite ra diga caimare i. Iena Jusiñamui facaina lloraima jaie cuega: “Jusiñamui llote: ‘Omoína jaca canoíticue. Omoína jaca fainonocaiñeíticue’ llote”. ⁶ Naiena cai uiñuamona, cai comeciaina ocuiñoíticai. Jaie cuegafue isoi lloíticai:

Cai Nama caina canoite.

Ie jira cai comeciai jarire finoñeíticai.

Buena jaciruiñeíticai.

Jiaimie buena caina jaciruitanide.

⁷ Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoi. Cristo díbeimo naimaci illamo omoi comeciaina facajanona, naimaci isoi Jesucristona ñnocana mai omoi jai. ⁸ Naimie jaca ñnogamiena uiñotícaí. Naimie ie lloga uaina jaie jaca finode. Iena birui finode. Ico iena jaca finoite. Ie jira naimiena cai ñnuá. ⁹ Cristo ieñede rafuedo jaiñoeno. Diga jiaie llofuiacino ite; iadedi iedo jaiñoeno. Jusiñamui caina canuamona, cai comeciaina birui ocuiñocana jaiticai. Moisés micorimo lloga rafuedo navui jaidicai. Diga ra fimaide; iadedi naiedo cai jaillamona, cai comeciai raise illena, buena oñedícaí. ¹⁰ Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. ¹¹ Moisés rafue llua isoi, nanoca ñairaima toiniaina faja mei, naie dirue dacaiño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñoena jira, nainomo iena jobaide. ¹² Ie isoide. Cristona comini jitaiñoena jira, ie comini nairaimona jino uillanona, naimiena meinetimaci. Nainomo jeacino facaina fiodaite, comini comeciaina raise finollena. ¹³ Ie jira Moisés micori lloga rafuena cai fainonocaida, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca ñnocana cai jailli. ¹⁴ Beno jaca cai illemo ocuiríñedícaí; iadedi monamo Jusiñamui diga cai jaca illemo ocuiridícaí. ¹⁵ Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uiñuamona, naimiemo iobillacinona jaca cai fecaja. ¹⁶ Marecinona finocana mai cai jailli. Jiaie creyente jitai raillano, omoi raruiaimona naimiena omoi cano. Iena omoi finoia, Jusiñamui omoiri iobite.

¹⁷ Omoi llofueraini uaina ñno. Naimaci anamo raise omoi i. Cristo díbeimo omoína raise itataiacadimaci. Iese naimaci finoacaiñoenia, Jusiñamui naimacina duere finoite. Naimaci uaina omoi ñnoia, Cristo díbeimo caimare maijítimaci. Naimaci uaina omoi ñnoñenia, sunaitimaci. Sunailla jira, naimaci llofuiacinomona buena oñeitomoi.

¹⁸ Jusiñamui diga omoi ñaia, cai facaina omoi jii. Jusiñamuimona cai comeciai marena illana uiñotícaí. Naimie jitailla isoi, mare rafuena finocana jaiacadícaí. ¹⁹ Omoi dine cue raire illena cue facaina Jusiñamuimo eo omoi jii.

Naimaci marena jaca illana jitaide

²⁰ Jusiñamui conini omoi comeciaina uri itatajana jitaídícaí. Cai Nama Jesús fiodailla mei, Jusiñamui naimiena jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacina feitate. Naimie fiodailla jira, naimie anamo cai illamona, caina raise sedarede. ²¹ Jusiñamui ie jitaillacino omoi finuana canoite. Cristona omoi ñnuana canoite. Mare rafuena omoi finuana canoite. Jesucristo uaido omoína canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaídícaí.

²² Cue amatiai, bie cartana caimare feiño. Eo are rafuena cueñedícaí. Janore cueticue. ²³ Cai ama Timoteo cárcelmona jai jino bite. Cue dine naimie raire bia, omoi dine naimiena atiíticue. ²⁴ Nana omoi llofuerainimo cue uaina oredícaí. Ua nana creyentaimo cue uaina oredícaí. Italiamona bitino imaci uaina jiai oredimaci. ²⁵ Jusiñamui omoína jaca duenaillana omoi uiñuana jitaídícaí. Mai. Macaibaite.

SANTIAGO ORETAGA RABE

Uaiduacino

¹ Caimaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiamo omoi duillamona, omoi jai judaisilla jira, omoimo cue uaina oredicue.

Ramo omoi jiriadedi, omoi comeciaina mairita

² Amatiai, diga ie ramo omoi jiriadedi, eo iobilla. ³ Ramo omoi jiriadedi, Jusiñamui uaina raise omoi ñnuana uiñoitomoi. Iemona omoi comeciai mairillemona, ñnocana omoi jaitomoi. Biena omoi uiñua jira, iobilla. ⁴ Mairicana omoi comeciai jaia, omoi comeciadi marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo ñnoitomoi; ⁵ iadedi omoimo rafue ia, niese nibaiana omoi uiñoñenia, Jusiñamuimo jica. Ie mei omoimo naimiedi abi uiñoraciona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite; ⁶ iadedi omoi jicaia, uai ñnuanona jica. Omoi comeciai ñnoñenia, jicañeno. Comecina ñnoñedi aifi betaja jorai isoide. Naimie comeci naganomo ite. ⁷ Naimiedi Jusiñamuimona ra feiñollemono sedaite. ⁸ Naie isoidimiedi nana naimie illa ñnori ie comeci naganomo iite.

⁹ Naimie ramo jiriadedi, Jusiñamuimona naimie jamai bue isoñena jira, duerede creyente iobilla; ¹⁰ iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite. ¹¹ Jitoma a ia, eo ecasillamona, safia safenaite. Liride. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

Nana mare rafue Jusiñamuimona feiñotica

¹² Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuenta isiruitinona cue illanomo jaca itataiticue”. ¹³ O ramo bu faia, lloñeno: “Jusiñamuidi cuenta ramo faite”. Maraiñede rafue ñbeimo naimie iñena jira, naimiedi buna ramo jaca fañede. ¹⁴ Cai comecimo naie jitaillacino illa jira, ramo faia uai ñnotica. Naie facaiseconi caimona ebirena jirari, iena finoacadica. ¹⁵ Cai jitailla jira, jeacinona finodica. Jeacinona finocabillanona jaillano, faifitica. ¹⁶ Ero, cue isiruiga amatiai, Jusiñamui omoina ramo faitatañena jira, naimiemono da mare rafue billa jira, ñani omoi abina jifueño. ¹⁷ Nana mare rafue cai Moomona feiñotica. Naimiedi monamo ite lligaiñoraniaina jaie finode. Naie radi nagarui daje isoi lligaiñoñede; iadedi naimie daje isoñede. Naimie comeci jacanano ñanoconi nagarui ite. ¹⁸ Naimie jitailla jira, ie uai lluno, naimie caina ie uruiaina itatate. Ie uruiaimona nano doforanidica.

¿Nie isoide rafuena finoacadica?

¹⁹ Cue isiruiga amatiai, Jusiñamui rafuemo raise cacarei. Ie mei naie uaina uaitaño. Jiai raire iciriño. ²⁰ Icirillamona, Jusiñamuidi cai marena jitailla isoi, buna jaca marebicaiñede. ²¹ Ie jira nana maraiñedicinona oni fañonocai. Jusiñamui uai omoi comecimo fecuise abi iedoño nagarui feiñocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede. ²² Cacajamona iena ñnocana jai. Cacajanona iena omoi ñnoñenia, ñani abina jifuetomoi. ²³ Bu naie uaina cacajamona ñnoñenia, naimiedi acaraimo eruaidimie isoide. ²⁴ Ie uiecona eruai. Naimie jailla meinoconi, ie eruaiilla ie uiecona jai raire faitate. ²⁵ Jusiñamui llogacinona bu eo facajia, iena feitañede. Iena ñnote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena ñnuva jira, naimie comeci caimare ite.

²⁶ “Jusiñamuina sedadicue” raillanona ie comecina facadimiedi jeare ñaia, maraiñeno ñaia, dama naimie abina jifue. Jusiñamuina taino sedade. ²⁷ Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñeite. Jusiñamui dibeimo iñedino isoi iacaiñeite. Jusiñamui naimie iese sedajia, Jusiñamuimona eo mare.

2

Nana cominimo comeciaina lloitaicadica

¹ Amatiai, cai Nama Jesucristo uai eo ebirede. Naimiena omoi ñnua jira, naimacimo daje isoi comeciai lloillamona, nana cominina daje isoi nafue. ² Ero, omoi roracomo mena ñima bia, ¿nie ñmana nafueitomo? Dame ucuberedimie. Naimiemo oro ie anillos ite. Eo mare ñiroina jitade. ³ Ucuberedimie llotomo: “Bai bene bancomo rai”. Dueredimie llotomo: “Bai bene naidai. Raiacania, eniruemo rai”. ⁴ Iese omoi lloia, damiena jai raise nafuetomo; ia damiena jai raise nafueñedomo. Iaimai ñiroimo omoi eruaillamona, nafuetomo. Mare rafuemo comeciaina facañedomo.

⁵ Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiena naimaci eo ñnua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”. ⁶ Ero, Jusiñamui dueredinona nafue; iadedi dueredimienai jai nafueñedomo. Dueredinomona duere sefueñedomo; ia dueredimienai jai duere finodomoi. Ucuberedinomona duere sefuicabidomoi; ia ucuberedimienai raise nafuetomo. Maijitalena, juez ñine ucuberedino omoina uitatatimaci, omoina llogidollena. Dueredino iese omoina finoñedimaci; ia ucuberedinodi iena finocabidimaci. ⁷ Cristomo omoi jainaiaillamona, ucuberedino naimiena jeare jiai ñaitimaci.

⁸ “Cristo llogacino finodica” raillanomo comeciaina facajamona ucuberedimienai omoi nafueia, cuemona mare. Cristo naiena iese caimo llote: “O jofo ecimo itinona isirui, dama o abina o isiruilla isoi”. Iese omoi ia, cuemona mare; ⁹ iadedi nana cominina daje isoi omoi nafueñenia, jeacinona jai finodomoi. Jai Jusiñamui llogacinona ñnoñedomoi. Jusiñamui llogacinomona jai maraiñeno itomo. ¹⁰ Nana Jusiñamui llogacinuaimona daje llogacinona omoi ñnoñenia, Jusiñamuimona nana naie llogacinuaina jai ñnoñedomoi. ¹¹ Jusiñamui caimo jai llote: “O añede riño diga iñeno. O ñiñede ñima diga iñeno”. Jiai llote: “Jiaimienai meineño”. O añede riño diga iñedio; iadedi jiaimienai o meineia, nana Jusiñamui llogacinuai jai ñnoñedio. ¹² Jiairuido Jusiñamuidi juez isoi omoimo lloite. Omoi comeciaino iticino ñiese omoimo lloite. Ie jira marena ñaino. Marena i. ¹³ Ero, omoimo naimie lloia, jiaie cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jiaie cominina birui omoi duenaia, Jusiñamui naie facaise omoina jiai duenaite. Duere sefuillena omoimo lloite.

Jusiñamuina cai ñnuamona, diga rafuena cai finua

¹⁴ Amatiai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracinodi naimienai jillotaite? Jillotañeite. ¹⁵ Jiaie rafuedo iena lloiticue. Omoimona daje creyente ñiroinia, guille iñenia, ¹⁶ naie creyente omoi ñine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomo? ¹⁷ Ero, Jusiñamui omoi ñnuamona mare rafuena omoi finoñenia, omoi ñnoracino ieñede. ¹⁸ Omoimona dame cuemo ñibai lloite: “Jusiñamuina raise ñnoticue”. Jiaimie cuemo ñibai lloite: “Mare rafuena finocabidicue”. Iaimaaimo lloiticue: “Jusiñamuina cai raise ñnoia, mare rafuena finocabidicai. Mare rafuena cai ñnuamona, Jusiñamuina cai raise ñnuana uiñoiticai”. ¹⁹ Dajede Jusiñamuidi illana ñnotio. Iena o ñnuano, mare; iadedi jananiai iena jiai ñnotimaci. Ie jira Jusiñamuina jaciruitimaci. ²⁰ “Jusiñamuina raise ñnoticue” ñibai ñia raitio. Abina raise ñia uiñoñedio. Mare rafue o jiai finoñenia, dama

abi o ñnoracinodi ieñede. ²¹ ¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. ²² Abraham micori ñnote. Mare rafuena jiai finode. Mare rafue naimie finuamona, naimie jai raise ñnote. ²³ Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. ²⁴ Abraham micori rafuemona daje rafuena uiñoticai. Dama ie ñnoracino diga jaca bu marebicaide; iadedi Jusiñamuina ñnuano, mare rafuena finuano, marebicaide. ²⁵ Jiaie rafuedo iena lloiticue. Jai Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraimaiaina feiñote. Naiñaiño nairaidi iaimaiaina meinellena jenodimaci. Meineñellena, naiñaiño iaimaiaina reide. Ie mei iaimaiaina bainino oretate. Mare rafuena naiñaiño finuamona, Jusiñamuimona naiñaiño marebicaide. ²⁶ Ero, bumo ie joreño jai iñenia, cajeñede. Ie isoide. Mare rafue bu finoñenia, ie ñnoracinodi ieñede.

3

Cai fuiaimona jeacinodi comuide

¹ Amatiai, omoimona diga comini creyentiaina llofuerainina jaiñeno. Jusiñamuidi juez isoi ico lloite. Llofueraini jiaie comini baifemo uiñuamona, Jusiñamui rafuena naimaci eo raise ñnoñenia, Jusiñamui naimacina jiaño baifemo duere finoite. Iese riire naimacimo lluaña jaciruillano, llofuerainina ailluena jaiñeno. ² Nana caidi diga marañede rafuena finocabidicai. Marañedicinona bu ñaiñenia, jai marebicaide. Naimie nana ie comeci namarede. ³ Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicai. ⁴ Riire aifi aillue botena nine uiacade; iadedi eo janorede quilla diga, ie jaiña dine piloto botena dataoicaide. ⁵ Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaina bootate. ⁶ Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaiacade.

⁷ Nana rana toiredicai: ocainai, sillini, ofomai, eniruemo biicaidino, lliciai. Nana toiredicai; ⁸ iadedi jaca bu ie fuena namatanide. Cai fuiai jaca eo marañede. Iemona eo marañede rafue icabite. ⁹ Cai fuiai diga cai Namamo, ua cai Momo, marecinona lloticai. Caina naimie finuamona Jusiñamuina eruaidicai; iadedi cai fuiai diga naimiena jeare jiai ñaiticai. ¹⁰ Cai fuedi dajede; iade marecinona ñaiticai. Marañedicinona jiai ñaiticai. Amatiai, iese cai ñaiñena. ¹¹ Ero, daje pozomona mare jinui, erirede jinui diga, oñedicai. ¹² Amatiai, higuera railla riaromona aceitunadi comuiñede. Uvas railla riaromona higo railla riaradi jiai comuiñede. Cuerede jinuiomona mare jinuiña oñedicai. Cai fuiaimona jeacino comuiñellena, cai fuiaina cai namataja.

Ua abi uiñoracino

¹³ Omoimona, ¿bu ua abi uiñote? Naimie ua abi uiñoia, naimie marena illamona, iena uiñoitomoi. Abi iedoñeno mare rafuena naimie finoia, naimiemo ua abi uiñoracino illana uiñoitomoi; ¹⁴ iadedi naimie abi eo uradoia, dama naimiemo ite ramo comeciña facaia, naimie abi uiñoracino diga naimie abina iedoñena. Jai tainona llote. Naimie llua isoi iñede. ¹⁵ Naie isoide uiñoracinodi Jusiñamuimona iñede. Bie enirue ie. Comini ie. Taife ie. ¹⁶ Comini abina uradoia, dani naimacimo ite ramo comeciña naimaci facaia, comini uri iñedimaci. Diga marañede rafue naimacimo ite. ¹⁷ Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiaie cominina duenante. Mare rafuena finocabide. Cominina raise nafuete. Abi tainona jifueñede. ¹⁸ Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

4

¿Bue ñellena uri iñedicai?

¹ ¿Bue ñellena fuiriruidomoi? ¿Bue ñellena iciriruidomoi? Omoi comeciáimo maraiñedicino illa muidona. Omoi comeciáimo maraiñeno jitaillacino illa muidona. Naie jitaillacino omoi comeciáimo namataacana muidona. ² Rana jitaidomoi. Iena omoi feiñoñena jira, naimaci rana fiillena, comena meinetomoi. Eo uradoidomoi. Omoi jitaille rana feiñoñena jira, fuiridomoi. Omoi jitaille rana Jusiñamuimo omoi jicañena jira, iena feiñoñedomoi. ³ Jiaicaiño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitailla ra feiñollena, omoi comeci jaisillena, jicadomoi. ⁴ Jusiñamuina birui raise jitañedomoi; ia naimie díbeimo iñedinona jai jitaidomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Niese iena uiñoñedomoi? Bu naie rafuena isiruillacana, Jusiñamui díbeimo jai iacaiñede. ⁵ Jusiñamui cuetatagafuiaina raise facañedomoi. Naiedi caimo llote: “Jusiñamui omoimo jai fecaca Joreñodi omoi comecina eo raise namataacade”. ⁶ Caina eo duenaila jira, naimie díbeimo cai raise illena, Jusiñamuidi caina eo canoacade. Jusiñamui cuetatagafuiái iena llote: “Jusiñamuidi abi iedotimiena canoñede; iadedi abi iedoñedimiena canode”. Naimie díbeimo iacaiñedimiena ñaite. Naimie díbeimo iacadimiena canuana jiaí ñaite.

⁷ Ie jira Jusiñamui anamo omoi i. Naimiena raise omoi iino. Taife uaina jitañenanona, naimie uaina oni caiño. Ie mei omoimona naimie oni jaite. ⁸ Jusiñamuina nabaillena, naimie díne iaire omoi i. Ie mei naimie omoi díne iaireno iite. Jeacinona finoraini, omoi comeciái iuaillaina meido. Naganomo omoi comeciaina facañeno. Omoi comeciaina marena fino. ⁹ Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino facaina omoi mai sunai. ¹⁰ Jusiñamui díbeimo abina iedoñeno omoi i. Ie mei naimie omoi comeciaina iobitaite.

Jiaino jinafomo jeare ñaiñeno

¹¹ Amatiai, maraiñede rafuena naimaci finoiadedi, jiaino jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise iñoñede. Jusiñamui uaina naimie iñoñenamona, Jusiñamui uaina jiaí jamaiñoacade. ¹² Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoñeno.

Ico are caimo suite rafuena uiñoñedicai

¹³ Jiaie rafuena lloiacadicue. Nibai llotomoi: “Birui jiaie nairaimo jaiticai. Birui cai jaiñenia, ico are jaiticai. Rana fecajamona ucube cai ollena, nainomo daje año iiticai”. ¹⁴ Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticai. Dallu bene iticai. Ie mei jai iñedicai. ¹⁵ Ie muidona omoi llua: “Cai Nama jitaia, nia iiticai. Cai Nama jitaia, nie isoide rafuena finoiticai”. ¹⁶ Iena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduardi maraiñede. ¹⁷ Mare rafuena finuana uiñotimiedi mare rafuena finoñenia, jeacino jai finode.

5

Ucuberedinomo llucacino

¹ Ucuberedino, daje rafuena omoimo jiaí lloiacadicue. Omoimo ramo jirite. Ja eo duere sefuitomoi. Ie jira cuiri-curi ee. ² Omoi raruiái ja sabite. Omoi mare iniroi ja sabite, ibuisai guilla jira. ³ Omoi ucube ja ieñeite. Ieñena jira, comini omoi faifillana uiñoitimaci. Abina faifitomoi, iraimo ra boa isoi. ⁴ Ero, ailluena ucube irairuillai iena jai eenotomoi. Naie facaisedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade. ⁵ Omoi illa dinori ailluena raruiái omoimo ite. Nana omoi comeciái jitailla rafuena finodomoi. Omoi comeciái jitailla isoi itomoi. Naie iba ollirui jai ride. ⁶ Maredinona duere finodomoi. Nie isoide rafuena omoimo finoñedimaci.

Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

Cai Nama billemo fecuise omoï ocuiri

⁷ Amatiai, cai Nama billemo fecuise omoï ocuiri. Cominidi imaci illimona riaru feñuana sedadimaci. Noci deillemo fecuise ocuiridimaci. Ie mei riaru llisillana otimaci.

⁸ Ie isoi cai Nama billemo fecuise ocuiri. Omoï comeciai rucaicueriñeno, cai Nama bille iaire illa jira. ⁹ Duere omoï sefua, Jusiñamui juez isoi omoïmo lloi raillano, “Jiaie creyente muidona duere sefuidicue” raiñeno. Jusiñamui omoï illana raise uiñote.

¹⁰ Amatiai, Jusiñamuina lloraini micoriaimona cai fueua. Cai Nama ðibeimo ñaitimaci. Duere sefuidimaci; iadedi eecuiñedimaci. ¹¹ Naimaci Jusiñamuina fañonocaiñena jira: “Naimaci comeciaidi caimare itimaci” raiticai. Job micorina jiai comeciticai. Naimie jaie ite. Naimie eeñeno duere sefuide. Duere sefuide; ia Jusiñamuina fañonocaiñede. Ie mei ja muidomo nie isoide cai Nama naimiena finuana uiñoticaï. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

¹² Cue amatiai, nanoca rafuena nia lloiacadicue. Omoï lloga uai omoï finollena jiaie comini uiñollena, Jusiñamui mamecina llinotomoi. “Iena cai llinoia, cai lloga uaina cai finoñena, Jusiñamui caina duere finoite” raitomoi. Omoï lloga uai omoï finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoï llumona, uanaicinona jaca llono. Iese llono, Jusiñamui omoïna duere finoï raillano.

¹³ Omoïmona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. ¹⁴ Duidimie ia, naimaci naimieri Jusiñamuimo jillena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena. ¹⁵ Finuano jiaia, jilloite. Cai Nama naimiena jillotaite. Naimie finoca jeacinona oni jiai dotajite. ¹⁶ Ie jira coninimo omoï marañedicinona llono. Ie mei Jusiñamuimo coniaina omoï jii, omoï duicomona omoï jilloillena. Jusiñamuimo marebicaidimie jiaia, diga rafuena finorede. ¹⁷ Elïana comecitomoi. Jaie ite; ia naimiedi cai isoide. Jusiñamuimo jiiide, noci deiñellena. Ie mei daje amani fiemona abimo atomonado jaca deiñede. ¹⁸ Ie mei dane jiiide, noci deillena. Ie jira noci deide. Ie mei riaru dane sicode.

¹⁹ Amatiai, omoïmona damiedi Jusiñamui ie uanaicino ðibeimona jaia, dane Jusiñamui ðibeimo naimiena bu itataia, eo mare. ²⁰ Iena bu finoia, naimiena ie uañedicinomona itatate. Faifillemona jai jillotate. Jusiñamuidi naimie jeacinaia oni dotajamona, iemona jiai jillotate. Mai. Santiagodicue.

PEDRO NANO ORETAGA RABE

Tuude cominimo Pedrodi cartana cuete

¹ ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. ² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi ñinollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

Jesucristo diga jaca cai illemo ocuridicai

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, ñinocana cai jaillamo jiai ocuridicai. ⁴ Omoi ocurillafuedi monamo ite. Faiñeñitomoi; ia nainomo caimare marena jaca itomoi. Jusiñamui iese omoina itataite. ⁵ Jusiñamuina omoi ñnua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. ⁶ Ieri iobidomoi; iadedi dallu diga rafuemona duere sefuidomoi.

⁷ Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca ñede. Ie isoide. Cristona omoi ua ñnuana facacillena, diga rafuemona duere sefuidomoi. ñinocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoiri eo iobite. ⁸ Jesucristona jaca cioñnedomoi; iadedi naimiena jai isiruitomoi. Naimiena jaca cioñnedomoi; iadedi naimiena jai ñnotomoi. Ie jira eo iocire itomoi. ⁹ Cristona omoi ñnuamona, jeacinomona jai jillobidomoi. ¹⁰ Jusiñamui facaina lloraini micoriaidi Jusiñamui omoina jai duenaillana jaie llotimaci. Jusiñamui omoina jilluana jaie llotimaci. Iena naimaci raise cacaiñenia, naiemo comeciaina facauidimaci. ¹¹ Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo iese ico suillena uiñoiacadimaci. Naie facaise illemo comeciaina jiai facadimaci. ¹² Jusiñamuidi naie rafue naimacimo duiñenana uiñotade. Naimacina naie rafue caimo duillana jiai uiñotade. Jusiñamui ie Joreñona monamona naimacimo oretajanona, ie uaido naimaci llumona, naimie facaina llorainimona bie mare rafuena birui jai cacadomoi. Jusiñamui jaienisa bie rafuena jiai raise uiñoiacadimaci; ia cai isoi iena uiñoñedimaci.

Naimie jitaillacinona cai finollena, Jusiñamui caina fetode

¹³ Ie jira omoi comeciai raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uiñoitomoi. Iemo iocire ocuri. ¹⁴ Jusiñamuina omoi nia uiñoñena facaise dani omoi comeciai jitaile rafuedo jaisoidomoi. Naimiena omoi jai ñnua jira, naimiena omoi nia uiñoñega facaise finoca rafuedo birui omoi jaiñeno. Mare uruiaci imaci moo uaina ñnotimaci. Jusiñamui uruiaina omoi jai illa jira, naimie uaina ñno. ¹⁵ Jusiñamui ie uruiaina omoi illena, jai omoina fetode. Naimie mareuilla jira, marena omoi i. ¹⁶ Iena naimiedi jaie cuetatate: “Cue mareuidimiena isoi, marena omoi i”.

¹⁷ Cai Moona Jusiñamui illamona, naimiemo birui jiidomoi; iadedi juez isoi nagamiemo ico Jusiñamui llua jira, nana omoi ille ñnori jaciruicana omoi jai. Nagamiema ie marañede finoca rafue diese duere finoite; ia marañede rafuena finoñedimiena duere finoñeite. ¹⁸ Omoi einamacaci rafuedo jai jaisoidomoi. Naie rafue jamaifue. Naifuemona

Jusiñamui omoína jai jillotate. Ibatajamona omoi jeacinomona jillotañede. Ucubedi raire cueruide. Raire cueruide ra diga omoína jillotañede; ¹⁹ iadedi Cristo diruedo naimie dacaiño fiodaillamona, omoína jaca jillotate. Cai comini imaci jeacino facaina mare toica llaudana fauidimaci; ia Cristomo jeacino iñena jira, cai jeacino facaina birui dacaiño fiodaite. ²⁰ Caina jilloitallena, enirue nia iñena facaiseconi Jusiñamui Cristona jaie fetode. Naimiëna omoi uiñollena, birui bene eniruemo Jusiñamui naimiëna oretate. ²¹ Cristo muidona Jusiñamuina ñnotomoi. Cristo fiodaite; ia iemona Jusiñamui naimiëna jillotate. Ie mei monamo ie ecimo naimiëna dane itatate. Ie jira Jusiñamuina ñnotomoi. Omoi fiodaia, dane jilloillemo jiai jai ocuridomoi. ²² Uanaicinona omoi ñnuamona, omoi comeciai jai jeanidimaci. Ie muidona jiaie creyentiaina isiruicana omoi jai. Omoi comeciãmona conini omoi isirui. ²³ Jusiñamui cominina jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iite. Naie uaido naimie cominina jaca iiticaí. ²⁴ Jusiñamui facaina llorãima micori iena jaie cuete: Nana cominidi raiticiaí isoidimaci. Safia dallu ebirede; iadedi raiticiaí ie safia diga are iñede. Ie isoide. Diga rafuena finuanona, dallu iticaí. Are iñedicaí; ²⁵ iadedi Jusiñamui uai jaca ite cuete. Naie uaidi mare rafue. Naie rafuena birui jai cacadomoi.

2

¹ Jusiñamui cominina cai illa jira, jiaie cominina gaiñenacinona fainonocai. Nana jifuiacinona fainonocai. Abina caitajacinona feita. Nana abi uradoillacinona feita. Jiaie comini joreña ñaiñeno. ² Ero, raise moonaillena, raise ecairellena, janosa monoi ijina jitaide. Ie isoide. Omoi comeciai raise marena illena, Jusiñamui rafuena jitaídomoi. ³ Cai Nama omoína duenaillana jai omoi uiñuamona, naimie uaina ñnocana jai.

Cristodi jofomo ite nanoca nofici isoide

⁴ Ie cominina raise omoi illena, Jusiñamui rafuena finocana jai. Naimie omoína jai fetode. Naimiemo omoi raise duillana jitaide. Iena omoi raise uiñollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiãina jai fetode. Nanoca nofici diga naie jofo nillana tãinede. Cristodi naie nanoca nofici isoide. Cai nãrai Cristona jaie jitaíñedimaci; iadedi Jusiñamuimona naimie maredimãna jira, Jusiñamui naimiëna fetode. Caidi jiaie noficiãí isoidicaí. Ie jofona nillena isoillena, Jusiñamui caina fetode. ⁵ Naimiëna cai jai ñnuua jira, naimie cominina jai jaidicaí. Naimie diga jai atona ñãiredicaí. Naimie diga jiaie comini facaina jiai ñãicabiticaí. Naimiëna cai raise sedallena, Jesucristo caina canuamona, Jusiñamui jitaillacinona finocana jaidicaí. ⁶ Jusiñamui facaina llorãima iena jaie cuega:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiëna jai fetodicue. Naimiedi eo mare.

Naimiëna ñnuamona, comini iobitimaci

cuega. ⁷ Naimiëna omoi ñnoia, Jusiñamui omoína iobitaite. Naimiëna omoi ñnoñenia, faífitomoi. Jusiñamui facaina llorãima micori iena jaie cuega:

Jofona finorãini jitaíñena noficidi nana naie jofomo ite noficiãí baífemo jai faíga

cuega. Ie isoide. Cai nãrai Cristona jitaíñede; iadedi Jusiñamui naimieri eo iobide. ⁸ Dane cuega:

Nine naimaci macaria, naie noficimona eicãitãillamona, uaitimaci

cuega. Cristona cuete. Cristo uaina naimaci ñnoñena jira, Jusiñamui llua isoi faífitimaci.

Pedro Jusiñamui fetocanona llofuede

⁹ Jusiñamui jai fetocanodomoi. Naimiemo omoi jai duillamona, naimie diga atona ñãiredomoi. Jusiñamui ua cominidomoi. Naimiëna omoi nia ñnoñenia, jeacino anamo omoi illa jira, jitaíñedonomo itomoi isoidomoi. Naiemona omoína jai jillobitade. Naimie anamo jai omoi illamona, useredonomo jai itomoi isoidomoi. Eo mare rafue omoímo

naimie finua jira, iena llocana omoi jai. ¹⁰ Jaie Jusiñamui cominiñedomoi; iadedi birui Jusiñamui cominidomoi. Naimie omoina duenaillana jaie uiñoñedomoi. Birui iena uiñotomoi.

Pedro Jusiñamui jitaillacinona finocana cai jaillana llofuate

¹¹ Cue isiruiganodomoi. Jusiñamui illanomo omoi birui jainaiailla jira, eniruemo jaca iñeitomoi. Eniruemo jaca omoi iñena jira, jeacinona finocana jaiñeno. Jeacino omoi comeciaina namataacana jira, iena ebiruiñeno, naie anamo omoi i raillano. ¹² Jusiñamuina iñoñedino motomo omoi illamona, mare rafuena finocana jai. Omoina birui jeare ñaitimaci; iadedi omoi marena illana naimaci uiñuamona, Jusiñamuina ico naimaci iñoia, naimiemo iobillacinona fecaitimaci. ¹³ Cai Namamo omoi duilla jira, illaicomini anamo raise i. Riai diga omoi nanoca illaima uaina iño. ¹⁴ Naimacina omoi illaicomini fetua jira, omoi gobernadores uaina iño. Maraiñede rafue omoi finoia, omoina duere finoitimaci; iadedi mare rafuena omoi finoia, omoi iobitimaci. ¹⁵ Jusiñamuidi mare rafuena omoi finuana jitaide. Iena omoi finua jira, omoina ebena ñaitino uaina llicaitaitomoi. ¹⁶ Jusiñamui anamo cai illamona: “Jiaie illaima uaina iñoñeiticai” raiñeiticai. Cai enirue illaima uaina cai iñoñenia, jeacinona finodicai. Jusiñamui dibeimo cai illa jira, naimie jitaillacinona finocana cai jailli. ¹⁷ Nana cominimo marena fino. Nana creyentiaina isirui. Jusiñamuina jaciruiocaida iño. Riai diga omoi illaima uaina iño.

Cristo duere sefuilla rafuemonafueoiticai

¹⁸ Patrón anamo damierie itomoi. Omoi patrón ocuica uaina iñocana omoi jai. Omoi patrón marena fecuise ocuica, naimie uaina iño. Naimie raire iciria, naimie ocuica uaina jiai iño. ¹⁹ Maraiñede rafuena omoi finoñenia, omoi patrón omoina duere finoia, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare. ²⁰ Maraiñede rafuena omoi finoia, omoi patrónomona duere sefuitomoi; iadedi maraiñede rafuena omoi finoñenia, omoi patrón omoina duere finoia, ibana omoi oñenia, Jusiñamuimona mare. ²¹ Duere omoi sefuia, ibana oñeno. Iese omoi illena, Jusiñamui omoina fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. ²² Naimiedi maraiñede rafuena jaca finoñede. Tainona jaca lloñede. ²³ Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoina ico duere finoiticue” raiñede. Naimiedi Jusiñamui naimacina ico raise duere finollena uiñote. ²⁴ Cruzmo naimie fiodaillamona jeacino anamo cai iñellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodicai. ²⁵ Sedañega toica llaudaiai isoi jaie ebena jaisoidicai. Cai sedaraima anamo jai iticai. Naimiedi cai comeciaina jai eenote.

3

Pedrodi inirediñaiñuaina, airedino diga llofuate

¹⁻² Inirediñaiñuai, omoimo jai lloiacadicue. Omoi iniñiai uaina iño. Nibai birui Cristo rafuena iñoñedimaci; iadedi omoi marena illamona, Cristo dibeimo naimacina itataitomoi. Jusiñamui uaina omoi iñuamona, omoi marena illamona, damierie Cristona iñoitimaci. ³ Dañaiñorie abina eo finocabidimaci, naiñaiñuaina jiaie comini ebinaillena. Naiñaiñuai ifotiena eo finocabidimaci. Eo raifide rana jitaicabidimaci. Eo ebirede raifide iniroina jitaicabidimaci. Naie isoide ra comecina marena itatañede; ia Jusiñamui jitaillacinodo jaillamona, comeci marena ite. Jiaie comini omoina ebinai raillano, iese omoi iñeno; ⁴ iadedi jiaie comini omoina ebinaillena, omoi comeciai marena fino. Omoi iniñiai uaina oñeno. Naimaci jitailla rafuena fino. Omoi comeciai iese ia, Jusiñamuimona eo mare. ⁵ Cai jaiagai facaise Jusiñamuina iñotiñaiñuai iese itimaci. Cue birui llofuia isoi, naiñaiñuai abina jaie finodimaci. Naiñaiñuai iniñiai uaina iñotimaci. ⁶ Iese Sara micori ie ini Abraham micori uaina iñote. Ie anamo naiñaiño illa jira, ie ocuica uaina jaca iñote.

Mare rafuena finocana omoi jaia, buena omoi jaciruiñenia, naiñaiño isoi iitomoï. Iemona naiñaiño uruiaina jaitomoï isoitomoï.

⁷ Airedino, omoïmo jai lloiacadicue. Omoï ainiaïmo comeciaina faca. Cai isoi naiñaiñuï mairiñena jira, naiñaiñuaina isiruillamona, naiñaiñuaina marena raise seda. Jusiñamui omoïna duenailamona, naimie cominina jai jaidomoï. Omoïna jai jillotate. Omoï ainiaïna omoï raise sedañenia, Jusiñamuïmo daajena raise jïnidomoïco.

Cristo ðibeïmo cai illa rafue

⁸ Daje isoi comeciï lloicana jai. Coninina duenai. Naga creyentena isirui. Jïainona cano. Abina iedoño. ⁹ Omoïna jiaïe cominï duere finoïa, ïbana oño. Omoïna naimaci jeare ñaïa, ïbana oño; iadedï naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui ðinena: “Mare” caina raite. ¹⁰ Jusiñamui facaina lloraïma micori iena jaïe cuega:

Marena uri jaca bu iacania, jeare ñaiño.

Tainona lloño.

¹¹ Jearede rafue finuana fainonocai. Mare rafuedo jai.

Omoï ecïmo itino ðiga, uri icana omoï jai.

¹² Naimie jitaïlla rafue omoï finoïa, Jusiñamui iena uiñuamona, omoïna raise sedade.

Naimie ðiga omoï ñaïa, iena cacade;

iadedï maraiñede rafue bu finoïa, Jusiñamui naimie ðiga icirite.

¹³ Mare rafuena omoï finocana jaia: “Maraiñede rafuena naimaci finua jira, naimacina duere finoiticaï” rainidimaci; ¹⁴ ia mare rafuena omoï finuamona omoï duere sefuïa, Jusiñamui omoïna canoite. Omoïna duere finodinona jaciruiño. Jarire iño; ¹⁵ ia omoï comeciï jitaïllamona Cristona seda. Naimiedi cai Nama. “¿Bue ñellena Cristona ïnotomoï?” omoïmo bu jïcanoïa, uaina raise ono. Fecuisse iciriño, uaina ono. ¹⁶ Mare rafuena finocana jai. Omoïna jiaïno jeare ñaïa, mare rafuena omoï finocabillamona meidaitimaci. Omoï marena illamona, tainona naimaci lluaana bairenite. ¹⁷ Mare rafuena omoï finuamona, Jusiñamui jitaïllamona omoï duere sefuïa, dama iese duere sefuitomoï; ia maraiñede rafuena omoï finuamona omoï duere sefuïa, omoï muidona. ¹⁸ Cristomo omoï comeciïna faca. Dacaiño cai jeacino facaina naimie fiodaite. Naimie mareuidimie; iadedï maraiñedino facaina fiodaite. Jusiñamui ðibeïmo caina itataiacade. Naimiena meinetimaci; iadedï naimie Joreño jaca ite. ¹⁹ Ie Joreño do naimie jaïllanona, jaïe fiodaitino imaci joreñuï eenoronomo ie finoca rafuena lluaide. Naimaci nia fiodaiñenia, Jusiñamuïna jaca ïnoñedimaci; ia Cristo ie finoca rafuena naimaci joreñuïmo lluaide. ²⁰ Jusiñamui rafuena jaïe ïnoñedimaci. Noé micori facaise Jusiñamuïdi naimaci naimiena ïnuamo fecuisse ocuiride. Jïnuïmona jillobillena, Noé micori ie balsana finode. Ocho ðigamie jillobidimaci. ²¹ Ie isoïde. Omoï bautizaïa: “Jusiñamui ðibeïmo jai iticaï” llotomoï. “Jeacïnomona jai jillobidicaï” llotomoï. Omoï abïmo ite jearenamona jillobiñedomoï; iadedï omoï comeciï jai marena ite. Fiodaïllamona Jesucristo jillua muidona, jillobidicaï. ²² Naimie jillua mei, monamo abïdo jai jaïde. Jusiñamui ecïmo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taïfena Jesucristo anafëfilla jira, Jesucristo anamo naimie ite; ia naimiena nia janafëfitañede.

4

Jusiñamuïmona cai feiño ga uai ðiga, naga jiaïe creyentena cai canua

¹ Cai isoi naimie illamona, Cristo duere sefuïde. Naimie duere sefuïde; ia jeacïnona finoñede. Duere omoï sefuïa, naimie illamo omoï comeciïna faca. ² Nana omoï ille ðinori cominï jitaïllacïnodo jaiño; iadedï Jusiñamui jitaïllacïnodo omoï jai.

³ Jusiñamuïna uiñoñedino isoi jaïe bie isoïde rafuena finouïdomoï: Omoï aiñede riñoñiaï ðiga isoïdomoï. Omoï iniñede ïñiaï ðiga isoïdomoï. Jearede rafuena ebiruitomoï. Jïfairuïdomoï. Jïruana ebiruitomoï. Jusiñamui rairuïca jïraraina sedauïdomoï. ⁴ Naie isoïde rafuena omoï jai finoñenia, Jusiñamuïna uiñoñedïno ðï omoïri rajicaidimaci.

Omoïna jeare ñaitimaci. ⁵ Iese itimaci; iadedi Jusiñamui uicomo ico iitimaci. Naimacina duere finoite. Nia fioldaiñedinona duere finoite. Jai fioldaitinona jiai duere finoite. ⁶ Naimaci nia fioldaiñena facaise, Jesucristo rafuena cacadimaci. Jeacino muidona nana fioldaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

⁷ Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jïllena, iese omoï jai. ⁸ Coninina isiruicana omoï jai. Omoï isiruillacino jiaie rafue baifemo faite. Jiaimie diga nicino ia, naimiena omoï isiruillemona, naicinona raire feिताitomoï. ⁹ Jiaie cominina jafueoicaida feiñoñeno; ia caimare feiño. ¹⁰ Creyentiaina omoï jailla facaise Jusiñamuimona omoï uaina feiñotomoï. Naimie dibeimo omoï majïllena feiñotomoï. Nagamiemo daje isoide uai iñede. Omoï uai diga, naga jiaie creyentena cano. ¹¹ Cristo rafuena bu llofueia, Jusiñamui naimiemo llua isoi, naimie llofua. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaïmana naimie illamona, caina jaca sedade. Naimiemo iobillacinona jaca cai fecacabillasa. Iena jitaïdicue.

Cristo dibeimo cai illamona, duere sefuiticai

¹² Cue isiruiganodomoï. Eo duere omoï sefua, rajicaiñeno. Creyentiaina omoï jailla jira, duere sefuitomoï. Jusiñamuidi Cristona raise omoï ñnuana facacite. ¹³ Cristo jai duere sefuide. Naimie isoi omoï duere sefua, ieri iobi. Naimie dane bene bia, naimie bairiari eo iobitomoï. ¹⁴ Creyentiaina omoï illamona, omoïna bu jeare ñiaia, caimare omoï i. Iemona Jusiñamui Joreño omoïmo illana uiñoitomoï. Naimie: “Mare” omoïna raite. ¹⁵ Jiaïnodï cominina meinetimaci. Rana fiidimaci. Maraiñede rafuena finodimaci. Naimacimo duide rafuena abïmo oñeno. Naie isoide rafuena bu finoia, duere sefuite. Iena omoï finoñeno. Naie isoide rafuena omoï finuamona omoï duere sefuillana jitaïñedicue. ¹⁶ Creyentiaina omoï illamona omoï duere sefua, ieri meiruiñeno; iadedi creyentiaina omoï illamona, iobillacinona Jusiñamuimo feca.

¹⁷ Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite. ¹⁸ Jusiñamui facaina lloaïma micori iena jaie cueda: “Mareuidinodi niadedi jillobiñedimacimo, ¿ñiese comeciaina jearedinodi jillobitimaci? ¿Ñiese maraiñedinodi jillobitimaci? Nibai jaca jillobiñeitimaci” cueda. ¹⁹ Iena omoï uiñuamona, mare rafuedo jai. Jusiñamui jitaïllamona duere omoï sefua, mare rafuedo jai. Jusiñamui caïmo finuana omoï uiñuamona, naimie anamo raise i. Naimie omoïna raise eenoite. Ie lloga uaina jaca finoite.

5

Pedro creyentiaina nia llofuede

¹ Creyentiaina llofueraini, omoïmo rafuena lloiacadicue. Cuedi jiai llofueraimadicue. Cristo fioldallana ciodicue. Naimie ebire abido bia, jiaie creyentiai diga iena cioiticue. Iese cue illamona, omoïmo lloiacadicue. ² Omoï anamo ite creyentiaina raise seda. Naimacina raise llofue. Jiaimie railla jira, llofueñeno; iadedi omoï jitaïlla jira, llofue. Rana ollena llofueñeno; iadedi iocire llofue. ³ Omoï anamo itinona riire llofueñeno; iadedi mare rafuedo omoï jaïllamona, naimacina llofue. ⁴ Cai creyentiai nanoca sedaraimadi Cristo. Naimie abido bia, naimiemona ibana feiñoitomoï. Naimie diga jaca iitomoï.

⁵ Conirueni, omoï llofueraini uaina raise ñno. Coninimona abina iedoñeno. Jusiñamui facaina lloaïma micori iese jaie cueda:

Bu abina iedoia, Jusiñamuimona maraiñede;
iadedi bu abi iedoñenia, Jusiñamuimona mare.

Jusiñamui naimiena duenaite

cueda. ⁶ Iese illa jira, cai Jusiñamui siñona jira, naimie anamo abina iedoñeno mai raise omoï i. Iemona naimie jitaïlliruido omoïna iobitaite. ⁷ Nïe isoide rafue ia, Jusiñamui

omoina canocabillana omoi uñuamona, omoi comeciai jarire finoño. Naimie omoina eenoite.

⁸ Ebona jaiño. Jeacino finuamo abina rairui. Taife caina ramo faicabite. Janallari ie rille jenua isoi, Taife omoina jenocabide. Jeacino omoi finuana jitaide. ⁹ Naimie ra faia uaina ñnoño; ia Cristona ñnocana jai. Omoi duere sefuilla isoi, nana jiaie creyentiai duere sefuidimaci. Iena omoi uñuamona, omoi comeciai ocuiñocana jai. ¹⁰ Cai Jusiñamui caina eo duenaite. Cristomo jai cai duilla jira, Jusiñamui illanomo ño jaca iitica. Dallu birui duere cai sefuia, Jusiñamui cai comeciaina raise finoite. Cai comeciaina raise ocuiñotaite. ¹¹ Illaimana naimie illamona, caina jaca sedade. Naimiemo iobillacino cai fecacabillasa. Iena jitaide.

*Naga creyentia*imo carta oria rafue

¹² Silvanona uñotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise ñnogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uñuamona, bie rafuena ñnocana jai.

¹³ Babiloniammo ite creyentiai omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiai orede. Cristomo naimie jai duilla jira, naimie cue jitona eruaide. ¹⁴ Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeciaina uri itatajana uñocana mai jai. Macaibaite. Pedrodicue.

IE EMODOMO PEDRO ORETAGA RABE

Pedro creyentia imo carta orede

¹ ¿Nigacino? ¿Nie isoidomoi? Bie carta omoimo oredicue. Simón Pedro dicue. Jesucristo díbeimo maijamona, ie rafuena lloticue. Cuen a oretajamona, ie lloga uaina finodícue. Cai isoi jai ñnotomoi. Cai Jusiñamui marena illa jira, Jesucristo marena illa jira, Jesucristo omoína jillotaja jira, jai ñnotomoi. Jusiñamuimona cai isoi omoi illa jira, bie carta omoi díne oredicue. ² Jusiñamuina omoi uñuamona, cai Nama Jesús omoi uñuamona, iaímaiaí omoína duenaillana uñocana jai. Iaímaiaí omoi uri itatajana uñocana jai.

Creyantia marena illa rafue

³ Jesús siñona illamona, bene cai marena illena, naimiedi nana rafue caimo jai iga. Naimiena cai uñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode. ⁴ Naimie iese illamona, eo mare rafuena caimo jai llote. Jiaie rafue baífemo faite. Bie rafue muidona jeacinomona jillobidicai. Cai comeciai jaie jitailla jira, faíficana jaidicai; iadedi naimie rafuena cai ñnuamona, naimie illa isoi, icana jaidicai. ⁵ Jesucristona jai ñnotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uñocana jai. ⁶ Jearede rafue finocana jaiñeno; iadedi omoi comeciaina eeno. Iena ocuiñocana jai. Jusiñamuina sedacana jai. ⁷ Jiaie creyantiaína isiruicana jai. Nana cominina isiruicana jai. ⁸ Naie isoidicinona jitaídómoi. Iedo omoi raise jaia, cai Nama Jesucristona eo raise uñocana jaitomoi; ⁹ iadedi iedo omoi jaiñenia, abina nia raise uññedomoi. Omoi jeacinomona jai jilluana jiai jai feitatomoi. Mare rafuena finocana jaillena, omoi jeacinomona jillobidomoi. Iena feitaño. ¹⁰ Cue amatiaí, naie isoidicinona finocana jai. Iemona Jusiñamui omoína fetuana raise uññoitomoi. Abido danomo jiai jaiñeitomoi. ¹¹ Iese omoi jaia, cai Jilloitaraímana naimie illamona, cai Nama Jesucristo ie illanomo omoína eo marena feiñoite. Nainomo naimie anamo jaca iitomoi.

¹² Ie jira bie isoide rafuena díga icaíño omoimo lloticue. Bie rafuena uññotomoi. Bie rafue uanaicinona jai raise uññocaidomoi. ¹³⁻¹⁴ Cai Nama Jesucristo cuemo jai llua jira, raíre cue fiódaillena uññoticue. Nia cue fiódaiñenia, bie rafuena omoimo díga icaíño lloticue. Iese omoimo cue lloía, cuemona mare. ¹⁵ Bie rafue omoi raise nagarui uññollena, omoína birui canoíticue. Cue fiódaille mei, nagarui bie rafuena omoi feitañenana jitaídícue. Ie muidona bie rafuena jai cueticue.

Pedro Cristona ebirenana jai eciode

¹⁶ Jamai rafue omoimo lloñedicai. Omoína jifueiacaiñedicai. Cai Nama Jesucristo siñonana lloticai. Naimie abido billena jiai lloticai. Naimiena ebirenana jaie ciódicai. ¹⁷⁻¹⁸ Enñruemo naimie jaie ia, anedu muidomo naimie díga jaidicai. Jusiñamui nainomo jiai illa jira, naie illano mare. Naie facaise Jusiñamui llua cacadicaí. Jusiñamui naimiena iobitaiacade. Ebire llote: “Bimie cue isiruiga Jito. Naimieri iobidícue”. Iena jaie cai ciuanona, birui naimie siñonana lloticai. ¹⁹ Naiemona Jusiñamui facaina jaie lloraini micoriaí lloga rafue suillena jai raise uññoticai. Naimaci lloga rafuemo omoi comeciaina faca. Lamparín jítiredinomo lligaiñua isoi, naie rafue cai comeciaina uanaicinona uññotade. Monairaícuduna cai cioía, iaírei monaille ua illana uññoticai. Ie isoide. Cristo dane baíreia, iena raise uññoiticaí. Jusiñamui facaina lloraini micoriaí rafuena cai uññuamona, uanaicinona ua uññoticai. ²⁰ Biena uññoticai. Dani comeciáimona Jusiñamui facaina lloraini micoriaídi naimaci lloga uaina llofueñedimaci. ²¹ Dani naimaci comeciai jamai facajamona naie rafuena oññedimaci; iadedi Jusiñamui Joreño naimacimo illamona, naimacina iena uññotajamona, Jusiñamui rafuena jino llotimaci.

2

Pedro tainona llofuerainina lloste

¹ Cai jaigai facaise tainona llofueraini itimaci. Birui ie isoide. Omoi motomo tainona llofueraini iitimaci. Jusiñamui rafuena raise llofueñeitimaci; iadedi naie rafuemona omoina itataiacanitimaci. Naimaci facaina Jesucristo fiodaite; iadedi: “Jesucristo cai Nama” raiñeitimaci. Naimaci finolle rafue muidona, raire ebena faifitimaci. ² Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci. ³ Ucube ollena, naimaci tainona llofuiacinodo omoina jifueiacanitimaci; iadedi Jusiñamui riicaillafue anamo jai itimaci. Jusiñamui naimacina ico duere finoite.

⁴ Naimie ecimo ite jaienisaimona damierie jeacino jaie finua jira, Jusiñamui naimacina jai oni dotade. Naimie riicaillafue anamo naimaci jai illamona, naimacimo ite uai jai iñede. Jitiredinomo jai itimaci. Naimacina duere finoite, nana comini Jusiñamui dine illirui ia. ⁵ Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo lloste; iadedi Jusiñamuina ñnoiacañedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. ⁶ Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua. ⁷ Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite. ⁸ Naimaci motomo naimie illamona, nagarui naimaci marañede rafue naimie ciuamona, naimie comeci uri iñede. ⁹ Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faiamona jilloitajana uiñote. Jusiñamui naimiena ñnoñedinona naimie riicaillafue anamo illana jiai uiñote. Ico naimacina duere finoite.

¹⁰ Jearede jitaillacino finocabinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaina jaciruiñeno jeare ñaitimaci. ¹¹ Jusiñamui jaienisai uai naimaci baifemo faite; iadedi Jusiñamui illanomo naimaci illamona, bie tainona llofuerainina jeare ñañedimaci. ¹² Ocainai ai abina raise uiñoñena muidona, cai rillena naimacina fatikai. Bie tainona llofueraini ocainai ai isoidimaci. Naimaci raise uiñoñega rafuena jeare ñaitimaci. Ocainai ai faifilla isoi, faifitimaci. ¹³ Jiaie cominina naimaci duere finua dinori duere sefuitimaci. Birui ite rafuena nagarui ebiruitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci ebiruilla jira, raise conini diga nabairinidomoi. ¹⁴ Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise ñnoñedinona jeacinona finotaiacadimaci. Rana eo nicidotimaci. Jusiñamui naimacina duere finoite. Jaca faifitimaci. ¹⁵ Cristo rafuena fañonocailanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacañede; iadedi jiaie rafuena lollena, jiaie nairai dine jaide. ¹⁶ Naisona naimie jaidemo, ie burra naimie diga ñaite. Jeacino naimie finoñellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

¹⁷ Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeci ai daje isoi lloñedimaci. Jusiñamui naimacina ico duere finoite. Jusiñamui illanomo naimaci iñenano, jitiredinomo jai iitimaci. ¹⁸ Jamai ñaia diga abina iedotimaci. Uañañede rafuemona, como Cristomo ñnotinona ramo faitimaci. “Jearede rafue finuana mare” raitimaci. ¹⁹ “Cai jitailla rafuena finoredicai” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci. ²⁰ Cai Nama Jesucristo. Naimiedi cai Jilloitaraima. Naimiena naimaci jaie ñnuamona, marañedicino anamona jai jillodimaci; iadedi marañedicinona dane finocana jaidimacina, naie marañedicino anamo dane

itimaci. Eo fodo jai jaidimaci. ²¹ Cristo rafuena jaie uiñoñedimaci. Birui iena uiñotimaci; iadedi naie mare rafuedo raise jaiñedimaci. Iena fainonocaillamona, eo jai fodo jaidimaci. ²² Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemono danomo abido jaidinodi daje isoidimaci.

3

Pedro cai Nama Cristo dane billena llofue

¹ Cue isiruiganodomo. Navui jiaie carta omoimo oredicue. Birui dane cueticue. Bie rafuena jai uiñotomoi; iadedi iena omoi ua raise uiñollena, iena dane cueticue. Iemo omoi comeciai raise facajana jitaidicue. ² Jusiñamui facaina jaie lloraini micoriai lloga rafuena jai uiñotomoi. Cai Nama caina oretajanona, ie lloga rafuena omoimo jai lloticai. Naimie muidona jillobidomo. Bie rafuemo omoi comeciai facajana jitaidicue. ³ Biemo nano omoi comeciaina faca. Cristo nia abido biñenia, Cristo rafuena uaitatino iitimaci. Naimaci jitailla rafuedo jaitimaci. ⁴ Jicanoitimaci: “¿Niese Cristo nia abido biñede? Enirue finua facaisemona nana ra daje isoi comuicana jaide. Cai mootiai jai fiodaicana jaidimaci. Cristo jaca biñeite”. ⁵ Iese raitimaci; iadedi iese iñede. Jaie suide rafuemo comeciaina facacaiñedimaci. Jusiñamui jaie llumona, ie uaido mona finode. Enirue jiai finode. Jinuimona iena finuamona, jinuimona eniruedi bairede. ⁶ Jinui diga Jusiñamuidi Noé micori facaise cominina jaie fuidode. ⁷ Jusiñamui mona, enirue diga, ico fuidollena jai llote. Mona, enirue diga, bootaite. Ie jitaillirui Jusiñamui naimiena iñoñedinona iese duere finoite. Ie uai jai llote; ia nia suiñede.

⁸ Cue isiruiganodomo. Biena feitaño. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide. ⁹ Damierie comeciai facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiena iñuana fecuise sedade. Comini imaci uai meidollena sedade. Naimaci faifillana jitañede. Ie muidona nia abido biñede. Ie lloga uai nia suiñede. ¹⁰ Firiraima billa isoi, cai Nama ebena abido biite. Naimie bia, mona eo ficrenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite. ¹¹ Bie rafue suillena uiñotica. Naie cai uiñuamona, Jusiñamui jitailla rafue finocana cai jailla. Naimiena raise cai sedajasa. ¹² Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite. ¹³ Naimie jai llua isoi, jiaie mona, jiaie enirue diga illena sedadica. Nainomo Jusiñamui jitailla isoi marena jaca iitica. Nainomo mare rafue finocana jaitica.

¹⁴ Cue isiruiganodomo. Bie rafue nia suiñena jira, naimie abido nia biñena jira, jeacino finoño i. Uri icana omoi i. Iese omoi ia, naimie abido bia, omoina: “Mare” raite. Omoiri iobite. ¹⁵ Raire abido cai Nama biñenia, naimiedi comini naimiena iñuamo ocuride. Iena uiñotica. Cai isiruiga ama Pablo, bie isoide rafue omoimo navui cuete. Cristo naimiena uiñotaga rafue diese cuete. ¹⁶ Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue irirede. Cristo rafuena raise uiñoñedino, Cristona raise iñoñedino iena tainonana llofuecabitimaci; iadedi iemona faificana jaidimaci. Jiaie Cristona cugafuaina tainonana llofuecabitimaci.

¹⁷ Bie rafue birui uiñotomoi. Iena omoi uiñuamona, jearede rafue finocabidino rafuedo jaiño. Abido danomo omoi jaiñellena, iemona abina rairui. ¹⁸ Cai Nama cai duenailana uiñocana jai. Naimiedi cai Jilloitaraima. Naimiena omoi uiñocana jaillamona, naimiena nabai. Naimiena birui cai iobitajasa. Naimiena ua jaca cai iobitajasa. Mai. Macaibaite. Pedrodicue.

JUAN NANO FUEÑE ORETAGA RABE

Jusiñamui diga cai jaca illena, Juan cuete

¹ Cue uruiaina omoi isoilla jira, omoimo cartana oredicue. ¿Nie isoidomoi? Nano dofoconi itimiēna lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicai. Naimiēna ciodicai. Naimiēna jiai jetadicai. Caina Jusiñamuina uiñotade. Jusiñamui diga cai jaca illena, jiai caina llofue. ² Jusiñamui dinena billanona, imana jaide. Naimiēna jaie raise cai ciua jira, naimie rafuena birui omoimo lloiacadicue. Ie Moo diga nano jaca ite; ia cai dine naimie billamona, naimiēna jai ciodicai. ³ Cai ciua rafuena, cai cacaja rafuena, omoimo lloiticue. Jusiñamuina cai diga omoi nabaillena jitaidicue. Jusiñamui Jito Jesucristona, cai diga omoi nabaillena jiai jitaidicue. ⁴ Omoi comeciai caimareficaillena, omoimo bie rafuena cueticue.

Jusiñamuidi jaca mareuidimiēna jira, useredinomo ite isoide

⁵ Jesucristomona cai cacaja rafuena omoimo ja lloiticue. Jusiñamuidi jaca mareuidimiēna jira, useredinomo ite isoide. Naimie comecidi jaca jeanina jira, jitiredinomo iñede isoide. ⁶ “Jusiñamuina nabaidicai” cai raia, iadedi jeacinona finocana cai jaiā, tainona lloticai. Uanaicinodo nia jaiñedicai. ⁷ Jusiñamui jeacino jaca finoñede. Naimie isoi jeacino finoñeno cai jaiā, coninina nabaidicai. Jesucristo fiodaillamona, naimie diaillamona, Jusiñamui cai jeacinona oni dotade. Iena feitate. ⁸ “Caimo jeacino jaca iñede” cai raia, dani cai abina jifueticai. Uanaicinodo nia jaiñedicai. ⁹ Naimiemo cai finoca jeacino cai lloia, Jusiñamui cai jeacinona dotaite. Nana cai maraiñedicinona dotaite. Naimie inogamiēna jira, naimie maremiēna jira, iese finoite. ¹⁰ “Omoimo ite jeacino” Jusiñamui llote; iadedi: “Jeacino finocabiñedicai” cai raia, “Jusiñamui tainona llote” raiticai. Iemona naimie uaina jai uaitaticai.

2

Cai facaina riidotimiedi Cristo

¹ Cue uruiā isoi cue mamecaomoi. Jeacino finocana omoi jaiñellena, omoimo birui cueticue. Jeacinona omoi finuana jitañedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiēna jira, cai facaina caina riidoite. ² Cai jeacino facaina naimie fiodaite. Iemona Jusiñamui riicaillifue anamona jillobidicai. Jesucristo cai facaina fiodaite; ia nana comini facaina jiai fiodaite. ³ Jusiñamui llogacinona cai inuamona, naimiēna cai uiñuana jai uiñoticai. ⁴ “Naimiēna uiñoticue” raitimiedi ie llogacinuai inoñenia, naimiedi tainona lloraima. Uanaicinona uiñoñede; ⁵ ia Jusiñamui llogacinuaina inotimiedi Jusiñamuina eo isiruicana jaite. Naimiēna cai isiruillamona, naimiēna cai nabaillana jai uiñoticai. ⁶ “Cristona nabaidicue” raitimiedi, Cristo isoi, mare rafuena finoite.

Cristo rafuedo jaidomoi

⁷ Cue isiruiganodomoi. Creyentiaina omoi jailla facaise bie rafuena cacadomoi. Ie jira jiaie rafuena birui omoimo cueñeticue; ⁸ ia naicinona abido dane lloiticue. Cristo iedo jaide. Iedo jiai jai jaidomoi. Jeacino anamo omoi jaie illamona, jitiredinomo itomoi isoidomoi; ia Cristo rafuena omoi jai uiñuamona, useredinomo jai itomoi isoidomoi. ⁹ “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitiredinomo naimie nia ite isoide. ¹⁰ Jiaie creyentena bu isiruia, Cristo rafuedo raise jaide. Iedo naimie jaiā, jiaimiēna jeacinona finotañeite; ¹¹ iadedi jiaie creyentena bu enoia, jitiredinomo nia ite isoide. Jeacino anamo nia ite. Uisinidimie ie jaillinona raise uiñoñena isoi, Jusiñamui dine rillena raise uiñoñede. Ie isoi abina uiñoñede.

¹² Cue uruiā isoi cue mamecaomoi. Cristo muidona omoi jeacino Jusiñamui jai dotajamona, nana omoimo bie cartana cueticue.

13-14 Einamací, Jusiñamuina are omoi jai ñnuamona, omoimo bie cartana cueticue. Naimie nano dofoconi jaca ite. Conirueni, jeacinona finoñellena omoi comeciaina ocuiñuamona, Jusiñamui uai omoi comeciaino raise itabillamona, maraiñedimiena omoi jai anafetitaja jira, omoimo bie cartana cueticue. Naimiedi Taife. Uruiai, Jusiñamui uaina omoi como ñnuamona, omoimo bie cartana cueticue. ¹⁵ Omoi ecimo maraiñede rafuena eburuiño. Iena bu eburuia, cai Moo Jusiñamuina isiruiñede. ¹⁶ Cai comeciaino ite maraiñede jitaillacinodi Jusiñamui ieñede. Cai uisido ebire jaide rafuedi Jusiñamui ieñede. Raruiái díga, abi ieducinodi Jusiñamui ieñede. ¹⁷ Jusiñamui ieñede rafue jaca fuite. Naie isoide rafuedo jaidinodi jiai faifitimaci; iadedi Jusiñamui jitaillacinona finodimie Jusiñamui illanomo jaca iite.

Cristona abi caitadino rafue

¹⁸ Cue uruiái isidomoi. Jesucristo abido billirui iaiei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iaiei illana jai uiñotomoi. ¹⁹ Cai creyentiai motomo nano itimaci; ia Cristo díbeimo naimaci iñena jira, naimaci llofuiana cai nafueñena jira, cai motomo birui fiebiñedimaci. Caimona naimaci jailla jira, Cristomo naimaci duiñenana jai uiñoticaí. ²⁰ Jesucristomona Jusiñamui Joreño jai omoi feiñua jira, nana omoi Jusiñamui díbeimo ite rafuena jai uiñotomoi. ²¹ Ie jira uanaicinona bu llofueia, iena uiñotomoi. Uanañedicinona bu llofueia, iena jiai uiñotomoi.

²² Tainona llofuerainina ja cueticue. “Cristo cai jilloitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini. ²³ Cristona ñnoñedinodi Jusiñamuina jiai ñnoñedimaci. Cristona ñnotino Jusiñamuina jiai ñnotimaci. Jusiñamui Joreño omoimo illamona, iena jai uiñotomoi. ²⁴ Ie jira creyentiaína omoi jailla facaise omoi cacaja rafuedo ñnocana nia omoi jai. Iedo omoi ñnocana jaia, Jusiñamui Jitona raise nabaitomoi. Jusiñamuina jiai raise nabaitomoi. ²⁵ Jusiñamui caimo jai llua isoi, naimie díga jaca iiticaí. ²⁶ Omoína damierie jifueiacana jira, bie rafuena jai cueticue. ²⁷ Jusiñamui Joreño jai feiñotomoi. Omoína Jusiñamui rafuena naimie uiñotaja jira, jiaie rafuena llofuerainina jai jitañedomoi. Jusiñamui Joreño uanaicinona omoína uiñotacabide. Naimie omoína uiñotaja isoi, Cristona nabaicana omoi jai. ²⁸ Cristo ico abido biite. Omoi jacinañellena, naimiena omoi meiruiñellena, naimiena birui raise omoi nabai. ²⁹ Jusiñamui maremiena cai uiñuamona, nana mare rafuena finocabidino naimiemo duillana jiai uiñoticaí.

3

Juandi Jusiñamui cominina llua rafue

¹ Jusiñamui caina isiruillamona, naimie cominina jai jaidicaí. Iemo omoi comeciaina facajana jitaídícué. Naimiena naimaci uiñoñena jira, Jusiñamuina ñnoñedino cai uiñoğa rafuena jiai raise uiñoñedimaci. ² Ero, birui Jusiñamui cominidicaí. Cristo dane bia, cai illena nia raise uiñoñedicaí; ia naimie illa isoi cai ico illena jai uiñoticaí. Ico naimiena cai cioillemona, iena raise uiñoiticaí. ³ Iemo cai ocurillamona, naimie marena illa isoi, cai comeciái marena itataja. ⁴ Jeacinona finocana bu jaia, Jusiñamui llogacinuaina ñnoñede. Jusiñamui llogacinuaina bu ñnoñenia, jeacinona jai finode. ⁵ Jusiñamui dinena Cristo billanona, ñmana jai jaide. Cai jeacinona oni dotallena, eniruemmo naimiedi bite. Naimiemo jeacino jaca iñena jira, jeacino díbeimo naimie jaca iñede. ⁶ Naimiena nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiena nia raise uiñoñede. ⁷ Cue uruiái isidomoi. Cristo llua isoi tainona llofueraini birui itimaci. Jeacino finuana rairuiñedimaci. Naimaci omoína jifueñellena, abina rairui. Jesucristo jaca maremie. Mare rafuena finocana cai jaia, naimie isoi mareniticaí; ⁸ ia jeacino finocana bu jaia, Taífemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafetitallena. ⁹ Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide. ¹⁰ Iemona Jusiñamui

dibeimo itinona raise uiñoticaí. Taife dibeimo itinona jiai raise uiñoticaí. Mare rafuena finocana jaiñedimie Jusiñamuimo duiñede. Jiaie creyentena isiruiñedimie Jusiñamuimo jiai duiñede.

Coninina cai isiruilla rafue

¹¹ Creyentiaina omoi jailla facaise: “Coninina isirui” raillana cacadomoi. Jiaie creyentiaina nia omoi isiruiñenia, Jusiñamuimo nia duiñedomoi. ¹² Caín micorimona cai fueua. Naimie ie amana isiruiñena jira, Taife naimiena ramo faiamona, ie amana meinete. Ie ama Jusiñamui jitailla rafuena finouide; ia Caín micori Jusiñamui jitailla rafuena finoñede. Uradoillamona ie amana meinete. ¹³ Ie isoide. Jusiñamui jitailla rafuena birui cai finuamona, Jusiñamui dibeimo iñedinodi caina enoidimaci. Ieri jacinañeno. ¹⁴ Cristona nia cai iñoñena facaise jeacino anamo cai illa jira, Jusiñamuimona fioiditino isoidicaí. Jiaie creyentena cai isiruia, Cristomo jai cai duillana jai uiñoticaí; ia jiaie creyentena bu isiruiñenia, jeacino anamo naimie nia ite. ¹⁵ Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede. ¹⁶ Cristomona cai fueua. Naimie jitailla jira, cai facaina fiodaite. Iemona jiaie creyentiaina cai isiruillana uiñoticaí. Ie jira naimaci facaina naimaci ramo jiriñellena fioidiacaniticaí. ¹⁷ Jiaie creyentiaina cai isiruillamona, naimacina canoiticaí. Omoimo ra ia, jiaie creyentemo ra iñenia, naimiena omoi canoñena, Jusiñamuina raise isiruiñedomoi. ¹⁸ Cue uruiaí isoidomoi. “Jamai uaido jiaie creyentiaina isiruiticaí” cai raiñena; iadedi cai finoca rafuemona naimacina cai canua.

Jusiñamuimo jaciruiñeno jiiñedicaí

¹⁹ Jiaie creyentiaina isirucana cai jaja, Jusiñamui cominina cai illana raise uiñoticaí. Jusiñamui muidona cai comeci uri ite. ²⁰ Cai comecimo iticinona uiñoticaí. Siñonamiena jira, Jusiñamui iena jiai uiñote. ²¹ Cai comecimo jeacino iñenia, Jusiñamuimo jaciruiñeno jiiñedicaí. ²² Naimie llogacinona cai iñoia, naimie jitaillacinona cai finoia, naimiemo cai jcaca rafuena birui feiñoticaí. ²³ Naimie Jito Jesucristo cai iñuana jitaide. Cristo llua isoi, coninina cai isiruillana jiai jitaide. ²⁴ Naimie llogacinuaina cai iñoia, naimiena nabaidicaí. Caina jiai nabaide. Naimie Joreño caimo illamona, naimie caina nabaillana jai uiñoticaí.

4

Juan tainona llofuerañina llua rafue

¹ Omoina isiruiticue. Naga llofueraima uaina iñoñeno. Ailluena tainona llofuerañi birui illa jira, Jusiñamuimona naimaci feiñoga uaina niica naimacina facaci: ² “Jusiñamui ñinena Jesucristo billanona, iimana jaide” naimaci lloia, Jusiñamuimona naimaci uaina otimaci; ³ ia “Jusiñamui ñinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caitadimiemona naimaci uaina otimaci. Naimie billena jai fididomoi. Comini comeciaina feidocana birui jaidimaci. ⁴ Ero, Jusiñamuimo jai cai duillamona, Jusiñamui caimo ite. Taino llofuerañi dibeimo omoi jaiñena jira, naimaci llofuiana oñedomoi. Naie taino llofuerañimo Taife ite; ia Jusiñamui Taife baifemo faite. ⁵ Naie tainona llofuerañi Jusiñamuina iñoñedinomo duidimaci. Naimaci ecimo ite rafuena llofuecabitimaci. Jusiñamuina iñoñedinomo naimaci llofuiana ebiruitimaci. ⁶ Jusiñamuimo jai duidicaí. Jusiñamuina iñotino cai llofuiana cacaacadimaci; ia Jusiñamuina iñoñedinomo cai llofuiana cacaacaiñedimaci. Iemona Jusiñamui uaina llofuerañina uiñoticaí. Iemona tainona llofuerañina jiai uiñoticaí.

Jusiñamui caina isiruilla rafue

⁷ Omoina isiruiticue. Coninina cai isiruilla. Jusiñamui caina isiruillamona, caina jiañona isiruitade. Ie isoi isiruitinodi Jusiñamui comini. Jusiñamui rafuena uiñocana jaidimaci. ⁸ Jusiñamuimo cai duillamona, caina jiañona naimie isiruitaja jira, jiañona isiruiñedimiedí Jusiñamui rafuena nia uiñoñede. ⁹ Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui ñine jaca iiticaí. Ie finoca rafuemona Jusiñamui caina isiruillana jai uiñoticaí. ¹⁰ Jusiñamuina cai isiruillana

ñaiñedicue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacinona feitate. Iemona isiruillana raise uiñoticai. ¹¹ Caina Jusiñamui isiruilla isoi, coninina cai isiruilla. ¹² Buna Jusiñamuina jaca cioiñede; iadedi coninina cai isiruillamona, Jusiñamui caimo illana jai uiñoticai. Naimiena isiruicana jiai jaidicai. ¹³ Naimie Joreño caimo itatajamona, naimiena cai nabaillana uiñoticai. Caina naimie nabaillana jiai uiñoticai. ¹⁴ Bie rafuena jiai uiñoticai. Jusiñamui ie Jitona eniruemo jai orete. Naimiena ñnoñedinona jilloitallena, naimiena orete. Naimie Jitona ciodicai. Ie jira iena birui lloticai. ¹⁵ “Jusiñamui Jitodi Jesús” llotimiedi Jusiñamuina nabaide. Jusiñamui naimiena jiai nabaide. ¹⁶ Ie jira Jusiñamui caina isiruillana uiñoticai. Caina jiañona naimie isiruitade. Iedo cai jaillamona, caina nabaide. Naimiena jiai nabaidicai. ¹⁷ Iemona Jusiñamuina isiruicana jaiticai. Naimie uicomo ico nana cai ille facaise naimiena jaciruiñeticai. Jusiñamui Jitona Cristo illanona, Jusiñamui cominina cai jiai illanona, naimiena birui jaciruiñedicai. ¹⁸ Jusiñamuina cai isiruia, naimiena jaciruiñedicai. Eo raise naimiena cai isiruia, ¿niese naimiena jaciruiticai? Naimiena cai jaciruia, naimie caina duere finuana jaciruiticai. Jusiñamuina jaciruitimiedi Jusiñamuina nia raise isiruiñede. ¹⁹ Nano Jusiñamui caina isiruilla jira, caidi naimiena isiruiticai. ²⁰ “Jusiñamuina isiruiticue” raitimiedi jiaie creyentena enoia, jai taño llote. Creyentena cide; ia naimiena isiruiñede. Jusiñamuina cioiñede. ¿Niese ie cioiñenamiena isiruite? ²¹ Jusiñamui iena caimo jai llote: “Cuenta isiruitimie jiaie creyentena jiai isiruite”. Ie jira coninina isirui.

5

Taife ie rafuena anafefitaticai

¹ Jusiñamuimona Jesús billana cai ñnoia, Jesús cai jilloitaraimana cai ñnoia, Jusiñamui cominina jaidicai. Jusiñamuina cai isiruia, nana naimie cominina jiai isiruiticai. ² Jusiñamuina cai raise isiruia, naimie llogacinuaina cai ñnoia, naimie cominina jiai isiruiticai. ³ Jusiñamuina cai isiruia, naimie llogacinuaina jiai jai ñnoticai. Naimie uai raise ñnuamona, iena finollena sefuiruiñedicai. ⁴ Jusiñamui ñbeimo itinodi Taife ie rafuena anafefitaticai. Cristona cai ñnuamona, Taife ie rafuena anafefitaticai. ⁵ Jesúsdi Jusiñamui Jitonana cai ñnuamona, Taife rafuena anafefitaticai.

Jesucristodi Jusiñamui Jito

⁶ Jesucristona dane ñaiticue. Naimiedi Jusiñamui Jitona ñnoticai. Naimie bautizamona, naimie fiodaillamona naimiedi Jusiñamui Jitonana uiñoticai. ⁷ Uanaicnona naimie uiñuamona, Jesucristo bautizaja facaise Jusiñamui Joreño caina iena jiai uiñotade. ⁸ Jusiñamui Joreñomona, Jesús bautizajamona, Jesús fiodaillamona, Jesúsdi Jusiñamui Jitonana raise uiñoticai. ⁹ Jesús bautizaja facaise “Jesúsdi cue Jito” Jusiñamui caimo llote. Jesúsna comini lloia, iena feiñoticai. Comini llua baifemo Jusiñamui llua faia jira, Jusiñamui llua jiai ua feiñoticai. ¹⁰ Jesúsdi Jusiñamui Jitonana cai ñnuamona, cai comeciai daje isoi lloide; ia Jusiñamui ie Jitona llua ñnoñedinodi: “Jusiñamui taño llote” raitimaci. ¹¹ Biena ñaiticue. Jusiñamui naimie ñga caina jaca itataiacade. Naimie Jitona cai ñnuamona, iese caina jai itatate. ¹² Jusiñamui Jitona ñnotino Jusiñamui ñga jaca iitimaci; ia naimiena ñnoñedino Jusiñamui ñga jaca iñeitimaci.

Jusiñamui caina raise uiñote

¹³ Jusiñamui ñga ico omoi jaca illena omoi raise uiñollena, bie cartana jai cueticue. ¹⁴ Jusiñamuina cai ñnuamona, naimiena jai jaciruiñedicai. Naimiemo cai jiaia, naimie jitailla isoide rafuena cai jicaia, naimie caina cacajana raise uiñoticai. ¹⁵ Iese cai jiaia, naimie jaca fairuana jiai uiñoticai. ¹⁶ Jiaie creyente jeacino finuana omoi cioia, naimie facaina Jusiñamuimo jii. Iemona Jusiñamui ñbeimo naimiena dane itataitomo. Jusiñamui rafuena jamaidimie facaina omoi jiaana lloñedicue. Naimie faificana jaiacade. ¹⁷ Jusiñamui llogacinona bu ñnoñenia, jeacino jai finode; ia naimie facaina omoi jiaia, Jusiñamui iena feitate. Faificana jaiacadimie facaina omoi jiaana lloñedicue. ¹⁸ Jusiñamui comini jeacinona finocana jaiñedimaci. Naiemona Cristo caina eenote. Ie

jira Taife caina duere finonide. ¹⁹ Jusiñamuimo jai duidicai. Naimie anamo jai iticai; ia naimiena ñinoñedino Taife anamo jai itimaci. ²⁰ Jusiñamui Jito jaie eniruemo billana uiñoticai. Iemona caina nanoca Jusiñamuina uiñotade. Naimiena cai ñinuamona, nanoca Jusiñamuimo jai duidicai. Jesucristomo jiai jai duidicai. Ie jira Jusiñamui diga ico jaca iiticai. ²¹ Cue uruiai isoidomoi. Daje rafuena nia lloiticue. Jiraraimona abina rairui. Jusiñamui ieñede rafuedo omoi jaiñeno. Mai. Juandicue.

JUAN IE EMODOMO ORETAGA RABE

Uanaicinona coninina cai isiruilla

¹ Juandicue. Creyentiaina sedaraimadicue. Ñoo, ¿nie isoidio? Cue uaina o dine oredicue. O uruiamo cue uaina jiai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci. ² Naie uanaicinona cai uiñua jira, omoina isiruiticai. Iena uiñocana jaca jaiticai. ³ Cai Moo Jusiñamui ie Jito Jesucristo diga, caina jaca duenaite. Iaimai caina jaca uri itataite. Uanaicinona cai uiñuamona, iaimaiaina cai isiruillamona, iese iiticai.

⁴ Caimo cai Moo llua isoi, uanaicinado o uruiaimona dajerie jailla jira, iobidicue. ⁵ Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñoticai. Coninina cai isiruillana ñaiticue. ⁶ Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui llucacinona cacadomoi. Coninina cai isiruillana cacadomoi.

Diga taino lloraini ite

⁷ Diga taino lloraini illa jira, iena ñaiticue. Jesucristo monamona jai billanona, ñmana jaiñenana llofuecabitimaci. Bu iese llofueia, cominina jifuate. Naimiedi Cristona abi caitadimie. ⁸ Cristo rafuedo omoi jailla jira, Jusiñamuimona buena omoi faifiñellena, omoi abina rairui. Jusiñamuimona ibana feiñoitomoi. ⁹ Cristo llogacinona bu fainocaia, Cristo rafuedo bu jaiñenia, Jusiñamuina ua uiñoñede; iadedi Cristo rafuedo bu jaia, cai Moo Jusiñamuina uiñote. Ie Jitona jiai uiñote. ¹⁰ O jofomo Cristo rafuedo jaiñedimie bia, Cristo rafuena cue llofui isoi naimie llofueñenia, naimiena nafueño. “Jusiñamui ona canuamona, marena o jai” lloño. ¹¹ “Marena jai” o lloia, naimie marañede rafue facaina jai itio.

Rafuena nia lloiacade

¹² Diga rafue ite omoimo cuellena; iadedi aillue cartana cueñeiticue. Omoi dine raire cue illemo ocuiridicue. Danomo cai rillamona ñaiticai, cai comeciai caimarecaillena. ¹³ O dine o euiño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

JUAN IE EMODOMO JIAIE ORETAGA RABE

Gayo mare rafue finocana jaide

¹ Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uñua jira, ona isiruiticue. ² Cue isiruigamiedio. Nana o finua rafue marena jaillana jitaaidicue. O ecairenana jiai jitaaidicue. O comeci marena illana jai uñoticue. ³ Cue dine dajerie creyentiai bite. Uanaicínodo omoi jaillana llote. Cristo rafuedo omoi jaillana llote. Ie jira iobidicue. ⁴ Uanaicínodo omoi jailla jira, eo iobidicue. Cue muidona Cristona omoi ñnua jira, cue uruiaidomoi isoidomoi. Uanaicínodo omoi jailla jira, eo iobidicue. ⁵ Cue isiruigamiedio. Naga icaiño jiaie creyentiaina o canoia, eo mare. Nia o uññoega creyentiai o illanomo ria, naimacina o canoia, ua eo mare. ⁶ Naie isoide creyentiaina o isiruillana jiai fididicue. Rollena creyentiai ofia, ona marena ñaitimaci. Naimaci jaillinomo naimaci jaia, naimacina o canoia, Jusiñamui jitailla isoi, ua eo mare. ⁷ Naimie rafue llua muidona, jai macaritimaci. Jusiñamuina uññoedinomona jaca buena feiñoñedimaci. ⁸ Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

Diótrufes marañede

⁹ O dine ite creyentiaimo cartana jai oredicue. Diótrufesna janore ñaiacadicue. Naimiedi eo uicoidimie. Naimiedi cue uaina uññoiacañede. ¹⁰ O dine cue ria, naimie finoca rafuena omoimo lloiticue. Cuenajaere ñaite. Jiaie illanomona bite creyentiaina feiñoiacañede. Naimaci feiñuana rairuide. Roracomo naimaci bia, naimacina jino dotade.

¹¹ Jeacino finoraini isoi omoi iñeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uññoñede.

Demetrio marena ite

¹² Nana creyentiaidi Demetriona marena ñaitimaci. Uanaicínodo naimie jaide. Iese naimiena jiai ñaiticai. Cai llucínodi uanaicinona uñnotio.

Rafuena nia lloiacade

¹³ Diga rafuena cueiacadicue; iadedi cueñeiticue. ¹⁴ Raire ona cue cioillemo ocuridicue. Ie mei ñaiticoco. ¹⁵ Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

JUDAS ORETAGA RABE

Judadi Jusiñamui fetocanomo cartana orede

¹ Cue nabaiñiai, bie carta omoi dine oredicue. ¿Nie isoidomoi? Judadicue. Ie rafuena llollena, Jesucristo dibeimo jai maijidicue. Jacobo cue ama. Jusiñamui omoina jai fetuana cue uiñuamona, bie cartana oredicue. Cai Moo Jusiñamui omoina isiruite. Jeacinona omoi finoi raillano, Jesucristo omoina jai sedade. ² Jusiñamui omoina eo duenaillana omoi uiñocana omoi jaillana jitaidicue. Naimie omoi comeciaina raise uri itatajana omoi uiñocana omoi jaillana jitaidicue. Naimie omoina eo isiruillana omoi uiñocana omoi jaillana jitaidicue.

Tainocinona llofueraini ite

³ Cue isiruigano, omoimo Jusiñamui caina jai jillotaja rafuena iocire cueiacadicue; iadedi jiaie rafue birui illa jira, omoimo cueticue. Jusiñamuimona cai feiñoga rafuena omoi eo riiduana jitaidicue. Naie rafuena Cristo oretaganomona cacadicai. Naie rafuena meidonidicai. Ieconu duide. Jusiñamui jiaie rafuena lloñeite. ⁴ Caimo ite rafuena omoi eo riiduana jitaidicue. Cai creyentiai motomo dajerie tainocinona llofueraini illa jira, iena jitaidicue. Uanaicinona llofuecana naimaci illamo cai comeciaina facadicai; iadedi Jusiñamui jitaillacinona finoñedimaci. “Jusiñamui caina duenaillamona, jeacino finocana cai jaia, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoiticue” Jusiñamui jaie llote. Naimie duere sefuillacino anamo jai itimaci.

⁵ Iemona omoi raise fueollena, bie rafuemo omoi comeciaina faca. Bie rafuena navui llofueticai. Iena raise cacadomoi; iadedi iena dane uibiño. Iena lloiticue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci iñoñena jira, bie eniruemo riñedimaci; iadedi Jusiñamuidi jofue iñenanomo naimaci fiodaillena llote. Iemona naimaci fiodaitimaci. Ie isoide. Naimiena birui omoi iñoñenia, omoina duere finoite. ⁶ Ero, bie rafuemonona omoi fueua. Jusiñamui ecimo ite jaienisaimona dajerie imaci illanona jaie jitañedimaci. Naimie isoi iacadimaci. Naimaci illano naimie ecimo jaie itimaci. Naimaci jitailla rafuena naimaci finollena, naimie ecimo illana fainonocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie riicaillafue anamo jai itimaci. Naimie dine nana comini illirui ia, naimacina duere finoite. Naimacimona omoi fueua. Jeacinona Jusiñamui dibeimo itino finoia, Jusiñamui naimacina duere finoite. ⁷ Ero, bie rafuemonona omoi fueua. Sodoma railla nairai micoriai marañedicinona jaie eo finouidimaci. Gomorra railla nairai micoriai daje isoidimaci. Nainomo ianori ite nairai daje isoidimaci. Naimaci aiñede riñoniai diga itimaci. Naiñaiñuai iniñede iñiaí diga itimaci. Coninina aifiedotimaci. Iemona Jusiñamui naimacina jaie duere finode. Nana naimaci illanona raise jaie jobaitate. Naimacimona omoi fueua. Jusiñamui nana jeacinona finodinona duere finoite.

⁸ Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaína jeare ñaitimaci. ⁹ Miguelna mameciredo jaienici isoi iñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raiacade. Taife diga Moisés micori abina uaitate. Taife Moisés micori abina bairoacade. Miguel iena jai jitaide. Miguel Taife diga riire ñaite; iadedi Taifena jeare ñañede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”. ¹⁰ Naie taino llofueraini iese iñedimaci. Jusiñamui jaienisaína jeare ñaitimaci. Ocainai ai imaci comeciái uiñuacinodo jailla isoi,

naie taino llofueraini imaci uiñoga rafuedo jaidimaci. Iemona ja muidomo faifitimaci. ¹¹ Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori diga icirite. Icirillamona Caín micori ie ama micorina jaie meinete. Caín micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jaie lloñede; iadedi cai judíuai cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori iñoñena jira, Jusiñamui naimie micorina meinete. Jusiñamui uaina naie taino llofueraini iñoiacaiñena jira, jiai faifitimaci. ¹² Dani omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo gutimaci. Dani naimaci comecimo ite jitaillacinona finodimaci. Omoína canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riera isoidimaci. Llisilla facaise riera llisiñenia, maraiñede. Riera llisiñenia, iena oni aiñodicai. Maraiñena jira, safenaite. Naimaci maraiñena jira, naie taino llofueraini jiai safenaitimaci. ¹³ Naie taino llofueraini jearede rana finocabidimaci. Eo bagode monailai isoidimaci. Monailai eo bagoia, monailai fuemo jearede rana oni ñaicosite. Ucuaina eruaillamona naiona cai macarillana uiñotica; iadedi ucudu ana feia, cai macarillana raise uiñoñedicai. Naie taino llofueraini ana fede ucudu isoidimaci. Comini uanaicinona uiñotañedimaci. Naimaci llofuiacinomona Jusiñamui jitailla rafuedo cai raise jaillana uiñoñedicai. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

¹⁴ Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisai diga biite, ¹⁵ nana naimiena iñoñedinona duere finollena. Naimie jitailla rafuena naimaci finoñena jira, maraiñedicinona naimaci finua jira, naimiena naimaci jeare riire ñaia jira, naimacina duere finoite” llote. ¹⁶ Naie taino llofuerainidi creyentiaina sedarainina uaitaside. Jusiñamuina jeare ñaioidimaci. Dani naimaci jitailla rafuena finouidimaci. Eo abina biriuidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

Cristona iñotinomo llucino

¹⁷ Cue isiruiga amatiai, cai Nama Jesucristo oretagano jai llogacinona omoi comeci. ¹⁸ Raitimaci: “Jesucristo nia abido biñena facaiseconi naimie uaina iñoñedino jaca iitimaci. Naimaci jearede jitaillacinodo jaitimaci” raitimaci. ¹⁹ Naie taino llofueraini comini comeciai daje isoi lloillana itatañedimaci. Jusiñamui dibeimo iñede rafuena gaidimaci. Jusiñamui Joreño naimacimo iñede.

²⁰ Cue isiruigano, naimaci isoi omoi iñeno; iadedi Jusiñamui rafue iñocana mai omoi jai. Naie rafuedi mare. Jusiñamui Joreño omoína canuacinodo Jusiñamuimo omoi jii.

²¹ Jusiñamui omoína isiruillacinona uiñocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenaila jira, naimie ecimo jaca iitica. ²² Diga comini naie taino llofueraini rafuedo jaidimaci. Iemona dajerie Jusiñamui uaina raise nia iñoñedimaci. Naimacimo lloño: “Mai iño. ²³ Dajerie cominina Jusiñamui duere sefuillacinomona jillote”. Taino llofueraini rafuedo naimaci jailla jira, niadi faifitimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruiocaida duenai.

Jusiñamuimo iobillacinona cai fecacabillasa

²⁴ Jusiñamuidi omoína jeacinona finoñenana itatarede. Naimie uicomo omoína ico itataite. Omoína jeacinona omoi jaca finoñedena nainomo itataite. Nainomo iocire iitomoi. ²⁵ Jusiñamuidi jaca dajede. Cai facaina cai Nama Jesucristo fiodaillamona, caina

cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.

JUAN ICO SUILLE RAFUENA CUIAFUE

Jesucristo ico suille rafue llwana cueticue

¹ Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo llollena, Jusiñamui naimiena bie rafuena uiñotade. Jiiruido ico ebena suille rafuena uiñotade. Cuen a iena uiñotallena, iena cuemo llollena, ie jaienici cue dine oretate. ² Jusiñamui cuena birui uiñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jiai jai cueticue. ³ Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iarei illa jira, iemo raise cacarei.

Siete creyentia illanuaimo bie carta oredicue

⁴ Asia railla eniruemo ite creyentiai, omoi dine cue uai oredicue. Siete illanomo omoi illamona, bie rafue omoi uiñuana jitaidicue. Iena omoi uiñollena, biena cueticue. Jusiñamui ie Joreño diga, Jesucristo diga, omoia duenaicabide. Omoia uri itatacabite. Iena omoi uiñocana mai omoi jai. Jusiñamui jaie jaca ite. Birui naimie jaca ite. Ico jaca iite. Ie Joreño naimie abimo illamona, omoia bie rafuena raise cacataite. Iena inotaite. ⁵ Ie Moo uaina raise inuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodañena jira, nana illacomini naimie anamo jai itimaci. Caina jaca isiruite. Naimie fiodaillamona caina cai jecinomona jai jillobitade. ⁶ Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaidicue.

⁷ Ero, eniruemo uillie metodo Jesucristo biite. Naimie bia, nana comini naimiena cioitimaci. Naimiena jaie meinete nairaidi naimiena cioitimaci. Duere sefuillana jacinallamona nana comini eecuitimaci. Iese jaca suite.

⁸ Cai Nama Jusiñamui cuemo llote: “Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iiticue. Siño jitodicue”.

Juan Cristona ciode

⁹ Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iticai. Naimie cai comeciaina ocuiñotajamona iemo birui ocuridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uiasimo birui iticue. Cárcelmo illa isoi duere sefuillena, illacomini bene cuena birui oredimaci. ¹⁰ Jusiñamuina cue sedajamona, naimie Joreño cuena namatajamona, iniñenamona nicairilla isoi cue jinafo dine damie ado llwana cacadicue. Trompeta isoi ie uaidi ficirede. ¹¹ Cuemo llote:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Diese illanuaimo oreta —llote.

¹² Cuemo llotimiena cue cioillena, jinafo dine erodaticue. Siete oromona finoca lamparíniai ciodicue. Naga lamparín ie oromona finoca rairacomo raide. ¹³ Naie lamparíniai motomo iimana eruaidimiena ciodicue. Naimiedi Cristo. Areroia jítade. Oromona finoca cinturóna jítade. ¹⁴ Naimie ifotirai userede iniroi isoi eo userede. Naimie uisi irai boa isoi eruaide. ¹⁵ Naimie eillidi bronco eo dua isoi quenirede. Naimie uai aillue ille tua isoi eo ficirede. ¹⁶ Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jítoma eo lligaiñua isoi.

¹⁷ Naimiena cue ciuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuenta jaciruiñeno. Siño jítóna cue illamona, jaie jaca iticue. Ico jaca iiticue. ¹⁸ Jaie fiódaiticue; iadedi naiemona jaie jillodícue. Jaca iiticue. Dane fiódaiñeiticue. Cue uai siñóna jira, comini fiódailiruina llotícue. Cuenta ñinoñedino fiódaila mei, naimaci joreñuai illinona jiai llotícue. ¹⁹ O como ciua rafuena cueno. Omo cue ja lolle rafuena cueno. O ciolle rafuena jiai cueno. ²⁰ Ailluena rafue omo llotícue. Ona iena uiñotaiticue. Cue nabeillimo siete ucuduaina ciódio. Bie siete ucuduaidi bie siete creyentiai llofueraíni isoide. Bie siete lamparíniaidi bie siete illanomo ite creyentiai isoide. Bie creyentiaína ja ñaiacadícue —raite.

2

Cristo Efesomo ite creyentiaímo lloga rafue

¹ Cristo cuemo llote:

—Efesomo ite creyentiaímo llollena, nainomo ite llofueraímamo cue lluaña cueno: “Cue nabeillimo siete ucuduai ite. Siete oromona finoca lamaríniái motomo iticue. Omoína ñaiticue. Omoí llofueraíma cue anamo ite. Omoí motomo cue illamona, cuenta nabaidomoi. ² Omoí motomo cue illa jira, omoí illana raise uiñotícue. Omoí comeciaí ocuiñocana iciriñeno itomoi. Maraiñedicinona finoraini diga nabairiñedomoi. Omoí motomo damierie ‘Cristo oretagacai’ raitinona facaciamona, naimaci tainona llorainina uiñotomoi. ³ Omoí comeciaí ocuiñocana jaicabidomoi. Cue muidona duere sefuidomoi; iadedi iena sefuiruiñedomoi. Cuenta ñinocana nia jaidomoi. ⁴ Iese itomoi; iadedi omoí abi rafue cuemona birui janore ite. Creyentiaína omoí nano jailla facaise cuenta eo isiruitomoi; iadedi birui iese cuenta isiruiñedomoi. ⁵ Iemo omoí comeciaína faca. Cue díbeimo dane raise i. Cuenta omoí nano isiruilla facaiseconi omoí illa isoí, cue jitaillacinona birui omoí fino. Cue díbeimo omoí comeciaí dane raise iñenia, omoína duere finoiticue. Iemona omoí lamparín oni uiticue. Omoí creyentiaína ñaiticue. Cue díbeimo raise omoí iñenia, jiaíruido omoí illanomo creyentiai iñeitimaci. ⁶ Omoína marecinona jiai llotícue. Nicolaítas railla comini finoca rafuena gaiñedomoi. Iena jiai gaiñedícue. Eo maraiñede rafuena finocana jaidimaci. ⁷ Jusiñamui Joreñomona cue lloga rafue ite, omoí creyentiai iena. Bie rafue bu cacajia, iena jiai ñinua. Cuenta raise ñinotínomo Jusiñamui illanomo ite riarana iticue. Ie llillemona jaca iitimaci” cueno.

Cristo Esmirnamo ite creyentiaímo lloga rafue

⁸ Cristo cuemo llote:

—Esmirnamo ite creyentiaímo llollena, nainomo ite llofueraímamo cue lluaña cueno: “Jaie jaca iticue. Eniruemo jaie cue ia, fiódaiticue; iadedi naiemona jai jillodícue. Jaca iiticue. ⁹ Cue cominina omoí illa jira, duere sefuidomoi. Omoí duerenana uiñotícue. Benomo dueredomoi; iadedi Jusiñamui mona duenidomoi. Naimie díne ico omoí ia, buerenitomoi. Damierie omoína jeare ñaiana uiñotícue. Naimacidi judíuai comini; iadedi cue díbeimo iñedimaci. Taife anamo itimaci. ¹⁰ Ico omoí duere sefúia, jaciruiñeno. Taife cárcelmo omoí mona damieriena itataite. Abido danomo omoí jaillena, iese omoína duere finoite. Díez dígarui duere sefuitomoi. Omoí ille dínorí cuenta ñinocana omoí jai. Duere sefuillamona bu fiódai, cue diga jaca iite. ¹¹ Jusiñamui Joreñomona cue lloga rafue ite, omoí creyentiai iena. Bie rafue bu cacajia, iena jiai ñinua. Jusiñamuidi cuenta raise ñinotínona naimaci jeacino facaina íbana oñeite. Iraimo faifiñeitimaci; ia Jusiñamui díne jaca iitimaci” cueno.

Cristo Pérgamomo ite creyentiaímo lloga rafue

¹² Cristo cuemo llote:

—Pérgamomo ite creyentiaímo llollena, nainomo ite llofueraímamo cue lluaña cueno: “Nagafebei eo jairede lloebi cuemo ite. ¹³ Omoí illana uiñotícue. Taife anamo itino motomo itomoi; iadedi cuenta ñinocana nia jaidomoi. Omoí mona Antipas micorína navui meinetimaci. Naimie micoridi cue rafuena raise llofueuide. Naie facaise cuenta faionocaiñedomoi; ¹⁴ iadedi cuemona janore rafue omoí diga birui ite. Omoí mona damieriedi Balaam micorí llofuiacinodo jaidimaci. Balaam micorí Balac micorímo

jaie llua jira, omoi jaiagai jeacino finodimaci. Balac cominimo omoi jaiagai diga nabairillena llote. Ie jira omoi jaiagai jiraraimo fecaca guillena naimaci diga guitimaci. Iemei naimacimona ainiaina otimaci. Jusiñamuina inoñedinomona ainiaina otimaci. Naiemona jearede rafue comuide. Omoimona birui damierie iese isoidimaci. Cuen a inoñedinomona ainiaina otimaci. ¹⁵ Omoimona damierie nicolaítas railla llofuiacinodo jiai jaidimaci. Naimaci llofuiacinodi uanañedicino. ¹⁶ Naie llofuiacinomona eneno mai omoi i. Iedo jaiñeno. Naie llofuiacinodo jaidinomo: ‘Omoi comeciai iuai dane meido’ llono. Iena naimaci finoñenia, cue dibeimo naimaci raise iacañenia, cuemo ite lloebi diga cuena inoñedinomona duere finoiticue. ¹⁷ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai inua. Judúuai jaiagaimo maná railla guille cue illa isoi, cuena raise inotonomo monamo jai ite maná isoi iiticue. Biena ñaiticue. Imaci comeciaina ocuiñotajacinona iiticue. Cue cominina naimaci illamona, naimacimo userede noficina jiai iiticue. Nainomo mameci ite. Dani naiena feiñotino naie mamecina uiñoitimaci” cueno.

Cristo Tiatiramo ite creyentiaimo lloga rafue

¹⁸ Cristo cuemo llote:

—Tiatiramo ite creyentiaimo llorena, nainomo ite llofueraimamo cue llua cueno: “Jusiñamui Jitona cue illanona, bie rafue omoimo lloiacadicue. Cue uisi irai isoi boode. Cue eilli bronca eo dua isoi quenirede. ¹⁹ Omoi finoca rafuena uiñoticue. Jusiñamuina omoi isiruillana uiñoticue. Jiaie cominina omoi isiruillana uiñoticue. Cuen a omoi inuana uiñoticue. Jiaie creyentiaina omoi canocabillana uiñoticue. Duere sefuidomoi; iadedi omoi comeciai ocuiñuana uiñoticue. Navui iese icana jaidomoi. Birui bai lliai jaidomoi; ²⁰ iadedi cuemo omoi diga rafue ite. Omoi motomo marañede riño ite. Jezabelna ñaiticue. Naiñaiñona omoi oni dotañena jira, cuemo omoi diga rafue ite. ‘Jusiñamui rafuena jino llua uai cuemo ite’ naiñaiño llote. Uanañedicinona llofuecabilla jira, omoimona damieriena jifuate. Jearede rafuena llofuecabite. Omoi añede riño diga illana llofuate. Omoi iniñede ima diga illana llofuate. Jiraraimo fecaca guille guillena llofuate. Iena guilla jira, omoimona damierie naie jiraraina sedade. Iese naiñaiño llofuecabite. ²¹ Naiñaiño comeci iuai meidollena are sedadicue; iadedi naiñaiño naie jearede rafuena fañonocaiañede. ²² Naiñaiño duere sefuillena, naiñaiño duitaiticue. Naimaci comeciai iuai naimaci meidoñenia, naiñaiño llofuiacinodo jaidinona jiai eo duere finoiticue. ²³ Naiñaiño dibeimo itinona meineiticue. Nana creyentiaidi nana comini comeciai iuaillaina cue uiñuana jiai uiñoitimaci. Nana comini comeciai facajacinona cue uiñuana jiai uiñoitimaci. Ie jira omoi finolle rafue diese cuemona duere sefuitomoi. ²⁴ Jezabel llofuiacinodo jaiñedinomo ja lloiticue. Taife come uiñoñega rafuena uiñote. Iena nia uiñoñedomoi. Omoimo jiaie rafuena lloñeiticue; ²⁵ iadedi cue nia abido biñenia, cuemona omoi uiñoga rafuena inocana mai jai. ²⁶ Cue Moomona cue uaina feiñoticue. Cuen a raise inuamona, abido cue bia, cue jitaillacinona finocabidinomo cue uaina iiticue. Naie facaise cue uai diga cue anamo ite nairaiaina raise sedaitimaci. ²⁷ Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llailla isoi. ²⁸ Cuen a inotonomo monairaicuduna jiai iiticue. ²⁹ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai inua” cueno.

3

Cristo Sardimo ite creyentiaimo lloga rafue

¹ Cristo cuemo llote:

—Sardimo ite creyentiaimo llorena, nainomo ite llofueraimamo cue llua cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiai ite. Omoi llofueraimana ñaiticue. Omoi finoca rafuena uiñoticue. ‘Cristona raise inoticaí’ raitomoi; iadedi omoi comeciainomona raise inedomoi. ² Cue dibeimo raise dane i. Cuen a dane raise inocana jai. Cuen a jai fañonocaiacadomoi. Jusiñamui omoi finoca rafueri iobiñede. ³ Cue rafuena jiaie cacajamona, iena inotomoi.

Iedo dane jai. Omoi comeciai iuaina dane meido. Cue dibeimo dane raise omoi iacaiñenia, fiiriraïma bainino billa isoi, omoïna duere finollena, ebena biitïcïe. Omoi dïne cue billïruïna uiñoñeitomoi. ⁴ Omoïmona damierie jearede rafuena finocana jaiñedïmaci. Jusiñamuïmona naimaci comeciai marena jira, cue dïne naimaci illena, userede ñiroïna jïtaitïmaci. ⁵ Cüena ñinocana jaidïnodï userede ñiroïna jïtaitïmaci. Cüemo ite rabenicomona naimaci mameciaina doñeiticue. Cue illanomo jaca iitïmaci. ‘Naimacidi cue comini’ cue Moomo lloiticue. Naimie jaienisaimo iena jiai lloiticue. ⁶ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cüeno.

Cristo Filadelfiamo ite creyentiaïmo lloga rafue

⁷ Cristo cüemo llote:

—Filadelfiamo ite creyentiaïma lloïlloïna, nainomo ite llofueraïmamo cue llüana cüeno: “Mareuidïmedïcïe. Uanaicïnona jaca lloïticue. David micori jïtona cue illamona, illaïmana cue illa jira, siño uai cüemo ite. Ie muidona cue jïtaïlla dïese cominïna feiñoïticue. Jusiñamui illanomo naimaci illena, naimacina feiñoïticue. Cue jïtaïlla dïese cominïna feiñoñedïcïe. ⁸ Omoi finoca rafuena uiñoïticue. Omoïna cue canua jira, jaca buna cue rafuena omoi llüana itatanide. Jamai bue isoidomoi; iadedi cue rafuena ñinocana jaidomoi. Cüena janoñedomoi. ⁹ Omoi dïne damierie Taïfe anamo itïmaci. Naimacidi judïuai; iadedi cue dibeimo iñedïmaci. Tainona llocabitïmaci. Ero, omoi dïne naimacina cue bitatajamona, omoïna cue isiruïllana uiñoïtïmaci. Cue dibeimo naimaci jaiïlla mei, cüemo iobillacïnona fecaitïmaci. ¹⁰ Nana cüena ñinoñedïnona ico eo duere finoitïcïe. Iemona cüena naimaci ñinoñenana uiñoïticue. Omoi duere sefuiñellena, naie facaisemona omoïna jïlloïtaitïcïe. ¹¹ Enïruemo ebena abïdo biitïcïe. Cüemona ñbana omoi feiñoñeni raïllano, cue dibeimo ñinocana omoi jai. Cue dibeimo raise omoi jaiñenia, cüemona jiaïmie omoi facaina ñbana feiñoïte. ¹² Cüena raise ñnotïno comeciaina ocuiñoïtaitïcïe. Cue illanomo jaca iitïmaci. Cüemo naimaci duïlla jira, cue jiaïe mamecïna naimaci abïmo cüeitïcïe. Jusiñamui mamecïna naimaci abïmo cüeitïcïe. Jusiñamui illano mamecïna naimaci abïmo cüeitïcïe. Naimie illanodi comue Jerusaléna mamecïrede. Naimiemona, monamona ico ana biite. ¹³ Jusiñamui Joreñomona cue lloga rafue ite, omoi creyentiai iena. Bie rafue bu cacajia, iena jiai ñnua” cüeno.

Cristo Laodiceamo ite creyentiaïmo lloga rafue

¹⁴ Cristo cüemo llote:

—Laodiceamo ite creyentiaïmo lloïlloïna, nainomo ite llofueraïmamo cue llüana cüeno: “Siño Jïtodïcïe. Cue lloga uaina jaca finocabidïcïe. Uanaicïnona jaca llocabitïcïe. Cue uaido Jusiñamui nana finode. Nana comuitate. ¹⁵ Omoi finoca rafuena uiñoïticue. Cue rafuedo jaiïllana ñia faïnonocaiñedomoi; ia cue rafuedo eo raise jaiñedomoi. Janore ñinocana jaidomoi. ¹⁶ Omoi finoca rafuena cue gaiñena jira, cüemona omoïna oni dotaitïcïe. ¹⁷ ‘Ucuberedicai’ raitomoi. ‘Raruaïredicai. Nana cai jïtaïlla ra caïmo ite’ raitomoi. Cüemona iese iñedomoi. Cüemona dueredomoi; ia iena uiñoñedomoi. Cüemona caïmare iñedomoi. Cüena omoi raise ñinoñena jira, uisïnidïno isoidomoi. Taimïedomoi isoidomoi. ¹⁸ Ie jira omoïna dajerie rafuena llofuëitïcïe. Cüemona omoi eo duerena jira, omoi comeciai raise iñena jira, omoïmo fiebidicïnona cüemo jica. Cüemona ono. Omoi duenillena, cüemona eo mare oro isoïde rana ono. Omoi taimïeñelle isoïñellena, cüemona omoi meïruiñellena, userede ñiroï isoïde ra cüemona ono. Omoi uisïna cioïlle isoïllena, cüemona manue ono. Omoi comeciaina ññaitïcïe. Cüena raise omoi ñnoïa, buena omoi comeciïmo fiebiñeite. ¹⁹ Cue isiruïgano cue dibeimo raise illena, naimacïmo riïre llocabitïcïe. Cue uaina naimaci ñnollena, naimacina jiai duere finocabidïcïe. Ie jira cue dibeimo raise omoi i. Jeacïno omoïmo ia, iena faïnonocai. ²⁰ Ero, nase tutïcïe isoidïcïe. Bu cüena cacajia, cue fo billena cüena uaidoïa, nasena bu econoïa, fo jaitïcïe. Naimïena nabaïllanona, naimie dïga guitïcïe. Omoi comeciaina ññaitïcïe. Cue rafuena omoi cacaja mei, iena omoi ñnoïa, cüena feiñoïtomoi. Iemona conini nabaitïcai. ²¹ Enïruemo cue Moo jïtaïlla rafuena jaiïe cue fuidua mei, naimie ecïmo abïdo jai itïcïe.

Cueri naimie iobillamona, illaimana cue illamona, naimie ecimo jai iticue. Ie isoide. Cuen a raise inotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue. ²² Jusiñamui Joreñomona cue lloga rafue ite, omoi creyentiai iena. Bie rafuena bu cacajia, iena jiai inua” cueno.

4

Juan Jusiñamui illanomo ciua rafue

¹ Dallu illanona monamo cue eruaia, jiaie rafuena ciodicue. Nainomo Jusiñamui illanomo econoga nasena ciodicue. Ailli cue diga ñaitimiedi cuena uaidote. Naimie uai trompeta isoi ficirede. Llote:

—Monamo bi. Jiairuido suille rafuena omo acataiticue.

² Jusiñamui Joreño anamo cue illamona, ñacairilla isoi Jusiñamui illanona ciodicue. Nainomo naimie ana raillana ciodicue. ³ Naimie eo quenirede. Eo raifide ebirede noficina eruaide. Jaspe railla noficina eruaide. Jaspe enefebecodo ciode. Cornalina railla noficina eruaide. Cornalina jiairede. Naie illano ecimo ameona ciodicue. Ameo mocorena jira, esmeralde railla noficina eruaide. ⁴ Naie illano ecimo veinticuatro rairabici jiai ite. Nainomo userede iniroina jitajanona veinticuatro einamací ana raidimaci. Naimaci ifogimo oromona finoca nuicirai ite. ⁵ Jusiñamui illanomona boricabide. Jiai gurucabide. Bue isoi eo ficirede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode. ⁶ Jusiñamui illano uicomo vidriona eruaide joraina ciodicue. Eo quenirede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite. ⁷ Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majaiñona eruaide. ⁸ Nagamiiaimo seis iaico ite. Ailluena uisi naimaci iaicuaimo ite. Naimaci abimo uisi jiai eo ite. Nagarui iniñeno jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jai e jaca ite. Birui ite. Ico jaca iite.

⁹ Naimaci iese llua jira, Jusiñamuina iobitadimaci. Naimiemo iobillacinona naimaci iese fecaia, ¹⁰ naie veinticuatro einamací Jusiñamui uicomo ana bitadajanona, naimiemo iobillacinona jiai fecadimaci. Naimieri iobillanona, naimaci nuiciraina naimie dine faianona, ¹¹ rotimaci:

Cai Nama Jusiñamui, ona eo iobitaiacadicaí.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidicaí.

5

Juan Jusiñamui illanomo ferinoga rabe illana ciode

¹ Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cueda rafue jai ite. Siete nitaca ra illamona, naie rabe raise ibaibide.

² Jusiñamui ie nanoca jaienici ado lluaana cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

³ Monamo itinomona, enirue itinomona, jai fioidaitinomona, bumio ie uai inede, naie rabe oni econollena. Naie rabe facanidimaci. ⁴ Jaca bumio naie uai inena jira, eo eedicue.

⁵ Naie facaise naie veinticuatro einamacimona damie cuemo llote:

—Mai eeño. Judá nairai ie Leónna mameciredimiedi iena econorede. Naimiedi David micori comini imie. Ie dibeimo inedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

⁶ Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie

Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreña jai orede. ⁷Naie facaise Jusiñamui ie nabellimona naie rabena ote. ⁸Iena naimie ua mei, naie cuatro cajedino, naie veinticuatro einamací diga, naimiena sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamuimo comini jiacino mamecido ite. ⁹Llaudana sedallena, naimaci arpas taillanona, comue ruana rotimaci: O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fiodailla jira, o diaillamona, Jusiñamui díbeimo naga nairaimona cominina itatatio.

Naimaci jeacinomona jillotatio.

¹⁰Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jiairuido eniruemo ite cominina sedaitimaci.

Ie jira naie rabena oni suiñoedio.

¹¹Iemei dane eruaillamona, naimie ecimo eo ailluena Jusiñamui jaienisaína ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide. ¹²Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiena eo abina uiñotajamona, naimiena jiai iobitaiacadicaí.

Naimiena cai inuanona, naimiemo iobillacinona feacaadicaí.

¹³Iie facaise nana comini, nana Jusiñamui comuitaga ra diga, lluaana cacadicue. Monamo itino, enirue itino, jai fiodaitino, monaillaimo itino lluaana cacadicue. Llotimaci: Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca feacaadicaí. Caina jaca sedallesa.

¹⁴Naie cuatro cajedino raitimaci:

—Ie isoi jiai lloiacadicaí.

Ie facaise naie Llauda isoidimiena sedallena, naie veinticuatro einamací ana bitadatimaci.

6

Juan siete nitaca ra oni suiñuana ciodicue

¹Toica Llauda isoidimie iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi gurua uai isoi lluaana cacadicue. Naimie llote:

—Mai bi.

²Naimie llua mei, userede caballo billana ciodicue. Caballo emodo itimiemo sicuira ite. Illaimana jira, naimie ifogimo nuicirai jide. Ie bacauai anafefitallena, oni jaide.

³Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁴Naimie llua mei, jiairede caballo billana ciodicue. Caballo emodo itimiemo are lloebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

⁵Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite. ⁶Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube diese raifide. Iemona llomenicono finoa, dacaiño guille raifi ite. Tres kilos

cebada ie core darui maijia ua ucube diese raifide. Iena damie oia, iemona llomenicono finoia, dacaiño amani guille raifi ite. Illimo riana nia ite; ia iena iballena ucube baiñede. Ie muidona aime guitimaci —llote.

⁷ Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

⁸ Naimie llua mei, liai usereoide caballona ciodicue. Ie emodo itimie mamecidi Fiodaitadimie. Jusiñamui uai naimiemo illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiamona fiodaitimaci. Atuedo meinetasiñeite; iadedi eo ailluena meinetasiite. Riai uaimona ie cuarta facaina comini fiodaitimaci.

⁹ Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicai” naimaci llua jira, Jusiñamuina inoñedino naimacina meinetimaci. Jai fiodaillamona naimaci joreñuui Jusiñamui illanomo jai itimaci. ¹⁰ Jusiñamuimo ado llotimaci:

—Cai Nama, siño jitodio. Mareuidimedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

¹¹ Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meineitimaci. Naimacina meinia mei, ibana oiticue.

¹² Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo jitireficaide. Fivuidi diruena eruaide. Jiairede. ¹³ Riirede aifi riana ana llutaja isoi, monamona eniruemo ucuai llude. ¹⁴ Ferinoga rabe oni uilla isoi, mona iñebicaide. Naga anedu, naga uiasi diga jiaie oni jaide. ¹⁵ Ie jira illacomini, jamai bue isoñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci. ¹⁶ Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui riicaillafuemono caina reirita. Llauda isoidimie riicaillafuemono caina reirita. ¹⁷ Iaimaiaie riicaillarui jai ite. Naiemona buna jillobinide —llotimaci.

7

Juan ailluena Israel comini Jusiñamui sello diga nitajana ciode

¹⁻² Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaiaiaie beicimo itiaiaiaie. Aifi biñellena itimaci. Ie muidona monailai dine aifi iñede. Aifi iñena jira, amenaiaie nirairiñede. Eniruena monailai diga maraiñeno finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaimo ado llote:

³ —Eniruena aifi diga maraiñeno nia finoñeno. Monailaina maraiñeno nia finoñeno. Amenaiaina maraiñeno nia finoñeno. Jusiñamui dibeimo itino uiecuai itofiai sello diga nia cai nitañenia, eniruena maraiñeno finoñeno.

⁴ Ailluena comini sello diga nitade. Ciento cuarenta y cuatro mil diese nitajana cacadicue. Nana naimaci Israel cominimona itimaci. ⁵ Judá micori cominimona doce mil ite. Rubén micori cominimona doce mil ite. Gad micori cominimona doce mil ite. ⁶ Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite. ⁷ Simeón micori cominimona doce mil ite. Leví micori cominimona doce mil ite. Isacar micori cominimona doce mil ite. ⁸ Zabulón micori cominimona doce mil ite. José micori cominimona doce mil ite. Benjamín micori cominimona doce mil ite. Diese nitade.

Juan ailluena comini userede iniroina jitajana ciode

⁹ Naie facaise ailluena cominina ciodicue. Ailluena jira, naimacina facadonicue. Naga nairaiaimona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite. ¹⁰ Ado llotimaci:

Bie Llauda isoidimie jaie fiodaillamona, cai jeacinomona Jusiñamui caina jai jillotate.

¹¹ Naie facaise nana Jusiñamui jaienisaí naimie ecimo naidaillana ciodicue. Naie veinticuatro einamací ecimo, naie cuatro cajedino ecimo jiaí naidaidimaci. Naie facaise Jusiñamui uicomo ana bitadajanona, naimiena sedadimaci. ¹² Raitimaci:

Bie comini isoi omo iobillacinona jiaí feaacadicaí.

Odi mareuidimedio. Abina eo uiñotio. Odi jaca siño jitodio.

Ie jira iese lloticaí.

Ona jaca cai iobitajasa.

¹³ Naie facaise naie veinticuatro einamacimona damie cuemo jicante:

—¿Userede iniroina jitadinodi nímaci? ¿Ñinena bitimaci?

¹⁴ Uai oticue:

—Uiñoñedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina iñoñedino meinegano. Naimaci iniroina jai jocoritimaci. Llauda isoidimie jaie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiaí ñaiticue. Llauda isoidimie fiodailla jira, naimaci comeciái jai jeanide. ¹⁵ Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite.

¹⁶ Dane duere sefuiñeitimaci. Nana naimaci jitailla ra naimacimo iite. Aime dane guiñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. ¹⁷ Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eeñeitimaci. Dane sunaiñeitimaci.

8

Juan Llauda isoidimie iraié nitaca ra oni suiñuana ciode

¹ Toica Llauda isoidimie iraié nitaca ra oni suiñuanona, media hora monamo tii raiñoicaide. ² Iemei siete Jusiñamui jaienici naimie uicomo illana ciodicue. Nagamiemo daje trompetana fecade. ³ Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina iñotino jiacino Jusiñamuimo jaide. ⁴ Jobaillamona Jusiñamui uicomo a jaide. Nana Jusiñamuimo jiacino diga a jaide. ⁵ Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

Juan trompetas fillana cacade

⁶ Iemei naie siete jaienici naimaci trompetas fillena llinote. ⁷ Damie ie trompetana fite. Filla jira, monamona janorede hielu, boode ra diga, dirue diga, eniruemo uaide. Atuedo enirue boñede; ia ailluena boode. Riaí uaimona ie tercera facaina boode. Nainomo nana amenaiaí boode. Nainomo nana raiticño boode.

⁸ Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. ⁹ Iemona monaillai diruena jaide. Atuedo iese jaiñede; ia ailluena iese jaide. Riaí uaimona ie tercera facaina diruena jaide. Ie muidona ie tercera facaina lliciaí fiodaite. Nainomo ite botemona ie tercera facaina jiaí anabaite.

¹⁰ Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniaí, ie tercera facaina jorainiaí diga erireficaide. ¹¹ Ie

muidona naie ucudu Ajenjona mameciredede. Riai uai oni dobaiñuamona “Eriredimie”. Iemona jinui erireficaide. Iena jiruamona, ailluena comini fioidaitimaci.

¹² Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

¹³ Iemei jaienici ado cuirioillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

9

¹ Jiaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana cidodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. ² Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide. ³ Uilliemona fioduaina eruailanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci. ⁴ Raiticño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci. ⁵ Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite. ⁶ Iese ico suia, eo duere comini sefuilla jira, fiodaillana jitaitimaci. Naimaci abina meinecanitimaci. Fiodaiacanitimaci; ia fioidainitimaci.

⁷ Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci. ⁸ Naimaci ifotie arena illanona, riño ifotiena eruaide. Naimaci isiduai leones isiduaina eruaide. ⁹ Naimaci abiaimo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficiredimaci. ¹⁰ Naimaci omacai acaido isoide. Naie diga maillanona, cinco fivui cominina duere finoitimaci. ¹¹ Naimaci illaimadi naie ana ifona sedadimie. Judíuai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodimie. ¹² Daje duere sefuilla rafue jai fuite. Mena nia suiñede.

¹³⁻¹⁴ Naie facaise jiaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suiño —llote. ¹⁵⁻¹⁶ Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riai uaimona ie tercera facaina meinetimaci. ¹⁷ Soldaduai caballos emodo itimaci. Soldaduai jogobemo ra ite. Daje facaise eo jiairede. Daje facaise mcorede. Daje facaise borarede. Caballos ifogiai leones ifogiaina eruaide. Naimaci fuemona boode radi, uillie diga, azufre boa isoi jino bite. ¹⁸⁻¹⁹ Naimaci fuemona bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogi itimaci. Ailluena cominina jiai duere finodimaci.

²⁰ Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, bronceomona, noficimona, amenamona finoca jiraraiaina nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jiai jaca buena cacaiñede. Jaca macariñede. Cajeñede; ia iena sedacabidimaci. ²¹ Conini meinecabitimaci. Aimaniai dine jaicabidimaci. Naimaci aiñede riño, naimaci iniñede iima diga icabitimaci. Rana fiicabidimaci. Jeacinona finocana nia jaidimaci.

10

Juan Jusiñamui jaienici, econoga rabenico diga, billana ciode

¹ Ie facaise Jusiñamui illanomona eniruemo jiaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide. ² Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide. ³ León eo irilla isoi, ado llote. Naie facaise siete gurua ñaia isoidino uai cacadicue. ⁴ Naimaci lluana cacaja mei, iena cueiacadicue; iadedi monamona damie cuemo llote:

—Naie lluana lloñeno. Iena cueñeno.

⁵ Naie jaienici ie nabei onolli mona dine ñuitajanona, ⁶ Jusiñamuimo llote:

—Jaca itio. Monana nainomo ite ra diga finodio. Eniruena nainomo ite ra diga jiai finodio. Monaillai nainomo ite ra diga jiai finodio. Cue baifemo o faia jira, uanaicinona cue lluana uiñotio. O lloga uaina jaca suite. ⁷ Iraie jaienici ie trompeta ja fiite. Filla mei, bie facaise Jusiñamui ie facaina lloraini micoriaimo jaie lloga rafue suite. Comini naie rafue jaie raise cacaiñedimaci; ia iena ja raise cacaitimaci —llote.

⁸ Monamona cuemo ailli llotimie dane llote:

—Jaienici onollimo econoga ite rabenicono llinuai.

⁹ Ie jira jaienici dine cue jaillanona:

—Iena cuemo ine —lloticue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

¹⁰ Llinua mei, iena guiticue. Ciifo isoi naimerede rana cacadicue; ia guilla mei, erirede ra isoi cue jebemo ite. ¹¹ Cuemo dane llote:

—Omo cue llole rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

11

Juan menamie Jusiñamui rafuena lluana cacade

¹ Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca. ² Cue jofo ecimo ite taibirina facañeno. Naie illano judúuaiñedinomo jainaiaide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. ³ Naie facaise menamiemo cue uaina iiticue. Iaimaiai cue llole rafuena daje amani años abimo atomonado lloitiaimaiai. Comini comeci iuai meiduana iaimaiai jitailla jira, sunaillamona, ebinide iniroina jitaitiaimaiai —llote.

⁴ Iaimaiai mena olivos railla riera mamecido itiaimaiai. Enirue Namana Jusiñamui illanona, naimie uicomo mena ite lamparín ie rairaco mamecido itiaimaiai. ⁵ Iaimaiaina duere bu finoacania, naimiena meineitiaimaiai. Iaimaiai fuemona boode ra billanona, naimiena meinetaimaiai iaimaiaina duere finodino iese fioidaitimaci. ⁶ Iaimaiai Jusiñamui rafue llole facaiseconi noci deitañellena, iaimaiaimo Jusiñamui uai iite. Jinui diruena jaitallena iaimaiaimo uai iite. Iaimaiai jitaicabilla facaise, diga isoide rafue finuamona cominina duere finoitiaimaiai; ⁷ iadedi Jusiñamui rafue iaimaiai llua mei, eo ana ite ifomona ocainana eruailanona, Taife jino biite. Jino billanona, iaimaiai diga fuirite. Iaimaiaina anafefitaja mei, iaimaiaina meineite. ⁸ Raiafomo joneñeitimaci; iadedi iaimaiai abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitañena jira, Sodoma jaie ite nairai isoidimaci. Egipto jaie ite nairai jiai isoidimaci. Jerusalémo Jesúsna jaie jiai meinetimaci. ⁹ Raiafomo iaimaiai joniana rairuitimaci. Darui amani abi atomonado ailluena comini, naga nairaiaimona iaimaiaina jibuisaibitimaci. ¹⁰ Nana eniruemo ite comini iaimaiai fiodaillari iobitimaci. Iaimaiaimona comini duere sefuilla jira, iaimaiai jai fiodailla jira, iobitimaci. Rafuena

finuanona, dani coninina rana fecaitimaci. ¹¹ Darui amani abi atomonado illanona, fiodaillamona iaimaiana Jusiñamui dane jillotaite. Ie muidona naidaitiaimaia. Nana iaimaiana ciodino eo jacinaitimaci. ¹² Naie facaise monamona damie iaimaiana uaiduana cacadiaimaia. Lote:

—Bene mai bi.

Iecon iaimaiana enoidimacidi uillie motomo monamo iaimaia jaillana ciodimaci. ¹³ Naie facaise aillue ñuisaño suide. Ie jira janore facai Jerusalén goide. Riai uaimona ie décima facai goide. Naiemona siete mil comini fiodaitimaci. Fiodañedino jacinailamona:

—Jusiñamuidi ua siño jito —lloitimaci. ¹⁴ Mena duere sefuilla facaise jai fuite. Nia daje suiñede; ia raire suite.

Juan irai trompeta fillana cacade

¹⁵ Naie facaise jiaie jaienici ie trompetana fite. Monamo itino ado llotimaci: Jusiñamui, Cristo diga, illaima isoi, eniruemo ite cominina biruimona jaca sedaite. Naie comini naimie anamo raise iitimaci.

¹⁶ Naie veinticuatro einamací Jusiñamui ecimo illanona, naimie uicomona ana bitadajanona naimiena sedadimaci. ¹⁷ Llotimaci:

Jusiñamui, cai Nama, omo iobillacinona fecaacadicaí.

Siño jitodio. O jitailla rafuena jaca finodio.

O uaido bie cominina jai sedadio.

¹⁸ Ona naimaci ñnoñenamona, o diga iciritimaci; iadedi naimacina emodofidio.

Bie facaise jai fiodaitino jillotajamona, ona naimaci ñnoñena jira, naimacimona ja ibana oitio.

Jearede rafuena naimaci finua jira, naie facaise ona ñnoñedinona duere finoitio.

O díbeimo maijidino, o facaina lloraini, nana ona ñnotino omona ibana feiñoitimaci.

Ñibai jamai bue isoidimaci.

Ñibai jamai bue isoiñedimaci; iadedi omona ibana feiñoitimaci.

¹⁹ Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Iecon boricabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielona ana llude.

12

Juan daje riñona, eo aillue jaio diga, ciode

¹ Naie facaise monamo daje riñona ciodicue. Naiñaiñona cue ciuamona, Jusiñamuidi eniruemo itinomo ico suille rafuena cue uiñuana jitaide. Naiñaiño iniroidi jítoma isoi bairede. Naiñaiño eilli anamo fivui ite. Naiñaiño ifogimo nuicirai isoi doce ucuduai ite. ² Jai uruesite. Jocoacana jira, como isirede. ³ Ie facaise monamo jiaimiena ciodicue. Naimiedi Taife. Naimie illamona jiaie rafue suillena uiñotícue. Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riai uaimona naimiedi dragón. ⁴ Naimie omacai diga ailluena ucuaina eniruemo ana butade. Riai uaimona ie tercera facaina butade. Ie uruena gutallena, riño uicomona naidaita naiñaiño jocollena sedade. ⁵ Naiñaiño ñimana jocode; ia jaio naimiena gutañede. Nana nairaiaí naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiena uite. Ie ecimo Jusiñamui naimiena itatate. ⁶ Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

⁷ Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jai fuiridimaci. Jusiñamui jaienisai illaima mamecidi Miguel.

⁸ Naimaci dinena emodofidimaci. Jaio ie jaienisai anafefilla jira, Jusiñamui illanomo naimaci illano jai iñede. ⁹ Eniruemo jaiona eruaidimie ie jaienisai diga dotadimaci. Naie jaiodi Taife. Satanás. Jaiona Taife jaie jaillanona, eo ailluena cominina jai jifujete.

¹⁰ Monamo damie ado lluaña jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise ñinoñenia, jeacinona bu finoia, Jusiñamui uicomo birui naimie finocabilla isoi, Taife caina llogidoñeite. ¹¹Toica Llauda isoidimie naimaciri fiodailla jira, naimie rafuena naimaci llumona, Taifena emodofidimaci. Fiodaitimacina, naie rafuena llocana jaiacadimaci. ¹²Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitimaci. Naimie eo icirite. Nainomo naimie are ñhellena uiñote. Naimie icirillamona eniruemo itino eo duere sefuitimaci —llote.

¹³ Eniruemo jaiona eruidimie dotajamona, naiñaiñona duere finollena, naimiedi ñimana jai jococa riñona racade. ¹⁴ Naimiemona jilloillena, Jusiñamui mena iaico, majaiño iaico isoi, naiñaiñoite. Feianona, jofue ñnenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide. ¹⁵ Ie facaise jaiona eruidimie fuemona eo ailluena jinui bite. Ille isoi tote, naiñaiñona corobaitallena; ¹⁶ ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobaiñede. ¹⁷⁻¹⁸ Naie facaise jaiona eruidimie riño diga icirillamona, naiñaiño comini diga jobairiacade. Nana Jusiñamui llogacino ñnotino diga, nana “Jesúmo duidicai” raitino diga, jobairiacade.

13

Juan mena riirede ocainana ciode

¹ Naie facaise monaillai fuemo cue naidaillanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogaiimo Jusiñamuina jeare ñaia mameci ite. ² Naie ocaina abi janallarina eruaide. Ie eilli oso eillina eruaide. Ie fue león fuena eruaide. Eniruemo itinona sedallena, naimiemo aillue jaiona eruidimiedi ie siño uaina fecade. ³ Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicaillamona, nana eniruemo ite comini naimie dibeimo jaidimaci. ⁴ Ocainamo ie uaina aillue jaiona eruidimie fecaja jira, jaiona sedajanona, iobillacinona naimiemo fecadimaci. Ocainana jiai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

⁵ Naimiemo Taife uai illa jira, abina uradoillamona, Jusiñamuina eo jeare ñaite. Taife jitaila jira, cuarenta y dos fivui iese nana cominina sedade. ⁶ Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite. ⁷ Taife uai naimiemo illa jira, Cristona eniruemo ite ñnotino diga jobairite. Naimacina emodofide. Iemona nana comini naga nairaiñaimona naimie anamo itimaci. ⁸ Nana Jusiñamui rabenicomo cueñega mameciai diese ocainana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena ñnotino mameciaina naie rabenicomo jai cuete. Naimie illanomo jaca illena, naimaci mameciaina cuete.

⁹ Omoi jeforena jira, raise fueollena, bie rafuemo cacarei. ¹⁰ Duere sefuillena, naie facaise cárcelmo Cristona ñnotinona joneitimaci. Naimacina meinia mei, naimacina meinettino Jusiñamuimona daje isoi ibana feiñoitimaci. Ie muidona Cristona ñnotino comeciai ocuiñoocaida ñnocana jailla.

¹¹ Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaio isoi ñaite. ¹² Monaillaimona bite ocaina uai eniruemona bite ocainamo jiai ite. Ie uai diga, nana cominina monaillaimona bite ocainana sedatate. ¹³ Eo siño rafuena finocabite. Comini cioillena, monamona eniruemo boode ra ana bitatate. ¹⁴ Siño rafuena finuamona, Taife jitaila jira, eniruemo itinona jifuate. Iena naimaci sedallena, cominina monaillaimona bite ocaina joreño finuana ocuide. Monaillaimona bite ocaina lloebi diga navui bofiamona jai jillode. ¹⁵ Joreño finua mei, eniruemona bite ocaina iena ñaitatate. Iena bu sedañenia, ocaina naimiena

meiniana ocuide. ¹⁶Nana cominimo naimie númerona cuetatate. Número cuetatañenia, naimie mamecina cuetatate. Ie nabeillimo cuetatañenia, ie uiecomo cuetatate. Jamai bue isoidinomo cuetatate. Jamai bue isoiñedinomo cuetatate. Ucuberedinomo cuetatate. Ucubenidinomo cuetatate. Patrón anamo itinomo cuetatate. Patrón anamo iñedinomo cuetatate. ¹⁷Iese bumo iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate. ¹⁸Iena raise cacailena, iemo omoi comeciaina faca. Abina uiñotimie bie númerona uiñoite. Come mamecido iite. Bie númerodi seiscientos sesenta y seis.

14

Juan 144,000 comini ruana cacade

¹Naie facaise Jerusalémo Sion railla anedu muidomo Toica Llauda isoidimie naidailana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cuega. ²Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue. ³Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamací nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruemono naimaci díbeimo iñedinomona jai jillodimaci. ⁴Bie ciento cuarenta y cuatro mil comini jearede rafuena ebiruiñedinomaci. Llauda isoidimie rafuena inocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena. ⁵Cristo rafuedo jeacinona finocabiñeno raise jaidimaci.

Juan daje amani jaienai rafue lluaana cacade

⁶Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena lluaide. ⁷Ado llote:

—Jusiñamuina inuanona naimiena seda. Naimiemo iobillacinona feca. Naimiemo inoñedinona ja duere finoite. Monana, enirue diga, monailai diga, ille diga, naimie finua jira, naimiena seda.

⁸Jiaie jaienici billanona llote:

—Babilonia railla nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamo jaié itino isoi, Jusiñamuimona duere sefuitimaci.

⁹Naie facaise jiaie jaienici billanona, ado llote:

—Monailaimona bite ocainana bu sedaia, ie joreña bu sedaia, ie uieco itofemo, ie onollimo ocaina cuetataga ra bumo ia, ¹⁰Jusiñamui riicaillafuemono, naimacina duenaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci. ¹¹Naie irai illano jaca bouamona, ie uillie jaca baireite. Nainomona naie duere sefuidino jaca jilloñeitimaci. Iese naimaci fiodañeno jaca duere sefuitimaci —llote.

¹²Bie rafue suille facaise Jusiñamui lloga uaina raise inuanona, Jesús díbeimo raise illanona, comeciái ocuiñocana naimaci jaille.

¹³Iemei monamona Jusiñamui Joreño llote:

—Biena cueno: “Biruimona Jesúna inuamona, meineganodi caimare iitimaci. Jesús díbeimo naimaci illamona, navui duere sefuidimaci. Iemona uri iitimaci. Ieri Jusiñamuimona ibana feiñoitimaci”.

Juan Jusiñamui eniruemo itinona duere finua rafuena cacade

¹⁴Naie facaise monamo cue eruaia, userede uilliena ciodicue. Uillie emodo Cristo raide. imana eruaide. Naimie ifogimo oromona finoca nuicirai ite. Ie onollimo jairede lloebi ite. ¹⁵Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite.

¹⁶Jaienici llua isoi, ie lloebi diga Cristo cotade. Nana iena finode. Cominina duere finode.

¹⁷ Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite. ¹⁸ Ieconí Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Llobiredimiemo ado llote:

—Jai einaila jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite. ¹⁹⁻²⁰ Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicaillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

15

Juan siete jaienisaí cominina duere finoacana ciode

¹ Naie facaise monamo jiaie rafuena ciodicue. Ieri eo rajjicaidicue. Iena cue ciuamona, Jusiñamuidi eniruemo itinomo suille rafuena cue uiñuana jitaide. Siete jaienisaína ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie riicaillifue saite.

² Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai iñedimaci. Ie cuetataga número anamo jai iñedimaci. Naimaci onollimo Jusiñamui arpas illanona, naimacina taillanona, ³ jai emodofilla jira, Moisés micori ie ruana rotimaci. Moisés micori Jusiñamui facaina jaie maijuuide. Jeacinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

⁴ Cai Nama, nana comini ona jaciruillamona, ona iinoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

⁵ Jusiñamuina sedajanomo dane eruaidicue. Ie fo iticuartomo ciodicue. ⁶ Naiemona siete jaienisaí billana ciodicue. Nagamie cominina duere finoacade. Eo userede linomona finoca iniroina jitade. Oromona finoca cinturones naimaci jogobemo jitade.

⁷ Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaite. ⁸ Jusiñamui ebirede siño uai illamona, ie sedajanomo uillie eo illana ciodicue. Bie siete jaienisaímo ite rafue nia suiñena jira, Jusiñamuina sedajanomo buna fo jainide.

16

Juan eniruemo copas oni totajanona ciode

¹ Ie sedajanomona Jusiñamui naie siete jaienisaímo ado llote:

—Cue riicaillafue omoi copamo illa jira, eniruemo itinona duere finollena, omoi copas oni tota.

² Daje jaienici iena finode. Eniruemo ite cominina duere finode. Monaillaimona bite ocaina cuetataganona jiai duere finode. Ocaina joreño sedadinona duere finode. Naimaci abiaímo jodollaiaína comuitate. Iemona duere sefuidimaci.

³ Iemei jiaie jaienici ie copa oni totajamona, monaillaina duere finode. Nana monaillaidi fiodaitino dirue isoi jaide. Eo jearedena eruaide. Nana nainomo ite cajedino fiodaitimaci.

⁴ Iemei jiaie jaienici ie copa oni totajamona, nana illiai, nana jorainiai diga, duere finode. Diruena jaide.

⁵⁻⁶ Naie facaise nana jinuina sedacabide jaienici llote:

—Jusiñamui, o jaca mareuidimedio. Ona iñotinona eniruemo itino meinia jira, o facaina llorainina naimaci meinia jira, naimacina o raise uiñuamona, naimacina duere

finodio. O cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

⁷ Jusiñamuimo caimare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

⁸ Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci. ⁹ Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uiñotimaci; ia naimie díbeimo naimaci comeciái iuaina meidoiacaiñedimaci. Jeacinona finuana fainonocaiacaiñedimaci. Naimiemo iobillacinona fecaacaiñedimaci.

¹⁰ Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitireficaide. Eo duere sefuillamona, comini imaci ifena ainitimaci. ¹¹ Duere sefuillamona, Jusiñamuina jeare ñaitimaci. Naimaci abiamo ite jodollaiaí isirede; iadedi naimaci comeciái iuaina meidoñedimaci. Jeacinona finuana fainonocaiñedimaci.

¹² Naie facaise jiaie jaienici ie copamona ie duere sefuillicinona Eufrates railla ille dine totade. Ie muidona naie aillue ille safenaite. Safenaillamona, jitoma billanomo ite nairaiaí illaicomini, imaci soldaduái diga, ruica dine raise birenitimaci.

¹³ Naie facaise aillue jaio fueмона, monaillaimona bite ocaina fueмона, naimie facaina lloraima fueмона, daje amani jananiaí billana ciodicue. Nagamiemona daje janaba bite. Nai jananiaí jerocina eruaide. ¹⁴ Taifemona bite. Siño rafuena finocabite. Nana illaicomini, imaci soldaduái diga uaidollena, naimacina oreite. Danomo ofillena illaicominina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uiñoitimaci. ¹⁵⁻¹⁶ Armagedón railla illanomo ofitimaci. Naie illano mamecidi judúuai uai mameci. Ieconi cai Nama cuemo llote:

—Fiiriraíma isoi ebena biiticue. Cue billemo ocuridimie iocire iite. Cue billemo naimie ocuria, cue bia, naimie cue jitailacinona finuamona, naimie meiruiñeite.

¹⁷ Naie facaise jiaie jaienici jafaici dine ie copamona ie duere sefuillicinona totade. Ieconi ie sedajanomona Jusiñamui llote:

—Bie duere sefuillicino diga, cominina cue duere finoacanacino ja fuite.

¹⁸ Ieconi boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede. ¹⁹ Iemona nanoca nairaí illano daje amani facaina goide. Nana jiaie illanuái jiaí goidimaci. Jusiñamuidi Babilonia railla nairaína raise uiñuamona, nana ie riicaillafuemona iena eo duere finode. ²⁰ Naie ñuisañoemona naga uiasí jai cioiñena. Naga anedu jiaí cioiñena. ²¹ Monamona noci deilla isoi, hieló jiaí ana jurude. Naga hieló cuarenta kilos ñibaí merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

17

Juan eo maraiñede riñona duere sefuillana ciode

¹ Naie facaise naie siete copas diga ite jaienisaímona cue dine damie billanona cuemo llote:

—Cue diga bi. Eo maraiñede riño duere sefuillana omo acataiticue. Monaillai emodomo naiñaiño jai raide isoide. Naiñaiñodi nanoca nairaí illano mamecido ite. Nana illaicomini naie nairaí anamo itimaci. ² Naiñaiño sedajamona, naiñaiño diga, illaicominidi jearede rafuena finocabidimaci. Naiñaiño nabaillamona, eniruemo ite comini jearede rafuena eo ebiruitimaci —llote.

³ Nicairilla isoi, jaienici cue joreñoña uillanona, jofue iñenanomo cue joreñoña uite. Eo jiairede riirede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiaí ite. Diez sigai jiaí ite.

⁴ Naie riño jiduirede iniroi, jiairede iniroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona

finoca. Ie diga ie abi eo finobide. Naiñaiño onollimo oromona finoca copana uite. Nainomo eo maraiñede jearede rafuena finocana uite isoide. ⁵Jusiñamui naiñaiño finoca rafuena uiñotaiacana jira, naiñaiño uiecomo mameci jai cuetataga: “Nanoca Babilonia raillañaiñodicue. Cuemona eo jearede rafue comuicana jaicabide. Cue muidona comini jearede rafuena finocabide”. ⁶Naiñaiñodi ailluena Jusiñamuimo duidinona, ailluena ua Jesúna iñnotinona meinetajana eo ebiruite. Naiñaiñona cue cioia, eo rajicaidicue. ⁷Jaienici cuemo jicanote:

—¿Bue ñe rajicaidio? Naiñaiño ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue. ⁸Naie ocaina navui ite; ia birui jai iñede. Ico eniruemona, eo ana ite ifomona, dane biite; iadedi faifite. Ieri Jesucristona iñoñedino rajicaitimaci. Jesucristona naimaci iñoñena jira, monamo Jusiñamuidi ie rabenicomo enirue nia finoñena facaise naimaci mameciaina jaca cueñede. Naimie illanomo jaca iñeitimaci. ⁹Ocaina rafuena omo ja lloiticue. Jusiñamui ona uiñotajanona iena cacaitio. Bie siete ifogidi siete anedu mamecido ite. Riño nainomo raide. ¹⁰Ie siete ifogidi siete illaicomini mamecido ite. Naimacimona cinco illaicomini jai iñede. Damie cominina birui sedade. Jaimie cominina nia sedañede. Cominina naimie sedaia, are naimacina sedañeite. Dallu sedaite.

¹¹Ifomona bite ocainana dane lloiticue. Cominina jiai sedaite; ia bie siete illaicomini sedajacinomo duite. Cominina naimie sedaja mei, naimie faifite. ¹²Ie diez sigaidi diez illaicomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci. ¹³Daje isoi comecina lloitimaci. Ocainana nabaitimaci. Naimie jitailla rafuena finuanona, naimie anamo iitimaci. ¹⁴Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illaicomini baifemo faia jira, nanoca imiema jira, naimacina emodofite. Ie cominina naimie fetode. Naimiema iñotimaci. Jai emodofitimaci —llote.

¹⁵Jaienici nia llote:

—Riño monailai emodomo railana ailli ciodio. Monailaidi nana comini mamecido ite. Naga nairai mamecido ite. ¹⁶⁻¹⁷Naie diez illaicominidi, ocaina diga riñona enoitimaci. Naiñaiñona duere finoitimaci. Jusiñamui jitailla jira, naimie jitailla rafue fuidollena, naimie lloga uai suillena, naimaci comecina daje isoi lloitaite. Ocaina anamo naimacina itataite. Riñona iese fuidoitimaci. Naiñaiño iñiroina oni dotatajanona, naiñaiño taiñaiñona iite. Naiñaiñona meineitimaci. Ie llicisina riitimaci. Ja muidomo iraimo naiñaiñona dotaitimaci. Iese naiñaiñona duere finuanona, naiñaiñona fuidoitimaci. ¹⁸Bie riñodi nanoca nairai illano mamecido ite. Naie nairai anamo nana eniruemo ite illaicomini iitimaci —llote.

18

Juan Babilonia railla nairai illano goilla rafuena ciode

¹Ie facaise monamona jiaie jaienici ana billana ciodicue. Naimie uai siño. Naimie uai siñona jira, eniruena lligaiñote. ²Ado llote:

—Iena Jusiñamui duere finuamona, Babilonia nairai illano jai nana goide. Comini nainomo jai iñedimaci. Nainomo Taife jaienisai birui itimaci. Jananiai nainomo birui itimaci. ³Nia goiñenia, bie nairai jeacinona eo finuamona, nana nairai iena ebiruitimaci. Bie nairaina nabaillamona, nana illaicomini jearede rafuena jiai finocabidimaci. Jearede rafuemona nana rana fecaraini bie nairaimona ailluena ucubena ganacabidimaci —llote.

⁴Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i. ⁵Bie nairai jeacino eo finocana jaidimaci; iadedi iena Jusiñamui uiñuamona, naimacina jai duere finoacade. ⁶Jusiñamui, naimaci finua diese ibana ono. Naimacina ua eo duere fino. ⁷Jeacino finuamona iobidimaci. Iemona abi iedotimaci. Jeacino finuana eo ebiruitimaci. “Illaicominidicai. Nana cai jitailla ra caimo ite. Feciño isoi duere jaca sefuiñeiticai” comeciaina facadimaci; ⁸iadedi cai Nama Jusiñamui naimacina ebena eo duere finoite. Duicomona, sure

illamona, aime guillamona fiodaitimaci. Naimaci jofue booite. Jusiñamui siño jitona jira, naimacina raire fuidoite —llote.

⁹ Bouamona uillie naimaci cioia, sunaillamona, naie nairai diga nabairite illaicomini eo eeditimaci. ¹⁰ Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuamona ua raire fuite —lloitimaci.

¹¹ Naimaci rana naie nairai jai oñena jira, rana fecaraini eo sunaillamona eo eeditimaci.

¹² Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronze, lloeona, mare nofici, ¹³ guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci. ¹⁴ Sure illamona lloitimaci:

—Caimona omoi comeciai jitailla rana ja oñeitomoi. Omoi ebiruiga rana ja oñeitomoi.

¹⁵ Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eeditimaci. Sunaitimaci. ¹⁶ Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga eburitimaci. Eo raifide abina finolle rana eo eburitimaci. Oromona finoca ra, perlamona finoca rana eo eburitimaci; ¹⁷ iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo majiuidino diga, nainomo jaidino diga, botedo rana fecaraini diga, ¹⁸ aaremona uilliena ciuamona, naie nairai bouana fidiano, lloitimaci:

—Naie nairai nana jiai nairai baifemo navui faite. Jiaie nairai ie isoi ebinide.

¹⁹ Sure illamona, naimaci ifogimo imuicina faianona, eeditimaci. Lloitimaci:

—Bie nairai eo duere sefuide. Bie nairaimona boteredinodica navui ailluena ganadica. Bie nairai jai raire fuite.

²⁰ Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui majjidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

²¹ Naie facaise jiaie jaienicimo siño uai illanona, eo aillue nofici llinuanona, monailaimo iena faite. Llote:

—Bie nofici dane cai cioiñena isoi, Babilonia railla nairai dane iñeite. Jusiñamui iena eo riire fuidoite. ²² Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca finoñeite. Buna jaca doberiñeite. Llomenicono finollena, buna dane majiñeite. ²³ Nainomo naiona lampariniai dane booñeite. Rafue dane iñeite. Eo caimare iobitaja rafue dane iñeite. Iraisñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabidimaci. ²⁴ Naie nairai ailluena Jusiñamuina inotona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

19

¹ Ie facaise monamo eo ailluena comini ado lluaana cacadicue. Jusiñamuimo llotimaci: Ona cai iobitajasa. Caina jai jillotatio.

O uai ebirede. Odi siño jitodio.

² O anamo itinona raise uiñuamona, uanaicinona o uiñuamona, naimacina duere jai finodio.

Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina majjidinona jai meinetade;

iadedi iba jai otio.

³ Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

⁴ Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiena sedadimaci. Llotimaci:

—Omoi lluacino mare. Ie isoi jiai lloiacadicaí. Jusiñamuina cai iobitajasa.

⁵ Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiena ñnotino naimiena iobitajasa.

Jamai bue isoidino naimiena iobitajasa.

Jamai bue isoiñedino naimiena iobitajasa.

Juan Toica Llauda isoidimie aina ua rafuena cacade

⁶ Naie facaise monamo eo ailluena comini lluaana cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie siño jito. Nana cominina birui jai sedade.

⁷ Eo iobidicaí. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naiñaiño jai finobide.

⁸ Mare iniroi naiñaiño jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie ñnotino imaci mare finoca rafue isoide.

⁹ Jaienici cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”.
—Iemei llote:

—Jusiñamui iena llua jira, uanaicinona omo lloticue.

¹⁰ Jaienici uicomo eillimo ana bitadaticue, naimiena sedallena; ia cuemo llote:

—Dama ite. Cuenas sedaño; ia dama Jusiñamuina seda. Jesús ie ñibeimo itinona uanaicinona jai uiñotade. Ie jira naga o diga naimiena ñnotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

Juan userede caballo emodomo itimiena ciode

¹¹ Naie facaise mona ecorillana ciodicue. Nainomo userede caballona ciodicue. Naie emodomo itimiemo mena mameci ite. ñnogamienna mameciredede. Uanaicinona llocabitimienas jiai mameciredede. Naimacina raise uiñuamona, naimie ñibeimo ñnedinona duere finollena, naimaci diga jobairite. ¹² Naimie uisidi irai isoide. Illaimana jira, naimie ifogimo ailluena nuicirai ite. Naimiemo cuega mamecina buna uiñoñede. Dama naimie iena uiñote. ¹³ Naimie jitaca iniroi ie ñibeimo ñnedino diruemo mutaca. Jusiñamuina naimie uiñotaja jira, Jusiñamui Uairedimienas mameciredede. Naimiedi Jesucristo. ¹⁴ Naimie jinafona soldaduai isoi Jusiñamui facaina itino monamona billana jiai ciodicue. Eo mare userede jeanide iniroina jitadimaci. Userede caballuai emodomo itimaci. ¹⁵ Eniruemo ite nairaiaina emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jirona jira, naimie riicaillifue anamo itinona eo duere finoite. ¹⁶ Naimie iniroimo, naimie idaímo jai cuega: “Nanoca illaima. Nanoca Nama”.

¹⁷ Naie facaise jaienici jirona lligaiñuanomo ciodicue. Nana inoniaina uaidote:

—Llicisina mai riabi. Jusiñamuidi ailluena cominina ja meiniamona rille eo iite.

¹⁸ Naimacina emodofillamona, ailluena llicisi ja iite. Ailluena cominina ja meineite. Illaicomini itimaci. Soldaduai illaicomini itimaci. Caballuai itimaci. Caballuai emodomo jiacabidino itimaci. Diga comini ite. Jamai bue isoidino itimaci. Jamai bue isoiñedino

itimaci. Patrones anamo itino itimaci. Patrones anamo inhedino itimaci. Naimaci llicisi mai riabi —llote.

¹⁹ Naie facaise monaillaimona bite riirede ocainadi enirue illaicomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci. ²⁰ Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraimana jiai gaitadimaci. Naie lloraima ocaina uai diga cominina jifuecabite. Siño rafuena finuamona, ocaina cuetataga ra itinona, ie joreñaona sedadinona jifuecabite. Naie iaimaiana gaitaja mei, eo boode iraimo iaimaiana cajena dotadimaci. Azufre boa isoi irai boode. ²¹ Caballo emodomo itimiedi ie fuemo ite lloebi diga iaimaiai soldaduaina meinete. Jaienici llua isoi, inoniai naimaci llicisina ritimaci. Iemona eo monidimaci.

20

Juan mil años Taife maiana ciode

¹ Naie facaise monamona jaienici billana ciodicue. Eniruemo eo ana ite ifo llave naimiemo ite. Aillue lloeo ie onollimo ite. ² Aillue jaiona eruaidimiena gaitade. Naimiedi Taife. Riabi uaimona Satanás. Jiaici dragón. Mil años iese illena lloeo diga naimiena maite. ³ Ana ite ifomo naimiena dotade. Llave diga ifona ibaide. Cominina ramo fañellena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiena jino oretaite, cominina ramo faillena.

⁴ Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamai duere sefuillicinona lloitimaci. Ie facaise jai meineganona jiai ciodicue. Eo duere sefuilla facaise “Jesús cominidicai” naimaci llua jira, Jusiñamui uaina naimaci llua jira, naimaci ifogiaina jaitajanona, naimacina meineganodimaci. Monaillaimona bite ocainana sedañedimaci. Ie joreñaona sedañedimaci. Ie cuetataga ra naimaci uiecomo, naimaci onollimo inede. Navui fiodaitimaci; ia iemona bie facaise jai jillobitimaci. Imaci abiai diga Jusiñamui naimacina jillotaite. Cristo diga mil años eniruemo itinona sedaitimaci. ⁵ Naimacidi nano jillodino. Naie mil años nia fuiñenia, jiaie jai fiodaitino nia jilloñeitimaci; ia mil años fuilla mei, jilloitimaci. ⁶ ¡Nano jillodino caimare marena iitimaci! Dane fiodaiñenamona Jusiñamui illanomo jaca iitimaci. Faifñeitimaci. Cominina sedajanona, comini Jusiñamuina raise uñollena, comini Cristona raise uñollena, naimacina canoitimaci. Cristo diga mil años naimacina sedaitimaci.

⁷ Bie mil años fuilla mei, Jusiñamuidi ana ite ifomona Taife jino oretaite. ⁸ Nana eniruemo ite nairaiaina jifuaibite. Gog raila illaicominina, Magog raila nairaiabi diga, jifueite. Naimaci nairaiaina ofitaite. Eo ailluena naimaci illa jira, conilliena cai facadonina isoi, naimacina facadonidicue. Jusiñamuina inotino diga jobairillena, ofitimaci. ⁹ Danomo ofillanona, Jusiñamuina inotinona ciribitaitimaci. Jerusaléna, Jusiñamui isiruiga nairaina, ciribitaitimaci. Naie facaise monamona boode ra billanona, jobairiacadinona fuidoite. ¹⁰ Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocainana jai dotade. Naimie facaina tainona lloraima jai dotade. Nainomo ua jaca duere sefuitimaci

Juan aillue rairabicina ciode. Nainomona Jusiñamui duere finollicinona llua cacade

¹¹ Naie facaise aillue userede rairabicina ciodicue. Illaimana naimie illamona, nainomo Jusiñamuina jiai ciodicue. Naimie siño illamona, mona enirue diga jai inede. ¹² Naie facaise Jusiñamui uiecomo nana fiodaitino naidallana ciodicue. Jamai bue isoinhedino itimaci. Jamai bue isoidino itimaci. Naimacimo juez isoi Jusiñamui lollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cueda. Iemei Jusiñamui jiaie rabenicono jibuide. Naimie diga jaca ille comini mameciai nainomo jai cueda. Naimaci mameciai nainomo inenia, naimaci finoca rafue diese Jusiñamui naimacimo duere sefuillena llote. ¹³ Monaillaimo ite corobaitino abiai, joreñuai diga, jilloitimaci. Raigano abiai joreñuai diga jilloitimaci. Naimaci finoca rafue

diese Jusiñamui naimacimo duere finollena lloite. ¹⁴ Naimaci abiai naimaci joreñuai diga iraimo dotaite. Jaca faifitimaci. Naiemona jaca jilloñeitimaci. Jusiñamuimona eneno jaca itimaci. ¹⁵ Monamo ite rabenicomo cueñega comini mameciai diese itinona iraimo dotaite.

21

Juan comue monana, comue enirue diga ciode

¹ Birui ite mona, birui ite enirue diga jai iñede. Monailai jiai jai iñede. Iemei comue mona ciodicue. Comue eniruena jiai ciodicue. ² Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede.

³ Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci. ⁴ Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiodaiñeitimaci. Sunaiñeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunaiñeitimaci —llote.

⁵ Jusiñamui llote:

—Ero, nana ra comuena birui finoiticue. Cue llucacino uanaicinona jira, cue llucacina cue finua jira, bie rafuena cueno.

⁶ Iemei cuemo llote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeciái eo caimare itataitcue. Ibatañeno cue diga illena, naimacina jaca itataitcue. ⁷ Cuen a raise inotinona iese itataitcue. Jaca naimaci Jusiñamuiniticue. Naimaci jaca cue comininitimaci. ⁸ Jiaño jaca eo boode iraimo jaca itimaci. Azufre boa isoi irai booite. Naiemona jaca jilloñeitimaci. Cuemona eneno jaca itimaci. Diese nainomo itimaci: abido danomo jaidino, cuena raise inoñedino, jearede rafue finocabidino, cominina meinetino, aiñede riño diga icabitino, iniñede iima diga icabitino, aiñiniaí, jiraraina sedacabidino, tainona llocabitino —llote.

Juan comue Jerusaléna llote

⁹ Naie facaise naie siete jaienisaimona damie cue dine bite. Naie jaienisai imaci copamo cominina duere finollicinona navui ite isoide. Naimie cuemo llote:

—Cue diga mai bi. Hima ie aina jai ua isoi, Toica Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataitcue.

¹⁰ Nicañrilla isoi, Jusiñamui Joreño cue joreñona eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare. ¹¹ Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficina eruaila jira, enefebecodo ciode. ¹² Ie llaigafu eo a ite. Eo jedaciede. Doce nasiaí ite. Naga nasemo daje jaienicí ite. Israel micorí uruiaí mameciaí naie nasiaímo cuega. Doce uruiaí illa jira, naga naserie daje mamecí cuega. ¹³ Jitoma bicabillano dine eruaidé llaigafomo daje amani nase ite. Jitoma jaicabillano dine eruaidé llaigafomo daje amani nase ite. Naga beici dine eruaidé llaigafomo daje amani nase ite. ¹⁴ Naie llaigafu anamo doce nofici ite. Nainomo Toica Llauda isoidimie ie doce llofueoicaigano mameciaí cuega.

¹⁵ Cue diga ñaite jaienicimo oromona ra facara ite. Naie nairai facallena ite. Ie nase, ie llaigafu diga, facallena ite. ¹⁶ Naie nairaina naimie facajamona, nagafebei daje isoi illana uiñoticue. Dos mil doscientos kilómetros nagafebei are ite. Dos mil doscientos kilómetros nagafebei a ite. ¹⁷ Ie llaigafona jiai facade. Sesenta y cuatro metros a ite. Comini facaja isoi, jaienicí iena facade.

¹⁸ Ie llaigafu jaspe railla noficimona finoca. Bie nairai difai oromona finoca. Enefebecodo ciode. ¹⁹ Diga eo quenirede noficina eruaidé ra llaigafomo ite noficimo jai nitade.

Nano jaspe. Enefebecodo ciode. Iemei zafiro. Mocorede. Jiaie ágata. Mocorede. Jiaie esmeralda. Mocorede. ²⁰Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafo anamo ite noficiai doce diga ite. ²¹Ie doce nasiaidi perlas. Userede. Naga nase daje perlamona finoca. Bie nairai naisuaidi difai oro. Enefebecodo ciode.

²²Bie illanomo Jusiñamuina sedajanona cioñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaimaiai uicomo sedaiticai. ²³Jusiñamui siñona jira, nainomo comini jitomana jitañeitimaci. Fivuina jitañeitimaci. Jusiñamui, Llauda isoidimie diga, iena lligaiñoite. ²⁴Nana comini iaimaiaina nabaicana jaitimaci. Nana illaicomini iaimaiai dine billanona, iaimaiaimo iobillacino jaca fecaitimaci. ²⁵Bie nairai nasiai jaca ibaiñeite. Nainomo naionadi jaca iñeite. ²⁶Iaimaiaimo iobillacinona fecallena, nana comini nainomo biitimaci. ²⁷Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimiemo ite rabenicomo cuega mameciai itinodi nainomo biitimaci. Bie rabenicomo Jusiñamui illanomo jaca iitino mameciai jai cuega.

22

¹Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. ²Nanoca naiso motodo tote. Nagafebelle dine jaca itataite amenaiai ite. Naga fivui llisillamona, naga fivui llisilla ite. Ie ibiai illamona, comini caimare marena itimaci. ³Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. ⁴Naimiena marefodo cioitimaci. Naimiemo naimaci duillamona, naimaci uiecuai itofiaimo naimie mameci cueite. ⁵Nainomo naionadi iñeite. Lamparina jitañeitimaci. Jitomana jitañeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

Juan Jesucristo billirui iaiei illana cacade

⁶Jaienici cuemo llote:

—Bie llucinodi uanaicino. Naimie facaina llorainimo ie rafuena lllollena, ie uaina itatate. Naimiena inotinona ico suille rafuena ja uinotaiacade. ⁷“Raie biiticue” Cristo llote.

Bie rabenicomo ite ico suille rafuena inotinodi caimare iitimaci.

⁸Juandicue. Bie rafuena cacadicue. Iena ciodicue. Iena cue cacaja mei, iena cue ciua mei, iena cuemo acataga jaienici uicomo ana bitadaticue. Naimiena sedaacadicue; ⁹iadedi cuemo llote:

—Dama ite. Cuena sedaño. O diga, naimie facaina lloraini isoi, bie rabenicomo ite llogacinona inotino isoi, naimie dibeimo jiai maijadicue. Dama Jusiñamuina seda. ¹⁰Bie rafue suillirui iaiei illa jira, iena jino llono. Iena uinota. ¹¹Bie rafuena bu inoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie inoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

¹²Jesucristo cuemo llote:

—Ero, raie biiticue. Naimie finoca rafue diese nagamiemo ibana fecaiticue. ¹³Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. ¹⁴Naimaci iniroina naimaci jocoia, caimare iitimaci. Naimaci comecina ñaiticue. Ie jeacinona oni dotacame jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; ¹⁵ia naimacina jeacinona naimaci faionocaiñenia, Jusiñamui illanomo marañede rafuena finocabidino, aima dine jaicabidino, añede riño diga icabitino, inañede ima diga icabitino, cominina meinetino, jiraraina sedacabidino, tainona llocabitino duiñeitimaci. ¹⁶Creyentiaina bie rafuena uinotallena, cue jaienici

o dine jai oretaticue. David micori ie jitodicue. Monairaicudu bairia isoi, Jusiñamui jitaillacinona cue finollena, baireitice —llote.

¹⁷ Bie facaise Jusiñamui Joreñodi, Cristo jai oga ai railla comini diga, naimiena nia iñoñedinona uaidote:

—Bie rafuena mai cacarei. Iena mai iño. Iena bu iñoia, jiaimiemo iena lluai: Iena mai cacarei. Iena mai iño.

Jiroacadimiemo llotice:

—Mai jiruaibi. Bie jinua raifiñede. Biena o jiroacania, jaca iitio. Iese llotice; ia ie comequina ñaitice. Bie rafue iñuana ñaitice. ¹⁸ Bie ico suille rafue ite rabenicono bu facajia, naimiemo rafuena lloiacadicue. Bie rafue baifemo bu lloia, bie rafuena bu meidoia, bie rabenicomio ite duere finuacino isoi, Jusiñamui naimiena duere finoite.

¹⁹ Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai llotice.

²⁰ Cristo raite:

—Bie rafue jaca suite. Ua raire biitice.

Iena raire suillena jiai jitaidice. Cai Nama Jesús raire billena eo jitaidice. ²¹ Naimie duenailacinona nana Jesucristona iñotino uiñocana jaillana jitaidice. Macaibaite. Juandice.